

全 唐 诗

(第一部)

第一卷

卷 1_1 【帝京篇十首】

李世民

秦川雄帝宅，函谷壮皇居。绮殿千寻起，离宫百雉余。
连薨遥接汉，飞观迥凌虚。云日隐层阙，风烟出绮疏。
岩廊罢机务，崇文聊驻輶。玉匣启龙图，金绳披凤篆。
韦编断仍续，缥帙舒还卷。对此乃淹留，欹案观坟典。

移步出词林，停舆欣武宴。雕弓写明月，骏马疑流电。
惊雁落虚弦，啼猿悲急箭。阅赏诚多美，于兹乃忘倦。

鸣笳临乐馆，眺听欢芳节。急管韵朱弦，清歌凝白雪。
彩凤肃来仪，玄鹤纷成列。去兹郑卫声，雅音方可悦。

芳辰追逸趣，禁苑信多奇。桥形通汉上，峰势接云危。
烟霞交隐映，花鸟自参差。何如肆辙迹，万里赏瑶池。

飞盖去芳园，兰桡游翠渚。萍间日彩乱，荷处香风举。
桂楫满中川，弦歌振长屿。岂必汾河曲，方为欢宴所。

· 全唐诗 ·

落日双阙昏，回舆九重暮。长烟散初碧，皎月澄轻素。
褰幌玩琴书，开轩引云雾。斜汉耿层阁，清风摇玉树。

欢乐难再逢，芳辰良可惜。玉酒泛云罍，兰肴陈绮席。
千钟合尧禹，百兽谐金石。得志重寸阴，忘怀轻尺璧。

建章欢赏夕，二八尽妖妍。罗绮昭阳殿，芬芳玳瑁筵。
佩移星正动，扇掩月初圆。无劳上悬圃，即此对神仙。

以兹游观极，悠然独长想。披卷览前踪，抚躬寻既往。
望古茅茨约，瞻今兰殿广。人道恶高危，虚心戒盈荡。
奉天竭诚敬，临民思惠养。纳善察忠谏，明科慎刑赏。
六五诚难继，四三非易仰。广待淳化敷，方嗣云亭响。

卷 1_2 【饮马长城窟行】

李世民

塞外悲风切，交河冰已结。瀚海百重波，阴山千里雪。
迥戍危烽火，层峦引高节。悠悠卷旆旌，饮马出长城。
寒沙连骑迹，朔吹断边声。胡尘清玉塞，羌笛韵金钲。
绝漠干戈戢，车徒振原隰。都尉反龙堆，将军旋马邑。
扬麾氛雾静，纪石功名立。荒裔一戎衣，灵台凯歌入。

· 全唐诗 ·

卷 1_3【执契静三边】

李世民

执契静三边，持衡临万姓。玉彩辉关烛，金华流日镜。
无为宇宙清，有美璇玑正。皎佩星连景，飘衣云结庆。
戢武耀七德，升文辉九功。烟波澄旧碧，尘火息前红。
霜野韬莲剑，关城罢月弓。钱缀榆天合，新城柳塞空。
花销葱岭雪，靺尽流沙雾。秋驾转兢怀，春冰弥轸虑。
书绝龙庭羽，烽休凤穴戍。衣宵寝二难，食旰餐三惧。
翦暴兴先废，除凶存昔亡。圆盖归天壤，方舆入地荒。
孔海池京邑，双河沼帝乡。循躬思励己，抚俗愧时康。
元首伫盐梅，股肱惟辅弼。羽贤崆岭四，翼圣襄城七。
浇俗庶反淳，替文聊就质。已知隆至道，共欢区宇一。

卷 1_4【正日临朝】

李世民

条风开献节，灰律动初阳。百蛮奉遐赆，万国朝未央。
虽无舜禹迹，幸欣天地康。车轨同八表，书文混四方。
赫奕俨冠盖，纷纶盛服章。羽旄飞驰道，钟鼓震岩廊。
组练辉霞色，霜戟耀朝光。晨宵怀至理，终愧抚遐荒。

· 全唐诗 ·

卷 1_5【幸武功庆善宫】

李世民

寿丘惟旧迹，酆邑乃前基。粤予承累圣，悬弧亦在兹。
弱龄逢运改，提剑郁匡时。指麾八荒定，怀柔万国夷。
梯山咸入款，驾海亦来思。单于陪武帐，日逐卫文枇。
端宸朝四岳，无为任百司。霜节明秋景，轻冰结水湄。
芸黄遍原隰，禾颖积京畿。共乐还乡宴，欢比大风诗。

卷 1_6【重幸武功】

李世民

代马依朔吹，惊禽愁昔丛。况兹承眷德，怀旧感深衷。
积善忻余庆，畅武悦成功。垂衣天下治，端拱车书同。
白水巡前迹，丹陵幸旧宫。列筵欢故老，高宴聚新丰。
驻蹕抚田峻，回舆访牧童。瑞气萦丹阙，祥烟散碧空。
孤屿含霜白，遥山带日红。于焉欢击筑，聊以咏南风。

卷 1_7【经破薛举战地】

李世民

昔年怀壮气，提戈初仗节。心随朗日高，志与秋霜洁。
移锋惊电起，转战长河决。营碎落星沉，阵卷横云裂。

· 全唐诗 ·

一挥氛沴静，再举鲸鲵灵。于兹俯旧原，属目驻华轩。
沉沙无故迹，灭灶有残痕。浪霞穿水净，峰雾抱莲昏。
世途亟流易，人事殊今昔。长想眺前踪，抚躬聊自适。

卷 1_8【过旧宅二首】

李世民

新丰停翠辇，谯邑驻鸣笳。园荒一径断，苔古半阶斜。
前池消旧水，昔树发今花。一朝辞此地，四海遂为家。
金舆巡白水，玉辇驻新丰。纽落藤披架，花残菊破丛。
叶铺荒草蔓，流竭半池空。纫珮兰凋径，舒圭叶翦桐。
昔地一蕃内，今宅九围中。架海波澄镜，韬戈器反农。
八表文同轨，无劳歌大风。

卷 1_9【还陕述怀】

李世民

慨然抚长剑，济世岂邀名。星旗纷电举，日羽肃天行。
遍野屯万骑，临原驻五营。登山麾武节，背水纵神兵。
在昔戎戈动，今来宇宙平。

· 全唐诗 ·

卷 1_10【入潼关】

李世民

崤函称地险，襟带壮两京。霜峰直临道，冰河曲绕城。
古木参差影，寒猿断续声。冠盖往来合，风尘朝夕惊。
高谈先马度，伪晓预鸡鸣。弃繻怀远志，封泥负壮情。
别有真人气，安知名不名。

卷 1_11【于北平作】

李世民

翠野驻戎轩，卢龙转征旆。遥山丽如绮，长流萦似带。
海气百重楼，岩松千丈盖。兹焉可游赏，何必襄城外。

卷 1_12【辽城望月】

李世民

玄兔月初明，澄辉照辽碣。映云光暂隐，隔树花如缀。
魄满桂枝圆，轮亏镜彩缺。临城却影散，带晕重围结。
驻蹕俯九都，停观妖氛灭。

· 全唐诗 ·

卷 1_13【春日登陕州城楼，俯眺厚野回丹，碧缀烟霞，密翠斑红，芳菲花柳，即目川岫，聊以命篇】

李世民

碧原开雾隰，绮岭峻霞城。烟峰高下翠，日浪浅深明。
斑红妆蕊树，圆青压溜荆。迹岩劳傅想，窥野访莘情。
巨川何以济，舟楫伫时英。

卷 1_14【春日玄武门宴群臣】

李世民

韶光开令序，淑气动芳年。驻辇华林侧，高宴柏梁前。
紫庭文珮满，丹墀袞绂连。九夷箴瑶席，五狄列琼筵。
娱宾歌湛露，广乐奏钧天。清尊浮绿醕，雅曲韵朱弦。
粤余君万国，还惭抚八埏。庶几保贞固，虚己厉求贤。

卷 1_15【登三台言志】

李世民

未央初壮汉，阿房昔侈秦。在危犹骋丽，居奢遂投人。
岂如家四海，日宇罄朝伦。扇天裁户旧，砌地翦基新。

· 全唐诗 ·

引月擎宵桂，飘云逼曙鳞。露除光炫玉，霜阙映雕银。
舞接花梁燕，歌迎鸟路尘。镜池波太液，庄苑丽宜春。
作异甘泉日，停非路寝辰。念劳惭逸己，居旷返劳神。
所欣成大厦，宏材伫渭滨。

卷 1_16【出猎】

李世民

楚王云梦泽，汉帝长杨宫。岂若因农暇，阅武出轘嵩。
三驱陈锐卒，七萃列材雄。寒野霜氛白，平原烧火红。
雕戈夏服箭，羽骑绿沉弓。怖兽潜幽壑，惊禽散翠空。
长烟晦落景，灌木振岩风。所为除民瘼，非是悦林丛。

卷 1_17【冬狩】

李世民

烈烈寒风起，惨惨飞云浮。霜浓凝广隰，冰厚结清流。
金鞍移上苑，玉勒骋平畴。旌旗四望合，置罗一面求。
楚踏争兕羶，秦亡角鹿愁。兽忙投密树，鸿惊起砾洲。
骑敛原尘静，戈回岭日收。心非洛汭逸，意在渭滨游。
禽荒非所乐，抚辔更招忧。

· 全唐诗 ·

卷 1_18【春日望海】

李世民

披襟眺沧海，凭轼玩春芳。积流横地纪，疏派引天潢。
仙气凝三岭，和风扇八荒。拂潮云布色，穿浪日舒光。
照岸花分彩，迷云雁断行。怀卑运深广，持满守灵长。
有形非易测，无源讵可量。洪涛经变野，翠岛屡成桑。
之罘思汉帝，碣石想秦皇。霓裳非本意，端拱且图王。

卷 1_19【临洛水】

李世民

春蒐驰骏骨，总辔俯长河。霞处流萦锦，风前漾卷罗。
水花翻照树，堤兰倒插波。岂必汾阴曲，秋云发棹歌。

卷 1_20【望终南山】

李世民

重峦俯渭水，碧嶂插遥天。出红扶岭日，入翠贮岩烟。
叠松朝若夜，复岫阙疑全。对此恬千虑，无劳访九仙。

· 全唐诗 ·

卷 1_21【元日】

李世民

高轩暖春色，邃阁媚朝光。彤庭飞彩旆，翠幌曜明珰。
恭己临四极，垂衣馭八荒。霜戟列丹陛，丝竹韵长廊。
穆矣熏风茂，康哉帝道昌。继文遵后轨，循古鉴前王。
草秀故春色，梅艳昔年妆。巨川思欲济，终以寄舟航。

卷 1_22【初春登楼即目观作述怀】

李世民

凭轩俯兰阁，眺瞩散灵襟。绮峰含翠雾，照日蕊红林。
镂丹霞锦岫，残素雪斑岑。拂浪堤垂柳，娇花鸟续吟。
连甍岂一拱，众干如千寻。明非独材力，终藉栋梁深。
弥怀矜乐志，更惧戒盈心。愧制劳居逸，方规十产金。

卷 1_23【首春】

李世民

寒随穷律变，春逐鸟声开。初风飘带柳，晚雪间花梅。
碧林青旧竹，绿沼翠新苔。芝田初雁去，绮树巧莺来。

· 全唐诗 ·

卷 1_24【初晴落景】

李世民

晚霞聊自怡，初晴弥可喜。日晃百花色，风动千林翠。
池鱼跃不同，园鸟声还异。寄言博通者，知予物外志。

卷 1_25【初夏】

李世民

一朝春夏改，隔夜鸟花迁。阴阳深浅叶，晓夕重轻烟。
暝莺犹响殿，横丝正网天。珮高兰影接，绶细草纹连。
碧鳞惊棹侧，玄燕舞檐前。何必汾阳处，始复有山泉。

卷 1_26【度秋】

李世民

夏律昨留灰，秋箭今移晷。峨嵋岫初出，洞庭波渐起。
桂白发幽岩，菊黄开灞浹。运流方可叹，含毫属微理。

· 全唐诗 ·

卷 1_27 【仪鸾殿早秋】

李世民

寒惊蓟门叶，秋发小山枝。松阴背日转，竹影避风移。
提壶菊花岸，高兴芙蓉池。欲知凉气早，巢空燕不窥。

卷 1_28 【秋日即目】

李世民

爽气浮丹阙，秋光澹紫宫。衣碎荷疏影，花明菊点丛。
袍轻低草露，盖侧舞松风。散岫飘云叶，迷路飞烟鸿。
砌冷兰凋佩，闺寒树陨桐。别鹤栖琴里，离猿啼峡中。
落野飞星箭，弦虚半月弓。芳菲夕雾起，暮色满房栊。

卷 1_29 【山阁晚秋】

李世民

山亭秋色满，岩牖凉风度。疏兰尚染烟，残菊犹承露。
古石衣新苔，新巢封古树。历览情无极，咫尺轮光暮。

· 全唐诗 ·

卷 1_30【秋暮言志】

李世民

朝光浮烧野，霜华净碧空。结浪冰初镜，在径菊方丛。
约岭烟深翠，分旗霞散红。抽思滋泉侧，飞想傅岩中。
已获千箱庆，何以继熏风。

卷 1_31【喜雪】

李世民

碧昏朝合雾，丹卷暝韬霞。结叶繁云色，凝琼遍雪华。
光楼皎若粉，映幕集疑沙。泛柳飞飞絮，妆梅片片花。
照璧台圆月，飘珠箔穿露。瑶洁短长阶，玉丛高下树。
映桐珪累白，萦峰莲抱素。断续气将沉，徘徊岁云暮。
怀珍愧隐德，表瑞伫丰年。蕊间飞禁苑，鹤处舞伊川。
傥咏幽兰曲，同欢黄竹篇。

卷 1_32【秋日敦庾信体】

李世民

岭衔宵月桂，珠穿晓露丛。蝉啼觉树冷，萤火不温风。

· 全唐诗 ·

花生圆菊蕊，荷尽戏鱼通。晨浦鸣飞雁，夕渚集栖鸿。
飒飒高天吹，氛澄下炽空。

卷 1_33【赋尚书】

李世民

崇文时驻步，东观还停辇。辍膳玩三坟，晖灯披五典。
寒心睹肉林，飞魄看沉湎。纵情昏主多，克己明君鲜。
灭身资累恶，成名由积善。既承百王末，战兢随岁转。

卷 1_34【咏司马彪续汉志】

李世民

二仪初创象，三才乃分位。非惟树司牧，固亦垂文字。
绵代更膺期，芳图无辍记。炎汉承君道，英谟纂神器。
潜龙既可跃，逵兔奚难致。前史殚妙词，后昆沉雅思。
书言扬盛迹，补阙兴洪志。川谷犹旧途，郡国开新意。
梅山未觉朽，谷水谁云异。车服随名表，文物因时置。
凤戟翼康衢，銮舆总柔辔。清浊必能澄，洪纤幸无弃。
观仪不失序，遵礼方由事。政宣竹律和，时平玉条备。
文囿雕奇彩，艺门蕴深致。云飞星共流，风扬月兼至。
类裡遵令典，坛墠资良地。五胜竟无违，百司诚有庇。
粤予承暇景，谈丛引泉秘。讨论穷义府，看核披经笥。

· 全唐诗 ·

大辨良难仰，小学终先匮。闻道谅知荣，含毫孰忘愧。

卷 1_35【咏风】

李世民

萧条起关塞，摇颺下蓬瀛。拂林花乱彩，响谷鸟分声。
披云罗影散，泛水织文生。劳歌大风曲，威加四海清。

卷 1_36【咏雨】

李世民

罩云飘远岫，喷雨泛长河。低飞昏岭腹，斜足洒岩阿。
泫丛珠缔叶，起溜镜图波。濛柳添丝密，含吹织空罗。

卷 1_37【咏雪】

李世民

洁野凝晨曜，装墀带夕晖。集条分树玉，拂浪影泉玑。
色洒妆台粉，花飘绮席衣。入扇萦离匣，点素皎残机。

· 全唐诗 ·

卷 1_38【赋得夏首启节】

李世民

北阙三春晚，南荣九夏初。黄莺弄渐变，翠林花落余。
瀑流还响谷，猿啼自应虚。早荷向心卷，长杨就影舒。
此时欢不极，调轸坐相于。

卷 1_39【赋得白日半西山】

李世民

红轮不暂驻，乌飞岂复停。岑霞渐渐落，溪阴寸寸生。
藿叶随光转，葵心逐照倾。晚烟含树色，栖鸟杂流声。

卷 1_40【置酒坐飞阁】

李世民

高轩临碧渚，飞檐迥架空。余花攒镂槛，残柳散雕栊。
岸菊初含蕊，园梨始带红。莫虑昆山暗，还共尽杯中。

· 全唐诗 ·

卷 1_41 【采芙蓉】

李世民

结伴戏方塘，携手上雕航。船移分细浪，风散动浮香。
游莺无定曲，惊鳧有乱行。莲稀钏声断，水广棹歌长。
栖乌还密树，泛流归建章。

卷 1_42 【赋得樱桃】

李世民

华林满芳景，洛阳遍阳春。朱颜含远日，翠色影长津。
乔柯啖娇鸟，低枝映美人。昔作园中实，今来席上珍。

卷 1_43 【赋得李】

李世民

玉衡流桂圃，成蹊正可寻。莺啼密叶外，蝶戏脆花心。
丽景光朝彩，轻霞散夕阴。暂顾晖章侧，还眺灵山林。

· 全唐诗 ·

卷 1_44 【赋得浮桥】

李世民

岸曲非千里，桥斜异七星。暂低逢辇度，还高值浪惊。
水摇文鹢动，缆转锦花萦。远近随轮影，轻重应人行。

卷 1_45 【谒并州大兴国寺诗】

李世民

回銮游福地，极目玩芳晨。梵钟交二响，法日转双轮。
宝刹遥承露，天花近足春。未佩兰犹小，无丝柳尚新。
圆光低月殿，碎影乱风筠。对此留余想，超然离俗尘。

卷 1_46 【咏兴国寺佛殿前幡】

李世民

拂霞疑电落，腾虚状写虹。屈伸烟雾里，低举白云中。
纷披乍依迥，掣曳或随风。念兹轻薄质，无翅强摇空。

· 全唐诗 ·

卷 1_47【望送魏徵葬】

李世民

阊阖总金鞍，上林移玉辇。野郊怆新别，河桥非旧饯。
惨日映峰沉，愁云随盖转。哀笳时断续，悲旌乍舒卷。
望望情何极，浪浪泪空泫。无复昔时人，芳春共谁遣。

卷 1_48【伤辽东战亡】

李世民

凿门初奉律，仗战始临戎。振鳞方跃浪，骋翼正凌风。
未展六奇术，先亏一篲功。防身岂乏智，殉命有余忠。

卷 1_49【月晦】

李世民

晦魄移中律，凝暄起丽城。罩云朝盖上，穿露晓珠呈。
笑树花分色，啼枝鸟合声。披襟欢眺望，极目畅春情。

· 全唐诗 ·

卷 1_50【秋日翠微宫】

李世民

秋日凝翠岭，凉吹肃离宫。荷疏一盖缺，树冷半帷空。
侧阵移鸿影，圆花钉菊丛。摅怀俗尘外，高眺白云中。

卷 1_51【初秋夜坐】

李世民

斜廊连绮阁，初月照宵帟。塞冷鸿飞疾，园秋蝉噪迟。
露结林疏叶，寒轻菊吐滋。愁心逢此节，长叹独含悲。

卷 1_52【秋日二首】

李世民

菊散金风起，荷疏玉露圆。将秋数行雁，离夏几林蝉。
云凝愁半岭，霞碎颭高天。还似成都望，直见峨眉前。
爽气澄兰沼，秋风动桂林。露凝千片玉，菊散一丛金。
日岫高低影，云空点缀阴。蓬瀛不可望，泉石且娱心。

· 全唐诗 ·

卷 1_53【冬宵各为四韵】

李世民

雕宫静龙漏，绮阁宴公侯。珠帘烛焰动，绣柱水光浮。
云起将歌发，风停与管遒。琐除任多士，端扆竟何忧。

卷 1_54【冬日临昆明池】

李世民

石鲸分玉溜，劫烬隐平沙。柳影冰无叶，梅心冻有花。
寒野凝朝雾，霜天散夕霞。欢情犹未极，落景遽西斜。

卷 1_55【望雪】

李世民

冻云宵遍岭，素雪晓凝华。入牖千重碎，迎风一半斜。
不妆空散粉，无树独飘花。萦空惭夕照，破彩谢晨霞。

· 全唐诗 ·

卷 1_56【守岁】

李世民

暮景斜芳殿，年华丽绮宫。寒辞去冬雪，暖带入春风。
阶馥舒梅素，盘花卷烛红。共欢新故岁，迎送一宵中。

卷 1_57【除夜】

李世民

岁阴穷暮纪，献节启新芳。冬尽今宵促，年开明日长。
冰消出镜水，梅散入风香。对此欢终宴，倾壶待曙光。

卷 1_58【咏雨】

李世民

和气吹绿野，梅雨洒芳田。新流添旧润，宿雾足朝烟。
雁湿行无次，花沾色更鲜。对此欣登岁，披襟弄五弦。

· 全唐诗 ·

卷 1_59【赋得含峰云】

李世民

翠楼含晓雾，莲峰带晚云。玉叶依岩聚，金枝触石分。
横天结阵影，逐吹起罗文。非得阳台下，空将惑楚君。

卷 1_60【三层阁上置音声】

李世民

绮筵移暮景，紫阁引宵烟。隔栋歌尘合，分阶舞影连。
声流三处管，响乱一重弦。不似秦楼上，吹箫空学仙。

卷 1_61【远山澄碧雾】

李世民

残云收翠岭，夕雾结长空。带岫凝全碧，障霞隐半红。
仿佛分初月，飘飘度晓风。还因三里处，冠盖远相通。

· 全唐诗 ·

卷 1_62【赋得花庭雾】

李世民

兰气已熏宫，新蕊半妆丛。色含轻重雾，香引去来风。
拂树浓舒碧，萦花薄蔽红。还当杂行雨，仿佛隐遥空。

卷 1_63【春池柳】

李世民

年柳变池台，隋堤曲直回。逐浪丝阴去，迎风带影来。
疏黄一鸟弄，半翠几眉开。萦雪临春岸，参差间早梅。

卷 1_64【芳兰】

李世民

春晖开紫苑，淑景媚兰场。映庭含浅色，凝露泫浮光。
日丽参差影，风传轻重香。会须君子折，佩里作芬芳。

· 全唐诗 ·

卷 1_65【咏桃】

李世民

禁苑春晖丽，花蹊绮树妆。缀条深浅色，点露参差光。
向日分千笑，迎风共一香。如何仙岭侧，独秀隐遥芳。

卷 1_66【赋帘】

李世民

参差垂玉阙，舒卷映兰宫。珠光摇素月，竹影乱清风。
彩散银钩上，文斜桂户中。惟当杂罗绮，相与媚房栊。

卷 1_67【咏乌代陈师道】

李世民

凌晨丽城去，薄暮上林栖。辞枝枝暂起，停树树还低。
向日终难托，迎风讵肯迷。只待纤纤手，曲里作宵啼。

· 全唐诗 ·

卷 1_68【咏饮马】

李世民

骏骨饮长泾，奔流洒络缨。细纹连喷聚，乱荇绕蹄萦。
水光鞍上侧，马影溜中横。翻似天池里，腾波龙种生。

卷 1_69【赋得残菊】

李世民

阶兰凝曙霜，岸菊照晨光。露浓晞晚笑，风劲浅残香。
细叶凋轻翠，圆花飞碎黄。还持今岁色，复结后年芳。

卷 1_70【赋秋日悬清光赐房玄龄】

李世民

秋露凝高掌，朝光上翠微。参差丽双阙，照耀满重闱。
仙驭随轮转，灵乌带影飞。临波光定彩，入隙有圆晖。
还当葵霍志，倾叶自相依。

· 全唐诗 ·

卷 1_71【琵琶】

李世民

半月无双影，全花有四时。摧藏千里态，掩抑几重悲。
促节萦红袖，清音满翠帷。驶弹风响急，缓曲钏声迟。
空余关陇恨，因此代相思。

卷 1_72【宴中山】

李世民

驱马出辽阳，万里转旂常。对敌六奇举，临戎八阵张。
斩鲸澄碧海，卷雾扫扶桑。昔去兰萦翠，今来桂染芳。
云芝浮碎叶，冰镜上朝光。回首长安道，方欢宴柏梁。

卷 1_73【饯中书侍郎来济】

李世民

暧暧去尘昏灞岸，飞飞轻盖指河梁。云峰衣结千重叶，
雪岫花开几树妆。深悲黄鹤孤舟远，独叹青山别路长。
聊将分袂沾巾泪，还用持添离席觞。

· 全唐诗 ·

卷 1_74【天太原召侍臣赐宴守岁】

李世民

四时运灰琯，一夕变冬春。送寒余雪尽，迎岁早梅新。

卷 1_75【咏烛二首】

李世民

焰听风来动，花开不待春。镇下千行泪，非是为思人。
九龙蟠焰动，四照逐花生。即此流高殿，堪持待月明。

卷 1_76【咏弓】

李世民

上弦明月半，激箭流星远。落雁带书惊，啼猿映枝转。

卷 1_77【赋得早雁出云鸣】

李世民

初秋玉露清，早雁出空鸣。隔云时乱影，因风乍含声。

· 全唐诗 ·

卷 1_78【赋得临池柳】

李世民

岸曲丝阴聚，波移带影疏。还将眉里翠，来就镜中舒。

卷 1_79【赋得临池竹】

李世民

贞条障曲砌，翠叶贯寒霜。拂牖分龙影，临池待凤翔。

卷 1_80【赋得弱柳鸣秋蝉】

李世民

散影玉阶柳，含翠隐鸣蝉。微形藏叶里，乱响出风前。

卷 1_81【探得李】

李世民

盘根直盈渚，交干横倚天。舒华光四海，卷叶荫三川。

· 全唐诗 ·

卷 1_82【咏小山】

李世民

近谷交萦蕊，遥峰对出莲。径细无全磴，松小未含烟。

卷 1_83【赋萧瑀】

李世民

疾风知劲草，板荡识诚臣。勇夫安识义，智者必怀仁。

卷 1_84【赋房玄龄】

李世民

太液仙舟迴，西园隐上才。未晓征车度，鸡鸣关早开。

卷 1_85【辽东山夜临秋】

李世民

烟生遥岩隐，月落半崖阴。连山惊鸟乱，隔岫断猿吟。

· 全唐诗 ·

卷 1-86【赐魏徵诗】

李世民

醺醺胜兰生，翠涛过玉瓚。千日醉不醒，十年味不败。

卷 1-87【两仪殿赋柏梁体】

李世民

绝域降附天下平，八表无事悦圣情。云披雾敛天地明。
登封日观禅云亭，太常具礼方告成。

卷 1-88【句】

李世民

雪耻酬百王，除凶报千古。
昔乘匹马去，今驱万乘来。
近日毛虽暖，闻弦心已惊。

· 全唐诗 ·

第二卷

卷 2_1【太子纳妃太平公主出降】

李治

龙楼光曙景，鲁馆启朝扉。艳日浓妆影，低星降婺辉。
玉庭浮瑞色，银榜藻祥徽。云转花萦盖，霞飘叶缀旂。
雕轩回翠陌，宝驾归丹殿。鸣珠佩晓衣，镂璧轮开扇。
华冠列绮筵，兰醑申芳宴。环阶凤乐陈，玳席珍羞荐。
蝶舞袖香新，歌分落素尘。欢凝欢懿戚，庆叶庆初姻。
暑阑炎气息，凉早吹疏频。方期六合泰，共赏万年春。

卷 2_2【七夕宴悬圃二首】

李治

羽盖飞天汉，凤驾越层峦。俱叹三秋阻，共叙一宵欢。
璜亏夜月落，靄碎晓星残。谁能重操杼，纤手濯清澜。

霓裳转云路，凤驾俨天潢。亏星凋夜靄，残月落朝璜。
促欢今夕促，长离别后长。轻梭聊驻织，掩泪独悲伤。

· 全唐诗 ·

卷 2_3【过温汤】

李治

温渚停仙跸，丰郊驻晓旌。路曲回轮影，岩虚传漏声。
暖溜惊湍驶，寒空碧雾轻。林黄疏叶下，野白曙霜明。
眺听良无已，烟霞断续生。

卷 2_4【九月九日】

李治

端居临玉宸，初律启金商。凤阙澄秋色，龙闱引夕凉。
野净山气敛，林疏风露长。砌兰亏半影，岩桂发全香。
满盖荷凋翠，圆花菊散黄。挥鞭争电烈，飞羽乱星光。
柳空穿石碎，弦虚侧月张。怯猿啼落岫，惊雁断分行。
斜轮低夕景，归旆拥通庄。

卷 2_5【谒慈恩寺题奘法师房】

李治

停轩观福殿，游目眺皇畿。法轮含日转，花盖接云飞。
翠烟香绮阁，丹霞光宝衣。幡虹遥合彩，定水迥分晖。

· 全唐诗 ·

萧然登十地，自得会三归。

卷 2_6【谒大慈恩寺】

李治

日宫开万仞，月殿耸千寻。花盖飞团影，幡虹曳曲阴。
绮霞遥笼帐，丛珠细网林。寥廓烟云表，超然物外心。

卷 2_7【守岁】

李治

今宵冬律尽，来朝丽景新。花余凝地雪，条含暖吹分。
绶吐芽犹嫩，冰已镂津。薄红梅色冷，浅绿柳轻春。
送迎交两节，暄寒变一辰。

卷 2_8【咸亨殿宴近臣诸亲柏梁体】

李治

屏欲除奢政返淳。（霍王以下和句亡）

· 全唐诗 ·

卷 2_9【九月九日幸临渭亭登高得秋字】

李显

九日正乘秋，三杯兴已周。泛桂迎尊满，吹花向酒浮。
长房萸早熟，彭泽菊初收。何藉龙沙上，方得恣淹留。

卷 2_10【登骊山高顶寓目】

李显

四郊秦汉国，八水帝王都。闾阖雄里閤，城阙壮规模。
贯渭称天邑，含岐实奥区。金门披玉馆，因此识皇图。

卷 2_11【幸秦始皇陵】

李显

眷言君失德，骊邑想秦馀。政烦方改篆，愚俗乃焚书。
阿房久已灭，阁道遂成墟。欲厌东南气，翻伤掩鲍车。

· 全唐诗 ·

卷 2_12【立春日游苑迎春】

李显

神皋福地三秦邑，玉台金阙九仙家。寒光犹恋甘泉树，
淑景偏临建始花。彩蝶黄莺未歌舞，梅香柳色已矜夸。
迎春正启流霞席，暂嘱曦轮勿遽斜。

卷 2_13【十月诞辰内殿宴群臣效柏梁体联句】

李显

润色鸿业寄贤才，--李显
叨居右弼愧盐梅。--李峤
运筹帷幄荷时来，--宗楚客
职掌图籍滥蓬莱。--刘宪
两司谬忝谢钟裴，--崔湜
礼乐铨管效涓埃。--郑愔
陈师振旅清九垓，--赵彦昭
欣承顾问侍天杯。--李适
衔恩献寿柏梁台，--苏颋
黄缣青简奉康哉。--卢藏用
鰕生侍忝王枚，--李义
右掖司言实不才。--马怀素
宗伯秩礼天地开，--薛稷

· 全唐诗 ·

帝歌难续仰昭回。--宋之问
微臣捧日寒灰，--陆景初
远惭班左愧游陪。古--上官婕妤

卷 2_14【景龙四年正月五日，移仗蓬莱宫，御大明殿，会吐蕃
骑马之戏，因重为柏梁体联句】

李显

大明御宇临万方，--李显
顾惭内政翊陶唐。--皇后
鸾鸣凤舞向平阳，--长宁公主
秦楼鲁馆沐恩光。--安乐公主
无心为子辄求郎，--太平公主
雄才七步谢陈王。--温王重茂
当态让羣愧前芳，--上官昭容
再司铨筦恩可忘。--崔湜
文江学海思济航，--郑愔
万邦考绩臣所详。--武平一
著作不休出中肠，--阎朝隐
权豪屏迹肃严霜。--窦从一
铸鼎开岳造明堂，--宗晋卿
玉醴由来献寿觞。知--明悉猎

· 全唐诗 ·

卷 2_15【石淙（太子时作）】

李显

三阳本是标灵纪，二室由来独擅名。霞衣霞锦千般状，
云峰云岫百重生。水炫珠光遇泉客，岩悬石镜厌山精。
永愿乾坤符睿算，长居膝下属欢情。

卷 2_16【石淙（相王时作）】

李旦

奇峰嶮嶮箕山北，秀崿岩峩嵩镇南。地首地肺何曾拟，
天目天台倍觉惭。树影蒙茏鄣叠岫，波深汹涌落悬潭。
愿紫宸居得一，永欣丹扆御通三。

· 全唐诗 ·

第三卷

卷 3_1 【过晋阳宫】

李隆基

缅想封唐处，实惟建国初。俯察伊晋野，仰观乃参虚。
井邑龙斯跃，城池凤翔余。林塘犹沛泽，台榭宛旧居。
运革祚中否，时迁命兹符。顾循承丕构，怵惕多忧虞。
尚恐威不逮，复虑化未孚。岂徒劳辙迹，所期训戎车。
习俗问黎人，亲巡慰里闾。永言念成功，颂德临康衢。
长怀经纶日，叹息履庭隅。艰难安可忘，欲去良踟蹰。

卷 3_2 【行次成皋，途经先圣擒建德之所，缅思功业，感而赋诗】

李隆基

有隋政昏虐，群雄已交争。先圣按剑起，叱咤风云生。
饮马河洛竭，作气嵩华惊。克敌睿图就，擒俘帝道亨。
顾惭嗣宝历，恭承天下平。幸过翦鲸地，感慕神且英。

· 全唐诗 ·

卷 3_3【校猎义成，喜逢大雪，率题九韵，以示群官】

李隆基

弧矢威天下，旌旗游近县。一面施鸟罗，三驱教人战。
暮云成积雪，晓色开行殿。皓然原隰同，不觉林野变。
北风勇士马，东日华组练。触地银獐出，连山缟鹿见。
月兔落高矰，星狼下急箭。既欣盈尺兆，复忆磻溪便。
岁丰将遇贤，俱荷皇天眷。

卷 3_4【赐诸州刺史以题座右】

李隆基

眷言思共理，鉴梦想维良。猗欤此推择，声绩著周行。
贤能既俟进，黎献实伫康。视人当如子，爱人亦如伤。
讲学试通论，阡陌劝耕桑。虚誉不可饰，清知不可忘。
求名迹易见，安贞德自彰。讼狱必以情，教民贵有常。
恤惻且存老，抚弱复绥强。勉哉各祗命，知予眷万方。

卷 3_5【送忠州太守康昭远等】

李隆基

端拱临中枢，缅怀共予理。不有台阁英，孰振循良美。

· 全唐诗 ·

分符侯甸内，拜手明庭里。誓节期饮冰，调人方导水。
嘉声驰九牧，惠化光千祀。时雨俾昔贤，芳猷贯前史。
伫尔颂中和，吾将令卿士。

卷 3_6【送李邕之任滑台】

李隆基

汉家重东郡，宛彼白马津。黎庶既蕃殖，临之劳近臣。
远别初首路，今行方及春。课成应第一，良牧尔当仁。

卷 3_7【端午三殿宴群臣探得神字】

李隆基

五月符天数，五音调夏钧。旧来传五日，无事不称神。
穴枕通灵气，长丝续命人。四时花竞巧，九子粽争新。
方殿临华节，圆宫宴雅臣。进对一言重，遒文六义陈。
股肱良足咏，凤化可还淳。

卷 3_8【温汤对雪】

李隆基

北风吹同云，同云飞白雪。白雪乍回散，同云何惨烈。

· 全唐诗 ·

未见温泉冰，宁知火井灭。表瑞良在兹，庶几可怡悦。

卷 3_9【登蒲州逍遥楼】

李隆基

长榆息烽火，高柳静风尘。卜征巡九洛，展豫出三秦。
昔是潜龙地，今为上理辰。时平乘道泰，聊赏遇年春。
黄河分地络，飞观接天津。一览遗芳翰，千载肃如神。

卷 3_10【经河上公庙】

李隆基

昔闻有耆叟，河上独遗荣。迹与尘嚣隔，心将道德并。
讷以天地累，宁为宠辱惊。矫然翔寥廓，如何屈坚贞。
玄玄妙门启，肃肃祠宇清。冥漠无先后，那能纪姓名。

卷 3_11【过王濬墓】

李隆基

吴国分牛斗，晋室命龙骧。受任敌已灭，策勋名不彰。
居美未尽善，矜功徒自伤。长戟今何在，孤坟此路傍。

· 全唐诗 ·

不观松柏茂，空余荆棘场。叹嗟悬剑陇，谁识梦刀祥。

卷 3_12【初入秦川路逢寒食】

李隆基

洛阳芳树映天津，灞岸垂杨窳地新。直为经过行处乐，
不知虚度两京春。去年余闰今春早，曙色和风著花草。
可怜寒食与清明，光辉并在长安道。自从关路入秦川，
争道何人不戏鞭。公子途中妨蹴鞠，佳人马上废秋千。
渭水长桥今欲渡，葱葱渐见新丰树。远看骊岫入云霄，
预想汤池起烟雾。烟雾氛氲水殿开，暂拂香轮归去来。
今岁清明行已晚，明年寒食更相陪。

卷 3_13【春台望】

李隆基

暇景属三春，高台聊四望。目极千里际，山川一何壮。
太华见重岩，终南分叠嶂。郊原纷绮错，参差多异状。
佳气满通沟，迟步入绮楼。初莺一一鸣红树，
归雁双双去绿洲。太液池中下黄鹤，昆明水上映牵牛。
闻道汉家全盛日，别馆离宫趣非一。甘泉逶迤亘明光，
五柞连延接未央。周庐徼道纵横转，飞阁回轩左右长。
须念作劳居者逸，勿言我后焉能恤。为想雄豪壮柏梁，

· 全唐诗 ·

何如俭陋卑茅室。阳乌黯黯向山沉，夕鸟喧喧入上林。
薄暮赏余回步辇，还念中人罢百金。

卷 3_14【过大哥宅探得歌字韵】

李隆基

鲁卫情先重，亲贤爱转多。冕旒丰暇日，乘景暂经过。
戚里申高宴，平台奏雅歌。复寻为善乐，方验保山河。

卷 3_15【同玉真公主过大哥山池】

李隆基

地有招贤处，人传乐善名。鰲池临九达，龙岫对层城。
桂月先秋冷，蘋风向晚清。凤楼遥可见，仿佛玉箫声。

卷 3_16【经邹鲁祭孔子而叹之】

李隆基

夫子何为者，栖栖一代中。地犹鄆氏邑，宅即鲁王宫。
叹凤嗟身否，伤麟怨道穷。今看两楹奠，当与梦时同。

· 全唐诗 ·

卷 3_17【惟此温泉是称愈疾，岂予独受其福，思与兆人共之。
乘暇巡游，乃言其志】

李隆基

桂殿与山连，兰汤涌自然。阴崖含秀色，温谷吐潺湲。
绩为蠲邪著，功因养正宣。愿言将亿兆，同此共昌延。

卷 3_18【旋师喜捷】

李隆基

边服胡尘起，长安汉将飞。龙蛇开阵法，貔虎振军威。
诈虏脑涂地，征夫血染衣。今朝书奏入，明日凯歌归。

卷 3_19【过老子庙】

李隆基

仙居怀圣德，灵庙肃神心。草合人踪断，尘浓鸟迹深。
流沙丹灶没，关路紫烟沉。独伤千载后，空馀松柏林。

· 全唐诗 ·

卷 3_20【途次陕州】

李隆基

境出三秦外，途分二陕中。山川入虞虢，风俗限西东。
树古棠阴在，耕余让畔空。鸣笳从此去，行见洛阳宫。

卷 3_21【野次喜雪】

李隆基

拂曙辟行宫，寒皋野望通。每云低远岫，飞雪舞长空。
赋象恒依物，萦回屡逐风。为知勤恤意，先此示年丰。

卷 3_22【送贺知章归四明】

李隆基

遗荣期入道，辞老竟抽簪。岂不惜贤达，其如高尚心。
寰中得秘要，方外散幽襟。独有青门饯，群僚怅别深。

· 全唐诗 ·

卷 3_23【轩游宫十五夜】

李隆基

行迈离秦国，巡方赴洛师。路逢三五夜，春色暗中期。
关外长河转，宫中淑气迟。歌钟对明月，不减旧游时。

卷 3_24【观拔河俗戏】

李隆基

壮徒恒贾勇，拔拒抵长河。欲练英雄志，须明胜负多。
噪齐山岌嶭，气作水腾波。预期年岁稔，先此乐时和。

卷 3_25【同刘晃喜雨】

李隆基

节变寒初尽，时和气已春。繁云先合寸，膏雨自依旬。
飒飒飞平野，霏霏静暗尘。悬知花叶意，朝夕望中新。

· 全唐诗 ·

卷 3_26【千秋节赐群臣镜】

李隆基

铸得千秋镜，光生百炼金。分将赐群后，遇象见清心。
台上冰华澈，窗中月影临。更衔长绶带，留意感人深。

卷 3_27【赐道士邓紫阳】

李隆基

太乙三门诀，元君六甲符。下传金版术，上刻玉清书。
有美探真士，囊中得秘书。自知三醮后，翊我灭残胡。

卷 3_28【幸蜀西至剑门】

李隆基

剑阁横云峻，銮舆出狩回。翠屏千仞合，丹嶂五丁开。
灌木萦旗转，仙云拂马来。乘时方在德，嗟尔勒铭才。

· 全唐诗 ·

卷 3_29【答司马承祯上剑镜】

李隆基

宝照含天地，神剑合阴阳。日月丽光景，星斗裁文章。
写鉴表容质，佩服为身防。从兹一赏玩，永德保龄长。

卷 3_30【送赵法师还蜀因名山奠简】

李隆基

道家奠灵简，自昔仰神仙。真子今将命，苍生福可传。
江山寻故国，城郭信依然。二室遥相望，云回洞里天。

卷 3_31【送道士薛季昌还山】

李隆基

洞府修真客，衡阳念旧居。将成金阙要，愿奉玉清书。
云路三天近，松溪万籁虚。犹期传秘诀，来往候仙舆。

· 全唐诗 ·

卷 3_32【送玄同真人李抱朴谒灊山仙祠】

李隆基

城阙天中近，蓬瀛海上遥。归期千载鹤，春至一来朝。
采药逢三秀，餐霞卧九霄。参同如有旨，金鼎待君烧。

卷 3_33【春日出苑游瞩（太子时作）】

李隆基

三阳丽景早芳辰，四序佳园物候新。梅花百树障去路，
垂柳千条暗回津。鸟飞直为惊风叶，鱼没都由怯岸人。
惟愿圣主南山寿，何愁不赏万年春。

卷 3_34【春晚宴两相及礼官丽正殿学士探得风字】

李隆基

乾道运无穷，恒将人代工。阴阳调历象，礼乐报玄穹。
介冑清荒外，衣冠佐域中。言谈延国辅，词赋引文雄。
野霁伊川绿，郊明巩树红。冕旒多暇景，诗酒会春风。

· 全唐诗 ·

卷 3_35【首夏花萼楼观群臣宴，宁王山亭回楼下又申之以赏乐赋诗】

李隆基

今年通闰月，入夏展春辉。楼下风光晚，城隅宴赏归。
九歌扬政要，六舞散朝衣。天喜时相合，人和事不违。
礼中推意厚，乐处感心微。别赏阳台乐，前旬暮雨飞。

卷 3_36【同二相已下群官乐游园宴】

李隆基

撰日岩廊暇，需云宴乐初。万方朝玉帛，千品会簪裾。
地入南山近，城分北斗余。池塘垂柳密，原隰野花疏。
帘幕看逾暗，歌钟听自虚。兴阑归骑转，还奏弼违书。

卷 3_37【集贤书院成，送张说上集贤学士，赐宴得珍字】

李隆基

广学开书院，崇儒引席珍。集贤招袞职，论道命台臣。
礼乐沿今古，文章革旧新。献酬尊俎列，宾主位班陈。
节变云初夏，时移气尚春。所希光史册，千载仰兹晨。

· 全唐诗 ·

卷 3_38【王屋山送道士司马承祯还天台】

李隆基

紫府求贤士，清溪祖逸人。江湖与城阙，异迹且殊伦。
间有幽栖者，居然厌俗尘。林泉先得性，芝桂欲调神。
地道逾稽岭，天台接海滨。音徽从此间，万古一芳春。

卷 3_39【早度蒲津关】

李隆基

钟鼓严更曙，山河野望通。鸣銮下蒲坂，飞旆入秦中。
地险关逾壮，天平镇尚雄。春来津树合，月落戍楼空。
马色分朝景，鸡声逐晓风。所希常道泰，非复候繻同。

卷 3_40【途经华岳】

李隆基

饬驾去京邑，鸣鸾指洛川。循途经太华，回辔暂周旋。
翠幄留斜影，悬岩冒夕烟。四方皆石壁，五位配金天。
仿佛看高掌，依稀听子先。终当铭岁月，从此记灵仙。

· 全唐诗 ·

卷 3_41 【喜雪】

李隆基

日观卜先征，时巡顺物情。风行未备礼，云密遽飘霙。
委树寒花发，萦空落絮轻。朝如玉已会，庭似月犹明。
既睹肤先合，还欣尺有盈。登封何以报，因此谢功成。

卷 3_42 【幸凤泉汤】

李隆基

西狩观周俗，南山历汉宫。荐鲜知路近，省敛觉年丰。
阴谷含神爨，汤泉养圣功。益龄仙井合，愈疾醴源通。
不重鸣岐凤，谁矜陈宝雄。愿将无限泽，沾沐众心同。

卷 3_43 【南出雀鼠谷答张说】

李隆基

雷出应乾象，风行顺国人。川途犹在晋，车马渐归秦。
背陕关山险，横汾鼓吹频。草依阳谷变，花待北岩春。
闻有鸛鸾客，清词雅调新。求音思欲报，心迹竟难陈。

· 全唐诗 ·

卷 3_44【赐崔日知往潞州】

李隆基

潞国开新府，壶关宠旧林。妙旌循吏德，持悦庶氓心。
礼乐中朝贵，神明列郡钦。扬风非赠扇，易俗是张琴。
藩镇讴谣满，行宫雨露深。会书丞相策，先赐颍川金。

卷 3_45【为赵法师别造精院过院赋诗】

李隆基

宗师心物外，为道运虚舟。不恋岩泉赏，来从宫禁游。
探玄知几岁，习静更宜秋。烟树辨朝色，风湍闻夜流。
坐朝繁听览，寻胜在清幽。欲广无为化，因兹庶可求。

卷 3_46【端午】

李隆基

端午临中夏，时清日复长。盐梅已佐鼎，曲蘖且传觞。
事古人留迹，年深缕积长。当轩知槿茂，向水觉芦香。
亿兆同归寿，群公共保昌。忠贞如不替，贻厥后昆芳。

· 全唐诗 ·

卷 3_47【春中兴庆宫酺宴】

李隆基

九达长安道，三阳别馆春。还将听朝暇，回作豫游晨。
不战要荒服，无刑礼乐新。合酺覃土宇，欢宴接群臣。
玉斝飞千日，琼筵荐八珍。舞衣云曳影，歌扇月开轮。
伐鼓鱼龙杂，撞钟角牴陈。曲终酣兴晚，须有醉归人。

卷 3_48【千秋节宴】

李隆基

兰殿千秋节，称名万寿觞。风传率土庆，日表继天祥。
玉宇开花萼，宫县动会昌。衣冠白鹭下，帟幕翠云长。
献遗成新俗，朝仪入旧章。月衔花绶镜，露缀彩丝囊。
处处祠田祖，年年宴杖乡。深思一德事，小获万人康。

卷 3_49【左丞相说右丞相璟太子少傅乾曜同日上官命宴东堂赐诗】

李隆基

赤帝收三杰，黄轩举二臣。由来丞相重，分掌国之钧。

· 全唐诗 ·

我有握中璧，双飞席上珍。子房推道要，仲子讶风神。
复辍台衡老，将为调护人。鹓鸾同拜日，车骑拥行尘。
乐聚南宫宴，觞连北斗醇。俾予成百揆，垂拱问彝伦。

卷 3_50【早登太行山中言志】

李隆基

清跸度河阳，凝笳上太行。火龙明鸟道，铁骑绕羊肠。
白雾埋阴壑，丹霞助晓光。涧泉含宿冻，山木带余霜。
野老茅为屋，樵人薜作裳。宣风问耆艾，敦俗劝耕桑。
凉德惭先哲，徽猷慕昔皇。不因今展义，何以冒垂堂。

卷 3_51【平胡】

李隆基

杂虏忽猖狂，无何敢乱常。羽书朝继入，烽火夜相望。
将出凶门勇，兵因死地强。蒙轮皆突骑，按剑尽鹰扬。
鼓角雄山野，龙蛇入战场。流膏润沙漠，溅血染锋铓。
雾扫清玄塞，云开静朔方。武功今已立，文德愧前王。

· 全唐诗 ·

卷 3_52【游兴庆宫作】

李隆基

代邸青门右，离宫紫陌陲。庭如过沛日，水若渡江时。
绮观连鸡岫，朱楼接雁池。从来敦棣萼，今此茂荆枝。
万叶传余庆，千年志不移。凭轩聊属目，轻辇共追随。
务本方崇训，相辉保羽仪。时康俗易渐，德薄政难施。
鼓吹迎飞盖，弦歌送羽卮。所希覃率土，孝弟一同规。

卷 3_53【送张说巡边】

李隆基

端拱复垂裳，长怀御远方。股肱申教义，戈剑靖要荒。
命将绥边服，雄图出庙堂。三台入武帐，八座起文昌。
宝胄匡韩主，华宗辅汉王。茂先惭博物，平子谢文章。
尽节恢时佐，输诚御寇场。三军临朔野，驷马即戎行。
鼓吹威夷狄，旌轩溢洛阳。云台先著美，今日更贻芳。

卷 3_54【饯王竣巡边】

李隆基

振武威荒服，扬文肃远墟。金坛申将礼，玉节授军符。

· 全唐诗 ·

免胄三方外，衔刀万里余。昔时吴会静，今日虏庭虚。
分阃仍推毂，援桴且训车。风扬旌旆远，雨洗甲兵初。
坐见台阶谧，行闻袄祲除。檄来虽插羽，箭去亦飞书。
舟楫功须著，盐梅望匪疏。不应陈七德，欲使化先敷。

卷 3_55【巡省途次上党旧宫赋】

李隆基

三千初击浪，九万欲抟空。天地犹惊否，阴阳始遇蒙。
存贞期历试，佐贰伫昭融。多谢时康理，良惭实赖功。
长怀问鼎气，夙负拔山雄。不学刘琨舞，先歌汉祖风。
英髦既包括，豪杰自牢笼。人事一朝异，讴歌四海同。
如何昔朱邸，今此作离宫。雁沼澄澜翠，猿岩落照红。
小山秋桂馥，长坂旧兰丛。即是淹留处，乘欢乐未穷。

卷 3_56【潼关口号】

李隆基

河曲回千里，关门限二京。所嗟非恃德，设险到天平。

· 全唐诗 ·

卷 3_57【千秋节赐群臣镜】

李隆基

瑞露垂花绶，寒冰澈宝轮。对兹台上月，聊以庆佳辰。

卷 3_58【续薛令之题壁】

李隆基

啄木觜距长，凤凰羽毛短。苦嫌松桂寒，任逐桑榆暖。

卷 3_59【送胡真师还西山】

李隆基

仙客厌人间，孤云比性闲。话离情未已，烟水万重山。

卷 3_60【过大哥山池题石壁】

李隆基

澄潭皎镜石崔巍，万壑千岩暗绿苔。

· 全唐诗 ·

林亭自有幽贞趣，况复秋深爽气来。

卷 3_61 【题梅妃画真】

李隆基

忆昔娇妃在紫宸，铅华不御得天真。
霜绡虽似当时态，争奈娇波不顾人。

卷 3_62 【鹡鸰颂】

李隆基

伊我轩宫，奇树青葱，蔼周庐兮。冒霜停雪，以茂以悦，
恣卷舒兮。连枝同荣，吐绿含英，曜春初兮。
蓂收御节，寒露微结，气清虚兮。桂宫兰殿，唯所息宴，
栖雍渠兮。行摇飞鸣，急难有情，情有余兮。
顾惟德凉，夙夜兢惶，惭化疏兮。上之所教，下之所效，
实在予兮。天伦之性，鲁卫分政，亲贤居兮。
爰游爰处，爰笑爰语，巡庭除兮。观此翔禽，以悦我心，
良史书兮。

· 全唐诗 ·

卷 3_63【傀儡吟】

李隆基

刻木牵丝作老翁，鸡皮鹤发与真同。
须臾弄罢寂无事，还似人生一梦中。

卷 3_64【句】

李隆基

昔见漳滨卧，言将人事违。今逢庆诞日，犹谓学仙归。
棠棣花重发，鵷原鸟再飞。
德比代云布，心如晋水清。

· 全唐诗 ·

第四卷

卷 4_1【延英殿玉灵芝诗三章，章八句】

李亨

玉殿肃肃，灵芝煌煌。重英发秀，连叶分房。
宗庙之福，垂其耿光。（此章缺二句）

元气产芝，明神合德。紫微间采，白藓呈色。
载启瑞图，庶符皇极。天心有眷，王道惟直。
幸生芳本，当我宸旒。效此灵质，賁其王猷。
神惟不爱，道亦无求。端拱思惟，永荷天休。

卷 4_2【赐梨李泌与诸王联句】

李亨

先生年几许，颜色似童儿。--颖王
夜抱九仙骨，朝披一品衣。--信王
不食千钟粟，唯餐两颗梨。--益王
天生此间气，助我化无为。--李亨

· 全唐诗 ·

卷 4_3【中和节日宴百僚赐诗】

李适

韶年启仲序，初吉谐良辰。肇兹中和节，式庆天地春。
欢酣朝野同，生德区宇均。云开洒膏露，草疏芳河津。
岁华今载阳，东作方肆勤。惭非熏风唱，曷用慰吾人。

卷 4_4【中和节赐百官燕集因示所怀】

李适

至化恒在宥，保和兹息人。推诚抚诸夏，与物长为春。
仲月风景暖，禁城花柳新。芳时协金奏，赐宴同群臣。
丝竹岂云乐，忠贤惟所亲。庶洽朝野意，旷然天地均。

卷 4_5【重阳日赐宴曲江亭，赋六韵诗用清字】

李适

早衣对庭燎，躬化勤意诚。时此万机暇，适与佳节并。
曲池洁寒流，芳菊舒金英。乾坤爽气满，台殿秋光清。
朝野庆年丰，高会多欢声。永怀无荒戒，良士同斯情。

· 全唐诗 ·

卷 4_6【九月十八赐百僚追赏因书所怀】

李适

雨霁霜气肃，天高云日明。繁林已坠叶，寒菊仍舒荣。
懿此秋节时，更延追赏情。池台列广宴，丝竹传新声。
至乐非外奖，浹欢同中诚。庶敦朝野意，永使风化清。

卷 4_7【送徐州张建封还镇】

李适

牧守寄所重，才贤生为时。宣风自淮甸，授钺膺藩维。
入觐展遐恋，临轩慰来思。忠诚在方寸，感激陈情词。
报国尔所向，恤人予是资。欢宴不尽怀，车马当还期。
谷雨将应候，行春犹未迟。勿以千里遥，而云无己知。

卷 4_8【麟德殿宴百僚】

李适

忧勤承圣绪，开泰喜时康。恭己临群后，垂衣御八荒。
务闲春向暮，朝罢日犹长。紫殿初筵列，彤庭广乐张。
成功归辅弼，致理赖忠良。共此欢娱事，千秋乐未央。

· 全唐诗 ·

卷 4_9【元日退朝观军仗归营】

李适

献岁视元朔，万方咸在庭。端旒揖群后，回辇阅师贞。
彩仗宿华殿，退朝归禁营。分行左右出，转旆风云生。
历历趋复道，容容映层城。勇余矜捷技，令肃无喧声。
眷此戎旅节，载嘉良士诚。顺时倾宴赏，亦以助文经。

卷 4_10【中和节赐群臣宴赋七韵】

李适

东风变梅柳，万汇生春光。中和纪月令，方与天地长。
耽乐岂予尚，懿兹时景良。庶遂亭育恩，同致寰海康。
君臣永终始，交泰符阴阳。曲沼水新碧，华林桃稍芳。
胜赏信多欢，戒之在无荒。

卷 4_11【三日书怀因示百僚】

李适

佳节上元巳，芳时属暮春。流觞想兰亭，捧剑得金人。
风轻水初绿，日晴花更新。天文信昭回，皇道颇敷陈。

· 全唐诗 ·

恭己每从俭，清心常保真。戒兹游衍乐，书以示群臣。

卷 4_12【重阳日中外同欢，以诗言志，因示群官】

李适

炎节在重九，物华新雨余。清秋黄叶下，菊散金潭初。
万实行就稔，百工欣所如。欢心畅遐迩，殊俗同车书。
至化自敦睦，佳辰宜宴胥。锵锵间丝生，济济罗簪裾。
此乐匪足耽，此诚期永孚。

卷 4_13【重阳日即事】

李适

令节晓澄霁，四郊烟霭空。天清白露洁，菊散黄金丛。
寡德荷天贶，顺时休百工。岂怀歌钟乐，思为君臣同。
至化在亭育，相成资始终。未知康衢咏，所仰惟年丰。

卷 4_14【丰年多庆，九日示怀】

李适

爽气肃时令，早衣闻朔鸿。重阳有佳节，具物欣年丰。

· 全唐诗 ·

皎洁暮潭色，芬敷新菊丛。芳尊满衢室，繁吹凝烟空。
惠合信吾道，保和惟尔同。推诚至玄化，天下期为公。

卷 4_15【七月十五日题章敬寺】

李适

招提迓皇邑，复道连重城。法筵会早秋，驾言访禅扃。
尝闻大仙教，清净宗无生。七物匪吾宝，万行先求成。
名相既双寂，繁华奚所荣。金风扇微凉，远烟凝翠晶。
松院静苔色，竹房深磬声。境幽真虑恬，道胜外物轻。
意适本非说，含毫空复情。

卷 4_16【中春麟德殿会百僚观新乐诗，一章，章十六句】

李适

芳岁肇佳节，物华当仲春。乾坤既昭泰，烟景含氤氲。
德浅荷玄贶，乐成思治人。前庭列钟鼓，广殿延群臣。
八卦随舞意，五音转曲新。顾非咸池奏，庶协南风熏。
式宴礼所重，浹欢情必均。同和谅在兹，万国希可亲。

· 全唐诗 ·

卷 4_17【九日绝句】

李适

禁苑秋来爽气多，昆明风动起沧波。
中流箫鼓诚堪赏，讵假横汾发棹歌。

卷 4_18【暮春喜雨诗】

李昂

风云喜际会，雷雨遂流滋。荐币虚陈礼，动天实精思。
渐侵九夏节，复在三春时。霖霖垂朱阙，飘飘入绿墀。
郊垌既沾足，黍稷有丰期。百辟同康乐，万方伫雍熙。

卷 4_19【题程修己竹障】

李昂

良工运精思，巧极似有神。
临窗忽睹繁阴合，再盼真假殊未分。

· 全唐诗 ·

卷 4_20 【宫中题】

李昂

辇路生春草，上林花发时。凭高何限意，无复侍臣知。

卷 4_21 【上巳日赐裴度】

李昂

注想待元老，识君恨不早。我家柱石衰，忧来学丘祷。

卷 4_22 【上元日二首】

李昂

上元高会集群仙，心齐何事欲祈年。
丹诚傥彻玉帝座，且共吾人庆大田。

莫生三五叶初齐，上元羽客出桃蹊。
不爱仙家登真诀，愿蒙四海福黔黎。

· 全唐诗 ·

卷 4_23【夏日联句】

李昂

人皆苦炎热，我爱夏日长。--李昂
熏风自南来，殿阁生微凉。主--柳公权

卷 4_24【百丈山】

李忱

大雄真迹枕危峦，梵宇层楼耸万般。日月每从肩上过，
山河长在掌中看。仙峰不间三春秀，灵境何时六月寒。
更有上方人罕到，暮钟朝磬碧云端。

卷 4_25【吊白居易】

李忱

缀玉联珠六十年，谁教冥路作诗仙。浮云不系名居易，
造化无为字乐天。童子解吟长恨曲，胡儿能唱琵琶篇。
文章已满行人耳，一度思卿一怆然。

· 全唐诗 ·

卷 4_26【幸华严寺】

李忱

云散晴山几万重，烟收春色更冲融。帐殿出空登碧汉，
遐川俯望色蓝笼。林光入户低韶景，岭气通宵展霁风。
今日追游何所似，莫惭汉武赏汾中。

卷 4_27【重阳锡宴群臣】

李忱

款塞旋征骑，和戎委庙贤。倾心方倚注，叶力共安边。

卷 4_28【题泾县水西寺】

李忱

大殿连云接爽溪，钟声还与鼓声齐。
长安若问江南事，说道风光在水西。

· 全唐诗 ·

卷 4_29【瀑布联句】

李忱

千岩万壑不辞劳，远看方知出处高。--黄檗
溪涧岂能留得住，终归大海作波涛。--李忱

卷 4_30【句】

李忱

海岳宴咸通。
七载秉钧调四序，一方狱市获来苏。

卷 4_31【咏雷句】

李晔

只解劈牛兼劈树，不能诛恶与诛凶。

· 全唐诗 ·

第五卷

卷 5_1【春游曲】

长孙氏

上苑桃花朝日明，兰闺艳妾动春情。井上新桃偷面色，
檐边嫩柳学身轻。花中来去看舞蝶，树上长短听啼莺。
林下何须远借问，出众风流旧有名。

卷 5_2【曳鼎歌】

武则天

羲农首出，轩昊膺期。唐虞继踵，汤禹乘时。
天下光宅，海内雍熙。上玄降鉴，方建隆基。

卷 5_3【唐享昊天乐·第一】

武则天

太阴凝至化，真耀蕴轩仪。德迈娥台敞，仁高似幄披。

· 全唐诗 ·

扪天遂启极，梦日乃升曦。

卷 5_4【唐享昊天乐·第二】

武则天

瞻紫极，望玄穹。翘至恳，罄深衷。
听虽远，诚必通。垂厚泽，降云宫。

卷 5_5【唐享昊天乐·第三】

武则天

乾仪混成冲邃，天道下济高明，闾阳晨披紫阙，
太一晓降黄庭。圜坛敢申昭报，方璧冀殿虔情。
丹襟式敷衷恳，玄鉴庶察微诚。

卷 5_6【唐享昊天乐·第四】

武则天

巍巍睿业广，赫赫圣基隆。菲德承先顾，祜符萃眇躬。
铭开武岩侧，图荐洛川中。微诚讵幽感，景命忽昭融。
有怀惭紫极，无以谢玄穹。

· 全唐诗 ·

卷 5_7【唐享昊天乐·第五】

武则天

朝坛雾卷，曙岭烟沉。爰设筐币，式表诚心。
筵辉丽璧，乐畅和音。仰惟灵鉴，俯察翘襟。

卷 5_8【唐享昊天乐·第六】

武则天

昭昭上帝，穆穆下临。礼崇备物，乐奏锵金。
兰羞委荐，桂醑盈斟。敢希明德，幸罄庄心。

卷 5_9【唐享昊天乐·第七】

武则天

尊浮九酝，礼备三周。陈诚菲奠，契福神猷。

· 全唐诗 ·

卷 5_10【唐享昊天乐·第八】

武则天

奠璧郊坛昭大礼，锵金拊石表虔诚。
始奏承云娱帝赏，复歌调露畅韶英。

卷 5_11【唐享昊天乐·第九】

武则天

荷恩承顾托，执契恭临抚。庙略静边荒，天兵曜神武。
有截资先化，无为遵旧矩。祯符降昊穹，大业光寰宇。

卷 5_12【唐享昊天乐·第十】

武则天

肃肃祀典，邕邕礼秩。三献已周，九成斯毕。
爰撤其俎，载迁其实。或升或降，惟诚惟质。

· 全唐诗 ·

卷 5_13【唐享昊天乐·第十一】

武则天

礼终肆类，乐阕九成。仰惟明德，敢荐非馨。
顾惭菲奠，久驰云輶。瞻荷灵泽，悚恋兼盈。

卷 5_14【唐享昊天乐·第十二】

武则天

式乾路，辟天扉。回日驭，动云衣。
登金阙，入紫微。望仙驾，仰恩徽。

卷 5_15【唐明堂乐章·外办将出】

武则天

总章陈昔典，衢室礼惟神。宏规则天地，神用叶陶钧。
负宸三春旦，充庭万宇宾。顾己诚虚薄，空惭驭兆人。

· 全唐诗 ·

卷 5_16【唐明堂乐章·皇帝行】

武则天

仰膺历数，俯顺讴歌。远安迩肃，俗阜时和。
化光玉镜，讼息金科。方兴典礼，永戢干戈。

卷 5_17【唐明堂乐章·皇嗣出入升降】

武则天

至人光俗，大孝通神。谦以表性，恭惟立身。
洪规载启，茂典方陈。誉隆三善，祥开万春。

卷 5_18【唐明堂乐章·迎送王公】

武则天

千官肃事，万国朝宗。载延百辟，爰集三宫。
君臣德合，鱼水斯同。睿图方水，周历长隆。

· 全唐诗 ·

卷 5_19【唐明堂乐章·登歌】

武则天

礼崇宗祀，志表严禋。笙镛合奏，文物惟新。
敬遵茂典，敢择良辰。絜诚斯著，奠谒方申。

卷 5_20【唐明堂乐章·配飨】

武则天

笙镛间玉宇，文物昭清辉。睟影临芳奠，休光下太微。
孝思期有感，明絜庶无违。

卷 5_21【唐明堂乐章·宫音】

武则天

履艮包群望，居中冠百灵。万方资广运，庶品荷财成。
神功谅匪测，盛德实难名。藻奠申诚敬，恭祀表惟馨。

· 全唐诗 ·

卷 5_22【唐明堂乐章·角音】

武则天

出震位，开平秩。扇条风，乘甲乙。
龙德盛，鸟星出。荐珪筐，陈诚实。

卷 5_23【唐明堂乐章·徵音】

武则天

赫赫离精御炎陆，滔滔炽景开隆暑。
冀延神鉴俯兰尊，式表虔襟陈桂俎。

卷 5_24【唐明堂乐章·商音】

武则天

律中夷则，序应收成。功宣建武，义表惟明。
爰申礼奠，庶展翘诚。九秋是式，百谷斯盈。

· 全唐诗 ·

卷 5_25【唐明堂乐章·羽音】

武则天

葭律肇启隆冬，蘋藻攸陈飨祭。
黄钟既陈玉烛，红粒方殷稔岁。

卷 5_26【唐大飨拜洛乐章·昭和】

武则天

九玄眷命，三圣基隆。奉成先旨，明台毕功。
宗祀展敬，冀表深衷。永昌帝业，式播淳风。

卷 5_27【唐大飨拜洛乐章·致和】

武则天

神功不测兮运阴阳，包藏万宇兮孕八荒。
天符既出兮帝业昌，愿临明祀兮降祯祥。

· 全唐诗 ·

卷 5_28【唐大飨拜洛乐章·咸和】

武则天

坎泽祠容备举，坤坛祭典爰申。灵眷遥行秘躅，
嘉贶荐委殊珍。肃礼恭禋载展，翘襟邈志逾殷。
方期交际悬应，（下一句逸）

卷 5_29【唐大飨拜洛乐章·九和】

武则天

祇荷坤德，钦若乾灵。惭惕罔置，兴居匪宁。
恭崇礼则，肃奉仪形。惟凭展敬，敢荐非馨。

卷 5_30【唐大飨拜洛乐章·拜洛】

武则天

菲躬承睿顾，薄德忝坤仪。乾乾遵后命，翼翼奉先规。
抚俗勤虽切，还淳化尚亏。未能弘至道，何以契明祇。

· 全唐诗 ·

卷 5_31【唐大飨拜洛乐章·显和】

武则天

顾德有惭虚菲，明祇屡降祯符。汜水初呈秘象，
温洛荐表昌图。玄泽流恩载洽，丹襟荷渥增愉。

卷 5_32【唐大飨拜洛乐章·昭和】

武则天

舒云致养，合大资生。德以恒固，功由永贞。
升歌荐序，垂币翘诚。虹开玉照，凤引金声。

卷 5_33【唐大飨拜洛乐章·敬和】

武则天

兰俎既升，蘋羞可荐。金石载设，咸英已变。
林泽斯总，山川是遍。敢用敷诚，实惟忘倦。

· 全唐诗 ·

卷 5_34【唐大飨拜洛乐章·齐和】

武则天

沉潜演赋分三极，广大凝禋总万方。
既荐羽旌文化启，还呈干戚武威扬。

卷 5_35【唐大飨拜洛乐章·德和】

武则天

夕惕同龙契，晨兢当凤宸。崇儒习旧规，偃伯循先旨。
绝壤飞冠盖，遐区丽山水。幸承三圣馀，忻属千年始。

卷 5_36【唐大飨拜洛乐章·禋和】

武则天

百礼崇容，千官肃事。灵降舞兆，神凝有粹。
奠享咸周，威仪毕备。奏夏登列，歌雍撤肆。

· 全唐诗 ·

卷 5_37【唐大飨拜洛乐章·通和】

武则天

皇皇灵眷，穆穆神心。暂动凝质，还归积阴。
功玄枢纽，理寂高深。衔恩佩德，耸志翘襟。

卷 5_38【唐大飨拜洛乐章·归和】

武则天

言旋云洞兮蹑烟涂，永宁中宇兮安下都。
包涵动植兮顺荣枯，长贻宝贶兮赞璇图。

卷 5_39【唐大飨拜洛乐章·归和】

武则天

调云阁兮神座兴，骖云驾兮俨将升。
腾绛霄兮垂景祐，翘丹恳兮荷休征。

· 全唐诗 ·

卷 5_40【唐武氏享先庙乐章】

武则天

先德谦摛冠昔，严规节素超今。奉国忠诚每竭，
承家至孝纯深。追崇惧乖尊意，显号恐玷徽音。
既迫王公屡请，方乃俯遂群心。有限无由展敬，
奠醑每阙亲斟。大礼虔申典册，蘋藻敬荐翘襟。

卷 5_41【早春夜宴】

武则天

九春开上节，千门敞夜扉。兰灯吐新焰，桂魄朗圆辉。
送酒惟须满，流杯不用稀。务使霞浆兴，方乘泛洛归。

卷 5_42【游九龙潭】

武则天

山窗游玉女，涧户对琼峰。岩顶翔双凤，潭心倒九龙。
酒中浮竹叶，杯上写芙蓉。故验家山赏，惟有风入松。

· 全唐诗 ·

卷 5_43【赠胡天师】

武则天

高人叶高志，山服往山家。迢迢间风月，去去隔烟霞。
碧岫窥玄洞，玉灶炼丹砂。今日星津上，延首望灵槎。

卷 5_44【从驾幸少林寺】

武则天

陪銮游禁苑，侍赏出兰闱。云偃攒峰盖，霞低插浪旂。
日宫疏涧户，月殿启岩扉。金轮转金地，香阁曳香衣。
铎吟轻吹发，幡摇薄雾霏。昔遇焚芝火，山红连野飞。
花台无半影，莲塔有全辉。实赖能仁力，攸资善世威。
慈缘兴福绪，于此罄归依。风枝不可静，泣血竟何追。

卷 5_45【石淙】

武则天

三山十洞光玄篆，压峤金峦镇紫微。均露均霜标胜壤，
交风交雨列皇畿。万仞高岩藏日色，千寻幽涧浴云衣。
且驻欢筵赏仁智，雕鞍薄晚杂尘飞。

· 全唐诗 ·

卷 5_46【腊日宣诏幸上苑】

武则天

明朝游上苑，火急报春知。花须连夜发，莫待晓风吹。

卷 5_47【如意娘】

武则天

看朱成碧思纷纷，憔悴支离为忆君。
不信比来长下泪，开箱验取石榴裙。

卷 5_48【制袍字赐狄仁杰】

武则天

敷政术，守清勤。升显位，励相臣。

卷 5_49【拟小山篇】

徐贤妃

仰幽岩而流盼，抚桂枝以凝想。

· 全唐诗 ·

将千龄兮此遇，荃何为兮独往。

卷 5_50【长门怨】

徐贤妃

旧爱柏梁台，新宠昭阳殿。守分辞芳辇，含情泣团扇。
一朝歌舞荣，夙昔诗书贱。颓恩诚已矣，覆水难重荐。

卷 5_51【秋风函谷应诏】

徐贤妃

秋风起函谷，劲气动河山。偃松千岭上，杂雨二陵间。
低云愁广隰，落日惨重关。此时飘紫气，应验真人还。

卷 5_52【赋得北方有佳人】

徐贤妃

由来称独立，本自号倾城。柳叶眉间发，桃花脸上生。
腕摇金钏响，步转玉环鸣。纤腰宜宝袜，红衫艳织成。
悬知一顾重，别觉舞腰轻。

· 全唐诗 ·

卷 5_53【进太宗】

徐贤妃

朝来临镜台，妆罢暂裴回。千金始一笑，一召讵能来。

卷 5_54【奉和圣制立春日侍宴内殿出翦彩花应制】

上官昭容

密叶因裁吐，新花逐翦舒。攀条虽不谬，摘蕊讵知虚。
春至由来发，秋还未肯疏。借问桃将李，相乱欲何如。

卷 5_55【九月九日上幸慈恩寺，登浮图，群臣上菊花寿酒】

上官昭容

帝里重阳节，香园万乘来。却邪萸入佩，献寿菊传杯。
塔类承天涌，门疑待佛开。睿词悬日月，长得仰昭回。

卷 5_56【彩书怨】

上官昭容

叶下洞庭初，思君万里馀。露浓香被冷，月落锦屏虚。

· 全唐诗 ·

欲奏江南曲，贪封蓟北书。书中无别意，惟怅久离居。

卷 5_57 【驾幸三会寺应制】

上官昭容

释子谈经处，轩臣刻字留。故台遗老识，残简圣皇求。
驻蹕怀千古，开襟望九州。四山缘塞合，二水夹城流。
宸翰陪瞻仰，天杯接献酬。太平词藻盛，长愿纪鸿休。

卷 5_58 【驾幸新丰温泉宫，献诗三首】

上官昭容

三冬季月景龙年，万乘观风出灞川。
遥看电跃龙为马，回瞩霜原玉作田。

鸾旂掣曳拂空回，羽骑骖驔蹑景来。
隐隐骊山云外耸，迢迢御帐日边开。

翠幕珠帟敞月营，金罍玉斝泛兰英。
岁岁年年常扈蹕，长长久久乐升平。

卷 5_59【游长宁公主流杯池二十五首】

上官昭容

逐仙赏，展幽情，逾昆阆，迈蓬瀛。
游鲁馆，陟秦台。污山壁，愧琼瑰。
檀栾竹影，飘飏松声。不烦歌吹，自足娱情。
仰循茅宇，俯眄乔枝。烟霞问讯，风月相知。
枝条郁郁，文质彬彬。山林作伴，松桂为邻。
清波汹涌，碧树冥蒙。莫怪留步，因攀桂丛。
莫论圆峤，休说方壶。何如鲁馆，即是仙都。
玉环腾远创，金埒荷殊荣。弗玩珠玑饰，仍留仁智情。
凿山便作室，凭树即为楹。公输与班尔，从此遂韬声。
登山一长望，正遇九春初。结驷填街术，闾阎满邑居。
斗雪梅先吐，惊风柳未舒。直愁斜日落，不畏酒尊虚。
霁晓气清和，披襟赏薜萝。玳瑁凝春色，琉璃漾水波。
跂石聊长啸，攀松乍短歌。除非物外者，谁就此经过。
暂尔游山第，淹留惜未归。霞窗明月满，涧户白云飞。
书引藤为架，人将薜作衣。此真攀玩所，临睨赏光辉。
放旷出烟云，萧条自不群。漱流清意府，隐几避嚣氛。
石画妆苔色，风梭织水文。山室何为贵，唯馀兰桂熏。
策杖临霞岫，危步下霜蹊。志逐深山静，途随曲涧迷。
渐觉心神逸，俄看云雾低。莫怪人题树，只为赏幽栖。
攀藤招逸客，偃桂协幽情。水中看树影，风里听松声。
携琴侍叔夜，负局访安期。不应题石壁，为记赏山时。
泉石多仙趣，岩壑写奇形。欲知堪悦耳，唯听水泠泠。

· 全唐诗 ·

岩壑恣登临，莹目复怡心。风篁类长笛，流水当鸣琴。
懒步天台路，惟登地肺山。幽岩仙桂满，今日恣情攀。
暂游仁智所，萧然松桂情。寄言栖遁客，勿复访蓬瀛。
瀑溜晴疑雨，丛篁昼似昏。山中真可玩，暂请报王孙。
傍池聊试笔，倚石旋题诗。豫弹山水调，终拟从钟期。
横铺豹皮褥，侧带鹿胎巾。借问何为者，山中有逸人。
沁水田园先自多，齐城楼观更无过。
倩语张骞莫辛苦，人今从此识天河。
参差碧岫耸莲花，潺湲绿水莹金沙。
何须远访三山路，人今已到九仙家。
凭高瞰险足怡心，菌阁桃源不暇寻。
余雪依林成玉树，残霏点岫即瑶岑。

卷 5_60【句】

上官昭容

势如连璧友，心似臭兰人。

卷 5_61【赠张云容舞】

杨玉环

罗袖动香香不已，红蕖袅袅秋烟里。
轻云岭上乍摇风，嫩柳池边初拂水。

· 全唐诗 ·

卷 5_62【谢赐珍珠】

江妃

桂叶双眉久不描，残妆和泪污红绡。
长门尽日无梳洗，何必珍珠慰寂寥。

· 全唐诗 ·

第六卷

卷 6_1【黄台瓜辞】

李贤

种瓜黄台下，瓜熟子离离。一摘使瓜好，再摘使瓜稀。
三摘犹自可，摘绝抱蔓归。

卷 6_2【奉和同太子监守违恋】

李元嘉

乾象开层构，离明启少阳。卜征从献吉，守器属元良。
逖矣凌周诵，遥哉掩汉庄。好士倾南洛，多才盛北场。
地分丹鹫岭，途间白云乡。储诚虔晓夕，宸爱积炎凉。
珠壁连霄汉，万物仰重光。

· 全唐诗 ·

卷 6_3【奉和圣制过温汤】

李贞

凤辇腾宸驾，骊籞次乾游。坎德疏温液，山隈派暖流。
寒氛空外拥，蒸气沼中浮。林凋帷影散，云敛盖阴收。
霜郊畅玄览，参差落景遒。

卷 6_4【石桥】

李祚

别有经行所，迢跨重峦侧。粤因求瘼余，倏想寻真域。
放情恣披拂，杖策聊 。 ， 色。
乱幡雾中见，雁塔云间识。薄烟幂远郊，遥峰没归翼。
仙桥危石架，幽洞乘 。 ， 易测。
二教无先后，一相平而直。冀兹捐俗心，永怀依妙力。

· 全唐诗 ·

第七卷

卷 7_1 【虚池驿题屏风】

宜芬公主

出嫁辞乡国，由来此别难。圣恩愁远道，行路泣相看。
沙塞容颜尽，边隅粉黛残。妾心何所断，他日望长安。

卷 7_2 【嘲陆畅】

宋若华

十二层楼倚翠空，凤鸾相对立梧桐。
双成走报监门卫，莫使吴歊入汉宫。

卷 7_3 【奉和御制麟德殿宴百僚应制】

宋若昭

垂衣临八极，肃穆四门通。自是无为化，非关辅弼功。

· 全唐诗 ·

修文招隐伏，尚武殄妖凶。德炳韶光炽，恩沾雨露浓。
衣冠陪御宴，礼乐盛朝宗。万寿称觞举，千年信一同。

卷 7_4【奉和御制麟德殿宴百官】

宋若宪

端拱承休命，时清荷圣皇。四聪闻受谏，五服远朝王。
景媚莺初啭，春残日更长。命筵多济济，盛乐复锵锵。
丰镐谁将敌，横汾未可方。愿齐山岳寿，祉福永无疆。

卷 7_5【奉和麟德殿宴百僚应制】

鲍君徽

睿泽先寰海，功成殿武韶。戈鋌清外垒，文物盛中朝。
圣祚山河固，宸章日月昭。玉筵鸾鹄集，仙管凤凰调。
御柳新低绿，宫莺乍啭娇。愿将亿兆庆，千祀奉神尧。

卷 7_6【关山月】

鲍君徽

高高秋月明，北照辽阳城。塞迥光初满，风多晕更生。

· 全唐诗 ·

征人望乡思，战马闻鼙惊。朔风悲边草，胡沙暗虏营。
霜凝匣中剑，风急原上旌。早晚谒金阙，不闻刁斗声。

卷 7_7【惜花吟】

鲍君徽

枝上花，花下人，可怜颜色俱青春。昨日看花花灼灼，
今朝看花花欲落。不如尽此花下欢，莫待春风总吹却。
莺歌蝶舞韶光长，红炉煮茗松花香。妆成罢吟恣游后，
独把芳枝归洞房。

卷 7_8【东亭茶宴】

鲍君徽

闲朝向晓出帘栊，茗宴东亭四望通。远眺城池山色里，
俯聆弦管水声中。幽篁引沼新抽翠，芳槿低檐欲吐红。
坐久此中无限兴，更怜团扇起清风。

· 全唐诗 ·

卷 7_9【夜梦】

萧妃

昨日梦君归，贱妾下鸣机。极知意气薄，不著去时衣。
故言如梦里，赖得雁书飞。

· 全唐诗 ·

第八卷

卷 8_1 【咏灯】

李昇

一点分明值万金，开时惟怕冷风侵。
主人若也勤挑拨，敢向尊前不尽心。

卷 8_2 【游后湖赏莲花】

李璟

蓼花蘸水火不灭，水鸟惊鱼银梭投。满目荷花千万顷，
红碧相杂敷清流。孙武已斩吴宫女，琉璃池上佳人头。

卷 8_3 【保大五年元日大雪，同太弟景遂汪王景逖齐王景逵进士 李建勋中书徐铉勤政殿学士登楼赋】

李璟

珠帘高卷莫轻遮，往往相逢隔岁华。春气昨宵飘律管，

· 全唐诗 ·

东风今日放梅花。素姿好把芳姿掩，落热还同舞势斜。
坐有宾朋尊有酒，可怜清味属侬家。

卷8_4【句】

李璟

灵槎思浩荡，老鹤倚崆峒。
苍苔迷古道，红叶乱朝霞。
栖凤枝梢犹软弱，化龙形状已依稀。

卷8_5【九月十日偶书】

李煜

晚雨秋阴酒乍醒，感时心绪杳难平。黄花冷落不成艳，
红叶飕飕竞鼓声。背世返能厌俗态，偶缘犹未忘多情。
自从双鬓斑斑白，不学安仁却自惊。

卷8_6【秋莺】

李煜

残莺何事不知秋，横过幽林尚独游。老舌百般倾耳听，

· 全唐诗 ·

深黄一点入烟流。栖迟背世同悲鲁，浏亮如笙碎在瓠。
莫更留连好归去，露华凄冷蓼花愁。

卷 8_7【病起题山舍壁】

李煜

山舍初成病乍轻，杖藜巾褐称闲情。炉开小火深回暖，
沟引新流几曲声。暂约彭涓安朽质，终期宗远问无生。
谁能役役尘中累，贪合鱼龙构强名。

卷 8_8【送邓王二十弟从益牧宣城】

李煜

且维轻舸更迟迟，别酒重倾惜解携。浩浪侵愁光荡漾，
乱山凝恨色高低。君驰桧楫情何极，我凭阑干日向西。
咫尺烟江几多地，不须怀抱重凄凄。

卷 8_9【渡中江望石城泣下】

李煜

江南江北旧家乡，三十年来梦一场。吴苑宫闱今冷落，

· 全唐诗 ·

广陵台殿已荒凉。云笼远岫愁千片，雨打归舟泪万行。
兄弟四人三百口，不堪闲坐细思量。

卷 8_10【挽辞】

李煜

珠碎眼前珍，花凋世外春。未销心里恨，又失掌中身。
玉筍犹残药，香奁已染尘。前哀将后感，无泪可沾巾。
艳质同芳树，浮危道略同。正悲春落实，又苦雨伤丛。
秾丽今何在，飘零事已空。沉沉无问处，千载谢东风。

卷 8_11【悼诗】

李煜

永念难消释，孤怀痛自嗟。雨深秋寂莫，愁引病增加。
咽绝风前思，昏濛眼上花。空王应念我，穷子正迷家。

卷 8_12【感怀】

李煜

又见桐花发旧枝，一楼烟雨暮凄凄。

· 全唐诗 ·

凭阑惆怅人谁会，不觉潸然泪眼低。

层城无复见娇姿，佳节缠哀不自持。
空有当年旧烟月，芙蓉城上哭蛾眉。

卷 8_13【梅花】

李煜

殷勤移植地，曲槛小栏边。共约重芳日，还忧不盛妍。
阻风开步障，乘月溉寒泉。谁料花前后，蛾眉却不全。
失却烟花主，东君自不知。清香更何用，犹发去年枝。

卷 8_14【书灵筵手巾】

李煜

浮生共憔悴，壮岁失婵娟。汗手遗香渍，痕眉染黛烟。

卷 8_15【书琵琶背】

李煜

侑自肩如削，难胜数缕绦。天香留凤尾，余暖在檀槽。

· 全唐诗 ·

卷 8_16【病中感怀】

李煜

憔悴年来甚，萧条益自伤。风威侵病骨，雨气咽愁肠。
夜鼎唯煎药，朝髭半染霜。前缘竟何似，谁与问空王。

卷 8_17【病中书事】

李煜

病身坚固道情深，宴坐清香思自任。月照静居唯捣药，
门扃幽院只来禽。庸医懒听词何取，小婢将行力未禁。
赖问空门知气味，不然烦恼万涂侵。

卷 8_18【赐宫人庆奴】

李煜

风情渐老见春羞，到处消魂感旧游。
多谢长条似相识，强垂烟态拂人头。

· 全唐诗 ·

卷 8_19【题金楼子后】

李煜

牙签万轴里红绡，王粲书同付火烧。
不于祖龙留面目，遗篇那得到今朝。

卷 8_20【句】

李煜

迢迢牵牛星，杳在河之阳。粲粲黄姑女，耿耿遥相望。

莺狂应有恨，蝶舞已无多。（《落花》）

揖让月在手，动摇风满怀。（《咏扇》）

病态如衰弱，厌厌向五年。（以下《律髓注》）

衰颜一病难牵复，晓殿君临颇自羞。

冷笑秦皇经远略，静怜姬满苦时巡。

鬓从今日添新白，菊是去年依旧黄。（以下《翰府名谈》）

· 全唐诗 ·

万古到头归一死，醉乡葬地有高原。

人生不满百，刚作千年画。（《野客丛谈》）

日映仙云薄，秋高天碧深。（《海录碎事》）

乌照始潜辉，龙烛便争秉。（以下《孔帖》）

凝珠满露枝。

游颺日已西，肃穆寒初至。

九重开扇鹄，四牖炳灯鱼。

忌觞无算酌。

倾碗更为寿，深卮递酬宾。

卷 8_21 【蔷薇诗一首十八韵，呈东海侍郎徐铉】

李从善

绿影复幽池，芳菲四月时。管弦朝夕兴，组绣百千枝。
盛引墙看遍，高烦架屡移。露轻濡彩笔，蜂误拂吟髭。
日照玲珑慢，风摇翡翠帷。早红飘藓地，狂蔓挂蛛丝。
嫩刺牵衣细，新条窣草垂。晚香难暂舍，娇自态相窥。

· 全唐诗 ·

深浅分前后，荣华互盛衰。尊前留客久，月下欲归迟。
何处繁临砌，谁家密映篱。绛罗房灿烂，碧玉叶参差。
分得殷勤种，开来远近知。晶荧歌袖袂，柔弱舞腰支。
膏麝谁将比，庭萱自合嗤。匀妆低水鉴，泣泪滴烟_雨斯。
画拟凭梁广，名宜亚楚姬。寄君十八韵，思拙愧新奇。

卷 8_22 【观棋】

李从谦

竹林二君子，尽日竟沉吟。相对终无语，争先各有心。
恃强斯有失，守分固无侵。若算机筹处，沧沧海未深。

卷 8_23 【赠别唐太师道袭】

李建

卅岁便将为肘腋，二纪何曾离一日。更深犹尚立案前，
敷奏柔和不伤物。今朝荣贵慰我心，双旌引向重城出。
褒斜旧地委勋贤，从此生灵永泰息。

· 全唐诗 ·

卷 8_24【幸秦川上梓潼山】

李衍

乔岩簇冷烟，幽径上寒天。下瞰峨眉岭，上窥华岳巅。
驱驰非取乐，按幸为忧边。此去如登陟，歌楼路几千。

卷 8_25【题剑门】

李衍

缓辔逾双剑，行行蹑石棱。作千寻壁垒，为万祀依凭。
道德虽无取，江山粗可矜。回看城阙路，云叠树层层。

卷 8_26【过白卫岭和韩昭】

李衍

先朝神武力开边，画断封疆四五千。前望陇山屯剑戟，
后凭巫峡锁烽烟。轩皇尚自亲平寇，嬴政徒劳爱学仙。
想到隗宫寻胜处，正应莺语暮春天。

· 全唐诗 ·

卷 8_27【宫词】

李衍

辉辉赫赫浮玉云，宣华池上月华新。
月华如水浸宫殿，有酒不醉真痴人。

卷 8_28【醉妆词】

李衍

者边走，那边走，只是寻花柳。
那边走，者边走，莫厌金杯酒。

卷 8_29【句】

李衍

不缘朝阙去，好此结茅庐。

· 全唐诗 ·

卷 8_30【巡衣锦军制还乡歌】

钱镠

三节还乡兮挂锦衣，碧天朗朗兮爱日晖。
功成道上兮列旌旗，父老远来兮相追随。
家山乡眷兮会时稀，今朝设宴兮觥散飞。
斗牛无孛兮民无欺，吴越一王兮驷马归。

卷 8_31【没了期歌】

钱镠

没了期，没了期，营基才了又仓基。
没了期，没了期，春衣才了又冬衣。

卷 8_32【句】

钱镠

须将一片地，付与有心人。

黄河信有澄清日，后代应难继此才。

· 全唐诗 ·

传语龙王并水府，钱塘借与筑钱城。

卷 8_33【宫中作】

钱俶

廊庑周遭翠幕遮，禁林深处绝喧哗。界开日影怜窗纸，
穿破苔痕恶笋芽。西第晚宜供露茗，小池寒欲结冰花。
谢公未是深沉量，犹把输赢局上夸。

卷 8_34【避暑摩诃池上作】

孟昶

冰肌玉骨清无汗，水殿风来暗香暖。帘开明月独窥人，
欹枕钗横云鬓乱。起来琼户寂无声，时见疏星渡河汉。
屈指西风几时来，只恐流年暗中换。

卷 8_35【批叶翘谏书纸尾】

王继鹏

春色曾看紫陌头，乱红飞尽不禁愁。
人情自厌芳华歇，一叶随风落御沟。

· 全唐诗 ·

第九卷

卷 9_1【丈人观】

徐氏

早与元妃慕至化，同跻灵岳访真仙。当时信有壶中景，
今日亲来洞里天。仪仗影空寥廓外，金丝声揭翠微巅。
惟惭未致华胥理，徒卜升平万万年。

卷 9_2【玄都观】

徐氏

千寻绿嶂夹流溪，登眺因知海岳低。瀑布迸春青石碎，
轮茵横翦翠峰齐。步粘苔藓龙桥滑，日闭烟罗鸟径迷。
莫道穹天无路到，此山便是碧云梯。

· 全唐诗 ·

卷 9_3【丈人观谒先帝御容】

徐氏

圣帝归梧野，躬来谒圣颜。旋登三径路，似陟九嶷山。
日照堆岚迥，云横积翠间。期修封禅礼，方俟再跻攀。

卷 9_4【题金华宫】

徐氏

再到金华顶，玄都访道回。云披分景象，黛锁显楼台。
雨涤前山净，风吹去路开。翠屏夹流水，何必羨蓬莱。

卷 9_5【丹景山至德寺】

徐氏

周回云水游丹景，因与真妃眺上方。晴日晓升金晃曜，
寒泉夜落玉丁当。松梢月转琴栖影，柏径风牵麝食香。
虔炸六铢宜铸祝，惟祈圣祉保遐昌。

· 全唐诗 ·

卷 9_6【题彭州阳平化】

徐氏

寻真游胜境，巡礼到阳平。水远波澜碧，山高气象清。
殿严孙氏貌，碑暗系师名。夜月登坛醮，松风森磬声。

卷 9_7【三学山夜看圣灯】

徐氏

虔祷游灵境，元妃夙志同。玉香焚静夜，银烛炫辽空。
泉漱云根月，钟敲桧杪风。印金标圣迹，飞石显神功。
满望天涯极，平临日角红。猿来斋石上，僧集讲筵中。
顿作超三界，浑疑证六通。愿成修偃化，社稷保延洪。

卷 9_8【题天回驿】

徐氏

周游灵境散幽情，千里江山暂得行。
所恨风光看未足，却驱金翠入龟城。

· 全唐诗 ·

卷 9_9【丈人观（以下为太妃时作）】

徐氏

获陪翠辇喜殊常，同涉仙坛岂厌长。
不羨乘鸾入烟雾，此中便是五云乡。

卷 9_10【玄都观】

徐氏

登寻丹壑到玄都，接日红霞照座隅。
即向周回岩下看，似看曾进画图无。

卷 9_11【游丈人观谒先帝御容】

徐氏

共谒御容仪，还同在禁闱。笙歌喧宝殿，彩仗耀金徽。
清泪沾罗袂，红霞拂绣衣。九疑山水远，无路继湘妃。

· 全唐诗 ·

卷 9_12【题金华宫】

徐氏

碧烟红雾漾人衣，宿雾苍苔石径危。风巧解吹松上曲，
蝶娇频采脸边脂。同寻僻境思携手，暗指遥山学画眉。
好把身心清净处，角冠霞帔事希夷。

卷 9_13【和题丹景山至德寺】

徐氏

丹景山头宿梵宫，玉轮金辂驻虚空。军持无水注寒碧，
兰若有花开晚红。武士尽排青嶂下，内人皆在讲筵中。
我家帝子传王业，积善终期四海同。

卷 9_14【题彭州阳平化】

徐氏

云浮翠辇届阳平，真似骅骝到上清。风起半厓闻虎啸，
雨来当面见龙行。晚寻水涧听松韵，夜上星坛看月明。
长恐前身居此境，玉皇教向锦城生。

· 全唐诗 ·

卷 9_15【三学山夜看圣灯】

徐氏

圣灯千万炬，旋向碧空生。细雨湿不暗，好风吹更明。
磬敲金地响，僧唱梵天声。若说无心法，此光如有情。

卷 9_16【题天回驿】

徐氏

翠驿红亭近玉京，梦魂犹是在青城。
比来出看江山景，却被江山看出行。

· 全唐诗 ·

第十卷

卷 10_1【郊庙歌辞·祀圜丘乐章·豫和】

上灵眷命膺会昌，盛德殷荐叶辰良。
景福降兮圣德远，玄化穆兮天历长。

卷 10_2【郊庙歌辞·祀圜丘乐章·太和】

穆穆我后，道应千龄。登三处大，得一居贞。
礼惟崇德，乐以和声。百神仰止，天下文明。

卷 10_3【郊庙歌辞·祀圜丘乐章·肃和】

闾阳播气，甄曜垂明。有赫圜宰，深仁曲成。
日丽苍璧，烟开紫营。聿遵乾享，式降鸿祯。

卷 10_4【郊庙歌辞·祀圜丘乐章·雍和】

钦惟大帝，载仰皇穹。始命田烛，爰启郊宫。

· 全唐诗 ·

云门骇听，雷鼓鸣空。神其介祀，景祚斯融。

卷 10_5【郊庙歌辞·祀圜丘乐章·寿和】

八音斯奏，三献毕陈。宝祚惟永，晖光日新。

卷 10_6【郊庙歌辞·祀圜丘乐章·舒和】

叠璧凝影皇坛路，编珠流彩帝郊前。
已奏黄钟歌大吕，还符宝历祚昌年。

卷 10_7【郊庙歌辞·祀圜丘乐章·凯安】

昔在炎运终，中华乱无象。酆郊赤乌见，邙山黑云上。
大资下周车，禁暴开殷网。幽明同叶赞，鼎祚齐天壤。

卷 10_8【郊庙歌辞·祀圜丘乐章·豫和】

歌奏毕兮礼献终，六龙驭兮神将升。
明德感兮非黍稷，降福简兮祚休征。

· 全唐诗 ·

卷 10_9【郊庙歌辞·郊天旧乐章·豫和】

蘋蘩礼著，黍稷诚微。音盈凤管，彩驻龙旗。
洪歆式就，介福攸归。送乐有闋，灵驭遄飞。

卷 10_10【郊庙歌辞·武后大享昊天乐章】

大阴凝至化，真耀蕴轩仪。德迈娥台敞，仁高姒幄披。
扪天遂启极，梦日乃升曦。

瞻紫极，望玄穹。翘至恳，罄深衷。
听虽远，诚必通。垂厚泽，降云宫。

乾仪混成冲邃，天道下济高明。闾阳晨披紫阙，
太一晓降黄庭。圆坛敢由昭报，方璧冀展虔情。
丹襟式敷衷恳，玄鉴庶察微诚。

巍巍睿业广，赫赫圣基隆。菲德承先顾，祜符萃眇躬。
铭开武岩侧，图荐洛川中。微诚讵幽感，景命忽昭融。
有怀惭紫极，无以谢玄穹。

朝坛雾卷，曙岭烟沉。爰设筐币，式表诚心。
筵辉丽璧，乐畅和音。仰惟灵鉴，俯察翘襟。

昭昭上帝，穆穆下临。礼崇备物，乐奏锵金。

· 全唐诗 ·

兰羞委荐，桂醑盈斟。敢希明德，聿罄庄心。

樽浮九酝，礼备三周。陈诚菲奠，契福神猷。

奠璧郊坛昭大礼，锵金拊石表虔诚。
始奏承云娱帝赏，复歌调露畅韶英。

荷恩承顾托，执契恭临抚。庙略静边荒，天兵耀神武。
有截资先化，无为遵旧矩。祯符降昊穹，大业光寰宇。

肃肃祀典，邕邕礼秩。三献已周，九成斯毕。

爰撤其俎，载迁其实。或升或降，唯诚唯质。

礼终肆类，乐阕九成。仰惟明德，敢荐非馨。

顾惭菲奠，久驻云輶。瞻荷灵泽，悚恋兼盈。

式乾路，辟天扉。回日驭，动云衣。
登金阙，入紫微。望仙驾，仰恩徽。

卷 10_11【中宗祀昊天乐章·豫和】

天之历数归睿唐，顾惟菲德钦昊苍。
撰吉日兮表殷荐，冀神鉴兮降闾阳。

· 全唐诗 ·

卷 10_12【中宗祀昊天乐章·太和】

恭临宝位，肃奉瑶图。恒思解网，每轸泣辜。
德惭巢燧，化劣唐虞。期我良弼，式赞嘉谟。

卷 10_13【中宗祀昊天乐章·告谢】

得一流玄泽，通三御紫宸。远叶千龄运，遐销九域尘。
绝瑞骈阗集，殊祥络绎臻。登年庆栖亩，稔岁贺盈囷。

卷 10_14【中宗祀昊天乐章·肃和】

悠哉广覆，大矣曲成。九玄著象，七曜贞明。
珪璧是奠，醑酌斯盈。作乐崇德，爰畅咸英。

卷 10_15【中宗祀昊天乐章·雍和】

郊坛展敬，严配因心。孤竹箫管，空桑瑟琴。
肃穆大礼，铿锵八音。恭惟上帝，希降灵歆。

卷 10_16【中宗祀昊天乐章·福和】

九成爰奏，三献式陈。钦承景福，恭托明禋。

· 全唐诗 ·

卷 10_17【中宗祀昊天乐章·中宫助祭升坛】

坤元光至德，柔训阐皇风。芾苒芳声远，螽斯美化隆。
睿范超千载，嘉猷备六宫。肃恭陪盛典，钦若荐禋宗。

卷 10_18【中宗祀昊天乐章·亚献】

三灵降飨，三后配神。虔敷藻奠，敬展郊禋。

卷 10_19【中宗祀昊天乐章·舒和】

已陈粢盛敷严祀，更奏笙镛协雅声。
璇图宝历欣宁谧，晏俗淳风乐太平。

卷 10_20【中宗祀昊天乐章·凯安】

堂堂圣祖兴，赫赫昌基泰。戎车盟津偃，玉帛涂山会。
舜日启祥晖，尧云卷征旆。风猷被有截，声教覃无外。

卷 10_21【明皇祀圜丘乐章·豫和】

至矣丕构，烝哉太平。授牺膺箓，复禹继明。
草木仁化，帛鬻颂声。祀宗陈德，无愧斯诚。

· 全唐诗 ·

卷 10_22【明皇祀圜丘乐章·太和】

郊坛斋帝，礼乐祀天。丹青寰宇，宫征山川。
神祇毕降，行止重旋。融融穆穆，纳祉洪延。

卷 10_23【明皇祀圜丘乐章·肃和】

止奏潜聆，登仪宿嘒。太玉躬奉，参钟首奠。
簠簋聿升，牺牲递荐。昭事颙若，存存以伋。

卷 10_24【明皇祀圜丘乐章·雍和】

烂云普洽，律风无外。千品其凝，九宾斯会。
祗尊晋烛，纯牺涤汰。玄覆攸广，鸿休汪濊。

卷 10_25【明皇祀圜丘乐章·寿和】

六变爰阕，八阶载虔。祐我皇祚，于万斯年。

卷 10_26【明皇祀圜丘乐章·寿和】

於赫圣祖，龙飞晋阳。底定万国，奄有四方。

· 全唐诗 ·

功格上下，道冠农黄。郊天配享，德合无疆。

卷 10_27【明皇祀圜丘乐章·寿和】

崇崇泰畤，肃肃严禋。粢盛既洁，金石毕陈。
上帝来享，介福爰臻。受釐合祉，宝祚维新。

卷 10_28【明皇祀圜丘乐章·舒和】

祝史正辞，人神叶庆。福以德招，享以诚应。
六变云备，百礼期浹。祀事孔明，祚流万叶。

卷 10_29【明皇祀圜丘乐章·凯安】

馨香惟后德，明命光天保。肃和崇圣灵，陈信表皇道。
玉铎初蹈万，金匏既静好。

卷 10_30【明皇祀圜丘乐章·豫和】

大号成命，思文配天。神光肸蚩，龙驾言旋。
眇眇闾阖，昭昭上玄。俾昌而大。于斯万年。

· 全唐诗 ·

卷 10_31【明皇祀圜丘乐章·太和】

六成既阕，三荐云终。神心具醉，圣敬愈崇。
受釐皇邸，回跸帷宫。穰穰之福，永永无穷。

卷 10_32【封泰山乐章·豫和】

款泰坛，柴泰清。受天命，报天成。
竦皇心，荐乐声。志上达，歌下迎。
亿上帝，临下庭。骑日月，陪列星。
嘉祝信，大糝馨。澹神心，醉皇灵。

相百辟，贡八荒。九歌叙，万舞翔。
肃振振，铿皇皇。帝欣欣，福穰穰。

高在上，道光明。物资始，德难名。
承眷命，牧苍生。寰宇谧，太阶平。

天道无亲，至诚与邻。山川遍礼，宫徵维新。
玉帛非盛，聪明会真。正斯一德，通乎百神。

飨帝飨亲，维孝维圣。缉熙懿德，敷扬成命。
华夷志同，笙镛礼盛。明灵降止，感此诚敬。

· 全唐诗 ·

卷 10_33【封泰山乐章·太和】

孝敬中发，和容外彰。腾华照宇，如升太阳。
贞璧就奠，玄灵垂光。礼乐具举，济济洋洋。

卷 10_34【封泰山乐章·肃和】

奠祖配天，承天享帝。百灵咸秩，四海来祭。
植我苍璧，布我玄制。华日裴回，神烟容裔。

卷 10_35【封泰山乐章·雍和】

俎豆有馥，粢盛洁丰。亦有和羹，既戒既平。
钟鼓管磬，肃唱和鸣。皇皇后祖，来我思成。

卷 10_36【封泰山乐章·寿和】

烝烝我后，享献惟寅。躬酌郁鬯，跪奠明神。
孝莫孝乎，配上帝亲。敬莫敬乎，孝天下臣。

卷 10_37【封泰山乐章·寿和】

皇祖严配，配享皇天。皇皇降嘏，天子万年。

· 全唐诗 ·

卷 10_38【封泰山乐章·舒和】

六钟翕协六变成，八佾倘佯八风生。
乐九韶兮人神感，美七德兮天地清。

卷 10_39【封泰山乐章·凯安】

烈祖顺三灵，文宗威四海。黄钺诛群盗，朱旗扫多罪。
戢兵天下安，约法人心改。大哉干羽意，长见风云在。

卷 10_40【封泰山乐章·豫和】

乐已终，烟燎上。怀灵惠，结皇想。
归风疾，回风爽。百福来，众神往。

卷 10_41【祈谷乐章·肃和】

履艮斯绳，居中体正。龙运垂祉，昭符启圣。
式事严禋，聿怀嘉庆。惟帝永锡，时皇休命。

卷 10_42【祈谷乐章·雍和】

殷荐乘春，太坛临曙。八簋盈和，六瑚登御。

· 全唐诗 ·

嘉稷匪歆，德馨斯饫。祝嘏无易，灵心有豫。

卷 10_43【祈谷乐章·舒和】

玉帛牺牲申敬享，金丝戚羽盛音容。
庶俾亿龄禋景福，长欣万宇洽时邕。

卷 10_44【明堂乐章·肃和】

象天御宇，乘时布政。严配申虔，宗禋展敬。
樽罍盈列，树羽交映。玉帛通诚，祚隆皇圣。

卷 10_45【明堂乐章·雍和】

八牖晨披，五精朝奠。雾凝璇筐，风清金县。
神涤备全，明粢丰衍。载絜彝俎，陈诚以荐。

卷 10_46【明堂乐章·舒和】

御宸合宫承宝历，席图重馆奉明灵。
偃武修文九围泰，沉烽静柝八荒宁。

· 全唐诗 ·

卷 10_47【武后明堂乐章·外办将出】

总章陈昔典，衢室礼惟神。宏规则天地，神用叶陶钧。
负宸三春旦，充庭万宇宾。顾己诚虚薄，空惭亿兆人。

卷 10_48【武后明堂乐章·皇帝行】

仰膺历数，俯顺讴歌。远安迓肃，俗阜时和。
化光玉镜，讼息金科。方兴典礼，永戢干戈。

卷 10_49【武后明堂乐章·皇嗣出入升降】

至人光俗，大孝通神。谦以表性，恭惟立身。
洪规载启，茂典方陈。誉隆三善，祥开万春。

卷 10_50【武后明堂乐章·迎送王公】

千官肃事，万国朝宗。载延百辟，爰集三宫。
君臣德合，鱼水斯同。睿图方永，周历长隆。

卷 10_51【武后明堂乐章·登歌】

礼崇宗祀，志表严禋。笙镛合奏，文物维新。

· 全唐诗 ·

敬遵茂典，敢择良辰。絜诚斯著，奠谒方申。

卷 10_52【武后明堂乐章·配飨】

笙镛间玉宇，文物昭清晖。睟影临芳奠，休光下太微。
孝思期有感，明絜庶无违。

卷 10_53【武后明堂乐章·宫音】

履艮包群望，居中冠百灵。万方资广运，庶品荷财成。
神功谅匪测，盛德实难名。藻奠申诚敬，恭祀表惟馨。

卷 10_54【武后明堂乐章·角音】

出震位，开平秩。扇条风，乘甲乙。
龙德盛，鸟星出。荐珪瓊，陈诚实。

卷 10_55【武后明堂乐章·徵音】

赫赫离精御炎陆，滔滔炽景开隆暑。
冀延神鉴俯兰樽，式表虔襟陈桂俎。

· 全唐诗 ·

卷 10_56【武后明堂乐章·商音】

律中夷则，序应收成。功宣建武，义表惟明。
爰申礼奠，庶展翘诚。九秋是式，百谷斯盈。

卷 10_57【武后明堂乐章·羽音】

葭律肇启隆冬，蘋藻攸陈飨祭。
黄钟既陈玉烛，红粒方殷稔岁。

卷 10_58【雩祀乐章·肃和】

朱鸟开辰，苍龙启映。大帝昭飨，群生展敬。
礼备怀柔，功宣舞咏。旬液应序，年祥协庆。

卷 10_59【雩祀乐章·雍和】

绀筵分彩，宝图吐绚。风管晨凝，云歌晓嘒。
肃事兰羞，虔申桂奠。百谷斯登，万箱攸荐。

卷 10_60【雩祀乐章·舒和】

凤曲登歌调令序，龙雩集舞泛祥风。

· 全唐诗 ·

彩旛云回昭睿德，朱干电发表神功。

卷 10_61【雩祀乐章·豫和】

鸟纬迁序，龙星见辰。纯阳在律，明德崇禋。
五方降帝，万宇安人。恭以致享，肃以迎神。

卷 10_62【雩祀乐章·豫和】

祀遵经设，享缘成举。献毕于樽，彻临于俎。
舞止干戚，乐停枺鼓。歌以送神，神还其所。

· 全唐诗 ·

第十一卷

卷 11_1【郊庙歌辞·五郊乐章·黄帝宫音】

黄中正位，含章居贞。既长六律，兼和五声。
毕陈万舞，乃荐斯牲。神其下降，永祚休平。

卷 11_2【郊庙歌辞·五郊乐章·肃和】

眇眇方輿，苍苍圜盖。至哉枢纽，宅中图大。
气调四序，风和万籁。祚我明德，时雍道泰。

卷 11_3【郊庙歌辞·五郊乐章·雍和】

金县夕肆，玉俎朝陈。飨荐黄道，芬流紫宸。
乃诚乃敬，载享载禋。崇荐斯在，惟皇是宾。

卷 11_4【郊庙歌辞·五郊乐章·舒和】

御征乘宫出郊甸，安歌率舞递将迎。

· 全唐诗 ·

自有云门符帝赏，犹持雷鼓答天成。

卷 11_5【郊庙歌辞·五郊乐章·青帝角音】

鹤云旦起，鸟星昏集。律候新风，阳开初蛰。
至德可飧，行潦斯挹。锡以无疆，蒸人乃粒。

卷 11_6【郊庙歌辞·五郊乐章·肃和】

玄鸟司春，苍龙登岁。节物变柳，光风转蕙。
瑶席降神，朱弦飧帝。诚备祝嘏，礼殚珪币。

卷 11_7【郊庙歌辞·五郊乐章·雍和】

大乐稀音，至诚简礼。文物棣棣，声明济济。
六变有成，三登无体。乃眷丰洁，恩覃恺悌。

卷 11_8【郊庙歌辞·五郊乐章·舒和】

笙歌箫舞属年韶，鹭鼓鳀钟展时豫。
调露初迎绮春节，承云遽践苍霄驭。

· 全唐诗 ·

卷 11_9【郊庙歌辞·五郊乐章·赤帝徵音】

青阳告谢，朱明戒序。延长是祈，敬陈椒醑。
博硕斯荐，笙镛备举。庶尽肃恭，非馨稷黍。

卷 11_10【郊庙歌辞·五郊乐章·肃和】

离位克明，火中宵见。峰云暮起，景风晨扇。
木槿初荣，含桃可荐。芬馥百品，铿锵三变。

卷 11_11【郊庙歌辞·五郊乐章·雍和】

昭昭丹陆，奕奕炎方。礼陈牲币，乐备簠簠。
琼羞溢俎，玉醑浮觞。恭惟正直，歆此馨香。

卷 11_12【郊庙歌辞·五郊乐章·舒和】

千里温风飘绛羽，十枝炎景剩朱干。
陈觞荐俎歌三献，拊石攄金会七盘。

卷 11_13【郊庙歌辞·五郊乐章·白帝商音】

白藏应节，天高气清。岁功既阜，庶类收成。

· 全唐诗 ·

万方静谧，九土和平。馨香是荐，受祚聪明。

卷 11_14【郊庙歌辞·五郊乐章·肃和】

金行在节，素灵居正。气肃霜严，林凋草劲。
豺祭隼击，潦收川镜。九谷已登，万箱流咏。

卷 11_15【郊庙歌辞·五郊乐章·雍和】

律应西成，乞躔南吕。珪币咸列，笙竽备举。
苾苾兰羞，芬芬桂醑。式资宴飨，用调霜序。

卷 11_16【郊庙歌辞·五郊乐章·舒和】

璿仪气爽惊缇籥，玉吕灰飞含素商。
鸣鞀奏管芳羞荐，会舞安歌葆眊扬。

卷 11_17【郊庙歌辞·五郊乐章·黑帝羽音】

严冬季月，星回风厉。享祀报功，方祚来岁。

· 全唐诗 ·

卷 11_18【郊庙歌辞·五郊乐章·肃和】

律回玉琯，星周金度。次极阳乌，纪穷阴兔。
火林霰雪，阳泉凝沍。八蜡已登，三农息务。

卷 11_19【郊庙歌辞·五郊乐章·雍和】

阳月斯纪，应钟在候。载洁牲牷，爰登俎豆。
既高既远，无声无臭。静言格思，惟神保佑。

卷 11_20【郊庙歌辞·五郊乐章·舒和】

执籥持羽初终曲，朱干玉钺始分行。
七德九功咸已畅，明灵降福具穰穰。

卷 11_21【郊庙歌辞·五郊乐章·黄郊迎神】

朱明季序，黄郊王辰。厚以载物，甘以养人。
毓金为体，禀火成身。宫音式奏，奏以迎神。

卷 11_22【郊庙歌辞·五郊乐章·送神】

春末冬暮，徂夏杪秋。土王四月，时季一周。

· 全唐诗 ·

黍稷已享，笾豆宜收。送神有乐，神其赐休。

卷 11_23【郊庙歌辞·五郊乐章·青郊迎神】

缙幕移候，青郊启蛰。淑景迟迟，和风习习。
璧玉宵备，旌旄曙立。张乐以迎，帝神其入。

卷 11_24【郊庙歌辞·五郊乐章·送神】

文物流彩，声明动色。人竭其恭，灵昭其饬。
歆荐不已，垂祜无极。送礼有章，惟神还轼。

卷 11_25【郊庙歌辞·五郊乐章·赤郊迎神】

青阳节谢，朱明候改。靡草凋华，含桃流彩。
虚列钟磬，筵陈脯醢。乐以迎神，神其如在。

卷 11_26【郊庙歌辞·五郊乐章·送神】

炎精式降，苍生攸仰。羞列豆笾，酒陈牺象。
昭祀有应，冥期不爽。送乐张音，惟灵之往。

· 全唐诗 ·

卷 11_27【郊庙歌辞·五郊乐章·白郊迎神】

序移玉律，节应金商。天严杀气，吹警秋方。
樯燎既积，稷奠并芳。乐以迎奏，庶降神光。

卷 11_28【郊庙歌辞·五郊乐章·送神】

祀遵五礼，时属三秋。人怀肃敬，灵降禔休。
奠歆旨酒，荐享珍羞。载张送乐，神其上游。

卷 11_29【郊庙歌辞·五郊乐章·黑郊迎神】

玄英戒序，黑郊临候。掌礼陈彝，司筵执豆。
寒氛敛色，沍泉凝漏。乐以迎神，八音斯奏。

卷 11_30【郊庙歌辞·五郊乐章·送神】

北郊时冽，南陆辉处。奠本虔诚，献弥恭虑。
上延祉福，下承欢豫。广乐送神，神其整驭。

卷 11_31【郊庙歌辞·朝日乐章·肃和】

惟圣格天，惟明飨日。帝郊肆类，王宫戒吉。

· 全唐诗 ·

珪奠春舒，钟歌晓溢。礼云克备，斯文有秩。

卷 11_32【郊庙歌辞·朝日乐章·雍和】

晨仪式荐，明祀惟光。神物爰止，灵晖载扬。
玄端肃事，紫幄兴祥。福履攸假，于昭允王。

卷 11_33【郊庙歌辞·朝日乐章·舒和】

崇牙树羽延调露，旋宫扣律掩承云。
诞敷懿德昭神武，载集丰功表睿文。

卷 11_34【郊庙歌辞·朝日乐章·迎神】

太阳朝序，王宫有仪。蟠桃彩驾，细柳光驰。
轩祥表合，汉历彰奇。礼和乐备，神其降斯。

卷 11_35【郊庙歌辞·朝日乐章·送神】

五齐兼酌，百羞具陈。乐终广奏，礼毕崇禋。
明鉴万宇，照临兆人。永流洪庆，式动曦轮。

· 全唐诗 ·

卷 11_36【郊庙歌辞·夕月乐章·肃和】

测妙为神，通微曰圣。坎祀貽则，郊禋展敬。
璧荐登光，金歌动映。以载嘉德，以流曾庆。

卷 11_37【郊庙歌辞·夕月乐章·雍和】

肱晨争举，天宗礼辟。夜典凉秋，阴明湛夕。
有醑斯旨，有牲斯硕。穆穆其晖，穰穰是积。

卷 11_38【郊庙歌辞·夕月乐章·舒和】

合吹八风金奏动，分容万舞玉鞘惊。
词昭茂典光前列，夕曜乘功表盛明。

卷 11_39【郊庙歌辞·祀九宫贵神乐章·豫和】

於昭上穹，临下有光。羽翼五佐，周流八荒。
谁其飨之，时文对扬。虞经夏典，兹礼未遑。

黑帝旋驭，青躔导日。金策上玄，玉堂初吉。
钩陈夕次，銮和先辟。蔼蔼群灵，昭昭咸秩。
帝临中坛，受禧元神。皇灵萃止，羽旄肃陈。

· 全唐诗 ·

摄提运衡，招摇移轮。光光宇宙，电耀雷震。

夜如何其，明星煌煌。天清容卫，露结坛场。
树羽幢幢，佩玉锵锵。凝精驻目，瞻望神光。

九位既肃，万灵毕会。天门启扃，日驭飞盖。
焕兮琴离，俟兮暗霭。如山之福，惟圣时对。

崇崇泰坛，灵具临兮。铿镗大乐，振动心兮。
神之降矣，卿云郁兮。神之至止，清风肃兮。

卷 11_40【郊庙歌辞·祀九宫贵神乐章·太和】

帝在灵坛，大明登光。天回云粹，穆穆皇皇。
金奏九夏，圭陈八芻。旷哉动植，如熙春阳。

卷 11_41【郊庙歌辞·祀九宫贵神乐章·肃和】

歌工既奏，神位既秩。天符众星，运行太一。
声和十管，气应中律。肃肃明廷，介兹元吉。

卷 11_42【郊庙歌辞·祀九宫贵神乐章·雍和】

俎豆有践，黄流在尊。九宫之祀，三代莫存。

· 全唐诗 ·

乐变六宫，坛开八门。圣皇昭对，祐我黎元。

卷 11_43【郊庙歌辞·祀九宫贵神乐章·寿和】

时文哲后，肃事严禋。馨我明德，享于贵神。
大庖载盈，旨酒斯醇。精意所属，期于利人。

卷 11_44【郊庙歌辞·祀九宫贵神乐章·福和】

祀既云毕，明灵告旋。礼洽和应，神歆福延。
动植咸若，阴阳不愆。锡兹纯嘏，天子万年。

卷 11_45【郊庙歌辞·祀九宫贵神乐章·舒和】

羽籥既阕，干戚陈。八音克谐，六变新。
愉贵神兮般以乐，保皇祚兮万斯春。

卷 11_46【郊庙歌辞·祀九宫贵神乐章·凯安】

盛德陈万舞，威棱畅九垓。风云交律候，日月丽昭回。
行庆休祥发，乘和春气来。百神肃临享，荡荡天门开。

· 全唐诗 ·

卷 11_47【郊庙歌辞·祀九宫贵神乐章·肃和】

精意严恭，明祠丰洁。献酬既备，俎豆斯撤。
日丽天仪，风和乐节。事光祀典，福覃有截。

卷 11_48【郊庙歌辞·祀九宫贵神乐章·豫和】

享申百礼，庆洽百灵。上排阊阖，洞入杳冥。
奠玉高坛，燔柴广庭。神之降福，万国咸宁。

卷 11_49【郊庙歌辞·祀风师乐章·迎神】包佶

太皞御气，句芒肇功。苍龙青旗，爰候祥风。
律以和应，神以感通。鼎俎修蚩，时惟礼崇。

卷 11_50【郊庙歌辞·祀风师乐章·奠币登歌】包佶

旨酒告絜，青蘋应候。礼陈瑶币，乐献金奏。
弹弦自昔，解冻惟旧。仰瞻肸蚩，群祥来凑。

卷 11_51【郊庙歌辞·祀风师乐章·迎俎酌献】包佶

德盛昭临，迎拜巽方。爰候发生，式荐馨香。

· 全唐诗 ·

酌醴具举，工歌载扬。神歆六律，恩降百祥。

卷 11_52【郊庙歌辞·祀风师乐章·亚献终献】包佶

簠苾备，玉帛陈。风动物，乐感神。
三献终，百神臻。草木荣，天下春。

卷 11_53【郊庙歌辞·祀风师乐章·送神】包佶

微穆敷华能应节，飘扬发彩宜行庆。送迎灵驾神心享，
跪拜灵坛礼容盛。气和草木发萌芽，德畅禽鱼遂翔泳。
永望翠盖逐流云，自兹率土调春令。

卷 11_54【郊庙歌辞·祀雨师乐章·迎神】包佶

陟降左右，诚达幽圉。作解之功，乐惟有年。
云輶戾止，洒雾飘烟。惟馨展礼，爰列豆笾。

卷 11_55【郊庙歌辞·祀雨师乐章·奠币登歌】包佶

岁正朱明，礼布元制。惟乐能感，与神合契。
阴雾离披，灵驭摇裔。膏泽之庆，期于稔岁。

· 全唐诗 ·

卷 11_56【郊庙歌辞·祀雨师乐章·迎俎酌献】包佶

阳开幽蛰，躬奉郁鬯。礼备节应，震来灵降。
动植求声，飞沉允望。时康气茂，惟神之贶。

卷 11_57【郊庙歌辞·祀雨师乐章·亚献终献】包佶

奠既备，献将终。神行令，瑞飞空。
迎乾德，祈岁功。乘烟燎，俨从风。

卷 11_58【郊庙歌辞·祀雨师乐章·送神】包佶

整驾升车望寥廓，垂阴荐祉荡昏氛。飨时灵贶僊如在。
乐罢余声遥可闻。饮福陈诚礼容备，撤俎终献曙光分。
跪拜临坛结空想，年年应节候油云。

· 全唐诗 ·

第十二卷

卷 12_1【郊庙歌辞·祭方丘乐章·顺和】

万方资以化，交泰属升平。易从业惟简，得一道斯宁。
具仪光玉帛，送舞变咸英。黍稷良非贵，明德信惟馨。

卷 12_2【郊庙歌辞·祭方丘乐章·肃和】

至矣坤德，皇哉地祇。开元统纽，合大承规。
九宫肃列，六典相仪。永言配命，长保无亏。

卷 12_3【郊庙歌辞·祭方丘乐章·雍和】

柔而能方，直而能敬。载厚以德，大亨以正。
有涤斯牲，有馨斯盛。介兹景福，祚我休庆。

卷 12_4【郊庙歌辞·祭方丘乐章·舒和】

玉帛牲牷分荐享，羽旄干戚递成容。

· 全唐诗 ·

一德惟宁两仪泰，三才保合四时邕。

卷 12_5【郊庙歌辞·祭方丘乐章·顺和】

阴祗协赞，厚载方贞。牲币具举，箫管备成。
其礼惟肃，其德惟明。神之听矣，式鉴虔诚。

卷 12_6【郊庙歌辞·武后大享拜洛乐章·昭和】

九玄眷命，三圣基隆。奉承先旨，明台毕功。
宗祀展敬，冀表深衷。永昌帝业，式播淳风。

卷 12_7【郊庙歌辞·武后大享拜洛乐章·致和】

神功不测兮运阴阳，包藏万宇兮孕八荒。
天符既出兮帝业昌，愿临明祀兮降祯祥。

卷 12_8【郊庙歌辞·武后大享拜洛乐章·咸和】

坎泽祠容备举，坤坛祭典爰申。灵眷遥行秘躅，
嘉贶荐委殊珍。肃礼恭禋载展，翘襟邈志逾殷。
方期交际悬应。（下一句逸）

· 全唐诗 ·

卷 12_9【郊庙歌辞·武后大享拜洛乐章·九和】

祗荷坤德，钦若乾灵。惭惕罔置，兴居匪宁。
恭崇礼则，肃奉仪形。惟凭展敬，敢荐非馨。

卷 12_10【郊庙歌辞·武后大享拜洛乐章·显和（拜洛）】

菲躬承睿顾，薄德忝坤仪。乾乾遵后命，翼翼奉先规。
抚俗勤虽切，还淳化尚亏。未能弘至道，何以契明祇。

卷 12_11【郊庙歌辞·武后大享拜洛乐章·显和（受图）】

顾德有惭虚菲，明祇屡降祯符。汜水初呈秘象，
温洛荐表昌图。玄泽流恩载洽，丹襟荷渥增愉。

卷 12_12【郊庙歌辞·武后大享拜洛乐章·昭和】

舒阴致养，合大资生。德以恒固，功由永贞。
升歌荐序，垂币翘诚。虹开玉照，凤引金声。

卷 12_13【郊庙歌辞·武后大享拜洛乐章·敬和】

兰俎既升，蘋羞可荐。金石载设，咸英已变。

· 全唐诗 ·

林泽斯总，山川是遍。敢用敷诚，实惟忘倦。

卷 12_14【郊庙歌辞·武后大享拜洛乐章·齐和】

沉潜演赋分三极，广大凝禋总万方。
既荐羽旌文化启，还呈干戚武威扬。

卷 12_15【郊庙歌辞·武后大享拜洛乐章·德和】

夕惕司龙契，晨兢当凤宸。崇儒习旧规，偃伯循先旨。
绝壤飞冠盖，遐区丽山水。幸承三圣余，忻属千年始。

卷 12_16【郊庙歌辞·武后大享拜洛乐章·禋和】

百礼崇容，千官肃事。灵降无兆，神凝有粹。
奠享咸周，威仪毕备。奏夏登列，歌雍彻肆。

卷 12_17【郊庙歌辞·武后大享拜洛乐章·通和】

皇皇灵眷，穆穆神心。暂动凝质，还归积阴。
功玄枢纽，理寂高深。衔恩佩德，耸志翘襟。

· 全唐诗 ·

卷 12_18【郊庙歌辞·武后大享拜洛乐章·归和】

言旋云洞兮蹑烟途，永宁中宇兮安下都。
包涵动植兮顺荣枯，长贻宝贶兮赞璇图。

卷 12_19【郊庙歌辞·武后大享拜洛乐章·又归和】

调云阁兮神座兴，骖云驾兮俨将升。
腾绛霄兮垂景祐，翹丹恳兮荷休征。

卷 12_20【郊庙歌辞·祭方丘乐章·顺和】

坤厚载物，德柔垂祉。九域咸雍，四溟为纪。
敬因良节，虔修阴祀。广乐式张，灵其降止。

卷 12_21【郊庙歌辞·祭方丘乐章·金奏】

坤元至德，品物资生。神凝博厚，道协高明。
列镇五岳，环流四瀛。于何不载，万宝斯成。

卷 12_22【郊庙歌辞·祭方丘乐章·顺和】

乐备金石，礼光尊俎。大享爰终，洪休是举。

· 全唐诗 ·

雨零感节，云飞应序。纓绂载辞，皇灵具举。

卷 12_23【郊庙歌辞·祭汾阴乐章·顺和（林钟宫）】

韩思复

大乐和畅，殷荐明神。一降通感，八变必臻。
有求斯应，无德不亲。降灵醉止，休征万人。

卷 12_24【郊庙歌辞·祭汾阴乐章·太簇角】

卢从愿

坤元载物，阳乐发生。播殖资始，品汇咸亨。
列俎棋布，方坛砥平。神歆禋祀，后德惟明。

卷 12_25【郊庙歌辞·祭汾阴乐章·姑洗徵】

刘晃

大君出震，有事郊禋。齐戒既肃，馨香毕陈。
乐和礼备，候暖风春。恭惟降福，实赖明神。

· 全唐诗 ·

卷 12_26【郊庙歌辞·祭汾阴乐章·南吕羽】

韩休

於穆浚哲，维清缉熙。肃事昭配，永言孝思。
涤濯静嘉，馨香在兹。神之听之，用受福釐。

卷 12_27【郊庙歌辞·祭汾阴乐章·太和】

王峻

於穆圣皇，六叶重光。太原刻颂，后土疏场。
宝鼎呈符，歆云孕祥。礼乐备矣，降福穰穰。

卷 12_28【郊庙歌辞·祭汾阴乐章·肃和】

崔玄童

聿修严配，展事禋宗。祥符宝鼎，礼备黄琮。
祝词以信，明德惟聪。介兹景福，永永无穷。

· 全唐诗 ·

卷 12_29【郊庙歌辞·祭汾阴乐章·雍和】

贾曾

蠲我饕餮，洁我膋芻。有豆孔硕，为羞既臧。
至诚无味，精意惟芳。神其醉止，欣欣乐康。

卷 12_30【郊庙歌辞·祭汾阴乐章·寿和】

苏颋

礼物斯具，乐章乃陈。谁其作主，皇考圣真。
对越在天，圣明佐神。窅然汾上，厚泽如春。

卷 12_31【郊庙歌辞·祭汾阴乐章·舒和】

何鸾

乐奏云阁，礼章载虔。禋宗于地，昭假于天。
惟馨荐矣，既醉歆焉。神之降福，永永万年。

· 全唐诗 ·

卷 12_32【郊庙歌辞·祭汾阴乐章·凯安】

蒋挺

维岁之吉，维辰之良。圣君绂冕，肃事坛场。
大礼已备，大乐斯章。神其醉止，降福无疆。

卷 12_33【郊庙歌辞·祭汾阴乐章·顺和】

源光裕

方丘既膳，嘉飧载谧。齐敬毕诚，陶匏贵质。
秀毕丰荐，芳俎盈实。永永福流，其升如日。

卷 12_34【郊庙歌辞·禅社首乐章·顺和】

至哉含柔德，万物资以生。常顺称厚载，流谦通变盈。
圣心事能察，增广陈厥诚。黄祇僊如在，泰折俟咸亨。

卷 12_35【郊庙歌辞·禅社首乐章·太和】

肃我成命，于昭黄祇。裘冕而祀，陟降在斯。
五音克备，八音聿施。缉熙肆靖，厥心匪离。

· 全唐诗 ·

卷 12_36【郊庙歌辞·禅社首乐章·肃和】

黄祗是祗，我其夙夜。寅畏诚絜，匪遑宁舍。
礼以琮玉，荐厥茅藉。念兹降康，胡宁克暇。

卷 12_37【郊庙歌辞·禅社首乐章·雍和】

夙夜宥密，不敢宁宴。五齐既陈，八音在县。
粢盛以洁，房俎斯荐。惟德惟馨，尚兹克遍。

卷 12_38【郊庙歌辞·禅社首乐章·寿和】

惟以明发，有怀载殷。乐盈而反，礼顺其禋。
立清以献，荐欲是亲。于穆不已，哀对斯臻。

卷 12_39【郊庙歌辞·禅社首乐章·福和】

穆穆天子，告成岱宗。大裘如濡，执珽有颙。
乐以平志，礼以和容。上帝临我，云胡肃邕。

卷 12_40【郊庙歌辞·禅社首乐章·太和】

昭昭有唐，天俾万国。列祖应命，四宗顺则。

· 全唐诗 ·

申锡无疆，宗我同德。曾孙继序，享神配极。

卷 12_41【郊庙歌辞·禅社首乐章·灵具醉】

灵具醉，杳熙熙。灵将往，眇褻褻。
顾明德，吐正辞。烂遗光，流祯祺。

卷 12_42【郊庙歌辞·祭神州乐章·肃和】

大矣坤仪，至哉神县。包含日域，牢笼月窟。
露絜三清，风调六变。皇祇介祉，式歆恭荐。

卷 12_43【郊庙歌辞·祭神州乐章·雍和】

泰折严享，阴郊展敬。礼以导神，乐以和性。
黝牲在列，黄琮俯映。九土既平，万邦贻庆。

卷 12_44【郊庙歌辞·祭神州乐章·舒和】

坤道降祥和庶品，灵心载德厚群生。
水土既调三极泰，文武毕备九区平。

· 全唐诗 ·

卷 12_45【郊庙歌辞·祭神州乐章·迎神】

黄舆厚载，赤寰归德。含育九区，保安万国。
诚敬无怠，禋祀有则。乐以迎神，其仪不忒。

卷 12_46【郊庙歌辞·祭神州乐章·送神】

神州阴祀，洪恩广济。草树沾和，飞沉沐惠。
礼修鼎俎，奠歆瑶币。送乐有章，灵轩其逝。

卷 12_47【郊庙歌辞·祭太社乐章·肃和】

后土凝德，神功协契。九域底平，两仪交际。
戊期应序，阴墉展币。灵车少留，俯歆樽桂。

卷 12_48【郊庙歌辞·祭太社乐章·雍和】

美报崇本，严恭展事。受露疏坛，承风启地。
絜粢登俎，醇牺入馈。介福远流，群生毕遂。

卷 12_49【郊庙歌辞·祭太社乐章·舒和】

神道发生敷九稼，阴极乘仁畅八埏。

· 全唐诗 ·

纬武经文隆景化，登祥荐祉启丰年。

卷 12_50【郊庙歌辞·祭太社乐章·迎神】

烈山有子，后土有臣。播种百谷，济育兆人。
春官缉礼，宗伯司禋。戊为吉日，迎享兹辰。

卷 12_51【郊庙歌辞·祭太社乐章·送神】

吉祥式就，酬功载毕。亲地尊天，礼文经术。
觐征令序，福流初日。神驭爰归，祠官其出。

卷 12_52【郊庙歌辞·蜡百神乐章·肃和】

序迫岁阴，日躔星纪。爰稽茂典，聿崇清祀。
绮帟霞舒，瑞珪虹起。百禩垂裕，万灵荐祉。

卷 12_53【郊庙歌辞·蜡百神乐章·雍和】

缇籥劲序，玄英晚候。姬蜡开仪，鹵歌入奏。
蕙馥雕俎，兰芬玉酎。大享明祇，永绥多祐。

· 全唐诗 ·

卷 12_54【郊庙歌辞·蜡百神乐章·舒和】

经纬两仪文化洽，削平方域武功成。
瑶弦自乐乾坤泰，玉戚长欢区宇宁。

卷 12_55【郊庙歌辞·蜡百神乐章·迎神】

八蜡开祭，万物合祀。上极天维，下穷坤纪。
鼎俎流芬，樽彝荐美。有灵有祇，咸希来止。

卷 12_56【郊庙歌辞·蜡百神乐章·送神】

十旬欢洽，一日祠终。澄彝拂俎，报德酬功。
虑虔容肃，礼缛仪丰。神其降祉，整驭随风。

卷 12_57【郊庙歌辞·享先农乐章·咸和】

粒食伊始，农之所先。古今攸赖，是曰人天。
耕斯帝籍，播厥公田。式崇明祀，神其福焉。

卷 12_58【郊庙歌辞·享先农乐章·肃和】

樽彝既列，瑚簋方荐。歌工载登，币礼斯奠。

· 全唐诗 ·

肃肃享祀，颋颋纓弁。神之听之，福流寰县。

卷 12_59【郊庙歌辞·享先农乐章·雍和】

前夕视牲，质明奉俎。沐芳整弁，其仪式序。
盛礼毕陈，嘉乐备举。歆我懿德，非馨稷黍。

卷 12_60【郊庙歌辞·享先农乐章·舒和】

羽籥低昂文缀已，干戚蹈厉武行初。
望岁祈农神所听，延祥介福岂云虚。

卷 12_61【郊庙歌辞·享先农乐章·咸和】

三推礼就，万庾祈凝。夤宾志远，蕙袞惟兴。
降歆肃荐，垂祐祗膺。送神有乐，神其上升。

卷 12_62【郊庙歌辞·享先蚕乐章·永和】

芳春开令序，韶苑畅和风。惟灵申广祐，利物表神功。
绮会周天宇，黼黻藻寰中。庶几承庆节，歆奠下帷宫。

· 全唐诗 ·

卷 12_63【郊庙歌辞·享先蚕乐章·肃和】

明灵光至德，深功掩百神。祥源应节启，福绪逐年新。
万宇承恩覆，七庙伫恭禋。于兹申至恳，方期远庆臻。

卷 12_64【郊庙歌辞·享先蚕乐章·展敬】

霞庄列宝卫，云集动和声。金卮荐绮席，玉帛委芳庭。
因心罄丹款，先已励苍生。所冀延明福，于兹享至诚。

卷 12_65【郊庙歌辞·享先蚕乐章·絜诚】

桂筵开玉俎，兰圃荐琼芳。八音调凤历，三献奉鸾觞。
絜粢申大享，庭宇冀降祥。神其覃有庆，契福永无疆。

卷 12_66【郊庙歌辞·享先蚕乐章·昭庆】

仙坛礼既毕，神驾俨将升。伫属深祥起，方期庶绩凝。
虔诚资宇内，务本勸黎蒸。灵心昭备享，率土洽休征。

卷 12_67【郊庙歌辞·释奠文宣王乐章·诚和】

圣道日用，神几不测。金石以陈，弦歌载陟。

· 全唐诗 ·

爰释其菜，匪馨于稷。来顾来享，是宗是极。

卷 12_68【郊庙歌辞·释奠文宣王乐章·承和】

万国以贞光上嗣，三善茂德表重轮。
视膳寝门尊要道，高辟崇贤引正人。

卷 12_69【郊庙歌辞·释奠文宣王乐章·肃和】

粤惟上圣，有纵自天。傍周万物，俯应千年。
旧章允著，嘉贄孔虔。王化兹首，儒风是宣。

卷 12_70【郊庙歌辞·释奠文宣王乐章·雍和】

堂献瑶筐，庭敷璆县。礼备其容，乐和其变。
肃肃亲享，雍雍执奠。明德惟馨，蘋蘩可荐。

卷 12_71【郊庙歌辞·释奠文宣王乐章·舒和】

隼集龟开昭圣烈，龙蹲凤峙肃神仪。
尊儒敬业宏图阐，纬武经文盛德施。

· 全唐诗 ·

卷 12_72【郊庙歌辞·享孔子庙乐章·迎神】

通吴表圣，问老探真。三千弟子，五百贤人。
亿龄规法，万载嗣禋。洁诚以祭，奏乐迎神。

卷 12_73【郊庙歌辞·享孔子庙乐章·送神】

醴溢牺象，羞陈俎豆。鲁壁类闻，泗川如觐。
里校覃福，胄筵承祐。雅乐清音，送神具奏。

卷 12_74【郊庙歌辞·释奠武成王乐章·迎神】

卜畋不从，兆发非熊。乃倾荒政，爰佐一戎。
盛烈载垂，命祀惟崇。日练上戊，宿严闕宫。
迎奏嘉至，感而遂通。

卷 12_75【郊庙歌辞·释奠武成王乐章·奠币登歌】

管磬升，膋芻集。上公进，嘉币执。信以通，僇如及。
恢帝功，锡后邑。四维张，百度立。绵亿载，邈难挹。

· 全唐诗 ·

卷 12_76【郊庙歌辞·释奠武成王乐章·迎俎酌献】

五齐洁，九牢硕。椀楸循，罍斝涤。进具物，扬鸿绩。
和奏发，高灵寂。虔告终，繁祉锡。昭秩祀，永无易。

卷 12_77【郊庙歌辞·释奠武成王乐章·亚献终献】

贰觞以献，三变其终。顾此非馨，尚达斯衷。茅缩可致，
神歆载融。始神翊周，拯溺除凶。时维降祐，永绝兴戎。

卷 12_78【郊庙歌辞·释奠武成王乐章·送神】

明祀方终，备乐斯阕。黝纁就瘞，豆笾告撤。
肸蚨尚余，光景云灭。返归虚极，神心则悦。

卷 12_79【郊庙歌辞·享龙池乐章·第一章】

姚崇

恭闻帝里生灵沼，应报明君鼎业新。既协翠泉光宝命，
还符白水出真人。此时舜海潜龙跃，此地尧河带马巡。
独有前池一小雁，叨承旧惠入天津。

· 全唐诗 ·

卷 12_80【郊庙歌辞·享龙池乐章·第二章】

蔡孚

帝宅王家大道边，神马龙龟涌圣泉。昔日昔时经此地，
看来看去渐成川。歌台舞榭宜正月，柳岸梅洲胜往年。
莫言波上春云少，只为从龙直上天。

卷 12_81【郊庙歌辞·享龙池乐章·第三章】

沈佺期

龙池跃龙龙已飞，龙德光天天不违。池开天汉分黄道，
龙向天门入紫微。邸第楼台多气色，君王鳧雁有光辉。
为报寰中百川水，来朝此地莫东归。

卷 12_82【郊庙歌辞·享龙池乐章·第四章】

卢怀慎

代邸东南龙跃泉，清漪碧浪远浮天。楼台影就波中出，
日月光疑镜里悬。雁沼回流成舜海，龟书荐祉应尧年。
大川既济惭为楫，报德空思奉细涓。

· 全唐诗 ·

卷 12_83【郊庙歌辞·享龙池乐章·第五章】

姜皎

龙池初出此龙山，常经此地谒龙颜。日日芙蓉生夏水，
年年杨柳变春湾。尧坛宝匣余烟雾，舜海渔舟尚往还。
愿似飘飘五云影，从来从去九天间。

卷 12_84【郊庙歌辞·享龙池乐章·第六章】

崔日用

龙兴白水汉兴符，圣主时乘运斗枢。岸上丰茸五花树，
波中的皪千金珠。操环昔闻迎夏启，发匣先来瑞有虞。
风色云光随隐见，赤云神化象江湖。

卷 12_85【郊庙歌辞·享龙池乐章·第七章】

苏颋

西京凤邸跃龙泉，佳气休光镇在天。轩后雾图今已得，
秦王水剑昔常传。恩鱼不似昆明钓，瑞鹤长如太液仙。
愿侍巡游同旧里，更闻箫鼓济楼船。

· 全唐诗 ·

卷 12_86【郊庙歌辞·享龙池乐章·第八章】

李义

星分邑里四人居，水洊源流万顷余。魏国君王称象处，
晋家藩邸化龙初。青蒲暂似游梁马，绿藻还疑宴镐鱼。
自有神灵滋液地，年年云物史官书。

卷 12_87【郊庙歌辞·享龙池乐章·第九章】

姜晞

灵沼萦回邸第前，浴日涵天写曙天。始见龙台升凤阙，
应如霄汉起神泉。石匱渚傍还启圣，桃李初生更有仙。
欲化帝图从此受，正同河变一千年。

卷 12_88【郊庙歌辞·享龙池乐章·第十章】

裴瓘

乾坤启圣吐龙泉，泉水年年胜一年。始看鱼跃方成海，
即睹龙飞利在天。洲渚遥将银汉接，楼台直与紫微连。
休气荣光常不散，悬知此地是神仙。

· 全唐诗 ·

第十三卷

卷 13_1【郊庙歌辞·享太庙乐章·永和】

於穆烈祖，弘此丕基。永言配命，子孙保之。
百神既洽，万国在兹。是用孝享，神其格思。

卷 13_2【郊庙歌辞·享太庙乐章·肃和】

大哉至德，允兹明圣。格于上下，聿遵诚敬。
嘉乐斯登，鸣球以咏。神其降止，式隆景命。

卷 13_3【郊庙歌辞·享太庙乐章·雍和】

崇兹享祀，诚敬兼至。乐以感灵，礼以昭事。
粢盛咸絜，牲牷孔备。永言孝思，庶几不匮。

卷 13_4【郊庙歌辞·享太庙乐章·长发舞】

睿哲维唐，长发其祥。帝命斯祐，王业克昌。

· 全唐诗 ·

配天载德，就日重光。本支百代，申锡无疆。

卷 13_5【郊庙歌辞·享太庙乐章·大基舞】

猗与祖业，皇矣帝先。翦商德厚，封唐庆延。
在姬犹稷，方晋喻宣。基我鼎运，于万斯年。

卷 13_6【郊庙歌辞·享太庙乐章·大成舞】

周称王季，晋美帝文。明明盛德，穆穆齐芬。
藏用四履，屈道三分。铿锵钟石，载纪鸿勋。

卷 13_7【郊庙歌辞·享太庙乐章·大明舞】

五纪更运，三正递升。勋华既没，禹汤勃兴。
神武命代，灵眷是膺。望云彰德，察纬告征。
上纽天维，下安地轴。征师涿野，万国咸服。
偃伯灵台，九官允穆。殊域委赉，怀生介福。
大礼既饰，大乐已和。黑章扰圉，赤字浮河。
功宣载籍，德被咏歌。克昌厥后，百禄是荷。

卷 13_8【郊庙歌辞·享太庙乐章·寿和】

八音斯奏，三献毕陈。宝祚惟永，晖光日新。

· 全唐诗 ·

卷 13_9【郊庙歌辞·享太庙乐章·舒和】

圣敬通神光七庙，灵心荐祚和万方。
严禋克配鸿基远，明德惟馨凤历昌。

卷 13_10【郊庙歌辞·享太庙乐章·雍和】

於穆清庙，聿修严祀。四县载陈，三献斯止。
笾豆彻荐，人祗介祉。神维格思，锡祚不已。

卷 13_11【郊庙歌辞·享太庙乐章·永和】

肃肃清祀，烝烝孝思。荐享昭备，虔恭在兹。
雍歌彻俎，祝嘏陈辞。用光武志，永固鸿基。

卷 13_12【郊庙歌辞·享太庙乐章·崇德舞】

五运改卜，千龄启圣。彤云晓聚，黄星夜映。
叶阐珠囊，基开玉镜。下临万宇，上齐七政。
雾开三象，尘清九服。海濂星晖，远安迓肃。
天地交泰，华夷辑睦。翔泳归仁，中外禔福。
绩逾黜夏，勋高翦商。武陈七德，刑设三章。
祥禽巢阁，仁兽游梁。卜年惟永，景福无疆。

· 全唐诗 ·

卷 13_13【郊庙歌辞·享太庙乐章·钧天舞】

承天抚箬，纂圣登皇。遐清万宇，仰协三光。
功成日用，道济时康。璇图载永，宝历斯昌。
日月扬晖，烟云烂色。河岳修贡，神祇效职。
舜风攸偃，尧曦先就。睿感通寰，孝思浹宙。
奉扬先德，虔遵曩狩。展义天扃，飞英云岫。
化逸王表，神凝帝先。乘云厌俗，驭日登玄。

卷 13_14【郊庙歌辞·享太庙乐章·太和舞】

广乐既备，嘉荐既新。述先惟德，孝飨惟亲。
七献具举，五齐毕陈。锡兹祚福，于万斯春。

卷 13_15【郊庙歌辞·享太庙乐章·景云舞】

惟睿作圣，惟圣登皇。精感耀魄，时膺会昌。
舜惭大孝，尧推让王。能事斯极，振古谁方。
文明履运，车书同轨。巍巍赫赫，尽善尽美。
衢室凝旒，大庭端扆。释负之寄，事光复子。
脱屣高天，登遐上玄。龙湖超忽，象野芊绵。
游衣复道，荐果初年。新庙奕奕，明德配天。

· 全唐诗 ·

卷 13_16【郊庙歌辞·享太庙乐章·光大舞】

大业龙祉，徽音骏尊。潜居皇德，赫嗣天昆。
展仪宗祖，重诚孝孙。春秋无极，享奏存存。

卷 13_17【郊庙歌辞·享太庙乐章·迎神】

七庙观德，百灵攸仰。俗荷财成，物资含养。
道光执契，化笼提象。肃肃雍雍，神其来飨。

卷 13_18【郊庙歌辞·享太庙乐章·金奏】

肃肃清庙，巍巍盛唐。配天立极，累圣重光。
乐和管磬，礼备烝尝。永惟来格，降福无疆。

卷 13_19【郊庙歌辞·享太庙乐章·送神】

五声备奏，三献终祠。车移凤辇，旆转虹旗。
礼周筮豆，诚效虔祗。皇灵徙跸，簪绅拜辞。

卷 13_20【郊庙歌辞·武后享清庙乐章十首·第一】

建清庙，赞玄功。择吉日，展禋宗。

· 全唐诗 ·

乐已变，礼方崇。望神驾，降仙宫。

卷 13_21【郊庙歌辞·武后享清庙乐章十首·第二】

隆周创业，宝命惟新。敬宗茂典，爰表虔禋。
声明已备，文物斯陈。肃容如在，恳志方申。

卷 13_22【郊庙歌辞·武后享清庙乐章十首·第三登歌】

肃敷大礼，上谒尊灵。敬陈筐币，载表丹诚。

卷 13_23【郊庙歌辞·武后享清庙乐章十首·第四迎神】

敬奠蘋藻，式罄虔襟。洁诚斯展，伫降灵歆。

卷 13_24【郊庙歌辞·武后享清庙乐章十首·第五饮福】

爰陈玉醴，式奠琼浆。灵心有穆，介福无疆。

卷 13_25【郊庙歌辞·武后享清庙乐章十首·第六送文舞】

帝图草创，皇业初开。功高佐命，业赞云雷。

· 全唐诗 ·

卷 13_26【郊庙歌辞·武后享清庙乐章十首·第七迎武舞】

赫赫玄功被穹壤，皇皇至德洽生灵。
开基拨乱妖氛廓，佐命宣威海内清。

卷 13_27【郊庙歌辞·武后享清庙乐章十首·第八武舞作】

荷恩承顾托，执契恭临抚。庙略静边荒，天兵耀神武。

卷 13_28【郊庙歌辞·武后享清庙乐章十首·第九彻俎】

登歌已阕，献礼方周。钦承景福，肃奉鸿休。

卷 13_29【郊庙歌辞·武后享清庙乐章十首·第十送神】

大礼言毕，仙卫将归。莫申丹恳，空瞻紫微。

卷 13_30【郊庙歌辞·享太庙乐章·严和】

肃肃清庙，赫赫玄猷。功高万古，化奄十洲。
中兴丕业，上荷天休。祇奉先构，礼备怀柔。

· 全唐诗 ·

卷 13_31【郊庙歌辞·享太庙乐章·升和】

顾惟菲薄，纂历应期。中外同轨，夷狄来思。
乐用崇德，礼以陈词。夕惕若厉，钦奉弘基。

卷 13_32【郊庙歌辞·享太庙乐章·虔和】

礼标荐鬯，肃事祠庭。敬申如在，敢托非馨。

卷 13_33【郊庙歌辞·享太庙乐章·歆和】

崇禋已备，粢盛聿修。洁诚斯展，钟石方遒。

卷 13_34【郊庙歌辞·享太庙乐章·承光舞】

金相载穆，玉裕重辉。养德清禁，承光紫微。
乾宫候色，震象增威。监国方永，宾天不归。
孝友自衷，温文性与。龙楼正启，鹤驾斯举。
丹宸流念，鸿名式序。中兴考室，永陈彝俎。

卷 13_35【郊庙歌辞·享太庙乐章·延和】

巍巍累圣，穆穆重光。奄有区夏，祚启隆唐。

· 全唐诗 ·

百蛮饮泽，万国来王。本枝亿载，鼎祚逾长。

卷 13_36【郊庙歌辞·享太庙乐章·同和】

惟圣配天敷盛礼，惟天为大阐洪名。
恭禋展敬光先德，蘋藻申虔表志诚。

卷 13_37【郊庙歌辞·享太庙乐章·宁和】

炎馱失天纲，土德承天命。英猷被寰宇，懿躅隆邦政。
七德已绥边，九夷咸底定。景化覃遐迩，深仁洽翔泳。

卷 13_38【郊庙歌辞·享太庙乐章·恭和】

礼周三献，乐阕九成。肃承灵福，悚惕兼盈。

卷 13_39【郊庙歌辞·享太庙乐章·通和】

祠容既毕，仙座爰兴。亭亭凤举，霭霭云升。
长隆宝运，永锡休征。福覃貺厥，恩被黎蒸。

· 全唐诗 ·

卷 13_40【郊庙歌辞·享太庙乐章·昭和】

道洽二仪交泰，时休四宇和平。
环珮肃于庭实，钟石扬乎颂声。

卷 13_41【郊庙歌辞·享太庙乐章·诚敬】

顾惟菲质，忝位椒宫。虔奉蘋藻，肃事神宗。
敢申诚絜，庶罄深衷。睟容有裕，灵享无穷。

卷 13_42【郊庙歌辞·享太庙乐章·肃和】

月礼已周，云和将变。爰献其醑，载迁其奠。
明德逾隆，非馨是荐。泽沾动植，仁覃宇县。

卷 13_43【郊庙歌辞·享太庙乐章·昭感】

铿锵韶濩，肃穆神容。洪规赫赫，祠典雍雍。
已周三献，将乘六龙。虔诚有托，恳志无从。

卷 13_44【郊庙歌辞·享太庙乐章·永和三章】

肃九室，谐八音。歌皇慕，动神心。

· 全唐诗 ·

礼宿设，乐妙寻。声明备，裸奠临。

律迺气，音入玄。依玉几，御黼筵。
聆愆息，僭周旋。九韶遍，百福传。

信工祝，永颂声。来祖考，听和平。
相百辟，贡九瀛。神休委，帝孝成。

卷 13_45【郊庙歌辞·享太庙乐章·太和】

时文圣后，清庙肃邕。致诚勤荐，在貌思恭。
玉节肆夏，金锵五钟。绳绳云步，穆穆天容。

卷 13_46【郊庙歌辞·享太庙乐章·肃和】

天子享孝，工歌溥将。躬裸郁鬯，乃焚膋芻。
臭以达阴，声以求阳。奉时烝尝，永代不忘。

卷 13_47【郊庙歌辞·享太庙乐章·雍和二章】

在涤嘉豢，丽碑敬牲。角握之牡，色纯之騂。
火传阳燧，水溉阴精。太公胖俎，传说和羹。

俎豆有馥，粢盛絜丰。亦有和羹，既戒既平。

· 全唐诗 ·

鼓钟管磬，肃唱和鸣。皇皇后祖，来我思成。

卷 13_48【郊庙歌辞·享太庙乐章·文舞】

圣谟九德，真言五千。庆集昌胄，符开帝先。
高文杖钺，克配彼天。三宗握镜，六合涣然。
帝其承祀，率礼罔愆。图书雾出，日月清悬。
舞形德类，咏谥功传。黄龙蜿蟺，彩云蹁跹。
五行气顺，八佾风宣。介此百禄，于皇万年。

卷 13_49【郊庙歌辞·享太庙乐章·光大舞】

肃肃艺祖，滔滔浚源。有雄玉剑，作镇金门。
玄王贻绪，后稷谋孙。肇禋九庙，四海来尊。

卷 13-50【郊庙歌辞·享太庙乐章·长发舞】

具祀崇德，备乐承风。魏推幢主，周赠司空。
不行而至，无成有终。神兴王业，天归帝功。

卷 13-51【郊庙歌辞·享太庙乐章·大政舞】

於赫元命，权舆帝文。天齐八柱，地半三分。

· 全唐诗 ·

宗庙观德，笙镛乐勋。封唐之兆，成天下君。

卷 13-52【郊庙歌辞·享太庙乐章·大成舞】

帝舞季历，龙圣生昌。后歌有蟠，胎炎孚黄。
天地合德，日月齐光。肃雍孝享，祚我万方。

卷 13-53【郊庙歌辞·享太庙乐章·大明舞】

赤精乱德，四海困穷。黄旗举义，三灵会同。
旱望春雨，云披大风。溥天来祭，高祖之功。

卷 13-54【郊庙歌辞·享太庙乐章·崇德舞】

皇合一德，朝宗百神。削平天地，大拯生人。
上帝配食，单于入臣。戎歌陈舞，晔晔震震。

卷 13-55【郊庙歌辞·享太庙乐章·钧天舞】

高皇迈道，端拱无为。化怀獯鬻，兵赋句骊。
礼尊封禅，乐盛来仪。合位娲后，同称伏羲。

· 全唐诗 ·

卷 13-56【郊庙歌辞·享太庙乐章·大和舞】

退居江水，郁起丹陵。礼物还归，朝章中兴。
龙图友及，骏命恭膺。鸣球香瓚，大糝是承。

卷 13-57【郊庙歌辞·享太庙乐章·景云舞】

景云霏烂，告我帝符。噫帝冲德，与天为徒。
竹籥遥远，俎豆虚无。春秋孝献，回复此都。

卷 13-58【郊庙歌辞·享太庙乐章·福和】

备礼用乐，崇亲致尊。诚通慈降，敬彻爱存。
献礼称寿，啐感承恩。皇帝孝德，子孙千亿。
大包天域，长亘不极。

卷 13-59【郊庙歌辞·享太庙乐章·舒和】

六钟翕协六变成，八佾徜徉八风生。
乐九韶兮人神感，美七德兮天地清。

· 全唐诗 ·

卷 13_60 【郊庙歌辞·享太庙乐章·凯安四章】

瑟彼瑶爵，亚惟上公。室如屏气，门不容躬。
礼殷其本，乐执其中。圣皇永慕，天地幽通。

礼匝三献，乐遍九成。降循轩陛，仰歆皇情。
福与仁合，德因孝明。百年神畏，四海风行。

总总干戚，填填鼓钟。奋扬争气，坐作为容。
离若鸷鸟，合如战龙。万方观德，肃肃雍雍。

烈祖顺三灵，文宗威四海。黄钺诛群盗，朱旗扫多罪。
戢兵天下安，约法人心改。大哉干羽意，长见风云在。

卷 13_61 【郊庙歌辞·享太庙乐章·登歌】

止笙磬，撤豆筯。廓无响，窅入玄。主在室，神在天。
情馀慕，礼罔愆。喜黍稷，屡丰年。

卷 13_62 【郊庙歌辞·享太庙乐章·永和】

眇嘉乐，授灵爽。感若来，思如往。休气散，回风上。
返寂寞，还惚恍。怀灵驾，结空想。

· 全唐诗 ·

卷 13_63 【郊庙歌辞·享太庙乐章·广运舞】郭子仪

於赫皇祖，昭明有融。惟文之德，惟武之功。
河海静谧，车书混同。虔恭孝飨，穆穆玄风。

卷 13_64 【郊庙歌辞·享太庙乐章·惟新舞】

刘晏

汉祚惟永，神功中兴。风驱氛祲，天覆黎蒸。
三光再朗，庶绩其凝。重熙累洽，景命是膺。

卷 13_65 【郊庙歌辞·享太庙乐章·保大舞】

郭子仪

於穆文考，圣神昭章。肃勺群慝，含光远方。
万物茂遂，九夷宾王。愔愔云韶，德音不忘。

卷 13_66 【郊庙歌辞·享太庙乐章·文明舞】

郑馀庆

开邸除暴，时迈勋尊。三元告命，四极骏奔。
金枝翠叶，辉烛瑶琨。象德亿载，贻庆汤孙。

· 全唐诗 ·

卷 13_67 【郊庙歌辞·享太庙乐章·大顺舞】

郑絪

於穆时文，受天明命。允恭玄默，化成理定。
出震嗣德，应乾传圣。猗欤缉熙，千亿流庆。

卷 13_68 【郊庙歌辞·享太庙乐章·象德舞】

段文昌

肃肃清庙，登显至德。泽周八荒，兵定四极。
生物咸遂，群盗灭息。明圣钦承，子孙千亿。

卷 13_69 【郊庙歌辞·享太庙乐章·和宁舞】

牛僧孺

湜湜颙颙，融昭德辉。不纽不舒，贯成九围。
武烈文经，敷施当宜。纂尧付启，亿万熙熙。

卷 13_70 【郊庙歌辞·享太庙乐章·大定舞】

李回

· 全唐诗 ·

受天明命，敷佑下土。化时以俭，卫文以武。
氛消夷夏，俗臻往古。亿万斯年，形于律吕。

卷 13_71 【郊庙歌辞·享太庙乐章·宣宗室舞】

夏侯孜

於铎令主，圣祚重昌。兴起教义，申明典章。
俗尚素朴，人皆乐康。积德可报，流庆无疆。

卷 13_72 【郊庙歌辞·享太庙乐章·懿宗室舞】

萧仿

圣祚无疆，庆传乐章。金枝繁茂，玉叶延长。
海渎常晏，波涛不扬。汪汪美化，垂范今王。

卷 13_73 【郊庙歌辞·享太庙乐章·咸宁舞】

於铎丕嗣，惟帝之光。羽籥象德，金石荐祥。
圣系无极，景命永昌。神降上哲，维天配长。

· 全唐诗 ·

第十四卷

卷 14_1【郊庙歌辞·太清宫乐章·煌煌】

煌煌道宫，肃肃太清。礼光尊祖，乐备充庭。
罄竭诚至，希夷降灵。云凝翠盖，风焰红旗。
众真以从，九奏初迎。永惟休祐，是锡和平。

卷 14_2【郊庙歌辞·太清宫乐章·冲和】

虚无结思，钟磬和音。歌以颂德，香以达心。
礼殊裸鬯，义感昭临。灵车至止，庆垂愔愔。

卷 14_3【郊庙歌辞·太清宫乐章·香初上】

肃肃我祖，绵绵道宗。至感潜达，灵心暗通。
云輶御气，芝盖随风。四时禋祀，万国来同。

卷 14_4【郊庙歌辞·太清宫乐章·再上】

仙宗绩道，我李承天。庆深虚极，符光象先。

· 全唐诗 ·

俗登仁寿，化阐螭涓。五千贻范，亿万斯年。

卷 14_5【郊庙歌辞·太清宫乐章·终上】

不宰元功，无为上圣。洪源长发，诞受天命。
金奏迎真，璇宫展盛。备礼周乐，垂光储庆。

卷 14_6【郊庙歌辞·太清宫乐章·紫极舞】

至道生元气，重圆法混成。无为观大象，冲用体常名。
仙乐临丹阙，云车出玉京。灵符百代应，瑞节九贞迎。
宝运开皇极，天临映太清。长垂一德庆，永庇万方宁。

卷 14_7【郊庙歌辞·太清宫乐章·序入破第一奏】

真宗开妙理，冲教统清虚。化演无为日，言昭有象初。
瑶台肃灵瑞，金阙映仙居。一奏三清乐，长回八景舆。

卷 14_8【郊庙歌辞·太清宫乐章·第二奏】

虚极仙宗本，希夷象帝先。百灵朝太上，万法祖重圆。
善贷惟冲德，功成谓自然。云门达和气，思用合钧天。

· 全唐诗 ·

卷 14_9【郊庙歌辞·太清宫乐章·第三奏】

元符传紫极，宝祚启高真。道德先垂裕，冲和已化淳。
人风齐太古，天瑞叶惟新。仙乐清都上，长明交泰辰。

卷 14_10【郊庙歌辞·太清宫乐章·登歌】

严禋展事，理洁烝尝。皇矣圣祖，德惟馨香。
盛荐既撤，工歌载扬。大来之庆，降福穰穰。

卷 14_11【郊庙歌辞·太清宫乐章·真和】

玉磬含香，金炉既馥。风驭泠泠，云坛肃肃。
杳归大象，霏流嘉福。俾宁万邦，无思不服。

卷 14_12【郊庙歌辞·德明兴圣庙乐章·迎神】

元尊九德，佐尧光宅。烈祖太宗，方周作伯。
响怀霜露，乐变金石。白云清风，仿佛来格。

卷 14_13【郊庙歌辞·德明兴圣庙乐章·登歌奠币】

四时有典，百事来祭。尊祖奉宗，严禋大帝。

· 全唐诗 ·

礼先苍璧，奠币黝制。于斯万年，熙成帝系。

卷 14_14【郊庙歌辞·德明兴圣庙乐章·迎俎】

盛牲实俎，涓选休成。鼎燧阳燧，玉盥阴精。
有飴嘉豆，既和大羹。侑以清乐，细齐人情。

卷 14_15【郊庙歌辞·德明兴圣庙乐章·德明酌献】

清庙奕奕，和乐雍雍。器尊牺象，礼属宗公。
白水方裸，黄流在中。谟明之德，万古清风。

卷 14_16【郊庙歌辞·德明兴圣庙乐章·兴圣酌献】

闕宫静谧，合乐周张。泰奠始献，百末重觴。
震澹存诚，庶几迪尝。遥源之祚，天汉灵长。

卷 14_17【郊庙歌辞·德明兴圣庙乐章·亚献终献】

惟清惟肃，靡闻靡见。举备九成，俯终三献。
庆彰曼寿，胙彻嘉荐。瘞玉埋牲，礼神斯遍。

· 全唐诗 ·

卷 14_18【郊庙歌辞·德明兴圣庙乐章·送神】

元精回复，灵贶繁滋。风洒兰路，云摇桂旗。
高丘缅邈，凉部逶迟。瞻望靡及，缠绵永思。

卷 14_19【郊庙歌辞·仪坤庙乐章·永和】

徐彦伯

猗若清庙，肃肃荧荧。国荐严祀，坤兴淑灵。
有几在室，有乐在庭。临兹孝享，百禄惟宁。

卷 14_20【郊庙歌辞·仪坤庙乐章·金奏（本无此章）】

阴灵曜祉，轩曜降精。祥符淑气，庆集柔明。
瑶俎既列，雕桐发声。徽猷永远，比德皇英。

卷 14_21【郊庙歌辞·仪坤庙乐章·太和】

丘说

孝哉我后，冲乎乃圣。道映重华，德辉文命。
慕深视箴，情殷抚镜。万国移风，兆人承庆。

· 全唐诗 ·

卷 14_22【郊庙歌辞·仪坤庙乐章·肃和】

张齐贤

裸圭既濯，郁鬯既陈。画幕云举，黄流玉醇。
仪充献酌，礼盛众禋。地察惟孝，愉焉飨亲。

卷 14_23【郊庙歌辞·仪坤庙乐章·雍和】

郑善玉

酌郁既灌，芻萧方蕪。笱豆静器，簠簋芬饎。
鱼腊荐美，牲牷表洁。是戢是将，载迎载列。

卷 14_24【郊庙歌辞·仪坤庙乐章·昭升】

薛稷

阳灵配德，阴魄昭升。尧坛凤下，汉室龙兴。
伫天作对，前旒是凝。化行南国，道盛西陵，
造舟集灌，无德而称。我粢既絜，我醴既澄。
阴阴灵庙，光灵若凭。德馨惟享，孝思烝烝。

· 全唐诗 ·

卷 14_25【郊庙歌辞·仪坤庙乐章·坤贞】

乾道既亨，坤元以贞。肃雍攸在，辅佐斯成。
外睦九族，内光一庭。克生睿哲，祚我休明。
钦若徽范，悠哉淑灵。建兹清宫，于彼上京。
缩茅以献，絜粢惟馨。实受其福，期乎亿龄。

卷 14_26【郊庙歌辞·仪坤庙乐章·寿和】

徐坚

於穆清庙，肃雍严祀。合福受釐，介以繁祉。

卷 14_27【郊庙歌辞·仪坤庙乐章·舒和】

胡雄

送文迎武递参差，一始一终光圣仪。
四海生人歌有庆，千龄孝享肃无亏。

· 全唐诗 ·

卷 14_28【郊庙歌辞·仪坤庙乐章·安和】

刘子玄

妙算申帷幄，神谋及庙庭。两阶文物备，七德武功成。
校猎长杨苑，屯军细柳营。将军献凯入，歌舞溢重城。

卷 14_29【郊庙歌辞·仪坤庙乐章·雍和】

员半千

孝享云毕，惟彻有章。云感玄羽，风凄素商。
瞻望神座，祗恋匪遑。礼终乐阕，肃雍锵锵。

卷 14_30【郊庙歌辞·仪坤庙乐章·永和】

祝钦明

闕宫实实，清庙微微。降格无象，馨香有依。
式昭纂庆，方融嗣徽。明禋是享，神保聿归。

卷 14_31【郊庙歌辞·仪坤庙乐章·迎神】

月灵降德，坤元授光。娥英比秀，任姒均芳。

· 全唐诗 ·

瑶台荐祉，金屋延祥。迎神有乐，歆此嘉芻。

卷 14_32【郊庙歌辞·仪坤庙乐章·送神】

太帛仪大，金丝奏广。灵应有孚，冥征不爽。
降彼休福，歆兹禋享。送乐有章，神麾其上。

卷 14_33【郊庙歌辞·昭德皇后庙乐章·永和】

穆清庙，荐严禋。昭礼备，和乐新。
望灵光，集元辰。祚无极，享万春。

卷 14_34【郊庙歌辞·昭德皇后庙乐章·肃和】

诚心达，娱乐分。升箫管，郁氛氲。
茅既缩，鬯既薰。后来思，福如云。

卷 14_35【郊庙歌辞·昭德皇后庙乐章·雍和】

我将我享，尽明而诚。载芬黍稷，载涤牺牲。
懿矣元良，万邦以贞。心乎爱敬，若睹容声。

· 全唐诗 ·

卷 14_36【郊庙歌辞·昭德皇后庙乐章·坤元】

於穆先后，丽圣称崇。母临万宇，道被六宫。
昌时协庆，理内成功。殷荐明德，传芳国风。

卷 14_37【郊庙歌辞·昭德皇后庙乐章·寿和】

工祝致告，徽音不遐。酒醴咸旨，馨香具嘉。
受釐献祉，永庆邦家。

卷 14_38【郊庙歌辞·昭德皇后庙乐章·舒和】

金枝羽部彻清歌，瑶台肃穆笙磬罗。
谐音遍响合明意，万类昭融灵应多。

卷 14_39【郊庙歌辞·昭德皇后庙乐章·凯安】

辰位列四星，帝功参十乱。进贤勤内辅，扈跸清多难。
承天厚载均，并耀宵光灿。留徽蔼前躅，万古披图焕。

卷 14_40【郊庙歌辞·昭德皇后庙乐章·雍和】

公尸既起，享礼载终。称歌进彻，尽敬繇衷。

· 全唐诗 ·

泽流惠下，大小咸同。

卷 14_41【郊庙歌辞·昭德皇后庙乐章·永和】

昭事终，幽享馀。移月御，返仙居。
璇庭寂，灵幄虚。顾裴回，感皇储。

· 全唐诗 ·

第十五卷

卷 15_1【郊庙歌辞·让皇帝庙乐章·迎神】

李舒

皇矣天宗，德先王季。因心则友，克让以位。
爰命有司，式遵前志。神其降灵，昭飨祀事。

卷 15_2【郊庙歌辞·让皇帝庙乐章·奠币】

李舒

惟帝时若，去而上仙。祀用商舞，乐备宫悬。
白璧加荐，玄纁告虔。子孙拜后，承兹吉蠲。

卷 15_3【郊庙歌辞·让皇帝庙乐章·迎俎】

李舒

祀盛体荐，礼协粢盛。方周假庙，用鲁纯牲。

· 全唐诗 ·

捧彻祇敬，击拊和鸣。受釐归胙，既戒而平。

卷 15_4【郊庙歌辞·让皇帝庙乐章·酌献】

李舒

八音具举，三寿既盥。洁兹宗彝，瑟彼圭瓚。
兰肴重错，椒醑飘散。降胙维城，永为藩翰。

卷 15_5【郊庙歌辞·让皇帝庙乐章·亚献终献】

李舒

秩礼有序，和音既同。九仪不忒，三揖将终。
孝感藩后，相维辟公。四时之典，永永无穷。

卷 15_6【郊庙歌辞·让皇帝庙乐章·送神】

李舒

奠献已事，昏昕载分。风摇雨散，灵卫絪縕。
龙驾帝服，上腾五云。泮宫复闕，寂寞无闻。

· 全唐诗 ·

卷 15_7【郊庙歌辞·享隐太子庙乐章·诚和】

道闋鹤关，运缠鸩里。门集大命，俾歆嘉祀。
礼亚六瑚，诚殚二簋。有诚颙若，神斯戾止。

卷 15_8【郊庙歌辞·享隐太子庙乐章·肃和】

岁肇春宗，乾开震长。瑶山既寂，戾园斯享。
玉肃其事，物昭其象。弦诵成风，笙歌合响。

卷 15_9【郊庙歌辞·享隐太子庙乐章·雍和】

明典肃陈，神居邃启。春伯联事，秋官相礼。
有来雍雍，登歌济济。缅维主鬯，庶歆芳醴。

卷 15_10【郊庙歌辞·享隐太子庙乐章·舒和】

三县已判歌钟列，六佾将开羽戚分。
尚想燕飞来蔽日，终疑鹤影降凌云。

卷 15_11【郊庙歌辞·享隐太子庙乐章·凯安】

天步昔将开，商郊初欲践。抚戎金阵廓，贰极瑶图阐。

· 全唐诗 ·

鸡戟遂崇仪，龙楼期好善。弄兵隳震业，启圣隆嗣典。

卷 15_12【郊庙歌辞·隐太子庙乐章·迎神】

苍震有位，黄离蔽明。江充祸结，戾据灾成。
衔冤昔痛，赠典今荣。享灵有秩，奉乐以迎。

卷 15_13【郊庙歌辞·隐太子庙乐章·送神】

皇情悼往，祀议增设。钟鼓铿锵，羽旄昭晰。
掌礼云备，司筵告彻。乐以送神，灵其鉴阒。

卷 15_14【郊庙歌辞·享章怀太子庙乐章·迎神】

副君昭象，道应黄离。铜楼备德，玉裕成规。
仙气霭霭，灵从师师。前驱戾止，控鹤来仪。

卷 15_15【郊庙歌辞·享章怀太子庙乐章·登歌酌鬯】

忠孝本著，羽翼先成。寝门昭德，驰道为程。
币帛有典，容卫无声。司存既肃，庙享惟清。

· 全唐诗 ·

卷 15_16【郊庙歌辞·享章怀太子庙乐章·迎俎酌献】

通三锡胤，明两承英。太山比赫，伊水闻笙。
宗祧是寄，礼乐其亨。嘉辰荐俎，以发声明。

卷 15_17【郊庙歌辞·享章怀太子庙乐章·送文舞迎武舞】

羽籥崇文礼以毕，干戚奋武事将行。
用舍繇来其有致，壮志宣威乐太平。

卷 15_18【郊庙歌辞·享章怀太子庙乐章·武舞作】

绿林炽炎历，黄虞格有苗。沙尘惊塞外，帷幄命嫖姚。
七德干戈止，三边云雾消。宝祚长无极，歌舞盛今朝。

卷 15_19【郊庙歌辞·享懿德太子庙乐章·迎神】

甲观昭祥，画堂升位。礼绝群后，望尊储贰。
启诵惭德，庄丕掩粹。伊浦凤翔，缙峰鹤至。

卷 15_20【郊庙歌辞·享懿德太子庙乐章·登歌酌鬯】

誉阐元储，寄崇明两。玉裕虽晦，铜楼可想。

· 全唐诗 ·

弦诵辍音，笙歌罢响。币帛言设，礼容无爽。

卷 15_21【郊庙歌辞·享懿德太子庙乐章·迎俎酌献】

雍雍盛典，肃肃灵祠。宾天有圣，对日无期。
飘飘羽服，掣曳云旗。眷言主鬯，心乎怵兹。

卷 15_22【郊庙歌辞·享懿德太子庙乐章·送文舞迎武舞】

八音协奏陈金石，六佾分行整礼容。
沧溟赴海还称少，素月开轮即是重。

卷 15_23【郊庙歌辞·享懿德太子庙乐章·武舞作】

隋季昔云终，唐年初启圣。纂戎将禁暴，崇儒更敷政。
威略静三边，仁恩覃万姓。

卷 15_24【郊庙歌辞·享节愍太子庙乐章·迎神】

储后望崇，元良寄切。寝门是仰，驰道不绝。
仙袂云会，灵旗电晰。煌煌而来，礼物攸设。

· 全唐诗 ·

卷 15_25【郊庙歌辞·享节愍太子庙乐章·登歌酌鬯】

灼灼重明，仰承元首。既贤且哲，惟孝与友。
惟孝虽遥，灵规不朽。礼因诚致，备絜玄酒。

卷 15_26【郊庙歌辞·享节愍太子庙乐章·迎俎酌献】

嘉荐有典，至诚莫骞。画梁云亘，雕俎星连。
乐器周列，礼容备宣。依稀如在，若未宾天。

卷 15_27【郊庙歌辞·享节愍太子庙乐章·送文舞出迎武舞入】

邕邕阐化凭文德，赫赫宣威藉武功。
既执羽旄先拂吹，还持玉戚更挥空。

卷 15_28【郊庙歌辞·享节愍太子庙乐章·武舞作】

武德谅雍雍，由来扫寇戎。剑光挥作电，旗影列成虹。
雾廓三边静，波澄四海同。睿图今已盛，相共舞皇风。

· 全唐诗 ·

卷 15_29【郊庙歌辞·享文敬太子庙乐章·请神】

许孟容

觴牢具品，管磬有节。祝道夤恭，神仪昭晰。
桐圭早贵，象辂追设。声达乐成，降歆丰洁。

卷 15_30【郊庙歌辞·享文敬太子庙乐章·登歌】

陈京

歌以德发，声以乐贵。乐善名存，追仙礼异。
鸾旌拱修，凤鸣合吹。神听皇慈，仲月皆至。

卷 15_31【郊庙歌辞·享文敬太子庙乐章·迎俎酌献】

冯伉

撰日瞻景，诚陈乐张。礼容秩秩，羽舞煌煌。
肃将涤濯，祇荐芬芳。永锡繁祉，思深飨尝。

卷 15_32【郊庙歌辞·享文敬太子庙乐章·送文舞迎武舞】

干旄羽籥相亏蔽，一进一退殊行缀。

· 全唐诗 ·

昔献三雍盛礼容，今陈六佾崇仪制。

卷 15_33【郊庙歌辞·享文敬太子庙乐章·亚献终献】

崔邠

醴齐泛尊彝，轩县动干戚。入室僖如在，升阶虔所历。
奋疾合威容，定利舒皦绎。方崇庙貌礼，永被君恩锡。

卷 15_34【郊庙歌辞·享文敬太子庙乐章·送神】

崔邠

三献具举，九旗将旋。追劳表德，罢享宾天。
风引仙管，堂虚画筵。芳馨常在，瞻望悠然。

卷 15_35【郊庙歌辞·享惠昭太子庙乐章·请神】

归登

嘉荐既陈，祀事孔明。闲歌在堂，万舞在庭。
外则尽物，内则尽诚。凤笙如闻，歌其洁精。

· 全唐诗 ·

卷 15_36【郊庙歌辞·享惠昭太子庙乐章·登歌】

杜羔

因心克孝，位震遗芬。宾天道茂，轸怀气分。
发祗乃祀，咳叹如闻。二歌斯升，以咏德薰。

卷 15_37【郊庙歌辞·享惠昭太子庙乐章·迎俎酌献】

李逢吉

既洁酒醴，聿陈熟腥。肃将震念，昭格储灵。
展矣礼典，薰然德馨。愔愔管磬，亦具是听。

卷 15_38【郊庙歌辞·享惠昭太子庙乐章·送文舞出迎武舞入】

孟简

喧喧金石容既缺，肃肃羽驾就行列。
缙山遗响昔所闻，庙庭进旅今攸设。

· 全唐诗 ·

卷 15_39【郊庙歌辞·享惠昭太子庙乐章·亚献终献】

裴度

重轮始发祥，齿胄方兴学。冥然升紫府，铿尔荐清乐。
奠斝致馨香，在庭纷羽籥。礼成神既醉，仿佛缙山鹤。

卷 15_40【郊庙歌辞·享惠昭太子庙乐章·送神】

王涯

威仪毕陈，备乐将阕。苞茅酒缩，膋萧香彻。
宫臣展事，肃雍在列。迎精送往，厥鉴昭晰。

卷 15_41【郊庙歌辞·武后崇先庙乐章（载《本集》）】

先德谦撝冠昔，严规节素超今。奉国忠诚每竭，
承家至孝纯深。追崇惧乖尊意，显号恐玷徽音。
既迫王公屡请，方乃俯遂群心。有限无由展敬，
莫醑每阙亲斟。大礼虔申典册，蘋藻敬荐翘襟。

卷 15_42【郊庙歌辞·褒德庙乐章·昭德】

道赫梧宫，悲盈蒿里。爰赐徽烈，载敷嘉祀。

· 全唐诗 ·

享洽四时，规陈二簋。灵应昭格，神其戾止。

卷 15_43【郊庙歌辞·褒德庙乐章·进德】

涂山懿戚，妣汭崇姻。祠筵肇启，祭典方申。
礼以备物，乐以感神。用隆敦叙，载穆彝伦。

卷 15_44【郊庙歌辞·褒德庙乐章·褒德】

家著累仁，门昭积善。瑶筐既列，金县式展。

卷 15_45【郊庙歌辞·褒德庙乐章·武舞作】

昭昭竹殿开，奕奕兰宫启。懿范隆丹掖，殊荣辟朱邸。
六佾荐徽容，三簋陈芳醴。万石覃貽厥，分珪崇祖祢。

卷 15_46【郊庙歌辞·褒德庙乐章·彰德】

名隆五岳，秩映三台。严祠已备，睟影方回。

卷 15_47【舞曲歌辞·功成庆善乐舞词】

寿丘惟旧迹，酆邑乃前基。粤余承累圣，悬弧亦在兹。

· 全唐诗 ·

弱龄逢运改，提剑郁匡时。指麾八荒定，怀柔万国夷。
梯山盛入款，驾海亦来思。单于陪武帐，日逐卫文櫜。
端宸朝四岳，无为任百司。霜节明秋景，轻冰结水湄。
芸黄遍原隰，禾颖积京坻。共乐还讌宴，欢此大风诗。

卷 15_48【舞曲歌辞·中和乐舞词】

芳岁肇佳节，物华当仲春。乾坤既昭泰，烟景含氤氲。
德浅荷玄贶，乐成思治人。前庭列钟鼓，广殿延群臣。
八卦随舞意，五音转曲新。顾非咸池奏，庶协南风薰。
式宴礼所重，浹欢情必均。同和谅在兹，万国希可亲。

卷 15_49【舞曲歌辞·凯乐歌辞·破阵乐】

受律辞元首，相将讨叛臣。咸歌破阵乐，共赏太平人。

卷 15_50【舞曲歌辞·凯乐歌辞·应圣期】

圣德期昌运，雍熙万宇清。乾坤资化育，海岳共休明。
辟土欣耕稼，销戈遂偃兵。殊方歌帝泽，执贽驾升平。

卷 15_51【舞曲歌辞·凯乐歌辞·贺圣欢】

四海皇风被，千年德水清。戎衣更不著，今日告功成。

· 全唐诗 ·

卷 15_52【舞曲歌辞·凯乐歌辞·君臣同庆乐】

主圣开昌历，臣忠奉大猷。君看偃革后，便是太平秋。

· 全唐诗 ·

第一十六卷

卷 16_1【郊庙歌辞·梁郊祀乐章·庆和】

赵光逢

就阳位，升圆丘。佩双玉，御大裘。
膺天命，拥神休。万灵感，百禄遒。

秉黄钺，建朱旗。震八表，清二仪。
帝业显，王道夷。受景命，启皇基。

开九门，怀百神。通舂蟄，接氤氲。
明粲荐，广乐陈。奠嘉璧，燎芳薪。

膺宝图，执左契。德应天，圣飨帝。
荐表衷，荷灵惠。寿万年，祚百世。

惟德动天，有感必通。秉兹一德，禋于六宗。
钦夤宝命，恭肃礼容。来顾来享，永穆皇风。

天惟佑德，辟乃奉天。交感斯在，昭事罔愆。
岁功已就，王道无偏。于焉报本，是用告虔。

· 全唐诗 ·

卷 16_2【郊庙歌辞·梁郊祀乐章·庆顺】

圣皇戾止，天步舒迟。乾乾睿相，穆穆皇仪。
进退必肃，陟降是祗。六变克协，万灵协随。

卷 16_3【郊庙歌辞·梁郊祀乐章·庆平】

天命降鉴，帝德惟馨。享祀不忒，礼容孔明。
奠璧布币，荐神献精。神祐以答，敷锡永宁。

卷 16_4【郊庙歌辞·梁郊祀乐章·庆肃】

张袞

笾豆簠簋，黍稷非馨。懿兹彝器，厥德惟明。
金石匏革，以和以平。由此无体，期乎永宁。

卷 16_5【郊庙歌辞·梁郊祀乐章·庆熙】

哲后躬享，旨酒斯陈。王恭无斁，严祀维夤。
皇祖以配，大孝以振。宜锡景福，永休下民。

· 全唐诗 ·

卷 16_6【郊庙歌辞·梁郊祀乐章·庆隆】

恭祀上帝，于国之阳。爵醴是荷，鸿基永昌。

卷 16_7【郊庙歌辞·梁郊祀乐章·庆融】

道和气兮袭氤氲，宣皇规兮彰圣神。
服遐裔兮敷质文，格苗扈兮息烟尘。

卷 16_8【郊庙歌辞·梁郊祀乐章·庆休】

大业来四夷，仁风和万国。白日体无私，皇天辅有德。
七旬罪已服，六月师方克。伟哉帝道隆，终始常作则。

卷 16_9【郊庙歌辞·梁郊祀乐章·庆和】

烟燎升，礼容彻。诚感达，人神悦。
灵贶彰，圣情结。玉座寂，金炉歇。

卷 16_10【郊庙歌辞·周郊祀乐章·昭顺乐】

五兵勿用，万国咸安。告功圆盖，受命云坛。

· 全唐诗 ·

乐鸣凤律，礼备鸡竿。神光欲降，众目遐观。

卷 16_11【郊庙歌辞·周郊祀乐章·治顺乐】

羽卫离丹阙，金轩赴泰坛。珠旗明月色，玉佩晓霜寒。
黼黻龙衣备，琮璜宝器完。百神将受职，宗社保长安。

卷 16_12【郊庙歌辞·周郊祀乐章·感顺乐】

明君陈大礼，展币祀圆丘。雅乐声齐发，祥云色正浮。

卷 16_13【郊庙歌辞·周郊祀乐章·禋顺乐】

黄彝将献，特牲预迎。既修昭事，潜达明诚。

卷 16_14【郊庙歌辞·周郊祀乐章·福顺乐】

相承五运，取法三才。大礼爰展，率土咸来。
卿云秘室，甘泉宝台。象樽初酌，受福不回。

卷 16_15【郊庙歌辞·周郊祀乐章·福顺乐】

昊天成命，邦国盛仪。多士齐列，六龙载驰。

· 全唐诗 ·

坛升泰一，乐奏咸池。高明祚德，永致昌期。

卷 16_16【郊庙歌辞·周郊祀乐章·福顺乐】

上天垂景贶，哲后举鸾觞。明德今方祚，邦家万世昌。

卷 16_17【郊庙歌辞·周郊祀乐章·忠顺乐】

木铎敷音文德昌，朱干成列武功彰。
雷鼗鹭羽今休用，玉戚相参正发扬。

卷 16_18【郊庙歌辞·周郊祀乐章·武舞乐】

圭瓚方陈礼，干旄乃象功。成文非羽籥，猛兽若罴熊。

卷 16_19【郊庙歌辞·周郊祀乐章·昭顺乐】

云门孤竹，苍璧黄琮。既祀天地，克配祖宗。
虔修盛礼，仰答玄功。神归碧落，福降无穷。

卷 16_20【郊庙歌辞·梁太庙乐舞辞·开平舞】

黍稷馨，醴醑清。牲牲洁，金石铿。

· 全唐诗 ·

恭祀事，结皇情。神来格，歌颂声。

卷 16_11【郊庙歌辞·梁太庙乐舞辞·皇帝行】

莫高者天，攀跻弗克。隋天有方，累仁积德。
祖宗隆之，子孙履之。配天明祀，永永孝思。

卷 16_12【郊庙歌辞·梁太庙乐舞辞·帝盥】

庄肃莅事，周旋礼容。裸鬯严洁，穆穆雍雍。

卷 16_13【郊庙歌辞·梁太庙乐舞辞·登歌】

於赫我皇，建中立极。动以武功，静以文德。
昭事上帝，欢心万国。大报严禋，四海述职。

卷 16_14【郊庙歌辞·梁太庙乐舞辞·大合舞】

於穆皇祖，浚哲雍熙。美溢中夏，化被南陲。
后稷累德，公刘创基。肇兴九庙，乐合来仪。

卷 16_15【郊庙歌辞·梁太庙乐舞辞·象功舞】

天地合德，睿圣昭彰。累赠太傅，俄登魏王。

· 全唐诗 ·

雄名不朽，奕叶而光。建国之兆，君临万方。

卷 16_16【郊庙歌辞·梁太庙乐舞辞·来仪舞】

於赫帝命，应天顺人。亨育品汇，宾礼百神。
洪基永固，景命惟新。肃恭孝享，祚我生民。

卷 16_17【郊庙歌辞·梁太庙乐舞辞·昭德舞】

肃肃文考，源浚派长。汉称诞季，周实生昌。
奄有四海，超彼百王。笙镛迭奏，礼物荧煌。

卷 16_18【郊庙歌辞·梁太庙乐舞辞·饮福】

戛玉拟金永颂声，縠丝孤竹和且清。
灵歆醉止牺象盈，自天降福千万龄。

卷 16_19【郊庙歌辞·梁太庙乐舞辞·撤豆】

笙镛洋洋，庭燎煌煌。明星有烂，祝史下堂。
笾豆斯撤，礼容有章。克勤克俭，无怠无荒。

· 全唐诗 ·

卷 16_20【郊庙歌辞·梁太庙乐舞辞·送神】

其降无从，其往无踪。黍稷非馨，有感必通。
赫奕令德，仿佛睟容。再拜慌忽，遐想昊穹。

卷 16_21【郊庙歌辞·后唐宗庙乐舞辞·昭德舞】

懿彼明德，赫赫煌煌。名高阃域，功著旗常。
道符休泰，运叶祺祥。庆传万祀，以播耿光。

卷 16_22【郊庙歌辞·后唐宗庙乐舞辞·文明舞】

帝业光扬，皇图翕赫。圣德孔彰，神功不测。
信及豚鱼，恩沾动植。懿范鸿名，传之万亿。

卷 16_23【郊庙歌辞·后唐宗庙乐舞辞·应天舞】

晋国肇兴，雄图再固。黼黻帝道，金玉王度。
皇天无亲，惟德是辅。载诞英明，永光圣祚。

卷 16_24【郊庙歌辞·后唐宗庙乐舞辞·永平舞】

庆传瓊祚，位正瑶图。功宣四海，化被八区。

· 全唐诗 ·

静彰帝道，动合乾符。千秋万祀，永荷昭苏。

卷 16_25【郊庙歌辞·后唐宗庙乐舞辞·武成舞】

艰难王业，返正皇唐。先天再造，却日重光。
汉绍世祖，夏资少康。功成德茂，率祀无疆。

卷 16_26【郊庙歌辞·后唐宗庙乐舞辞·雍熙舞】

仁君御宇，寰海谧清。运符武德，道协文明。
九成式叙，百度惟贞。金门积庆，玉叶传荣。

卷 16_27【郊庙歌辞·汉宗庙乐舞辞·武德舞】

明明我祖，天集休明。神母夜哭，彤云昼兴。
笾豆有践，管籥斯登。孝孙致告，神其降灵。

卷 16_28【郊庙歌辞·汉宗庙乐舞辞·灵长舞】

天降祥，汉祚昌。火炎上，水灵长。建庙社，洁蒸尝。
罗钟石，俨珩璜。陈玉豆，酌金觴。气昭感，德馨香。
祗洛汭，瞻晋阳。降吾祖，福穰穰。

· 全唐诗 ·

卷 16_29【郊庙歌辞·汉宗庙乐舞辞·积善舞】

黍稷斯馨，祖德惟明。蛇告赤帝，龟谋大横。
云行雨施，天成地平。造我家邦，斡我璿衡。
陶匏在御，醑盎惟精。或戛或击，载炮载烹。
饮福受胙，舞降歌迎。滔滔不竭，洪惟水行。

卷 16_30【郊庙歌辞·汉宗庙乐舞辞·显仁舞】

运极金行谢，天资水德隆。礼神鄺時馆，布政未央宫。
诒旦备明祀，登歌答茂功。云轩临降久，星俎荐陈丰。
霭霭沉檀雾，锵锵环佩风。荧煌升藻籍，肸蚨转珠栊。
尊祖咸韶备，贻孙书轨同。京坻长有积，宗社享无穷。

卷 16_31【郊庙歌辞·汉宗庙乐舞辞·章庆舞】

果臝晓唱鸡人，三牲八簋斯陈。雾集瑶阶琐闼，
香生绮席华茵。珠佩貂珰熠燿，羽旄干戚纷纶。
酌鬯既终三献，凝旒何止千春。阿阁长栖彩凤，
郊宫叠奏祥麟。赤伏英灵未泯，玄圭运祚重新。
玉斝牺樽潋潋，龙旗凤辇逡巡。
瞻望月游冠冕，犹疑苍野回轮。

· 全唐诗 ·

卷 16_32【郊庙歌辞·汉宗庙乐舞辞·观德舞】张昭

高庙明灵再启图，金根玉辂幸神都。巢阿丹凤衔书命，
入昴飞星献宝符。正换熏弦娱赤子，忽登仙驾泣苍梧。
荐樱鹤馆笳箫咽，酌鬯金楹剑佩趋。星俎云罍兼鲁礼，
朱干象箭杂巴渝。氤氲龙麝交青琐，仿佛钗钿下蕊珠。
荐豆奉觞亲玉几，配天合祖耀璿枢。受禧饮酒皇欢洽，
仰俟余灵泰九区。

卷 16_33【郊庙歌辞·周宗庙乐舞辞·肃顺】

我后至孝，祇谒祖先。仰瞻庙貌，夙设宫悬。
朱弦疏越，羽舞回旋。神其来格，明祀惟虔。

卷 16_34【郊庙歌辞·周宗庙乐舞辞·治顺】

清庙将入，袞服是依。载行载止，令色令仪。
永终就养，空极孝思。瞻望如在，顾复长违。

卷 16_35【郊庙歌辞·周宗庙乐舞辞·肃雍舞】

周道载兴，象日之明。万邦咸庆，百谷用成。
於穆圣祖，祇荐鸿名。祀于庙社，陈其牺牲。

· 全唐诗 ·

进旅退旅，皇武之形。一倡三叹，朱弦之声。
以妥以侑，既和且平。至诚潜达，介福攸宁。

卷 16_36【郊庙歌辞·周宗庙乐舞辞·章德舞】

清庙新，展严禋。恭祖德，厚人伦。雅乐荐，礼器陈。
俨皇尸，列虞宾。神如在，声不闻。享必信，貌惟寅。
想龙服，奠牺樽。礼既备，庆来臻。

卷 16_37【郊庙歌辞·周宗庙乐舞辞·善庆舞】

卜世长，帝祚昌。定中国，服四方。修明祀，从旧章。
奏激楚，转清商。罗俎豆，列簪裳。歌累累，容皇皇。
望来格，降休祥。祝敢告，寿无疆。

卷 16_38【郊庙歌辞·周宗庙乐舞辞·观成舞】

穆穆王国，奕奕神功。毖祀载展，明德有融。
彝樽斯满，簠簋斯丰。纷絺旄羽，锵洋磬钟。
或升或降，克和克同。孔惠之礼，必肃之容。
锡以纯嘏，祚其允恭。神保是飨，万世无穷。

· 全唐诗 ·

卷 16_39【郊庙歌辞·周宗庙乐舞辞·明德舞】

惟彼岐阳，德大流光。载造周室，泽及遐荒。
於铎圣祖，上帝是皇。乃圣乃神，知微知彰。
新庙奕奕，丰年穰穰。取彼血膋，以往蒸尝。
黍稷惟馨，笾豆大房。工祝致告，受福无疆。

卷 16_40【郊庙歌辞·周宗庙乐舞辞·咸顺】

万舞咸列，三阶克清。贯珠一倡，击石九成。
盈觞虽酌，灵坐无形。永怀我祖，达其孝诚。

卷 16_41【郊庙歌辞·周宗庙乐舞辞·禋顺】

旨酒既献，嘉殽乃迎。振其鼗鼓，洁以铏羹。
肇禋肇祀，或炮或烹。皇尸俨若，保飨是明。

卷 16_42【郊庙歌辞·周宗庙乐舞辞·福顺】

新庙奕奕，金奏洋洋。享于祖考，循彼典章。
清酏特满，嘉玉腾光。神醉既告，帝祉无疆。

· 全唐诗 ·

卷 16_43【郊庙歌辞·周宗庙乐舞辞·忠顺】

称文既表温柔德，示武须成蹈厉容。
缀兆疾舒皆应节，明明我祖乐无穷。

卷 16_44【郊庙歌辞·善胜舞】

圣祖累功，福钟来裔。持羽执干。舞文不废。

卷 16_45【郊庙歌辞·善胜舞·禋顺】

礼毕祀先，香散几筵。罢舞干戚，收撤豆笾。

卷 16_46【郊庙歌辞·善胜舞·肃顺】

乐奏四顺，福受万年。神归碧天，庭余瑞烟。

卷 16_47【郊庙歌辞·晋朝飨乐章·初举酒文同乐】

赫矣昌运，明哉圣王。文兴坠典，礼复旧章。
鸳鸾济济，鸟兽跄跄。一人有庆，万福无疆。

· 全唐诗 ·

卷 16_48【郊庙歌辞·晋朝飨乐章·举酒】

大明御宇，至德动天。君臣庆会，礼乐昭宣。
剑佩成列，金石在悬。椒觞再献，宝历万年。

卷 16_49【郊庙歌辞·晋朝飨乐章·再举酒】

朝野无事，寰瀛大康。圣人有作，盛礼重光。
万国执玉，千官奉觞。南山永固，地久天长。

卷 16_50【郊庙歌辞·晋朝飨乐章·四举酒】

八表欢无事，三秋贺有成。照临同日远，渥泽并云行。
河变千年色，山呼万岁声。愿修封岱礼，方以称文明。

卷 16_51【郊庙歌辞·晋朝飨乐章·群臣酒行歌】

剑佩俨如林，齐倾拱北心。渥恩颁美禄，咸濩听和音。
一德君臣合，重瞳日月临。歌时兼乐圣，唯待赞泥金。

万国咸归禹，千官共祝尧。拜恩瞻凤宸，倾耳听云韶。
运启金行远，时和玉烛调。酒酣齐抃舞，同贺圣明朝。

· 全唐诗 ·

令节陈高会，群臣侍御筵。玉墀留爱景，金殿霭祥烟。
振鹭涵天泽，灵禽下乐悬。圣明无一事，何处让尧年。

卷 16_52【郊庙歌辞·周朝飨乐章·忠顺】

岁迎更始，节及朝元。冕旒仰止，冠剑相连。
八音合奏，万物齐宣。常陈盛礼，愿永千年。

卷 16_53【郊庙歌辞·周朝飨乐章·忠顺】

明君当宁，列辟奉觞。云容表瑞，日影初长。
衣冠济济，钟磬洋洋。令仪克盛，嘉会有章。

卷 16_54【郊庙歌辞·周朝飨乐章·治顺】

庭陈大乐，坐当太微。凝旒负宸，端拱垂衣。
鸳鸾成列，簪组相辉。御炉香散，郁郁霏霏。

卷 16_55【郊庙歌辞·周朝飨乐章·福顺】

圣皇端拱，多士输忠。蛮觞共献，臣心毕同。
声齐嵩岳，祝比华封。千龄万祀，常保时雍。

· 全唐诗 ·

卷 16_56【郊庙歌辞·周朝飨乐章·康顺】

鸿钧广运，嘉节良辰。列辟在位，万国来宾。
干旌屡舞，金石咸陈。礼容既备，帝履长春。

卷 16_57【郊庙歌辞·周朝飨乐章·忠顺】

礼成三爵，乐毕九成。共离金阼，复列彤庭。

卷 16_58【郊庙歌辞·周朝飨乐章·忠顺】

明庭展礼，为龙为光。咸韶息韵，鸛鹭归行。

卷 16_59【郊庙歌辞·晋昭德成功舞歌·昭德舞歌二首】

圣代修文德，明庭举旧章。两阶陈羽籥，万舞合宫商。
剑佩森鸳鹭，箫韶下凤凰。我朝青史上，千古有辉光。
淮海干戈戢，朝廷礼乐施。白驹皆就絷，丹凤复来仪。
德备三苗格，风行万国随。小臣同百兽，率舞贺昌期。

· 全唐诗 ·

卷 16_60【郊庙歌辞·晋昭德成功舞歌·武功舞歌二首】

拨乱资英王，开基自晋阳。一戎成大业，七德焕前王。
炎汉提封远，姬周世祚长。朱干将玉戚，全象武功扬。

睿算超前古，神功格上圆。百川留禹迹，万国戴尧天。
既已囊弓矢，诚宜播管弦。踟蹰随鸟兽，共乐太平年。

· 全唐诗 ·

第十七卷

卷 17_1【乐府杂曲·鼓吹曲辞·朱鹭】

张籍

翩翩兮朱鹭，来泛春塘栖绿树。
羽毛如翦色如染，远飞欲下双翅敛。
避人引子入深堑，动处水纹开滟滟。
谁知豪家网尔躯，不如饮啄江海隅。

卷 17_2【乐府杂曲·鼓吹曲辞·艾如张】

李贺

锦襜褕，绣裆襦，强强饮啄哺尔雏。陇东卧穗满风雨，
莫信龙媒陇西去。齐人织网如素空，张在野春平碧中。
网丝漠漠无形影，误尔触之伤首红。艾叶绿花谁翦刻，
中藏祸机不可测。

· 全唐诗 ·

卷 17_3【乐府杂曲·鼓吹曲辞·上之回】

卢照邻

回中道路险，萧关烽候多。五营屯北地，万乘出西河。
单于拜玉玺，天子按雕戈。振旅汾川曲，秋风横大歌。

卷 17_4【乐府杂曲·鼓吹曲辞·上之回】

李白

三十六离宫，楼台与天通。阁道步行月，美人愁烟空。
恩疏宠不及，桃李伤春风。淫乐意何极，金舆向回中。
万乘出黄道，千旗扬彩虹。前军细柳北，后骑甘泉东。
岂问渭川老，宁邀襄野童。秋暮瑶池宴，归来乐未穷。

卷 17_5【乐府杂曲·鼓吹曲辞·上之回】

李贺

上之回，大旗喜。悬虹彗，挹凤尾。剑匣破，舞蛟龙。
蚩尤死，鼓逢逢。天高庆雷齐坠地，地无惊烟海千里。

· 全唐诗 ·

卷 17_6【乐府杂曲·鼓吹曲辞·战城南】

卢照邻

将军出紫塞，冒顿在乌贪。笳喧雁门北，阵翼龙城南。
雕弓夜宛转，铁骑晓参潭。应须驻白日，为待战方酣。

卷 17_7【乐府杂曲·鼓吹曲辞·战城南】

李白

去年战桑干源，今年战葱河道。洗兵条支海上波，
放马天山雪中草。万里长征战，三军尽衰老。
匈奴以杀戮为耕作，古来唯见白骨黄沙田。
秦家筑城备胡处，汉家还有烽火燃。
烽火燃不息，征战无已时。野战格斗死，败马号鸣向天悲。
乌鸢啄人肠，衔飞上挂枯树枝。士卒涂草莽，将军空尔为。
乃知兵者是凶器，圣人不得已而用之。

卷 17_8【乐府杂曲·鼓吹曲辞·战城南】

刘驾

城南征战多，城北无饥鸦。白骨马蹄下，谁言皆有家。

· 全唐诗 ·

城前水声苦，倏忽流万古。莫争城外地，城里有闲土。

卷 17_9【乐府杂曲·鼓吹曲辞·战城南二首】

贯休

万里桑乾傍，茫茫古蕃壤。将军貌憔悴，抚剑悲年长。
胡兵尚陵逼，久住亦非强。邯郸少年辈，个个有伎俩。
拖枪半夜去，雪片大如掌。

碛中有阴兵，战马时惊蹶。轻猛李陵心，摧残苏武节。
黄金锁子甲，风吹色如铁。十载不封侯，茫茫向谁说。

卷 17_10【乐府杂曲·鼓吹曲辞·巫山高】

郑世翼

巫山凌太清，岧峣类削成。霏霏暮雨合，霭霭朝云生。
危峰入鸟道，深谷泻猿声。别有幽栖客，淹留攀桂情。

卷 17_11【乐府杂曲·鼓吹曲辞·巫山高二首】

沈佺期

巫山峰十二，环合隐昭回。俯眺琵琶峡，平看云雨台。

· 全唐诗 ·

古槎天外倚，瀑水日边来。何忽啼猿夜，荆王枕席开。
神女向高唐，巫山下夕阳。裴回作行雨，婉娈逐荆王。
电影江前落，雷声峡外长。霁云无处所，台馆晓苍苍。

卷 17_12【乐府杂曲·鼓吹曲辞·巫山高】

卢照邻

巫山望不极，望望下朝雾。莫辨啼猿树，徒看神女云。
惊涛乱水脉，骤雨暗峰文。沾裳即此地，况复远思君。

卷 17_13【乐府杂曲·鼓吹曲辞·巫山高】

张循之

巫山高不极，沓沓状奇新。暗谷疑风雨，幽岩若鬼神。
月明三峡曙，潮满二江春。为问阳台夕，应知入梦人。

卷 17_14【乐府杂曲·鼓吹曲辞·巫山高】

刘方平

楚国巫山秀，清猿日夜啼。万重春树合，十二碧峰齐。
峡出朝云下，江来暮雨西。阳台归路直，不畏向家迷。

· 全唐诗 ·

卷 17_15【乐府杂曲·鼓吹曲辞·巫山高】

皇甫冉

巫峡见巴东，迢迢半出空。云藏神女馆，雨到楚王宫。
朝暮泉声落，寒暄树色同。清猿不可听，偏在九秋中。

卷 17_16【乐府杂曲·鼓吹曲辞·巫山高】

李端

巫山十二峰，皆在碧虚中。回合云藏日，霏微雨带风。
猿声寒过水，树色暮连空。愁向高唐望，清秋见楚宫。

卷 17_17【乐府杂曲·鼓吹曲辞·巫山高】

于濂

何山无朝云，彼云亦悠扬。何山无暮雨，彼雨亦苍茫。
宋玉恃才者，凭云构高唐。自重文赋名，荒淫归楚襄。
峨峨十二峰，永作妖鬼乡。

· 全唐诗 ·

卷 17_18【乐府杂曲·鼓吹曲辞·巫山高二首】

孟郊

巴山上峡重复重，阳台碧峭十二峰。荆王猎时逢暮雨，
夜卧高丘梦神女。经红流烟湿艳姿，行云飞去明星稀。
目极魂断望不见，猿啼三声泪沾衣。

见尽数万里，不闻三声猿。但飞萧萧雨，中有亭亭魂。
千载楚襄恨，遗文宋玉言。至今青冥里，云结深闺门。

卷 17_19【乐府杂曲·鼓吹曲辞·巫山高】

李贺

碧丛丛，高插天，大江翻澜神曳烟。楚魂寻梦风飏然，
晓风飞雨生苔钱。瑶姬一去一千年，丁香筇竹啼老猿。
古祠近月蟾桂寒，椒花坠红湿云间。

卷 17_20【乐府杂曲·鼓吹曲辞·巫山高】

齐己

巫山高，巫女妖，雨为暮兮云为朝，楚王憔悴魂欲销。

· 全唐诗 ·

秋猿噪日将夕，红霞紫烟凝老壁。千岩万壑花皆坼，
但恐芳菲无正色。不知今古行人行，几人经此无秋情。
云深庙远不可觅，十二峰头插天碧。

卷 17_21【乐府杂曲·鼓吹曲辞·将进酒】

李白

君不见黄河之水天上来，奔流到海不复回。
君不见高堂明镜悲白发，朝如青丝暮成雪。
人生得意须尽欢，莫使金尊空对月。天生我材必有用，
千金散尽还复来。烹羊宰牛且为乐，会须一饮三百杯。
岑夫子，丹丘生，将进酒，杯莫停。与君歌一曲，
请君为我侧耳听。钟鼓馔玉不足贵，但愿长醉不复醒。
古来圣贤皆寂寞，惟有饮者留其名。陈王昔时宴平乐，
斗酒十千恣欢谑。主人何为言少钱，径须沽取对君酌。
五花马，千金裘，呼儿将出换美酒，与尔同销万古愁。

卷 17_22【乐府杂曲·鼓吹曲辞·将进酒】

元稹

将进酒，将进酒，酒中有毒鸩主父，言之主父伤主母。
母为妾地父妾天，仰天俯地不忍言。佯为僵踣主父前，
主父不知加妾鞭。旁人知妾为主说，主将泪洗鞭头血。

· 全唐诗 ·

推摧主母牵下堂，扶妾遣升堂上床。将进酒，
酒中无毒令主寿，愿主回思归主母，遣妾如此事主父。
妾为此事人偶知，自惭不密方自悲。主今颠倒安置妾，
贪天僭地谁不为。

卷 17_23【乐府杂曲·鼓吹曲辞·将进酒】

李贺

琉璃钟，琥珀浓，小槽酒滴真珠红。烹龙炮凤玉脂泣，
罗屏绣幕围香风。吹龙笛，击鼉鼓，皓齿歌，细腰舞。
况是青春日将暮，桃花乱落如红雨。劝君终日酩酊醉，
酒不到刘伶坟上土。

卷 17_24【乐府杂曲·鼓吹曲辞·君马黄】

李白

君马黄，我马白，马色虽不同，人心本无隔。
共作游冶盘，双行洛阳陌。长剑既照曜，高冠何赭赫。
各有千金裘，俱为五侯客。猛虎落陷阱，壮夫时屈厄。
相知在急难，独好亦何益。

· 全唐诗 ·

卷 17_25【乐府杂曲·鼓吹曲辞·芳树】

沈佺期

何地早芳菲，宛在长门殿。夭桃色若绶，秣李光如练。
啼鸟弄花疏，游蜂饮香遍。叹息春风起，飘零君不见。

卷 17_26【乐府杂曲·鼓吹曲辞·芳树】

卢照邻

芳树本多奇，年华复在斯。结翠成新幄，开红满旧枝。
风归花历乱，日度影参差。容色朝朝落，思君君不知。

卷 17_27【乐府杂曲·鼓吹曲辞·芳树】

徐彦伯

玉花珍簟上，金缕画屏开。晓月怜箏柱，春风忆镜台。
箏柱春风吹晓月，芳树落花朝暝歇。稿砧刀头未有时，
攀条拭泪坐相思。

· 全唐诗 ·

卷 17_28【乐府杂曲·鼓吹曲辞·芳树】

韦应物

迢迢芳园树，列映清池曲。对此伤人心，还如故时绿。
风条洒馀霭，露叶承新旭。佳人不再攀，下有往来躅。

卷 17_29【乐府杂曲·鼓吹曲辞·芳树】

元稹

芳树已寥落，孤英万可嘉。可怜团团叶，盖覆深深花。
游蜂竞攒刺，斗雀亦纷拏。天生细碎物，不爱好光华。
非无殢殢法，念尔有生涯。春雷一声发，惊燕亦惊蛇。
清池养神蔡，已复长虾蟆。雨露贵平施，吾其春草芽。

卷 17_30【乐府杂曲·鼓吹曲辞·芳树】

罗隐

细蕊慢逐风，暖香闲破鼻。青帝固有心，时时动人意。
去年高枝犹压地，今年低枝已憔悴。
吾所以见造化之权，变通之理。春夏作头，秋冬为尾。
循环反复无穷已。今生长短同一轨，若使威可以制，

· 全唐诗 ·

力可以止，秦皇不肯敛手下沙丘，孟贲不合低头入蒿里。
伊人强猛犹如此，顾我劳生何足恃。但愿开素袍，
倾绿蚁，陶陶兀兀大醉于青冥白昼间。任他上是天，
下是地。

卷 17_31【乐府杂曲·鼓吹曲辞·有所思】

沈佺期

君子事行役，再空芳岁期。美人旷延伫，万里浮云思。
园槿绽红艳，郊桑柔绿滋。坐看长夏晚，秋月生罗帏。

卷 17_32【乐府杂曲·鼓吹曲辞·有所思】

李白

我思仙人，乃在碧海之东隅。
海寒多天风，白波连山倒蓬壶。长鲸喷涌不可涉，
抚心茫茫泪如珠。西来青鸟东飞去，愿寄一书谢麻姑。

卷 17_33【乐府杂曲·鼓吹曲辞·有所思】

孟郊

桔槔烽火昼不灭，客路迢迢信难越。古镇刀攒万片霜，

· 全唐诗 ·

寒江浪起千堆雪。此时西去定如何，空使南心远凄切。

卷 17_34【乐府杂曲·鼓吹曲辞·有所思】

卢仝

当时我醉美人家，美人颜色娇如花。今日美人弃我去，
青楼珠箔天之涯。天涯娟娟常娥月，三五二八盈又缺。
翠眉蝉鬓生别离，一望不见心断绝。心断绝，几千里，
梦中醉卧巫山云，觉来泪滴湘江水。湘江两岸花木深，
美人不见愁人心。含愁更奏绿绮琴，调高弦绝无知音。
美人兮美人，不知为暮雨兮为朝云，相思一夜梅花发，
忽到窗前疑是君。

卷 17_35【乐府杂曲·鼓吹曲辞·有所思】

韦应物

借问江上柳，青青为谁春。空游昨日地，不见昨日人。
缭绕万家井，往来车马尘。莫道无相识，要非心所亲。

· 全唐诗 ·

卷 17_36【乐府杂曲·鼓吹曲辞·有所思】

刘氏云

朝亦有所思，暮亦有所思。登楼望君处，蔼蔼浮云飞。
浮云遮却阳关道，向晚谁知妾怀抱。玉井苍苔春院深，
桐花落地无人扫。

卷 17_37【乐府杂曲·鼓吹曲辞·雉子班】

李白

辟邪伎作鼓吹惊，雉子班之奏曲成，喔咿振迅欲飞鸣。
扇锦翼，雄风生，双雌同饮啄，趯悍谁能争。
乍向草中耿介死，不求黄金笼下生。
天地至广大，何惜遂物情。善卷让天子，务光亦逃名。
所贵旷士怀，朗然合太清。

卷 17_38【乐府杂曲·鼓吹曲辞·临高台】

褚亮

高台暂俯临，飞翼耸轻音。浮光随日度，漾影逐波深。
回瞰周平野，开怀畅远襟。独此三休上，还伤千岁心。

· 全唐诗 ·

卷 17_39【乐府杂曲·鼓吹曲辞·临高台】

王勃

临高台，高台迢递绝浮埃，瑶轩绮构何崔嵬，
鸾歌凤吹清且哀。俯瞰长安道，萋萋御沟草，
斜对甘泉路，苍苍茂陵树。高台四望同，
帝乡佳气郁葱葱。紫阁丹楼纷照曜，璧房锦殿相玲珑。
东弥长乐观，西指未央宫。赤城映朝日，绿树摇春风。
旗亭百队开新市，甲第千甍分戚里。朱输翠盖不胜春，
叠树层楹相对起。复有青楼大道中，绣户文窗雕绮栊。
锦衣昼不襞，罗帏夕未空。歌屏朝掩翠，妆镜晚窥红。
为吾安宝髻，蛾眉罢花丛。狭路尘间黯将暮，
云间月色明如素。鸳鸯池上两两飞，凤凰楼下双双度。
物色正如此，佳期那不顾。银鞍绣毂盛繁华，
可怜今夜宿倡家。倡家少妇不须嚬，东园桃李片时春。
君看旧日高台处，柏梁铜雀生黄尘。

卷 17_40【乐府杂曲·鼓吹曲辞·临高台】

贯休

凉风吹远念，使我升高台。宁知数片云，不是旧山来。
故人天一涯，久客殊未回。雁来不得书，空寄声哀哀。

· 全唐诗 ·

卷 17_41【乐府杂曲·鼓吹曲辞·黄雀行】

庄南杰

穿屋穿墙不知止，争树争巢入营死。林间公子挟弹弓，
一丸致毙花丛里。小雏黄口未有知，青天不解高高飞。
虞人设网当要路，白日啾嘲祸万机。

卷 17_42【乐府杂曲·鼓吹曲辞·钓竿篇】

沈佺期

朝日敛红烟，垂竿向绿川。人疑天上坐，鱼似镜中悬。
避楫时惊透，猜钩每误牵。湍危不理辖，潭静欲留船。
钓玉君徒尚，征金我未贤。为看芳饵下，贪得会无全。

卷 17_43【乐府杂曲·鼓吹曲辞·凯歌六首】

岑参

汉将承恩西破戎，捷书先奏未央宫。
天子预开麟阁待，只今谁数贰师功。

官军西出过楼兰，营幕傍临月窟寒。

· 全唐诗 ·

蒲海晓霜凝剑尾，葱山夜雪扑旌竿。

鸣笳擂鼓拥回军，破国平蕃昔未闻。
大夫鹊印摇边月，天将龙旗掣海云。

月落辕门鼓角鸣，千群面缚出蕃城。
洗兵鱼海云迎阵，秣马龙堆月照营。

蕃军遥见汉家营，满谷连山遍哭声。
万箭千刀一夜杀，平明流血浸空城。

暮雨旌旗湿未干，胡尘白草日光寒。
昨夜将军连晓战，蕃军只见马空鞍。

卷 17_44【乐府杂曲·鼓吹铙歌·晋阳武】

柳宗元

晋阳武，奋义威。炀之渝，德焉归。氓毕屠，绥者谁。
皇烈烈，专天机。号以仁，扬其旗。日之升，九土晞。
斥田圯，流洪辉。有其二，翼余隋。斫梟髻，连熊螭。
枯以肉，勅者羸。后土荡，玄穹弥。合之育，莽然施。
惟德辅，庆无期。

· 全唐诗 ·

卷 17_45【乐府杂曲·鼓吹饶歌·兽之穷】

柳宗元

兽之穷，奔大麓。天厚黄德，狙犷服。
甲之囊弓，弭矢箛。皇旅靖，敌逾蹙。
自亡其徒，匪予戮。屈赧猛，虔栗栗。
縻以尺组，啖以秩。黎之阳，土茫茫。
富兵戎，盈仓箱。乏者德，莫能享。
驱豺兕，授我疆。

卷 17_46【乐府杂曲·鼓吹饶歌·战武牢】

柳宗元

战武牢，动河朔。逆之助，图犄角。怒轂麇，抗乔岳。
翘萌牙，傲霜雹。王谋内定，申掌握。铺施芟夷，
二主缚。惮华戎，廓封略。命之瞽，卑以斫。归有德，
唯先觉。

卷 17_47【乐府杂曲·鼓吹饶歌·泾水黄】

柳宗元

泾水黄，陇野茫。负太白，腾天狼。有鸟鸛立，羽翼张。

· 全唐诗 ·

钩喙决前，钜趯傍；怒飞饥啸，翮不可当。老雄死，
子复良。巢岐饮渭，肆翱翔。顿地纆，提天纲。
列缺掉帜，招摇耀铓。鬼神来助，梦嘉祥。脑涂原野，
魂飞扬。星辰复，恢一方。

卷 17_48【乐府杂曲·鼓吹铙歌·奔鲸沛】

柳宗元

奔鲸沛，荡海垠。吐霓翳日，腥浮云。帝怒下顾，
哀垫昏。授以神柄，推元臣。手援天予，截修鳞。
披攘蒙雾，开海门。地平水静，浮天垠。羲和显耀，
乘清氛。赫炎溥畅，融大钧。

卷 17_49【乐府杂曲·鼓吹铙歌·苞枿】

柳宗元

苞枿黜矣，惟根之蟠。弥巴蔽荆，负南极以安。
曰我旧梁氏，辑绥艰难。江汉之阻，都邑固以完。
圣人作，神武用，有臣勇智，奋不以众。投迹死地，
谋猷纵。化敌为家，虑则中。浩浩海裔，不威而同。
系纆降王，定厥功。澶漫万里，宣唐风。蛮夷九译，
咸来从。凯旋金奏，象形容。震撼万国，罔不龚。

· 全唐诗 ·

卷 17_50【乐府杂曲·鼓吹铙歌·河右平】

柳宗元

河右澶漫，顽为之魁。王师如雷震，昆仑以颓。
上聋下聩，鰌不可回。助仇抗有德，惟人之灾。
乃溃乃奋，执缚归厥命。万室蒙其仁，一夫则病。
濡以鸿泽，皇之圣。威畏德怀，功以定。顺之于理，
物咸遂厥性。

卷 17_51【乐府杂曲·鼓吹铙歌·铁山碎】

柳宗元

铁山碎，大漠舒。二虏劲，连穹庐。背北海，专坤隅。
岁来侵边，或傳于都。天子命元帅，奋其雄图。
破定襄，降魁渠。穷竟窟宅，斥余吾。百蛮破胆，
边氓苏。威武辉耀，明鬼区。利泽弥万祀，功不可逾。
官臣拜手，惟帝之谟。

卷 17_52【乐府杂曲·鼓吹铙歌·靖本邦】

柳宗元

本邦伊晋，惟时不靖。根柢之摇，枝叶攸病。

· 全唐诗 ·

守臣不任，勤于神圣。惟钺之兴，翦焉则定。
洪惟我理，式和以敬。群顽既夷，庶绩咸正。
皇谟载大，惟人之庆。

卷 17_53【乐府杂曲·鼓吹铙歌·吐谷浑】

柳宗元

吐谷浑盛强，背西海以夸。岁侵扰我疆，退匿险且遐。
帝谓神武师，往征靖皇家。烈烈旆其旗，熊虎杂龙蛇。
王旅千万人，衔枚默无哗。束刃逾山徼，张翼纵漠沙。
一举刈膻腥，尸骸积如麻。除恶务本根，况敢遗萌芽。
洋洋西海水，威命穷天涯。系虏来王都，犒乐穷休嘉。
登高望还师，竟野如春华。行者靡不归，亲戚讙要遮。
凯旋献清庙，万国思无邪。

卷 17_54【乐府杂曲·鼓吹铙歌·高昌】

柳宗元

麹氏雄西北，别绝臣外区。既恃远且险，纵傲不我虞。
烈烈王者师，熊螭以为徒。龙旂翻海浪，駟骑驰坤隅。
贲育搏婴儿，一扫不复馀。平沙际天极，但见黄云驱。
臣靖执长缨，智勇伏囚拘。文皇南面坐，夷狄千群趋。
咸称天子神，往古不得俱。献号天可汗，以覆我国都。

· 全唐诗 ·

兵戎不交害，各保性与躯。

卷 17_55【乐府杂曲·鼓吹铙歌·东蛮】

柳宗元

东蛮有谢氏，冠带理海中。已言我异世，虽圣莫能通。
王卒如飞翰，鹏鹞骇群龙。轰然自天坠，乃信神武功。
击虏君臣人，累累来自东。无思不服从，唐业如山崇。
百辟拜稽首，咸愿图形容。如周王会书，永永传无穷。
睢盱万状乖，咿唔九译重。广输抚四海，浩浩知皇风。
歌诗铙鼓间，以壮我元戎。

· 全唐诗 ·

第十八卷

卷 18_1【横吹曲辞·陇头（一曰陇头水）】

张籍

陇头已断人不行，胡骑夜入凉州城。汉家处处格斗死，
一朝尽没陇西地。驱我边人胡中去，散放牛羊食禾黍。
去年中国养子孙，今著毡裘学胡语。谁能更使李轻车，
收取凉州属汉家。

卷 18_2【横吹曲辞·陇头吟】

王维

长安少年游侠客，夜上戍楼看太白。陇头明月迥临关，
陇上行人夜吹笛。关西老将不胜愁，驻马听之双泪流。
身经大小百余战，麾下偏裨万户侯。苏武才为典属国，
节旄空尽海西头。

· 全唐诗 ·

卷 18_3【横吹曲辞·陇头吟】

翁绶

陇水潺湲陇树黄，征人陇上尽思乡。马嘶斜日朔风急，
雁过寒云边思长。残月出林明剑戟，平沙隔水见牛羊。
横行俱足封侯者，谁斩楼兰献未央。

卷 18_4【横吹曲辞·陇头水】

杨师道

陇头秋月明，陇水带关城。笳添离别曲，风送断肠声。
映雪峰犹暗，乘冰马屡惊。雾中寒雁至，沙上转蓬轻。
天山传羽檄，汉地急征兵。阵开都护道，剑聚伏波营。
于兹觉无度，方共濯胡缨。

卷 18_5【横吹曲辞·陇头水】

卢照邻

陇坂高无极，征人一望乡。关河别去水，沙塞断归肠。
马系千年树，旌悬九月霜。从来共呜咽，皆是为勤王。

· 全唐诗 ·

卷 18_6【横吹曲辞·陇头水】

王建

陇水何年陇头别，不在山中亦呜咽。征人塞耳马不行，
未到陇头闻水声。谓是西流入蒲海，还闻北海绕龙城。
陇东陇西多屈曲，野麋饮水长簇簇。胡兵夜回水傍住，
忆著来时磨剑处。向前无井复无泉，放马回看陇头树。

卷 18_7【横吹曲辞·陇头水】

于濇

借问陇头水，终年恨何事。深疑呜咽声，中有征人泪。
昨日上山下，达曙不能寐。何处接长波，东流入清渭。

卷 18_8【横吹曲辞·陇头水】

皎然

陇头心欲绝，陇水不堪闻。碎影摇枪垒，寒声咽帐军。
素从盐海积，绿带柳城分。日落天边望，逶迤入寒云。

秦陇逼氐羌，征人去未央。如何幽咽水，并欲断君肠。

· 全唐诗 ·

西注悲穷漠，东分忆故乡。旅魂声搅乱，无梦到辽阳。

卷 18_9【横吹曲辞·陇头水】

鲍溶

陇头水，千古不堪闻。生归苏属国，死别李将军。
细响风凋草，清哀雁落云。

卷 18_10【横吹曲辞·陇头水】

罗隐

借问陇头水，年年恨何事。全疑呜咽声，中有征人泪。
自古无长策，况我非深智。何计谢潺湲，一宵空不寐。

卷 18_11【横吹曲辞·出关】

魏徵

中原还逐鹿，投笔事戎轩。纵横计不就，慷慨志犹存。
策杖谒天子，驱马出关门。请缨羁南越，凭轼下东藩。
郁纡陟高岫，出没望平原。古木吟寒鸟，空山啼夜猿。
既伤千里目，还惊九折魂。岂不惮艰险，深怀国土恩。

· 全唐诗 ·

季布无二诺，侯嬴重一言。人生感意气，功名谁复论。

卷 18_12【横吹曲辞·入关】

贾驰

河上微风来，关头树初湿。今朝关城吏，又见孤客入。
上国谁与期，西来徒自急。

卷 18_13【横吹曲辞·入关】

张祜

都城连百二，雄险北回环。地势遥尊岳，河流侧让关。
秦皇曾虎视，汉祖亦龙颜。何事枭凶辈，干戈自不闲。

卷 18_14【横吹曲辞·出塞】

窦威

匈奴屡不平，汉将欲纵横。看云方结阵，却月始连营。
潜军渡马邑，扬旆掩龙城。会勒燕然石，方传车骑名。

· 全唐诗 ·

卷 18_15【横吹曲辞·出塞】

陈子昂

忽闻天上将，关塞重横行。始返楼兰国，还向朔方城。
黄金装战马，白羽集神兵。星月开天阵，山川列地营。
晚风吹画角，春色耀飞旌。宁知班定远，独是一书生。

卷 18_16【横吹曲辞·出塞】

张易之

侠客重恩光，骢马饰金装。瞥闻传羽檄，驰突救边荒。
转战磨笄地，横行戴斗乡。将军占太白，小妇怨流黄。
骀褭青丝骑，娉婷红粉妆。一春莺度曲，八月雁成行。
谁堪坐秋思，罗袖拂空床。

卷 18_17【横吹曲辞·出塞】

沈佺期

十年通大漠，万里出长平。寒日生戈剑，阴云摇旆旌。
饥乌啼旧垒，疲马恋空城。辛苦皋兰北，胡霜损汉兵。

· 全唐诗 ·

卷 18_18【横吹曲辞·出塞】

王维

居延城外猎天骄，白草连天野火烧。暮云空碛时驱马，
秋日平原好射雕。护羌校尉朝乘障，破虏将军夜渡辽。
玉靶角弓珠勒马，汉家将赐霍嫖姚。

卷 18_19【横吹曲辞·出塞】

王昌龄

秦时明月汉时关，万里长征人未还。
但使龙城飞将在，不教胡马度阴山。

白花垣上望京师，黄河水流无尽时。
穷秋旷野行人绝，马首东来知是谁。

卷 18_20【横吹曲辞·出塞】

马戴

金带连环束战袍，马头冲雪度临洮。
卷旗夜劫单于帐，乱斫胡兵缺宝刀。

· 全唐诗 ·

卷 18_21 【横吹曲辞·前出塞九首】

杜甫

戚戚去故里，悠悠赴交河。公家有程期，亡命婴祸罗。
君已富土境，开边一何多。弃绝父母恩，吞声行负戈。

出门日已远，不受徒旅欺。骨肉恩岂断，男儿死无时。
走马脱辔头，手中挑青丝。捷下万仞冈，俯身试搴旗。

磨刀呜咽水，水赤刃伤手。欲轻肠断声，心绪乱已久。
丈夫誓许国，愤惋复何有。功名图麒麟，战骨当速朽。

送徒既有长，远戍亦有身。生死向前去，不劳吏怒嗔。
路逢相识人，附书与六亲。哀哉两决绝，不复同苦辛。

迢迢万余里，领我赴三军。军中异苦乐，主将宁尽闻。
隔河见胡骑，倏忽数百群。我始为奴仆，几时树功勋。

挽弓当挽强，用箭当用长。射人先射马，擒贼先擒王。
杀人亦有限，列国自有疆。苟能制侵陵，岂在多杀伤。

驱马天雨雪，军行入高山。径危抱寒石，指落曾冰间。
已去汉月远，何时筑城还。浮云暮南征，可望不可攀。

单于寇我垒，百里风尘昏。雄剑四五动，彼军为我奔。

· 全唐诗 ·

虏其名王归，系颈授辕门。潜身备行列，一胜何足论。

从军十年余，能无分寸功。众人贵苟得，欲语羞雷同。
中原有斗争，况在狄与戎。丈夫四方志，安可辞固穷。

卷 18_22【横吹曲辞·后出塞五首】

杜甫

男儿生世间，及壮当封侯。战伐有功业，焉能守旧丘。
召募赴蓟门，军动不可留。千金买马鞭，百金装刀头。
闾里送我行，亲戚拥道周。斑白居上列，酒酣进庶羞。
少年别有赠，含笑看吴钩。

朝进东门营，暮上河阳桥。落日照大旗，马鸣风萧萧。
平沙列万幕，部伍各见招。中天悬明月，令严夜寂寥。
悲笳数声动，壮士惨不骄。借问大将谁，恐是霍嫖姚。

古人重守边，今人重高勋。岂知英雄主，出师亘长云。
六合已一家，四夷且孤军。遂使貔虎士，奋身勇所闻。
拔剑击大荒，日牧胡马群。誓开玄冥北，持以奉吾君。

献凯日继踵，两蕃静无虞。渔阳豪侠地，击鼓吹笙竽。
云帆转辽海，粳稻来东吴。越罗与楚练，照耀舆台躯。
主将位益崇，气骄陵上都。边人不忍议，议者死路衢。

· 全唐诗 ·

我本良家子，出师亦多门。将骄益愁思，身贵不足论。
跃马二十年，恐辜明主恩。坐见幽州骑，长驱河洛昏。
中夜间道归，故里但空村。恶名幸脱免，穷老无儿孙。

卷 18_23【横吹曲辞·出塞】

皇甫冉

吹角出塞门，前瞻即胡地。三军尽回首，皆洒望乡泪。
转念关山长，行看风景异。由来征戍客，各负轻生义。

卷 18_24【横吹曲辞·出塞】

王之涣

黄沙直上白云间，一片孤城万仞山。
羌笛何须怨杨柳，春光不度玉门关。

卷 18_25【横吹曲辞·出塞】

耿漳

汉家边事重，窦宪出临戎。绝漠秋山在，阳关旧路通。
列营依茂草，吹角向高风。更就燕然石，看铭破虏功。

· 全唐诗 ·

卷 18_26【横吹曲辞·出塞】

张籍

秋塞雪初下，将军远出师。分营长记火，放马不收旗。
月冷边帐湿，沙昏夜探迟。征人皆白首，谁见灭胡时。

卷 18_27【横吹曲辞·出塞】

刘驾

胡风不开花，四气多作雪。北人尚冻死，况我本南越。
古来犬羊地，巡狩无遗辙。九土耕不尽，武皇犹征伐。
中天有高阁，图画何时歇。坐恐塞上山，低于砂中骨。

卷 18_28【横吹曲辞·出塞曲】

刘济

将军在重围，音信绝不通。羽书如流星，飞入甘泉宫。
倚是并州儿，少年心胆雄。一朝随召募，百战争王公。
去年桑干北，今年桑干东。死是征人死，功是将军功。
汗马牧秋月，疲兵卧霜风。仍闻左贤王，更欲图云中。

· 全唐诗 ·

卷 18_29【横吹曲辞·出塞曲】

于鹄

微雪将军出，吹笳天未明。观兵登古戍，斩将对双旌。
分阵瞻山势，潜军制马鸣。如今新史上，已有灭胡名。

单于骄爱猎，放火到军城。待月调新弩，防秋置远营。
空山朱戟影，寒碛铁衣声。逢著降胡说，阴山有伏兵。

卷 18_30【横吹曲辞·出塞曲】

贯休

扫尽狂胡迹，回戈望故关。相逢唯死斗，岂易得生还。
纵宴参胡乐，收兵过雪山。不封十万户，此事亦应闲。

玉帐将军意，殷勤把酒论。功高宁在我，阵没与招魂。
塞色干戈束，军容喜气屯。男儿今始是，敢出玉关门。

回首陇山头，连天草木秋。圣君应入梦，半路遣封侯。
水不担阴雪，柴令倒戍楼。归来麟阁上，春色满皇州。

· 全唐诗 ·

卷 18_31【横吹曲辞·入塞】

刘希夷

将军陷虏围，边务息戎机。霜雪交河尽，旌旗入塞飞。
晓光随马度，春色伴人归。课绩朝明主，临轩拜武威。

卷 18_32【横吹曲辞·入塞曲】

耿漳

将军带十围，重锦制戎衣。猿臂销弓力，虬须长剑威。
首登平乐宴，新破大宛归。楼上姝姬笑，门前问客稀。
暮烽玄菟急，秋草紫骝肥。未奉君王诏，高槐昼掩扉。

卷 18_33【横吹曲辞·入塞曲】

贯休

单于烽火动，都护去天涯。别赐黄金甲，亲临白玉墀。
塞垣须静谧，师旅审安危。定远条支宠，如今胜古时。

方见将军贵，分明对冕旒。圣恩如远被，狂虏不难收。
臣节唯期死，功勋敢望侯。终辞修里第，从此出皇州。

· 全唐诗 ·

百里精兵动，参差便渡辽。如何好白日，亦照此天骄。
远树深疑贼，惊蓬迥似雕。凯歌何日唱，碣路共天遥。

卷 18_34【横吹曲辞·入塞曲】

沈彬

欲为皇王服远戎，万人金甲鼓鼙中。阵云暗塞三边黑，
兵血愁天一片红。半夜翻营旗搅月，深秋防戍剑磨风。
谤书未及明君爇，卧骨将军已殁功。

苦战沙间卧箭痕，戍楼闲上望星文。生希国泽分偏将，
死夺河源答圣君。鸢觑败兵眠白草，马惊边鬼哭阴云。
功多地远无人纪，汉阁笙歌日又曛。

卷 18_35【横吹曲辞·折杨柳】

卢照邻

倡楼启曙扉，园柳正依依。鸟鸣知岁隔，条变识春归。
露叶疑啼脸，风花乱舞衣。攀折聊将寄，军中书信稀。

· 全唐诗 ·

卷 18_36【横吹曲辞·折杨柳】

沈佺期

玉窗朝日映，罗帐春风吹。拭泪攀杨柳，长条宛地垂。
白花飞历乱，黄鸟思参差。妾自肝肠断，旁人那得知。

卷 18_37【横吹曲辞·折杨柳】

乔知之

可怜濯濯春杨柳，攀折将来就纤手。
妾容与此同盛衰，何必君恩独能久。

卷 18_38【横吹曲辞·折杨柳】

刘宪

沙塞三河道，金闺二月春。碧烟杨柳色，红粉绮罗人。
露叶怜啼脸，风花思舞巾。攀持君不见，为听曲中新。

· 全唐诗 ·

卷 18_39【横吹曲辞·折杨柳】

崔湜

二月风光半，三边戍不还。年华妾自惜，杨柳为君攀。
落絮缘衫袖，垂条拂髻鬟。那堪音信断，流涕望阳关。

卷 18_40【横吹曲辞·折杨柳】

韦承庆

万里边城地，三春杨柳节。叶似镜中眉，花如关外雪。
征人远乡思，倡妇高楼别。不忍掷年华，含情寄攀折。

卷 18_41【横吹曲辞·折杨柳】

欧阳瑾

垂柳拂妆台，葳蕤叶半开。年华枝上见，边思曲中来。
嫩色宜新雨，轻花伴落梅。朝朝倦攀折，征戍几时回。

· 全唐诗 ·

卷 18_42【横吹曲辞·折杨柳】

张祜

红粉青楼曙，垂杨仲月春。怀君重攀折，非妾妒腰身。
舞带萦丝断，娇娥向叶嚬。横吹凡几曲，独自最愁人。

卷 18_43【横吹曲辞·折杨柳】

张九龄

纤纤折杨柳，持此寄情人。一枝何足贵，怜是故园春。
迟景那能久，流芳不及新。更愁征戍客，鬓老边城尘。

卷 18_44【横吹曲辞·折杨柳】

余延寿

大道连国门，东西种杨柳。葳蕤君不见，袅娜垂来久。
缘枝栖暝禽，雄去雌独吟。馀花怨春尽，微月起秋阴。
坐望窗中蝶，起攀枝上叶。好风吹长条，婀娜何如妾。
妾见柳园新，高楼四五春。莫吹胡塞曲，愁杀陇头人。

· 全唐诗 ·

卷 18_45【横吹曲辞·折杨柳】

李白

垂杨拂绿水，摇艳东风年。花明玉关雪，叶暖金窗烟。
美人结长恨，想对心凄然。攀条折春色，远寄龙庭前。

卷 18_46【横吹曲辞·折杨柳】

孟郊

杨柳多短枝，短枝多别离。赠远累攀折，柔条安得垂。
青春有定节，离别无定时。但恐人别促，不怨来迟迟。
莫言短枝条，中有长相思。朱颜与绿杨，并在别离期。

楼上春风过，风前杨柳歌。枝疏缘别苦，曲怨为年多。
花惊燕地雪，叶映楚池波。谁堪别离此，征戍在交河。

卷 18_47【横吹曲辞·折杨柳】

李端

东城攀柳叶，柳叶低著草。少壮莫轻年，轻年有人老。
柳发遍川岗，登高堪断肠。雨烟轻漠漠，何树近君乡。

· 全唐诗 ·

赠君折杨柳，颜色岂能久。上客莫沾巾，佳人正回首。
新柳送君行，古柳伤君情。突兀临荒渡，婆娑出旧营。
随家两岸尽，陶宅五株平。日暮偏愁望，春山有鸟声。

卷 18_48【横吹曲辞·折杨柳】

翁绶

紫陌金堤映绮罗，游人处处动离歌。阴移古戍迷荒草，
花带残阳落远波。台上少年吹白雪，楼中思妇敛青蛾。
殷勤攀折赠行客，此去关山雨雪多。

卷 18_49【横吹曲辞·望行人】

王建

自从江树秋，日日上江楼。梦见离珠浦，书来在桂州。
不同鱼比目，终恨水分流。久不开明镜，多应是白头。

卷 18_50【横吹曲辞·望行人】

张籍

秋风窗下起，旅雁向南飞。日日出门望，家家行客归。

· 全唐诗 ·

无因见边使，空待寄寒衣。独闭青楼暮，烟深鸟雀稀。

卷 18_51【横吹曲辞·关山月】

卢照邻

塞垣通碣石，虏障抵祁连。相思在万里，明月正孤悬。
影移金岫北，光断玉门前。寄书谢中妇，时看鸿雁天。

卷 18_52【横吹曲辞·关山月】

沈佺期

汉月生辽海，曈曔出半晖。合昏玄兔郡，中夜白登围。
晕落关山迥，光含霜霰微。将军听晓角，战马欲南归。

卷 18_53【横吹曲辞·关山月】

李白

明月出天山，苍茫云海间。长风几万里，吹度玉门关。
汉下白登道，胡窥青海湾。由来征战地，不见有人还。
戍客望边色，思归多苦颜。高楼当此夜，叹息未应闲。

· 全唐诗 ·

卷 18_54【横吹曲辞·关山月】

长孙佐辅

凄凄还切切，戍客多离别。何处最伤心，关山见秋月。
关月竟如何，由来远近过。始经玄兔塞，终绕白狼河。
忽忆秦楼妇，流光应共有。已得并蛾眉，还知揽纤手。
去岁照同行，比翼复连形。今宵照独立，顾影自茕茕。
馀晖渐西落，夜夜看如昨。借问映旌旗，何如鉴帷幕。
拂晓朔风悲，蓬惊雁不飞。几时征戍罢，还向月中归。

卷 18_55【横吹曲辞·关山月】

耿漳

月明边徼静，戍客望乡时。塞古柳衰尽，关寒榆发迟。
苍苍万里道，戚戚十年悲。今夜青楼上，还应照所思。

卷 18_56【横吹曲辞·关山月二首】

戴叔伦

月出照关山，秋风人未还。清光无远近，乡泪半书间。

· 全唐诗 ·

一雁过连营，繁霜覆古城。胡笳在何处，半夜起边声。

卷 18_57【横吹曲辞·关山月】

崔融

月生西海上，气逐边风壮。万里度关山，苍茫非一状。
汉兵开郡国，胡马窥亭障。夜夜闻悲笳，征人起南望。

卷 18_58【横吹曲辞·关山月】

李端

露湿月苍苍，关头榆叶黄。回轮照海远，分彩上楼长。
水冻频移幕，兵疲数望乡。只应城影外，万里共如霜。

卷 18_59【横吹曲辞·关山月】

王建

关山月，营开道白前军发。冻轮当碛光悠悠，
照见三堆两堆骨。边风割面天欲明，金莎岭西看看没。

· 全唐诗 ·

卷 18_60【横吹曲辞·关山月】

张籍

秋月朗朗关山上，山中行人马蹄响。关山秋来雨雪多，
行人见月唱边歌。海边漠漠天气白，胡儿夜度黄龙碛。
军中探骑暮出城，伏兵暗处低旌戟。溪水连地霜草平，
野驼寻水碛中鸣。陇头风急雁不下，沙场苦战多流星。
可怜万国关山道，年年战骨多秋草。

卷 18_61【横吹曲辞·关山月】

翁绶

裴回汉月满边州，照尽天涯到陇头。影转银河寰海静，
光分玉塞古今愁。笳吹远戍孤烽灭，雁下平沙万里秋。
况是故园摇落夜，那堪少妇独登楼。

卷 18_62【横吹曲辞·关山月】

鲍氏君徽

高高秋月明，北照辽阳城。塞迥光初满，风多晕更生。
征人望乡思，战马闻鞞惊。朔风悲边草，胡沙昏虏营。

· 全唐诗 ·

霜疑匣中剑，风急原上旌。早晚谒金阙，不闻刁斗声。

卷 18_63【横吹曲辞·洛阳道】

于武陵

浮世若浮云，千回故复新。旋添青草冢，更有白头人。
岁暮客将老，雪晴山欲春。行行车与马，不尽洛阳尘。

卷 18_64【横吹曲辞·洛阳道】

郑渥

客亭门外路东西，多少喧腾事不齐。杨柳惹鞭公子醉，
纆麻掩泪鲁人迷。通宵尘土飞山月，是处经营夹御堤。
顷刻知音几存殁，半回依约认轮蹄。

卷 18_65【横吹曲辞·洛阳陌】

李白

白玉谁家郎，回车渡天津。看花东上陌，惊动洛阳人。

· 全唐诗 ·

卷 18_66【横吹曲辞·长安道】

崔颢

长安甲第高入云，谁家居住霍将军。日晚朝回拥宾从，
路傍拜揖何纷纷。莫言炙手手可热，须臾火尽灰亦灭。
莫言贫贱即可欺，人生富贵自有时。一朝天子赐颜色，
世上悠悠应始知。

卷 18_67【横吹曲辞·长安道】

孟郊

胡风激秦树，贱子风中泣。家家朱门开，得见不可入。
长安十二衢，投树鸟亦急。高阁何人家，笙簧正喧吸。

卷 18_68【横吹曲辞·长安道】

顾况

长安道，人无衣，马无草，何不归来山中老。

· 全唐诗 ·

卷 18_69【横吹曲辞·长安道】

聂夷中

此地无驻马，夜中犹走轮。所以路旁草，少于衣上尘。

卷 18_70【横吹曲辞·长安道】

韦应物

汉家宫殿含云烟，两宫十里相连延。晨霞出没弄丹阙，
春雨依微自甘泉。春雨依微春尚早，长安贵游爱芳草。
宝马横来下建章，香车却转避驰道。
贵游谁最贵，卫霍世难比。何能蒙主恩，幸遇边尘起。
归来甲第拱皇居。朱门峨峨临九衢，
中有流苏合欢之宝帐，一百二十凤凰罗列含明珠。
下有锦铺翠被之粲烂，博山吐香五云散。
丽人绮阁情飘飘，头上鸳钗双翠翘，低鬟曳袖回春雪，
聚黛一声愁碧霄。山珍海错弃藩篱，烹犊炰羔如折葵。
既请列侯封部曲，还将金印授庐儿。欢荣若此何所苦，
但苦白日西南驰。

· 全唐诗 ·

卷 18_71【横吹曲辞·长安道】

白居易

花枝缺处青楼开，艳歌一曲酒一杯。美人劝我急行乐，
自古朱颜不再来，君不见外州客，长安道，一回来，
一回老。

卷 18_72【横吹曲辞·长安道】

薛能

汲汲复营营，东西连两京。关繻古若在，山岳累应成。
各自有身事，不相知姓名。交驰喧众类，分散入重城。
此路去无尽，万方人始生。空馀片言苦，来往觅刘桢。

卷 18_73【横吹曲辞·长安道】

贯休

憧憧合合，八表一辙。黄尘雾合，车马火热。名汤风雨，
利辗霜雪。千车万驮，半宿关月。上有尧禹，下有夔契。
紫气银轮兮常覆金阙，仙掌捧日兮浊河澄澈。
愚将草木兮有言，与华封人兮不别。

· 全唐诗 ·

卷 18_74【横吹曲辞·长安道】

沈佺期

秦地平如掌，层城出云汉。楼阁九衢春，车马千门旦。
绿柳开复合，红尘聚还散。日晚斗鸡回，经过狭斜看。

卷 18_75【横吹曲辞·梅花落】

卢照邻

梅岭花初发，天山雪未开。雪处疑花满，花边似雪回。
因风入舞袖，杂粉向妆台。匈奴几万里，春至不知来。

卷 18_76【横吹曲辞·梅花落】

沈佺期

铁骑几时回，金闺怨早梅。雪中花已落，风暖叶应开。
夕逐新春管，香迎小岁杯。感时何足贵，书里报轮台。

· 全唐诗 ·

卷 18_77【横吹曲辞·梅花落】

刘方平

新岁芳梅树，繁苞四面同。春风吹渐落，一夜几枝空。
小妇今如此，长城恨不穷。莫将辽海雪，来比后庭中。

卷 18_78【横吹曲辞·紫骝马】

卢照邻

骝马照金鞍，转战入皋兰。塞门风稍急，长城水正寒。
雪暗鸣珂重，山长喷玉难。不辞横绝漠，流血几时干。

卷 18_79【横吹曲辞·紫骝马】

李白

紫骝行且嘶，双翻碧玉蹄。临流不肯渡，似惜锦障泥。
白雪关山远，黄云海树迷。挥鞭万里去，安得念春闺。

· 全唐诗 ·

卷 18_80【横吹曲辞·紫骝马】

李益

争场看斗鸡，白鼻紫骝嘶。漳水春归晚，丛台日向低。
歇鞍珠作汗，试剑玉如泥。为谢红梁燕，年年妾独栖。

卷 18_81【横吹曲辞·紫骝马】

秦韬玉

渥洼奇骨本难求，况是豪家重紫骝。膘大宜悬银压鈬。
力浑欺却玉衔头。生狞弄影风随起，躩蹀冲尘汗满沟。
若遇丈夫皆调御，任从骑取觅封侯。

卷 18_82【横吹曲辞·骢马（一曰骢马驱）】

李群玉

浮云何权奇，绝足势未知。长嘶青海风，躩蹀振云丝。
由来渥洼种，本是苍龙儿。穆满不再活，无人昆阆骑。
君识跃峤怯，宁劳耀金羁。青刍与白水，空笑驽骀肥。
伯乐傥一见，应惊耳长垂。当思八荒外，逐日向瑶池。

· 全唐诗 ·

卷 18_83【横吹曲辞·骢马曲】

纪唐夫

连钱出塞蹋沙蓬，岂比当时御史骢。逐北自谙深磧路，
连嘶谁念静边功。登山每与青云合，弄影应知碧草同。
今日虏平将换妾，不如罗袖舞春风。

卷 18_84【横吹曲辞·雨雪曲】

李端

天山一丈雪，杂雨夜霏霏。湿马胡歌乱，经烽汉火微。
丁零苏武别，疏勒范羌归。若著关头过，长榆叶定稀。

卷 18_85【横吹曲辞·雨雪曲】

翁绶

边声四合殷河流，雨雪飞来遍陇头。铁岭探人迷鸟道，
阴山飞将湿貂裘。斜飘旌旆过戎帐，半杂风沙入戍楼。
一自塞垣无李蔡，何人为解北门忧。

· 全唐诗 ·

卷 18_86【横吹曲辞·刘生】

卢照邻

刘生气不平，抱剑欲专征。报恩为豪侠，死难在横行。
翠羽装剑鞘，黄金饰马缨。但令一顾重，不吝百身轻。

卷 18_87【横吹曲辞·雍台歌】

温庭筠

太子池南楼百尺，八窗新树疏帘隔。黄金铺首画钩陈，
羽葆亭童拂交戟。盘纡阑楯临高台，帐殿临流鸾扇开。
早雁声鸣细波起，映花卤簿龙飞回。

卷 18_88【横吹曲辞·捉搦歌】

张祜

门上关，墙上棘，窗中女子声唧唧，洛阳大道徒自直。
女子心在婆舍侧，呜呜笼鸟触四隅。
养男男娶妇，养女女嫁夫。阿婆六十翁七十，
不知女子长日泣，从他嫁去无悒悒。

· 全唐诗 ·

卷 18_89【横吹曲辞·幽州胡马客歌】

李白

幽州胡马客，绿眼虎皮冠。笑拂两只箭，万人不可干。
弯弓若转月，白雁落云端。双双掉鞭行，游猎向楼兰。
出门不顾后，报国死何难。天骄五单于，狼戾好凶残。
牛马散北海，割鲜若虎餐。虽居燕支山，不道朔雪寒。
妇女马上笑，颜如赭玉盘。翻入射鸟兽，花月醉雕鞍。
旄头四光芒，争战若蜂攒。白刃洒赤血，流沙为之丹。
名将古谁是，疲兵良可叹。何时天狼灭，父子得闲安。

卷 18_90【横吹曲辞·白鼻騊】

李白

银鞍白鼻騊，绿地障泥锦。
细雨春风花落时，挥鞭且就胡姬饮。

卷 18_91【横吹曲辞·白鼻騊】

张祜

为底胡姬酒，长来白鼻騊。摘莲抛水上，郎意在浮花。

· 全唐诗 ·

第十九卷

卷 19_1【相和歌辞·箜篌引】

李贺

公乎公乎，提壶将焉如。屈平沉湘不足慕，
徐衍入海诚为愚。公乎公乎，床有菅席盘有鱼，
北里有贤兄，东邻有小姑，陇亩油油黍与葫，
瓦甒浊醪蚁浮浮。黍可食，醪可饮，公乎公乎其奈居，
被发奔流竟何如？贤兄小姑哭呜呜。

卷 19_2【相和歌辞·公无渡河】

李白

黄河西来决昆仑，咆哮万里触龙门。波滔天，尧咨嗟，
大禹理百川，儿啼不窥家。杀湍湮洪水，九州始蚕麻。
其害乃去。茫然风沙，被发之叟狂而痴。
清晨径流欲奚为，旁人不惜妻止之，公无渡河苦渡之。
虎可搏，河难凭，公果溺死流海湄，有长鲸白齿若雪山。
公乎公乎，挂骨于其间，箜篌所悲竟不还。

· 全唐诗 ·

卷 19_3【相和歌辞·公无渡河】

王建

渡头恶天两岸远，波涛塞川如叠坂。幸无白刃驱向前，
何用将身自弃捐。蛟龙啮尸鱼食血，黄泥直下无青天。
男儿纵轻妇人语，惜君性命还须取。妇人无力挽断衣，
舟沉身死悔难追。公无渡河公自为。

卷 19_4【相和歌辞·公无渡河】

温庭筠

黄河怒浪连天来，大响沄沄如殷雷。龙伯驱风不敢上，
百川喷雪高崔嵬。二十五弦何太哀，请公勿渡立裴回。
下有狂蛟锯为尾，裂帆截棹磨霜齿。神锥凿石塞神潭，
白马趁蹀赤尘起。公乎跃马扬玉鞭，灭没高蹄日千里。

19_5【相和歌辞·公无渡河】

王睿

浊波洋洋兮凝晓雾，公无渡河兮公苦渡。
风号水激兮呼不闻，提壶看入兮中流去。

· 全唐诗 ·

浪摆衣裳兮随步没，沉尸深入兮蛟螭窟。
蛟螭尽醉兮君血干，推出黄沙兮泛君骨。
当时君死妾何适，遂就波澜合魂魄。
愿持精卫衔石心，穷取河源塞泉脉。

卷 19_6【相和歌辞·江南曲】

宋之问

妾住越城南，离居不自堪。采花惊曙鸟，摘叶喂春蚕。
懒结茱萸带，愁安玳瑁簪。侍臣消瘦尽，日暮碧江潭。

卷 19_7【相和歌辞·江南曲】

刘昫

美人何荡漾，湖上风月长。玉手欲有赠，裴回双鸣珰。
歌声随绿水，怨色起朝阳。日暮还家望，云波横洞房。

卷 19_8【相和歌辞·江南曲】

丁仙芝

长干斜路北，近浦是儿家。有意来相访，明朝出浣纱。

· 全唐诗 ·

发向横塘口，船开值急流。知郎旧时意，且请拢船头。
昨暝逗南陵，风声波浪阻。入浦不逢人，归家谁信汝。
未晓已成妆，乘潮去茫茫。因从京口渡，使报邵陵王。
始下芙蓉楼，言发琅邪岸。急为打船开，恶许傍人见。

卷 19_9【相和歌辞·江南曲八首】

刘希夷

暮宿南洲草，晨行北岸林。日悬沧海阔，水隔洞庭深。
烟景无留意，风波有异浔。岁游难极目，春戏易为心。
朝夕无荣遇，芳菲已满襟。

艳唱潮初落，江花露未晞。春洲惊翡翠，朱服弄芳菲。
画舫烟中浅，青阳日际微。锦帆冲浪湿，罗袖拂行衣。
含情罢所采，相叹惜流晖。

君为陇西客，妾遇江南春。朝游含灵果，夕采弄风蘋。
果气时不歇，蘋花日自新。以此江南物，持赠陇西人。
空盈万里怀，欲赠竟无因。

皓如楚江月，霭若吴岫云。波中自皎镜，山上亦氛氲。
明月留照妾，轻云持赠君。山川各离散，光气乃殊分。
天涯一为别，江北自相闻。

舫舟乘潮去，风帆振草凉。潮平见楚甸，天际望维扬。

· 全唐诗 ·

洄溯经千里，烟波接两乡。云明江屿出，日照海流长。
此中逢岁晏，浦树落花芳。

暮春三月晴，维扬吴楚城。城临大江汜，回映洞浦清。
晴云曲金阁，珠楼碧烟里。月明芳树群鸟飞，
风过长林杂花起。可怜离别谁家子，于此一至情何已。

北堂红草盛丰茸，南湖碧水照芙蓉。朝游暮起金花尽，
渐觉罗裳珠露浓。自惜妍华三五岁，已叹关山千万重。
人情一去无还日，欲赠怀芳怨不逢。

忆昔江南年盛时，平生怨在长洲曲。冠盖星繁湘水上，
冲风漂落洞庭绿，落花舞袖红纷纷，朝霞高阁洗晴云。
谁言此处婵娟子，珠玉为心以奉君。

卷 19_10【相和歌辞·江南曲】

于鹄

偶向江边采白蘋，还随女伴赛江神。
众中不敢分明语，暗掷金钱卜远人。

· 全唐诗 ·

卷 19_11【相和歌辞·江南曲】

李益

嫁得瞿塘贾，朝朝误妾期。早知潮有信，嫁与弄潮儿。

卷 19_12【相和歌辞·江南曲】

李贺

汀洲白蘋草，柳恹乘马归。江头楂树香，岸上蝴蝶飞。
酒杯若叶露，玉轸蜀桐虚。朱楼通水陌，沙暖一双鱼。

卷 19_13【相和歌辞·江南曲】

李商隐

郎船安两桨，侬舸动双桡。扫黛开宫额，裁裙约楚腰。
乖期方积思，临醉欲拼娇。莫以采菱唱，欲羨秦台箫。

· 全唐诗 ·

卷 19_14【相和歌辞·江南曲】

韩翃

长乐花枝雨点消，江城日暮好相邀。
春楼不闭葳蕤锁，绿水回通宛转桥。

卷 19_15【相和歌辞·江南曲】

温庭筠

妾家白蘋浦，日上芙蓉楫。轧轧摇桨声，移舟入茭叶。
溪长菱叶深，作底难相寻。避郎郎不见，鸂鶒自浮沉。
拾萍萍无根，采莲莲有子。不作浮萍生，宁作藕花死。
岸傍骑马郎，乌帽紫游缰。含愁复含笑，回首问横塘。
妾住金陵步，门前朱雀航。流苏持作帐，芙蓉持作梁。
出入金犊幃，兄弟侍中郎。前年学歌舞，定得郎相许。
连娟眉绕山，依约腰如杵。凤管悲若咽，鸾弦娇欲语。
扇薄露红铅，罗轻压金缕。明月西南楼，珠帘玳瑁钩。
横波巧能笑，弯蛾不识愁。花开子留树，草长根依土。
早闻金沟远，底事归郎许。不学杨白花，朝朝泪如雨。

· 全唐诗 ·

卷 19_16【相和歌辞·江南曲】

张籍

江南人家多橘树，吴姬舟上织白纻。土地卑湿饶虫蛇，
连木为牌入江住。江村亥日长为市，落帆渡桥来浦里。
青莎覆城竹为屋，无井家家饮潮水。长江午日酤春酒，
高高酒旗悬江口。倡楼两岸悬水栅，夜唱竹枝留北客。
江南风土欢乐多，悠悠处处尽经过。

卷 19_17【相和歌辞·江南曲】

罗隐

江烟湿雨蛟绡软，漠漠远山眉黛浅。水国多愁又有情，
夜槽压酒银船满。绷丝采怨凝晓空，吴王台榭春梦中。
鸳鸯鸂鶒唤不起，平铺渌水眠东风。西陵路边月悄悄，
油壁轻车嫁苏小。

卷 19_18【相和歌辞·江南曲】

陆龟蒙

为爱江南春，涉江聊采蘋。水深烟浩浩，空对双车轮。

· 全唐诗 ·

车轮明月团，车盖浮云盘。云月徒自好，水中行路难。
遥遥洛阳道，夹岸生春草。寄语棹船郎，莫夸风浪好。

卷 19_19【相和歌辞·江南曲】

陆龟蒙

鱼戏莲叶间，参差隐叶扇。鸂鶒鸂鶒窥，潏潏无因见。
鱼戏莲叶东，初霞射红尾。傍临谢山侧，恰值清风起。
鱼戏莲叶西，盘盘舞波急。潜依曲岸凉，正对斜光入。
鱼戏莲叶南，欹危午烟叠。光摇越鸟巢，影乱吴娃楫。
鱼戏莲叶北，澄阳动微涟。回看帝子渚，稍背鄂君船。

卷 19_20【相和歌辞·度关山】

李端

雁塞日初晴，胡关雪复平。危竿缘广漠，古戍傍长城。
拔剑金星出，弯弧玉羽鸣。谁知系虏者，贾谊是书生。

· 全唐诗 ·

卷 19_21 【相和歌辞·关山曲】

马戴

金锁耀兜鍪，黄云拂紫骝。叛羌旗下戮，陷壁夜中收。
霜霰戎衣故，关河碣气秋。箭创殊未合，更遣击兰州。
火发龙山北，中宵易左贤。勒兵临汉水，惊雁散胡天。
木落防河急，军孤受敌偏。犹闻汉皇怒，按剑待开边。

卷 19_22 【相和歌辞·登高丘而望远】

李白

登高丘而望远海，六鳌骨已霜，三山流安在？
扶桑半摧折，白日沉光彩。银台金阙如梦中，
秦皇汉武空相待。精卫费木石，鼋鼉无所凭。
君不见骊山茂陵尽灰灭，牧羊之子来攀登。
盗贼劫宝玉，精灵竟何能。穷兵黩武今如此，
鼎湖飞龙安可乘？

卷 19_23 【相和歌辞·蒿里】

贯休

兔不迟，乌更急，但恐穆王八骏，著鞭不及。所以蒿里，

· 全唐诗 ·

坟出戢戢。气凌云天，龙腾凤集。尽为风消土吃，
狐掇蚁拾。黄金不啼玉不泣，白杨骚屑。乱风愁月，
折碑石人，莽秽榛没，牛羊窳窳。时见牧童儿，弄枯骨。

卷 19_24【相和歌辞·挽歌】

赵微明

寒日蒿上明，凄凄郭东路。素车谁家子，丹旌引将去。
原下荆棘丛，丛边有新墓。人间痛伤别，此是长别处。
旷野何萧条，青松白杨树。

卷 19_25【相和歌辞·挽歌二首】

于鹄

阴风吹黄蒿，挽歌渡秋水。车马却归城，孤坟月明里。
双辙出郭门，绵绵东西道。送死多于生，几人得终老。
见人切肺肝，不如归山好。不闻哀哭声，默默安怀抱。
时尽从物化，又免生忧扰。世间寿者稀，尽为悲伤恼。

· 全唐诗 ·

卷 19_26 【相和歌辞·挽歌】

孟云卿

草草门巷喧，涂车俨成位。冥冥何所须，尽我生人意。
北邙路非远，此别终天地。临穴频抚棺，至哀反无泪。
尔形未衰老，尔息犹童稚。骨肉不可离，皇天若容易。
房帷即虚张，庭宇为哀次。薤露歌若斯，人生尽如寄。

卷 19_27 【相和歌辞·挽歌】

白居易

丹旌何飞扬，素骖亦悲鸣。晨光照闾巷，輶车俨欲行。
萧条九月天，哀挽出重城。借问送者谁，妻子与弟兄。
苍苍上古原，峨峨开新茔。含酸一恸哭，异口同哀声。
旧垄转芜绝，新坟日罗列。
春风草绿北邙山，此地年年生死别。

卷 19_28 【相和歌辞·对酒】

崔国辅

行行日将夕，荒村古冢无人迹。朦胧荆棘一鸟飞，

· 全唐诗 ·

屡唱提壶酤酒吃。古人不达酒不足，遗恨精灵传此曲。
寄言当代诸少年，平生且尽杯中禄。

卷 19_29【相和歌辞·对酒二首】

李白

松子栖金华，安期入蓬海。此人古之仙，羽化竟何在。
浮生速流电，倏忽变光彩。天地无凋换，容颜有迁改。
对酒不肯饮，含情欲谁待。

劝君莫拒杯，春风笑人来。桃李如旧识，倾花向我开。
流莺啼碧树，明月窥金罍。昨来朱颜子，今日白发催。
棘生石虎殿，鹿走姑苏台。自古帝王宅，城阙闭黄埃。
君若不饮酒，昔人安在哉。

卷 19_30【相和歌辞·陌上桑】

李白

美女渭桥东，春还事蚕作。五马如飞龙，青丝结金络。
不知谁家子，调笑来相谑。妾本秦罗敷，玉颜艳名都。
绿条映素手，采桑向城隅。使君且不顾，况复论秋胡。
寒蜚爱碧草，鸣凤栖青梧。托心自有处，但怪傍人愚。
徒令白日暮，高驾空踟蹰。

· 全唐诗 ·

卷 19_31【相和歌辞·陌上桑】

常建

翳翳陌上桑，南枝交北堂。美人金梯出，素手自提筐。
非但畏蚕饥，盈盈娇路傍。

卷 19_32【相和歌辞·陌上桑】

陆龟蒙

皓齿还如贝色含，长眉亦似烟华贴。
邻娃尽著绣裆襦，独自提筐采蚕叶。

卷 19_33【相和歌辞·采桑】

郎大家宋氏

春来南雁归，日去西蚕远。妾思纷何极，客游殊未返。

· 全唐诗 ·

卷 19_34 【相和歌辞·采桑】

刘希夷

杨柳送行人，青青西入秦。秦家采桑女，楼上不胜春。
盈盈灞水曲，步步春芳绿。红脸耀明珠，绛唇含白玉。
回首渭桥东，遥怜树色同。青丝娇落日，缃绮弄春风。
携笼长叹息，逶迤恋春色。看花若有情，倚树疑无力。
薄暮思悠悠，使君南陌头。相逢不相识，归去梦青楼。

卷 19_35 【相和歌辞·采桑】

李彦暉

采桑畏日高，不待春眠足。攀条有馀愁，那矜貌如玉。
千金岂不赠，五马空踟躅。何以变真性，幽篁雪中绿。

卷 19_36 【相和歌辞·采桑】

王建

鸟鸣桑叶间，叶绿条复柔。攀看去手近，放下长长钩。
黄花盖野田，白马少年游。所念岂回顾，良人在高楼。

· 全唐诗 ·

卷 19_37【相和歌辞·日出行】

李白

日出东方隈，似从地底来。历天又入海，
六龙所舍安在哉？其始与终古不息。
人非元气安能与之久裴回。草不谢荣于春风，
木不怨落于秋天，谁挥鞭策驱四运，万物兴歇皆自然。
羲和羲和，汝奚汨没于荒淫之波。
鲁阳何德，驻景挥戈，逆道违天，矫诬实多。
吾将囊括大块，浩然与溟滓同科。

卷 19_38【相和歌辞·日出行】

李贺

白日下昆仑，发光如舒丝。徒照葵藿心，不照游子悲。
折折黄河曲，日从中央转。旸谷耳曾闻，若木眼不见。
奈何铄石，胡为销人。羿弯弓属矢那不中，
足令久不得奔，讵教晨光夕昏。

· 全唐诗 ·

卷 19_39【相和歌辞·王昭君】

崔国辅

汉使南还尽，胡中妾独存。紫台绵望绝，秋草不堪论。

卷 19_40【相和歌辞·王昭君】

崔国辅

一回望月一回悲，望月月移人不移。
何时得见汉朝使，为妾传书斩画师。

卷 19_41【相和歌辞·王昭君】

卢照邻

合殿恩中绝，交河使渐稀。肝肠辞玉辇，形影向金微。
汉宫草应绿，胡庭沙正飞。愿逐三秋雁，年年一度归。

· 全唐诗 ·

卷 19_42【相和歌辞·王昭君】

骆宾王

敛容辞豹尾，缄怨度龙鳞。金钿明汉月，玉箸染胡尘。
妆镜菱花暗，愁眉柳叶颦。惟有清笳曲，时闻芳树春。

卷 19_43【相和歌辞·王昭君】

沈佺期

非君惜鸾殿，非妾妒蛾眉。薄命由骄虏，无情是画师。
嫁来胡地恶，不并汉宫时。心苦无聊赖，何堪上马辞。

卷 19_44【相和歌辞·王昭君】

梁献

图画失天真，容华坐误人。君恩不可再，妾命在和亲。
泪点关山月，衣销边塞尘。一闻阳鸟至，思绝汉宫春。

· 全唐诗 ·

卷 19_45【相和歌辞·王昭君】

上官仪

玉关春色晚，金河路几千。琴悲桂条上，笛怨柳花前。
雾掩临妆月，风惊入鬓蝉。缄书待还使，泪尽白云天。

卷 19_46【相和歌辞·王昭君】

董思恭

琵琶马上弹，行路曲中难。汉月正南远，燕山直北寒。
髻鬟风拂散，眉黛雪沾

· 全唐诗 ·

第二十卷

卷 20_1【相和歌辞·前苦寒行二首】

杜甫

汉时长安雪一丈，牛马毛寒缩如猬。楚江巫峡冰入怀，
虎豹哀号又堪记。秦城老翁荆扬客，惯习炎蒸岁絺绤。
玄冥祝融气或交，手持白羽未敢释。

去年白帝雪在山，今年白帝雪在地。冻埋蛟龙南浦缩，
寒刮肌肤北风利。楚人四时皆麻衣，楚天万里无晶辉。
三足之乌足恐断，羲和送将安所归。

卷 20_2【相和歌辞·后苦寒行二首】

杜甫

南纪巫庐瘴不绝，太古已来无尺雪。蛮夷长老怨苦寒，
昆仑天关冻应折。玄猿口噤不能啸，白鹄翅垂眼流血，
安得春泥补地裂。

· 全唐诗 ·

晚来江门失大木，猛风中夜吹白屋。天兵断斩青海戎，
杀气南行动坤轴，不尔苦寒何太酷。巴东之峡生凌澌，
彼苍回轩人得知。

卷 20_3【相和歌辞·苦寒行】

刘驾

严寒动八荒，薿薿无休时。阳乌不自暖，雪压扶桑枝。
岁暮寒益壮，青春安得归。朔雁到南海，越禽何处飞。
谁言贫士叹，不为身无衣。

卷 20_4【相和歌辞·苦寒行】

僧贯休

北风北风，职何严毒，摧壮士心，缩金乌足。
冻云噤噤碍雪，一片下不得。声绕枯桑，根在沙塞。
黄河彻底，顽直到海。一气搏束，万物无态。
唯有吾庭前杉松树枝，枝枝健在。

· 全唐诗 ·

卷 20_5【相和歌辞·苦寒行】

僧齐己

冰峰撑空寒矗矗，云凝水冻埋海陆。
杀物之性，伤人之欲，既不能断绝蒺藜荆棘之根株，
又不能展凤凰麒麟之拳跼。如此则何如为和煦，为膏雨，
自然天下之荣枯，融融于万户。

卷 20_6【相和歌辞·北上行】

李白

北上何所苦，北上缘太行。磴道盘且峻，巉岩凌穹苍。
马足蹶侧石，车轮摧高冈。沙尘接幽州，烽火连朔方。
杀气毒剑戟，严风裂衣裳。奔鲸夹黄河，凿齿屯洛阳。
前行无归日，返顾思旧乡。惨戚冰雪里，悲号绝中肠。
尺布不掩体，皮肤剧枯桑。汲水涧谷阻，采薪陇坂长。
猛虎又掉尾，磨牙皓秋霜。草木不可餐，饥饮零露浆。
叹此北上苦，停骖为之伤。何日王道平，开颜睹天光。

· 全唐诗 ·

卷 20_7【相和歌辞·豫章行】

李白

胡风吹代马，北拥鲁阳关。吴兵照海雪，西讨何时还。
半渡上辽津，黄云惨无颜。老母与子别，呼天野草间。
白马绕旌旗，悲鸣相追攀。白杨秋月苦，早落豫章山。
本为休明人，斩虏素不闲。岂惜战斗死，为君扫凶顽。
精感石没羽，岂忘惮险艰。楼船若鲸飞，波荡落星湾。
此曲不可奏，三军鬓成斑。

卷 20_8【相和歌辞·董逃行】

元稹

董逃董逃董卓逃，揩铿戈甲声劳嘈。剌剌深脐脂焰焰，
人皆数叹曰，尔独不忆年年取我身上膏。
膏销骨尽烟火死，长安城中贼毛起。城门四走公卿士，
走劝刘虞作天子。刘虞不敢作天子，曹瞒篡乱从此始。
董逃董逃人莫喜，胜负翻环相枕倚。缝缀难成裁破易，
何况曲针不能伸巧指，欲学裁缝须准拟。

· 全唐诗 ·

卷 20_9【相和歌辞·董逃行】

张籍

洛阳城头火曛曛，乱兵烧我天子宫。宫城南面有深山，
尽将老幼藏其间。重岩为屋椽为食，丁男夜行候消息。
闻道官军犹掠人，旧里如今归未得。
董逃行，汉家几时重太平。

卷 20_10【相和歌辞·相逢行】

崔颢

妾年初二八，家住洛桥头。玉户临驰道，朱门近御沟。
使君何假问，夫婿大长秋。女弟新承宠，诸兄近拜侯。
春生百子殿，花发五城楼。出入千门里，年年乐未休。

卷 20_11【相和歌辞·相逢行二首】

李白

朝骑五花马，谒帝出银台。秀色谁家子，云车珠箔开。
金鞭遥指点，玉勒近迟回。夹毂相借问，疑从天上来。
怜肠愁欲断，斜日复相催。下车何轻盈，飘然似落梅。

· 全唐诗 ·

邀入青绮门，当歌共衔杯。衔杯映歌扇，似月云中见。
相见不相亲，不如不相见。相见情已深，未语可知心。
胡为守空闺，孤眠愁锦衾。锦衾与罗帏，缠绵会有时。
春风正澹荡，暮雨来何迟。愿因三青鸟，更报长相思。
光景不待人，须臾发成丝。当年失行乐，老去徒伤悲。
持此道密意，无令旷佳期。

相逢红尘内，高揖黄金鞭。万户垂杨里，君家阿那边。

卷 20_12【相和歌辞·相逢行】

韦应物

二十登汉朝，英声迈今古。适从东方来，又欲谒明主。
犹酣新丰酒，尚带霸陵雨。邂逅两相逢，别来间寒暑。
宁知白日晚，暂向花间语。忽闻长乐钟，走马东西去。

卷 20_13【相和歌辞·三妇艳诗】

董思恭

大妇裁纨素，中妇弄明珰。小妇多姿态，登楼红粉妆。
丈人且安坐，初日渐流光。

· 全唐诗 ·

卷 20_14【相和歌辞·中妇织流黄】

虞世南

寒闺织素锦，含怨敛双蛾。综新交缕涩，经脆断丝多。
衣香逐举袖，钏动应鸣梭。还恐裁缝罢，无信达交河。

卷 20_15【相和歌辞·难忘曲】

李贺

夹道开洞门，弱杨低画戟。帘影竹叶起，箫声吹日色。
蜂语绕妆镜，拂蛾学春碧。乱系丁香梢，满阑花向夕。

卷 20_16【相和歌辞·塘上行】

李贺

藕花凉露湿，花缺藕根涩。飞下雌鸳鸯，塘水声溢溢。

· 全唐诗 ·

卷 20_17【相和歌辞·苦辛行】

戎昱

且莫奏短歌，听余苦辛词：如今刀笔士，不及屠酤儿。
少年无事学诗赋，岂意文章复相误。东西南北少知音，
终年竟岁悲行路。仰面诉天天不闻，低头告地地不言。
天地生我尚如此，陌上他人何足论。谁谓西江深，
涉之固无忧；谁谓南山高，可以登之游。
险巖惟有世间路，一向令人堪白头。贵人立意不可测，
等闲桃李成荆棘。风尘之士深可亲，心如鸡犬能依人。
悲来却忆汉天子，不弃相如家旧贫。饮酒酒能散羁愁，
谁家有酒判一醉，万事从他江水流。

卷 20_18【相和歌辞·秋胡行】

高适

妾本邯郸未嫁时，容华倚翠人未知。一朝结发从君子，
将妾迢迢东路陲。时逢大道无难阻，君方游宦从陈汝。
蕙楼独卧频度春，彩落辞君几徂暑。三月垂杨蚕未眠，
携笼结侣南陌边。道逢行子不相识，赠妾黄金买少年。
妾家夫婿轻离久，寸心誓与长相守。愿言行路莫多情，
送妾贞心在人口。日暮蚕饥相命归，携笼端饰来庭闱。
劳心苦力终无恨，所冀君恩那可依。闻说行人已归止，

· 全唐诗 ·

乃是向来赠金子。相看颜色不复言，相顾怀惭有何已。
从来自隐无疑背，直为君情也相会。如何咫尺仍有情，
况复迢迢千里外。此时顾恩不顾身，念君此日赴河津。
莫道向来不得意，故欲留规诫后人。

卷 20_19【相和歌辞·善哉行】

僧贯休

有美一人兮婉如清扬，识曲别音兮令姿煌煌。
绣袂捧琴兮登君子堂，如彼萱草兮使我忧忘。
欲赠之以紫玉尺，白银珰，久不见之兮湘水茫茫。

卷 20_20【相和歌辞·善哉行】

僧齐己

大鹏刷翩谢溟渤，青云万层高突出。下视秋涛空渺弥，
旧处鱼龙皆细物。人生在世何容易，眼浊心昏信生死。
愿除嗜欲待身轻，携手同寻列仙事。

· 全唐诗 ·

卷 20_21【相和歌辞·来日大难】

李白

来日一身，携粮负薪。道长食尽，苦口焦唇。今日醉饱，
乐过千春。仙人相存，诱我远学。海陵三山，陆憩五岳。
乘龙上三天，飞目瞻两角。授以神药，金丹满握。
螭蛄蒙恩，深愧短促。思填东海，强衔一木。道重天地，
轩师广成。蝉翼九五，以求长生。下土大笑，如苍蝇声。

卷 20_22【相和歌辞·当来日大难】

元稹

当来日大难行，前有坂，后有坑，大梁侧，小梁倾。
两轴相绞，两轮相撑。大牛竖，小牛横。乌啄牛背，
足跌力狞。当来日大难行，太行虽险，险可使平。
轮轴自挠，牵制不停。泥潦渐久，荆棘旋生。
行必不得，不如不行。

· 全唐诗 ·

卷 20_23【相和歌辞·陇西行】

王维

十里一走马，五里一扬鞭。都护军书至，匈奴围酒泉。
关山正飞雪，烽火断无烟。

卷 20_24【相和歌辞·陇西行】

耿漳

雪下阳关路，人稀陇戍头。封狐犹未翦，边将岂无羞。
白草三冬色，黄云万里愁。因思李都尉，毕竟不封侯。

卷 20_25【相和歌辞·陇西行】

长孙佐辅

阴云凝朔气，陇上正飞雪。四月草不生，北风劲如切。
朝来羽书急，夜救长城窟。道隘行不前，相呼抱鞍歇。
人寒指欲堕，马冻蹄亦裂。射雁旋充饥，斧冰还止渴。
宁辞解围斗，但恐乘疲没。早晚边候空，归来养羸卒。

· 全唐诗 ·

卷 20_26 【相和歌辞·东门行】

柳宗元

汉家三十六将军，东方雷动横阵云。鸡鸣函谷客如雾，
貌同心异不可数。赤丸夜语飞电光，徼巡司隶眠如羊。
当街一叱百吏走，冯敬胸中函匕首。凶徒侧耳潜愠心，
悍臣破胆皆杜口。魏王卧内藏兵符，子西掩袂真无辜。
羌胡羯下一朝起，敌国舟中非所拟。安陵谁辨削砺功，
韩国讵明深井里。绝咽断骨那下补，万金宠赠不如土。

卷 20_27 【相和歌辞·饮马长城窟行】

李世民

塞外悲风切，交河冰已结。瀚海百重波，阴山千里雪。
迥戍危烽火，层峦引高节。悠悠卷旆旌，饮马出长城。
寒沙连骑迹，朔吹断边声。胡尘清玉塞，羌笛韵金钲。
绝漠干戈戢，车徒振原隰。都尉反龙堆，将军旋马邑。
扬麾氛雾静，纪石功名立。荒裔一戎衣，云台凯歌入。

· 全唐诗 ·

卷 20_28【相和歌辞·饮马长城窟行】

虞世南

驰马渡河干，流深马渡难。前逢锦车使，都护在楼兰。
轻骑犹衔勒，疑兵尚解鞍。温池下绝涧，栈道接危峦。
拓地勋未赏，亡城律讵宽。有月关犹暗，经春陇尚寒。
云昏无复影，冰合不闻湍。怀君不可遇，聊持报一餐。

卷 20_29【相和歌辞·饮马长城窟行】

袁朗

朔风动秋草，清跸长安道。长城连不穷，所以隔华戎。
规模惟圣作，荷负晓成功。鸟庭已向内，龙荒更凿空。
玉关尘卷静，金微路已通。汤征随北怨，舜咏起南风。
画野功初立，绥边事云集。朝服践狼居，凯歌旋马邑。
山响传凤吹，霜华藻琼铍。属国拥节归，单于款关入。
日落寒云起，惊沙被原隰。零落叶已寒，河流清且急。
四时徭役尽，千载干戈戢。太平今若斯，汗马竟无施。
惟当事笔研，归去草封禅。

· 全唐诗 ·

卷 20_30【相和歌辞·饮马长城窟行】

王翰

长安少年无远图，一生惟羡执金吾。骐驎前殿拜天子，
走马为君西击胡。胡沙猎猎吹人面，汉虏相逢不相见。
遥闻鼙鼓动地来，传道单于夜犹战。此时顾恩宁顾身，
为君一行摧万人。壮士挥戈回白日，单于溅血染朱轮。
回来饮马长城窟，长安道傍多白骨。问之耆老何代人，
云是秦王筑城卒。黄昏塞北无人烟，鬼哭啾啾声沸天。
无罪见诛功不赏，孤魂流落此城边。当昔秦王按剑起，
诸侯膝行不敢视。富国强兵二十年，筑怨兴徭九千里。
秦王筑城何太愚，天实亡秦非北胡。一朝祸起萧墙内，
渭水咸阳不复都。

卷 20_31【相和歌辞·饮马长城窟行】

王建

长城窟，长城窟边多马骨。古来此地无井泉，
赖得秦家筑城卒。征人饮马愁不回，长城变作望乡堆。
蹄迹未干人去近，续后马来泥污尽。枕弓睡著待水生，
不见阴山在前阵。马蹄足脱装马头，健儿战死谁封侯。

· 全唐诗 ·

卷 20_32【相和歌辞·饮马长城窟行】

僧子兰

游客长城下，饮马长城窟。马嘶闻水腥，为浸征人骨。
岂不是流泉，终不成潺湲。洗尽骨上土，不洗骨中冤。
骨若比流水，四海有还魂。空流呜咽声，声中疑是言。

卷 20_33【相和歌辞·上留田】

李白

行至上留田，孤坟何峥嵘。积此万古恨，春草不复生。
悲风四边来，肠断白杨声。借问谁家地，埋没蒿里茔。
古老向余言，言是上留田，蓬科马鬣今已平。
昔之弟死兄不葬，他人于此举铭旌。一鸟死，百鸟鸣；
一兽死，百兽惊。桓山之禽别离苦，欲去回翔不能征。
田氏仓卒骨肉分，青天白日摧紫荆。交柯之木本同形，
东枝憔悴西枝荣。无心之物尚如此，参商胡乃寻天兵。
孤竹延陵，让国扬名；高风缅邈，颓波激清。
尺布之谣，塞耳不能听。

· 全唐诗 ·

卷 20_34【相和歌辞·上留田】

僧贯休

父不父，兄不兄，上留田，螯贼生。徒陟冈，泪峥嵘。
我欲使诸凡鸟雀，尽变为鹳鸪；我欲使诸凡草木，
尽变为田荆。邻人歌，邻人歌，古风清，清风生。

卷 20_35【相和歌辞·安乐宫】

李贺

深井桐乌起，尚复牵清水。未盥邵陵王，瓶中弄长翠。
新城安乐宫，宫如凤凰翅。歌回蜡版鸣，大绾提壶使。
绿繁悲水曲，茱萸别秋子。

卷 20_36【相和歌辞·放歌行】

王昌龄

南渡洛阳津，西望十二楼。明堂坐天子，月朔朝诸侯。
清乐动千门，皇风被九州。庆云从东来，泱泱抱日流。
升平贵论道，文墨将何求。有诏征草泽，微臣献谋猷。
冠冕如星罗，拜揖曹与周。望尘非吾事，入赋且迟留。

· 全唐诗 ·

幸蒙国士识，因脱负薪裘。今者放歌行，以慰梁父愁。
但营数斗禄，奉养毋丰羞。若得金膏遂，飞云亦可俦。

卷 20_37【相和歌辞·野田黄雀行】

李白

游莫逐炎洲翠，栖莫近吴宫燕。吴宫火起焚尔窠，
炎洲逐翠遭网罗。萧条两翅蓬蒿下，纵有鹰鹯奈若何。

卷 20_38【相和歌辞·野田黄雀行】

储光羲

啧啧野田雀，不知躯体微。闲穿深蒿里，争食复争飞。
穷老一颓舍，枣多桑树稀。无枣犹可食，无桑何以衣。
萧条空仓暮，相引时来归。邪路岂不捷，渚田岂不肥。
水长路且坏，恻恻与心违。

卷 20_39【相和歌辞·野田黄雀行】

僧贯休

高树风多，吹尔巢落。深蒿叶暖，宜尔依薄。莫近鸱类，

· 全唐诗 ·

珠网亦恶。饮野田之清水，食野田之黄粟。深花中睡，
埽土里浴。如此即全胜啄太仓之谷，而更穿人屋。

卷 20_40【相和歌辞·野田黄雀行】

僧齐己

双双野田雀，上下同饮啄。暖去栖蓬蒿，寒归傍篱落。
殷勤避罗网，乍可遇雕鹗。雕鹗虽不仁，分明在寥廓。

卷 20_41【相和歌辞·雁门太守行】

李贺

黑云压城城欲摧，甲光向月金鳞开。角声满天秋色里，
塞上燕支凝夜紫。半卷红旗临易水，霜重鼓寒声不起。
报君黄金台上意，提携玉龙为君死。

卷 20_42【相和歌辞·雁门太守行】

张祜

城头月没霜如水，趺趺蹋沙人似鬼。灯前拭泪试香裘，
长引一声残漏子。驼囊泻酒酒一杯，前头唳血心不回。

· 全唐诗 ·

寄语年少妻莫哀，鱼金虎竹天上来，雁门山边骨成灰。

卷 20_43【相和歌辞·雁门太守行】

庄南杰

旌旗闪闪摇天末，长笛横吹虏尘阔。跨下嘶风白练狞，
腰间切玉青蛇活。击革拊金燧牛尾，犬羊兵败如山死。
九泉寂寞葬秋虫，湿云荒草啼秋思。

卷 20_44【相和歌辞·飞来双白鹤】

虞世南

飞来双白鹤，奋翼远凌烟。双栖集紫盖，一举背青田。
颺影过伊洛，流声入管弦。鸣群倒景外，刷羽阊风前。
映海疑浮雪，拂涧泻飞泉。燕雀宁知去，蜉蝣不识还。
何言别俦侣，从此间山川。顾步已相失，裴回反自怜。
危心犹警露，哀响讵闻天。无因振六翮，轻举复随仙。

卷 20_45【相和歌辞·门有车马客行】

虞世南

财雄重交结，戚里擅豪华。曲台临上路，高门抵狭斜。

· 全唐诗 ·

赭汗千金马，绣毂五香车。白鹤随飞盖，朱鹭入鸣笳。
夏莲开剑水，春桃发露花。轻裙染回雪，浮蚁泛流霞。
高谈辨飞兔，摛藻握灵蛇。逢恩借羽翼，失路委泥沙。
暧暧风烟晚，路长归骑远。日斜青琐第，尘飞金谷苑。
危弦促柱奏巴渝，遗簪堕珥解罗襦。如何守直道，
翻使谷名愚。

卷 20_46【相和歌辞·门有车马客行】

李白

门有车马客，金鞍曜朱轮。谓从丹霄落，乃是故乡亲。
呼儿扫中堂，坐客论悲辛。对酒两不饮，停觞泪盈巾。
叹我万里游，飘飘三十春。空谈霸王略，紫绶不挂身。
雄剑藏玉匣，阴符生素尘。廓落无所合，流离湘水滨。
借问宗党间，多为泉下人。生苦百战役，死托万鬼邻。
北风扬胡沙，埋翳周与秦。大运且如此，苍穹宁匪仁。
恻怆竟何道，存亡任大钧。

卷 20_47【相和歌辞·蜀道难】

张文琮

梁山镇地险，积石阻云端。深谷下寥廓，层岩上郁盘。
飞梁架绝岭，栈道接危峦。揽辔独长息，方知斯路难。

· 全唐诗 ·

卷 20_48【相和歌辞·蜀道难】

李白

噫吁戏，危乎高哉！蜀道之难，难于上青天。
蚕丛及鱼凫，开国何茫然。尔来四万八千岁，
乃与秦塞通人烟。西当太白有鸟道，可以横绝峨眉巅。
地崩山摧壮士死，然后天梯石栈方钩连。
上有六龙回日之高标，下有冲波逆折之回川。
黄鹤之飞尚不得，猿猱欲度愁攀缘。青泥何盘盘，
百步九折萦岩峦。扪参历井仰胁息，以手抚膺坐长叹。
问君西游何时还，畏途巉岩不可攀。但见悲鸟号枯木，
雄飞雌绕绕林间。又闻子规啼夜月，愁空山。蜀道之难，
难于上青天，使人听此凋朱颜。连峰去天不盈尺，
枯松倒挂倚绝壁。飞湍瀑流相喧逐，砢崖转石万壑雷。
其险也若此，嗟尔远道之人胡为乎来哉！
剑阁峥嵘而崔嵬，一夫当关，万夫莫开。所守或匪亲，
化为狼与豺。朝避猛虎，夕避长蛇，磨牙吮血，
杀人如麻。锦城虽云乐，不如早还家。
蜀道之难，难于上青天，侧身西望长咨嗟。

卷 20_49【相和歌辞·棹歌行】

骆宾王

写月图黄罢，凌波拾翠通。镜花摇芰日，衣麝入荷风。

· 全唐诗 ·

叶密舟难荡，莲疏浦易空。凤媒羞自托，鸳翼恨难穷。
秋帐灯花翠，倡楼粉色红。相思无别曲，并在棹歌中。

卷 20_50【相和歌辞·棹歌行】

徐坚

棹女饰银钩，新妆下翠楼。霜丝青桂楫，兰棹紫霞舟。
水落金陵曙，风起洞庭秋。扣船过曲浦，飞帆越回流。
影入桃花浪，香飘杜若洲。洲长殊未返，萧散云霞晚。
日下大江平，烟生归岸远。岸远闻潮波，争途游戏多。
因声赵津女，来听采菱歌。

卷 20_51【相和歌辞·胡无人行】

徐彦伯

十月繁霜下，征人远凿空。云摇锦更节，海照角端弓。
暗碛埋砂树，冲飙卷塞蓬。方随膜拜入，歌舞玉门中。

卷 20_52【相和歌辞·胡无人行】

聂夷中

男儿徇大义，立节不沽名。腰间悬陆离，大歌胡无行。

· 全唐诗 ·

不读战国书，不览黄石经。醉卧咸阳楼，梦入受降城。
更愿生羽翼，飞身入青冥。请携天子剑，斫下旄头星。
自然胡无人，虽有无战争。悠哉典属国，驱羊老一生。

卷 20_53【相和歌辞·胡无人行】

李白

严风吹霜海草凋，筋干精坚胡马骄。汉家战士三十万，
将军兼领霍嫖姚。流星白羽腰间插，剑花秋莲光出匣。
天兵照雪下玉关，虏箭如沙射金甲。云龙风虎尽交回，
太白入月敌可摧。敌可摧，旄头灭，履胡之肠涉胡血。
悬胡青天上，埋胡紫塞旁。胡无人，汉道昌，
陛下之寿三千霜。但歌大风云飞扬，安得猛士兮守四方。
胡无人，汉道昌。

卷 20_54【相和歌辞·胡无人行】

僧贯休

霍嫖姚，赵充国，天子将之平朔漠。肉胡之肉，
烬胡帐幄，千里万里，惟留胡之空壳。边风萧萧，
榆叶初落，杀气昼赤，枯骨夜哭。将军既立殊勋，
遂有胡无人曲。我闻之。天子富有四海，德被无垠。
但令一物得所，八表来宾，亦何必令彼胡无人。

· 全唐诗 ·

卷 20_55【相和歌辞·白头吟】

刘希夷

洛阳城东桃李花，飞来飞去落谁家。洛阳女儿惜颜色，
行逢落花长叹息。今年花落颜色改，明年花开复谁在。
已见松柏摧为薪，更闻桑田变成海。古人无复洛城东，
今人还对落花风。年年岁岁花相似，岁岁年年人不同。
寄言全盛红颜子，须怜半死白头翁。此翁白头真可怜，
伊昔红颜美少年。公子王孙芳树下，清歌妙舞落花前。
光禄池台文锦绣，将军楼阁画神仙。一朝卧病无人识，
三春行乐在谁边。宛转蛾眉能几时，须臾白发乱如丝。
但看旧来歌舞地，惟有黄昏鸟雀悲。

卷 20_56【相和歌辞·白头吟二首】

李白

锦水东北流，波荡双鸳鸯。雄巢汉宫树，雌弄秦草芳。
宁同万死碎绮翼，不忍云间两分张。此时阿娇正娇妒，
独坐长门愁日暮。但愿君恩顾妾深，岂惜黄金将买赋。
相如作赋得黄金，丈夫好新多异心，一朝将聘茂陵女，
文君因赠白头吟。东流不作西归水，落花辞条归故林。
兔丝固无情，随风任颠倒。谁使女萝枝，而来强萦抱。
两草犹一心，人心不如草。莫卷龙须席，从他生网丝。

· 全唐诗 ·

且留琥珀枕，或有梦来时。覆水再收岂满杯，
弃妾已去难重回。古时得意不相负，只今惟见青陵台。

锦水东流碧，波荡双鸳鸯。雄巢汉宫树，雌弄秦草芳。
相如去蜀谒武帝，赤车驷马生辉光。一朝再览大人作，
万乘忽欲凌云翔。闻道阿娇失恩宠，千金买赋要君王。
相如不忆贫贱日，官高金多聘私室。茂陵姝子皆见求，
文君欢爱从此毕。泪如双泉水，行堕紫罗襟。
五起鸡三唱，清晨白头吟。长吁不整绿云鬓，
仰诉青天哀怨深。城崩杞梁妻，谁道士无心。
东流不作西归水，落花辞枝羞故林。头上玉燕钗，
是妾嫁时物，赠君表相思，罗袖幸时拂。莫卷龙须席，
从他生网丝，且留琥珀枕，还有梦来时。鸂鶒裘在锦屏上，
自君一挂无由披。妾有秦楼镜，照心胜照井。
愿持照新人，双对可怜影。覆水却收不满杯，
相如还谢文君回。古来得意不相负，只今惟有青陵台。

卷 20_57【相和歌辞·白头吟】

张籍

请君膝上琴，弹我白头吟。忆昔君前娇笑语，
两情宛转如萦素。宫中为我起高楼，更开华池种芳树。
春天百草秋始衰，弃我不待白头时。罗襦玉珥色未暗，
今朝已道不相宜。扬州青铜作明镜，暗中持照不见影。
人心回互自无穷，眼前好恶那能定。君恩已去若再返，

· 全唐诗 ·

菖蒲花生月长满。

卷 20_58【相和歌辞·反白头吟】

白居易

炎炎者烈火，营营者小蝇。火不热真玉，蝇不点清冰。
此苟无所受，彼莫能相仍。乃知物性中，各有能不能。
古称怨报死，则人有所惩。惩淫或应可，在道未为弘。
譬如蝮鸩徒，啾啾啁龙鹏。宜当委之去，寥廓高飞腾。
岂能泥尘下，区区酬怨憎。胡为坐自苦，吞悲仍抚膺。

卷 20_59【相和歌辞·决绝词三首】

元稹

乍可为天上牵牛织女星，不愿为庭前红槿枝。
七月七日一相见，故心终不移。那能朝开暮飞去，
一任东西南北吹。分不两相守，恨不两相思。
对面且如此，背面当何知。春风撩乱伯劳语，
此时抛去时。握手苦相问，竟不言后期。君情既决绝，
妾意已参差。借如死生别，安得长苦悲。

噫春冰之将泮，何余怀之独结。有美一人，於焉旷绝。
一日不见，比一日于三年，况三年之旷别。

· 全唐诗 ·

水得风兮小而已波，笋在苞兮高不见节。矧桃李之当春，
竞众人之攀折。我自顾悠悠而若云，
又安能保君皓皓之如雪。感破镜之分明，睹泪痕之馀血。
幸他人之既不我先，又安能使他人之终不我夺。已焉哉，
织女别黄姑，一年一度暂相见，彼此隔河何事无。

夜夜相抱眠，幽怀尚沉结。那堪一年事，长遣一宵说。
但感久相思，何暇暂相悦。虹桥薄夜成，龙驾侵晨列。
生憎野鹊往迟回，死恨天鸡识时节。曙色渐曛晓，
华星次明灭。一去又一年，一年何时彻。有此迢递期，
不如生死别。天公隔是妒相怜，何不便教相决绝。

卷 20_60【相和歌辞·梁甫吟】

李白

长啸梁甫吟，何时见阳春？君不见朝歌屠叟辞棘津，
八十西来钓渭滨。宁羞白发照渌水，逢时吐气思经纶。
广张三千六百钧，风雅暗与文王亲。大贤虎变愚不测，
当年颇似寻常人。君不见高阳酒徒起草中，
长揖山东隆准公。入门不拜骋雄辩，两女辍洗来趋风。
东下齐城七十二，指麾楚汉如旋蓬。狂生落拓尚如此，
何况壮士当群雄！我欲攀龙见明主，雷公砰訇震天鼓，
帝旁投壶多玉女。三时大笑开电光，倏烁晦冥起风雨。
阊阖九门不可通，以额叩关阍者怒。白日不照吾精诚，
杞国无事忧天倾。猘獠磨牙竞人肉，驺虞不折生草茎。

· 全唐诗 ·

手接飞猱搏雕虎，侧足焦原未言苦。智者可卷愚者豪，
世人见我轻鸿毛。力排南山三壮士，齐相杀之费二桃。
吴楚弄兵无剧孟，亚夫诘尔为徒劳。梁父吟，梁父吟，
声正悲。张公两龙剑，神物合有时。风云感会起屠钓，
大人岷当安之。

卷 20_61【相和歌辞·东武吟】

李白

好古笑流俗，素闻贤达风。方希佐明主，长揖辞成功。
白日在高天，回光烛微躬。恭承凤凰诏，焰起云萝中。
清切紫霄迥，优游丹禁通。君王赐颜色，声价凌烟虹。
乘舆拥翠盖，扈从金城东。宝马丽绝景，锦衣入新丰。
倚岩望松雪，对酒鸣丝桐。因学扬子云，献赋甘泉宫。
天书美片善，清芬播无穷。归来入咸阳，谈笑皆王公。
一朝去金马，飘落成飞蓬。宾友日疏散，玉尊亦已空。
才力犹可倚，不惭世上雄。闲作东武吟，曲尽情未终。
书此谢知己，吾寻黄绮翁。

卷 20_62【相和歌辞·怨诗二首】

薛奇童

日晚梧桐落，微寒入禁垣。月悬三雀观，霜度万秋门。

· 全唐诗 ·

艳舞矜新宠，愁容泣旧恩。不堪深殿里，帘外欲黄昏。

禁苑春风起，流莺绕合欢。玉窗通日气，珠箔卷轻寒。
杨叶垂金砌，梨花入井阑。君王好长袖，新作舞衣宽。

卷 20_63【相和歌辞·怨诗】

张洎

去年离别雁初归，今夜裁缝萤已飞。
征客去来音信断，不知何处寄寒衣。

卷 20_64【相和歌辞·怨诗】

刘元济

玉关芳信断，兰闺锦字新。愁来好自抑，念切已含颦。
虚牖风惊梦，空床月厌人。归期傥可促，勿度柳园春。

卷 20_65【相和歌辞·怨诗三首】

李暇

罗敷初总髻，蕙芳正娇小。月落始归船，春眠恒著晓。

· 全唐诗 ·

何处期郎游，小苑花台间。相忆不可见，且复乘月还。

别来花照路，别后露垂叶。歌舞须及时，如何坐悲妾。

卷 20_66【相和歌辞·怨诗二首】

崔国辅

楼前桃李疏，池上芙蓉落。织锦犹未成，虫声入罗幕。

妾有罗衣裳，秦王在时作。为舞春风多，秋来不堪著。

卷 20_67【相和歌辞·怨诗】

孟郊

试妾与君泪，两处滴池水。看取芙蓉花，今年为谁死。

卷 20_68【相和歌辞·怨诗】

刘义

君莫嫌丑妇，丑妇死守贞。山头一怪石，长作望夫名。
鸟有并翼飞，兽有比肩行。丈夫不立义，岂如鸟兽情。

· 全唐诗 ·

卷 20_69【相和歌辞·怨诗】

鲍溶

女萝寄松柏，绿蔓花绵绵。三五定君婚，结发早移天。
肃肃羊雁礼，泠泠琴瑟篇。恭承采蘋祀，敢效同居贤。
皎日不留景，良时如逝川。秋心还遗爱，春貌无归妍。
翠袖洗朱粉，碧阶对绮钱。新人易如玉，废瑟难为弦。
寄羨薜华木，荣名香阁前。岂无摇落苦，贵与根蒂连。
希君旧光景，照妾薄暮年。

卷 20_70【相和歌辞·怨诗】

白居易

夺宠心那惯，寻思倚殿门。不知移旧爱，何处作新恩。

卷 20_71【相和歌辞·怨诗二首】

姚氏月华

春水悠悠春草绿，对此思君泪相续。
羞将离恨向东风，理尽秦筝不成曲。

· 全唐诗 ·

与君形影分胡越，玉枕终年对离别。
登台北望烟雨深，回身泣向寥天月。

卷 20_72【相和歌辞·怨歌行】

虞世南

紫殿秋风冷，雕甍白日沉。裁纨凄断曲，织素别离心。
掖庭羞改画，长门不惜金。宠移恩稍薄，情疏恨转深。
香销翠羽帐，弦断凤凰琴。镜前红粉歇，阶上绿苔侵。
谁言掩歌扇，翻作白头吟。

卷 20_73【相和歌辞·怨歌行】

李白

十五入汉宫，花颜笑春红。君王选玉色，侍寝金屏中。
荐枕娇夕月，卷衣恋春风。宁知赵飞燕，夺宠恨无穷。
沉忧能伤人，绿鬓成霜蓬。一朝不得意，世事徒为空。
鸛鸛换美酒，舞衣罢雕笼。寒苦不忍言，为君奏丝桐。
肠断弦亦绝，悲心夜忡忡。

· 全唐诗 ·

卷 20_74【相和歌辞·怨歌行】

吴少微

城南有怨妇，含怨倚兰丛。自谓二八时，歌舞入汉宫，
皇恩弄幸玉堂中。绿陌黄花催夜酒，锦衣罗袂逐春风。
建章西宫焕若神，燕赵美女二千人。君王厌德不忘新，
况群艳冶纷来陈。是时别君不再见，三十三春长信殿。
长信重门昼掩关，清房晓帐幽且闲。绮窗虫网氛尘色，
文轩莺对桃李颜。天王贵宫不贮老，浩然泪陨今来还。
自怜转晚暮，试逐佳游芳草路。小腰丽女夺人奇，
金鞍少年曾不顾。归来谁为夫，请谢西家妇，
莫辞先醉解罗襦。

卷 20_75【相和歌辞·明月照高楼】

雍陶

朗月何高高，楼中帘影寒。一妇独含叹，四坐谁成欢。
时节屡已移，游旅杳不还。沧溟尚未涸，妾泪终不干。
君若无定云，妾若不动山。云行出山易，山逐云去难。
愿为边塞尘，因风委君颜。君颜良洗多，荡妾浊水间。

· 全唐诗 ·

卷 20_76【相和歌辞·长门怨】

徐贤妃

旧爱柏梁台，新宠昭阳殿。守分辞方辇，含情泣团扇。
一朝歌舞荣，夙昔诗书贱。颓恩诚已矣，覆水难重荐。

卷 20_77【相和歌辞·长门怨】

沈佺期

月皎风冷冷，长门次掖庭。玉阶闻坠叶，罗幌见飞萤。
清露凝珠缀，流尘下翠屏。妾心君未察，愁叹剧繁星。

卷 20_78【相和歌辞·长门怨】

吴少微

月出映曾城，孤圆上太清。君王春爱歇，枕席凉风生。
怨咽不能寝，踟蹰步前楹。空阶白露色，百草塞虫鸣。
念昔金房里，犹嫌玉座轻。如何娇所误，长夜泣恩情。

· 全唐诗 ·

卷 20_79【相和歌辞·长门怨】

张修之

长门落景尽，洞房秋月明。玉阶草露积，金屋网尘生。
妾妒今应改，君恩昔未平。寄语临邛客，何时作赋成。

卷 20_80【相和歌辞·长门怨】

裴交泰

自闭长门经几秋，罗衣湿尽泪还流。
一种蛾眉明月夜，南宫歌管北宫愁。

卷 20_81【相和歌辞·长门怨】

刘阜

宫殿沉沉月欲分，昭阳更漏不堪闻。
珊瑚枕上千行泪，不是思君是恨君。

· 全唐诗 ·

卷 20_82【相和歌辞·长门怨】

袁晖

早知君爱歇，本自无萦妒。谁使恩情深，今来反相误。
愁眠罗帐晓，泣坐金闺暮。独有梦中魂，犹言意如故。

卷 20_83【相和歌辞·长门怨】

刘言史

独坐炉边结夜愁，暂时恩去亦难留。
手持金箸垂红泪，乱拨寒灰不举头。

卷 20_84【相和歌辞·长门怨二首】

李白

天回北斗挂西楼，金屋无人萤火流。
月光欲到长门殿，别作深宫一段愁。

桂殿长愁不记春，黄金四屋起秋尘。
夜悬明镜青天上，独照长门宫里人。

· 全唐诗 ·

卷 20_85【相和歌辞·长门怨】

李华

弱体鸳鸯荐，啼妆翡翠衾。鸦鸣秋殿晓，人静禁门深。
每忆椒房宠，那堪永巷阴。日惊罗带缓，非复旧来心。

卷 20_86【相和歌辞·长门怨】

岑参

君王嫌妾妒，闭妾在长门。舞袖垂新宠，愁眉结旧恩。
绿钱生履迹，红粉湿啼痕。羞被桃花笑，看春独不言。

卷 20_87【相和歌辞·长门怨】

齐浣

茕茕孤思逼，寂寂长门夕。妾妒亦非深，君恩那不惜。
携琴就玉阶，调悲声未谐。将心托明月，流影入君怀。

· 全唐诗 ·

卷 20_88【相和歌辞·长门怨】

刘长卿

何事长门闭，珠帘只自垂。月移深殿早，春向后宫迟。
蕙草生闲地，梨花发旧枝。芳菲自恩幸，看却被风吹。

卷 20_89【相和歌辞·长门怨】

僧皎然

春风日日闭长门，摇荡春心自梦魂。
若遣花开只笑妾，不如桃李正无言。

卷 20_90【相和歌辞·长门怨】

卢纶

空宫古廊殿，寒月照斜晖。卧听未央曲，满箱歌舞衣。

· 全唐诗 ·

卷 20_91【相和歌辞·长门怨】

戴叔伦

自忆专房宠，曾居第一流。移恩向何处，暂妒不容收。
夜久丝管绝，月明宫殿秋。空将旧时意，长望凤凰楼。

卷 20_92【相和歌辞·长门怨】

刘驾

御泉长绕凤凰楼，只是恩波别处流。
闲揲舞衣归未得，夜来砧杵六宫秋。

卷 20_93【相和歌辞·长门怨二首】

高蟾

天上何劳万古春，君前谁是百年人。魂销尚愧金炉烬，
思起犹惭玉辇尘。烟翠薄情攀不得，星芒浮艳采无因。
可怜明镜来相向，何似恩光朝夕新。

天上凤凰休寄梦，人间鹦鹉旧堪悲。
平生心绪无人识，一只金梭万丈丝。

· 全唐诗 ·

卷 20_94 【相和歌辞·长门怨】

张祜

日映宫墙柳色寒，笙歌遥指碧云端。
珠铅滴尽无心语，强把花枝冷笑看。

卷 20_95 【相和歌辞·长门怨二首】

郑谷

闲把罗衣泣凤凰，先朝曾教舞霓裳。
春来却羡庭花落，得逐晴风出禁墙。

流水君恩共不回，杏花争忍扫成堆。
残春未必多烟雨，泪滴闲阶长绿苔。

卷 20_96 【相和歌辞·长门怨二首】

刘氏媛

雨滴梧桐秋夜长，愁心和雨到昭阳。
泪痕不学君恩断，拭却千行更万行。

· 全唐诗 ·

学画蛾眉独出群，当时人道便承恩。
经年不见君王面，花落黄昏空掩门。

卷 20_97【相和歌辞·阿娇怨】

刘禹锡

望见葳蕤举翠华，试开金屋扫庭花。
须臾宫女传来信，云幸平阳公主家。

卷 20_98【相和歌辞·班婕妤】

徐彦伯

君恩忽断绝，妾思终未央。巾栉不可见，枕席空馀香。
窗暗网罗白，阶秋苔藓黄。应门寂已闭，流涕向昭阳。

卷 20_99【相和歌辞·班婕妤】

严识玄

贱妾如桃李，君王若岁时。秋风一已劲，摇落不胜悲。
寂寂苍苔满，沉沉绿草滋。荣华非此日，指攀竞何辞。

· 全唐诗 ·

卷 20_100 【相和歌辞·班婕妤三首】

王维

玉窗萤影度，金殿人声绝。秋夜守罗帏，孤灯耿不灭。
宫殿生秋草，君王恩幸疏。那堪闻凤吹，门外度金舆。
怪来妆阁闭，朝下不相迎。总向春园里，花间语笑声。

卷 20_101 【相和歌辞·婕妤怨】

崔湜

不分君恩断，新妆视镜中。容华尚春日，娇爱已秋风。
枕席临窗晓，帏屏向月空。年年后庭树，荣落在深宫。

卷 20_102 【相和歌辞·婕妤怨】

崔国辅

长信宫草，年年愁处生。故侵珠履迹，不使玉阶行。

· 全唐诗 ·

卷 20_103【相和歌辞·婕妤怨】

张烜

贱妾裁纨扇，初摇明月姿。君王看舞席，坐起秋风时。
玉树清御路，金陈翳垂丝。昭阳无分理，愁寂任前期。

卷 20_104【相和歌辞·婕妤怨】

刘方平

夕殿别君王，宫深月似霜。人愁在长信，萤出向昭阳。
露裛红兰死，秋凋碧树伤。惟当合欢扇，从此箠中藏。

卷 20_105【相和歌辞·婕妤怨】

王沈

长信梨花暗欲栖，应门上簾草萋萋。
春风吹花乱扑户，班婕车声不至啼。

· 全唐诗 ·

卷 20_106【相和歌辞·婕妤怨】

皇甫冉

由来咏团扇，今与值秋风。事逐时皆往，恩无日再中。
早鸿闻上苑，寒露下深宫。颜色年年谢，相如赋岂工。

卷 20_107【相和歌辞·婕妤怨】

陆龟蒙

妾貌非倾国，君王忽然宠。南山掌上来，不及新恩重。
后宫多窈窕，日日学新声。一落君王耳，南山又须轻。

卷 20_108【相和歌辞·婕妤怨】

翁绶

谗谤潜来起百忧，朝承恩宠暮仇雠。火烧白玉非因玷，
霜翦红兰不待秋。花落昭阳谁共辇，月明长信独登楼。
繁华事逐东流水，团扇悲歌万古愁。

· 全唐诗 ·

卷 20_109【相和歌辞·婕妤怨】

刘氏云

君恩不可见，妾岂如秋扇。秋扇尚有时，妾身永微贱。
莫言朝花不复落，娇容几夺昭阳殿。

卷 20_110【相和歌辞·长信怨】

王諲

飞燕倚身轻，争人巧笑名。生君弃妾意，增妾怨君情。
日落昭阳殿，秋来长信城。寥寥金殿里，歌吹夜无声。

卷 20_112【相和歌辞·长信怨】

王昌龄

金井梧桐秋叶黄，珠帘不卷夜来霜。
金炉玉枕无颜色，卧听南宫清漏长。

奉帚平明金殿开，暂将团扇共裴回。
玉颜不及寒鸦色，犹带昭阳日影来。

· 全唐诗 ·

卷 20_113【相和歌辞·长信怨】

李白

月皎昭阳殿，霜清长信宫。天行乘玉辇，飞燕与君同。
更有留情处，承恩乐未穷。谁怜团扇妾，独坐怨秋风。

卷 20_114【相和歌辞·蛾眉怨】

王翰

君不见宜春苑中九华殿，飞阁连连直如发。
白日全含朱鸟窗，流云半入苍龙阙。宫中彩女夜无事，
学凤吹箫弄清越。珠帘北卷待凉风，绣户南开向明月。
忽闻天子忆蛾眉，宝凤衔花揲两螭。传声走马开金屋，
夹路鸣环上玉墀。长乐彤庭宴华寝，三千美人曳光锦。
灯前含笑更罗衣，帐里承恩荐瑶枕。不意君心半路回，
求仙别作望仙台。仓琅禁闼遥相忆，紫翠岩房昼不开。
欲向人间种桃实，先从海底觅蓬莱。蓬莱可求不可上，
孤舟缥缈知何往。黄金作盘铜作茎，晴天白露掌中擎。
王母嫣然感君意，云车雨旆欲相迎。飞廉观前空怨慕，
少君何事须相误。一朝埋没茂陵田，贱妾蛾眉不重顾。
宫车晚出向南山，仙卫逶迤去不还。朝晡泣对麒麟树，
树下苍苔日渐斑。人生百年夜将半，对酒长歌莫长叹。
剩知白日不可思，一死一生何足算。

· 全唐诗 ·

卷 20_115【相和歌辞·玉阶怨】

李白

玉阶生白露，夜久侵罗袜。却下水精帘，玲珑望秋月。

卷 20_116【相和歌辞·宫怨】

长孙佐辅

窗前好树名玫瑰，去年花落今年开。无情春色尚识返，
君心忽断何时来。忆昔妆成候仙仗，宫琐玲珑日新上。
拊心却笑西子颦，掩鼻谁忧郑姬谤。草染文章衣下履，
花粘甲乙床前帐。三千玉貌休自夸，十二金钗独相向。
盛衰倾夺欲何如，娇爱翻悲逐佞谗。重远岂能惭沼鹄，
弃前方见泣船鱼。看笼不记熏龙脑，咏扇空曾秃鼠须。
始意类萝新托柏，终伤如荠却甘荼。深院独开还独闭，
鸚鵡惊飞苔覆地。满箱旧赐前日衣，渍枕新垂夜来泪。
痕多开镜照还悲，绿髻青蛾尚未衰。莫道新缣长绝比，
犹逢故剑会相追。

· 全唐诗 ·

卷 20_117【相和歌辞·宫怨】

李益

露湿晴花宫殿香，月明歌吹在昭阳。
似将海水添宫漏，共滴长门一夜长。

卷 20_118【相和歌辞·宫怨】

于湊

妾家望江口，少年家财厚。临江起珠楼，不卖文君酒。
当年乐贞独，巢燕时为友。父兄未许人，畏妾事姑舅。
西墙邻宋玉，窥见妾眉宇。一旦及天聪，恩光生户牖。
谓言入汉宫，富贵可长久。君王纵有情，不奈陈皇后。
谁怜颊似桃，孰知腰胜柳。今日在长门，从来不如丑。

卷 20_119【相和歌辞·宫怨】

柯崇

尘满金炉不炷香，黄昏独自立重廊。
笙歌何处承恩宠，一一随风入上阳。

· 全唐诗 ·

长门槐柳半萧疏，玉辇沉思恨有馀。
红泪旋销倾国态，黄金谁为达相如。

卷 20_120【相和歌辞·杂怨三首】

聂夷中

生在绮罗下，岂识渔阳道。良人自戍来，夜夜梦中到。
渔阳万里远，近于中门限。中门逾有时，渔阳常在眼。

良人昨日去，明日又不还。别时各有泪，零落青楼前。

君泪濡罗巾，妾泪滴路尘。罗巾今在手，日得随妾身。
路尘如因飞，得上君车轮。

卷 20_121【相和歌辞·杂怨三首】

孟郊

天桃花清晨，游女红粉新。天桃花薄暮，游女红粉故。
树有百年花，人无一定颜。花送人老尽，人悲花自闲。

贫女镜不明，寒花日少容。暗蛩有虚织，短线无长缝。
浪水不可照，狂夫不可从。浪水多散影，狂夫多异踪。
持此一生薄，空成百恨浓。

· 全唐诗 ·

忆人莫至悲，至悲空自衰。寄人莫翦衣，翦衣未必归。
朝为双蒂花，暮为四散飞。花落却绕树，游子不顾期。

· 全唐诗 ·

第二十一卷

卷 21_1【相和歌辞·子夜春歌】

王翰

春气满林香，春游不可忘。落花吹欲尽，垂柳折还长。
桑女淮南曲，金鞍塞北装。行行小垂手，日暮渭川阳。

卷 21_2【相和歌辞·子夜冬歌】

崔国辅

寂寥抱冬心，裁罗又絢絢。夜久频挑灯，霜寒剪刀冷。

卷 21_3【相和歌辞·子夜冬歌】

薛光耀

朔风扣群木，严霜凋百草。借问月中人，安得长不老。

· 全唐诗 ·

卷 21_4【相和歌辞·子夜四时歌六首·春歌二首】

郭元振

青楼含日光，绿池起风色。赠子同心花，殷勤此何极。

陌头杨柳枝，已被春风吹。妾心正断绝，君怀那得知。

卷 21_5【相和歌辞·子夜四时歌六首·秋歌二首】

郭元振

邀欢空伫立，望美频回顾。何时复采菱，江中密相遇。

辟恶茱萸囊，延年菊花酒。与子结绸缪，丹心此何有。

卷 21_6【相和歌辞·子夜四时歌六首·冬歌二首】

郭元振

北极严气升，南至温风谢。调丝竞短歌，拂枕怜长夜。

帷横双翡翠，被卷两鸳鸯。婉态不自得，宛转君王床。

· 全唐诗 ·

卷 21_7【相和歌辞·子夜四时歌四首·春歌】

李白

秦地罗敷女，采桑绿水边。素手青条上，红妆白日鲜。
蚕饥妾欲去，五马莫留连。

卷 21_8【相和歌辞·子夜四时歌四首·夏歌】

李白

镜湖三百里，菡萏发荷花。五月西施采，人看隘若邪。
回舟不待月，归去越王家。

卷 21_9【相和歌辞·子夜四时歌四首·秋歌】

李白

长安一片月，万户捣衣声。秋风吹不尽，总是玉关情。
何日平胡虏，良人罢远征。

· 全唐诗 ·

卷 21_10【相和歌辞·子夜四时歌四首·冬歌】

李白

明朝驿使发，一夜絮征袍。素手抽针冷，那堪把剪刀。
裁缝寄远道，几日到临洮。

卷 21_11【相和歌辞·子夜四时歌四首·春歌】

陆龟蒙

山连翠羽屏，草接烟华席。望尽南飞燕，佳人断信息。

卷 21_12【相和歌辞·子夜四时歌四首·夏歌】

陆龟蒙

兰眼抬露斜，莺唇映花老。金龙倾漏尽，玉井敲冰早。

卷 21_13【相和歌辞·子夜四时歌四首·秋歌】

陆龟蒙

凉汉清沏寥，衰林怨风雨。愁听络纬唱，似与羁魂语。

· 全唐诗 ·

卷 21_14【相和歌辞·子夜四时歌四首·冬歌】

陆龟蒙

南光走冷圭，北籁号空木。年年任霜霰，不减筇筇绿。

卷 21_15【相和歌辞·大子夜歌二首】

陆龟蒙

歌谣数百种，子夜最可怜。慷慨吐清音，明转出天然。

丝竹发歌响，假器扬清音。不知歌谣妙，声势出口心。

卷 21_16【相和歌辞·子夜警歌二首】

陆龟蒙

镂碗传绿酒，雕炉熏紫烟。谁知苦寒调，共作白雪弦。

恃爱如欲进，含羞出不前。朱口发艳歌，玉指弄娇弦。

· 全唐诗 ·

卷 21_17【相和歌辞·丁督护歌】

李白

云阳上征去，两岸饶商贾。吴牛喘月时，拖船一何苦。
水浊不可饮，壶浆半成土。一唱都护歌，心摧泪如雨。
万人凿盘石，无由达江浒。君看石芒砀，掩泪悲千古。

卷 21_18【相和歌辞·团扇郎】

张祜

白团扇，今来此去捐。愿得入郎手，团圆郎眼前。

卷 21_19【相和歌辞·团扇郎】

刘禹锡

团扇复团扇，奉君清暑殿。秋风入庭树，从此不相见。
上有乘鸾女，苍苍虫网遍。明年入怀袖，别是机中练。

· 全唐诗 ·

卷 21_20【相和歌辞·碧玉歌】

李暇

碧玉上宫妓，出入千花林。珠被玳瑁床，感郎情意深。

卷 21_21【相和歌辞·懊恼曲】

温庭筠

藕丝作线难胜针，蕊粉染黄那得深。玉白兰芳不相顾，
倡楼一笑轻千金。莫言自古皆如此，健剑荆钟铅绕指。
三秋庭绿尽迎霜，惟有荷花守红死。西江小吏朱斑轮，
柳缕吐芽香玉春。两股金钗已相许，不令独作空城尘。
悠悠楚水流如马，恨紫愁红满平野。野土千年怨不平，
至今烧作鸯鸯瓦。

卷 21_22【相和歌辞·读曲歌五首】

张祜

窗中独自起，帘外独自行。愁见蜘蛛织，寻思直到明。

碓上米不舂，窗中丝罢络。看渠驾去车，定是无四角。

· 全唐诗 ·

不见心相许，徒云脚漫勤。摘荷空摘叶，是底采莲人。

窗外山魑立，知渠脚不多。三更机底下，摸着是谁梭。

郎去摘黄瓜，郎来收赤枣。郎耕种麻地，今作西舍道。

卷 21_23【相和歌辞·春江花月夜二首】

张子容

林花发岸口，气色动江新。此夜江中月，流光花上春。
分明石潭里，宜照浣纱人。

交甫怜瑶佩，仙妃难重期。沉沉绿江晚，惆怅碧云姿。
初逢花上月，言是弄珠时。

卷 21_24【相和歌辞·春江花月夜】

张若虚

春江潮水连海平，海上明月共潮生。滟滟随波千万里，
何处春江无月明。江流宛转绕芳甸，月照花林皆似霰。
空中流霜不觉飞，汀上白沙看不见。江天一色无纤尘。
皎皎空中孤月轮。江畔何人初见月，江月何年初照人。
人生代代无穷已，江月年年望相似。不知江月待何人，

· 全唐诗 ·

但见长江送流水。白云一片去悠悠，青枫浦上不胜愁。
谁家今夜扁舟子，何处相思明月楼。可怜楼上月裴回，
应照离人妆镜台。玉户帘中卷不去，捣衣砧上拂还来。
此时相望不相闻，愿逐月华流照君。鸿雁长飞光不度，
鱼龙潜跃水成文。昨夜闲潭梦落花，可怜春半不还家。
江水流春去欲尽，江潭落月复西斜。斜月沉沉藏海雾，
碣石潇湘无限路。不知乘月几人归，落月摇情满江树。

卷 21_25【相和歌辞·春江花月夜】

温庭筠

玉树歌阑海云黑，花庭忽作青芜国。秦淮有水水无情，
还向金陵漾春色。杨家二世安九重，不御华芝嫌六龙。
百幅锦帆风力满，连天展尽金芙蓉。珠翠丁星复明灭，
龙头劈浪哀笳发。千里涵空照水魂，万枝破鼻团香雪。
漏转霞高沧海西，颇黎枕上闻天鸡。蛮弦代雁曲如语，
一醉昏昏天下迷。四方倾动烟尘起，犹在浓香梦魂里。
后主荒宫有晓莺，飞来只隔西江水。

卷 21_26【相和歌辞·玉树后庭花】

张祜

轻车何草草，独唱后庭花。玉座谁为主，徒悲张丽华。

· 全唐诗 ·

卷 21_27【相和歌辞·堂堂】

温庭筠

钱塘岸上春如织，淼淼寒潮带晴色。淮南游客马连嘶，
碧草迷人归不得。风飘客意如吹烟，纤指殷勤伤雁弦。
一曲堂堂红烛筵，金鲸泻酒如飞泉。

卷 21_28【相和歌辞·三阁词四首】

刘禹锡

贵人三阁上，日晏未梳头。不应有恨事，娇甚却成愁。
珠箔曲琼钩，子细见扬州。北兵那得度，浪语判悠悠。
沉香帖阁柱，金缕画门楣。回首降幡下，已见黍离离。
三人出晋井，一身登槛车。朱门漫临水，不可见鲈鱼。

卷 21_29【相和歌辞·神弦曲】

李贺

西山日没东山昏，旋风吹马马踏云。画弦素管声浅繁，

· 全唐诗 ·

花裙綵縵步秋尘。桂叶刷风桂坠子，青狸哭血寒狐死。
古壁彩虬金帖尾，雨工骑入秋潭水。百年老鸮成木魅，
笑声碧火巢中起。

卷 21_30【相和歌辞·神弦别曲】

李贺

巫山小女隔云别，松花春风山上发。绿盖独穿香径归，
白马花竿前孑孑。蜀江风澹水如罗，堕兰谁泛相经过。
南山桂树为君死，云衫残污红脂花。

卷 21_31【相和歌辞·祠渔山神女歌·迎神】

王维

坎坎击鼓，渔山之下。吹洞箫，望极浦。
女巫进，纷屡舞。陈瑶席，湛清醑。风凄凄，又夜雨。
不知神之来兮不来，使我心兮苦复苦。

卷 21_32【相和歌辞·祠渔山神女歌·送神】

王维

纷进舞兮堂前，目眷眷兮琼筵。来不言兮意不传，

· 全唐诗 ·

作暮雨兮愁空山。悲急管兮思繁弦，神之驾兮俨欲旋。
倏云收兮雨歇，山青青兮水潺潺。

卷 21_33【相和歌辞·祠神歌·迎神】

王睿

蒲草头花椰叶裙，蒲葵树下舞蛮云。
引领望江遥滴酒，白蘋风起水生文。

卷 21_34【相和歌辞·祠神歌·送神】

王睿

枳枳山响答琵琶，酒湿青莎肉饲鸦。
树叶无声神去后，纸钱灰出木绵花。

卷 21_35【相和歌辞·乌夜啼】

杨巨源

可怜杨叶复杨花，雪净烟深碧玉家。乌栖不定枝条弱，
城头夜半声哑哑。浮萍摇荡门前水，任骂芙蓉莫堕沙。

· 全唐诗 ·

卷 21_36【相和歌辞·乌夜啼】

李白

黄云城边乌欲栖，归飞哑哑枝上啼。机中织锦秦川女，
碧纱如烟隔窗语。停梭怅然忆远人，独宿孤房泪如雨。

卷 21_37【相和歌辞·乌夜啼二首】

顾况

玉房掣锁声翻叶，银箭添泉绕霜堞。毕逋发刺月衔城，
八九雏飞其母惊。此是天上老鸦鸣，人间老鸦无此声。
摇杂佩，耿华烛，良夜羽人弹此曲，东方曈曈赤日旭。

月出江林西，江林寂寂城鸦啼。昔人何处为此曲，
今人何处听不足。城寒月晓驰思深，江上青草为谁绿。

卷 21_38【相和歌辞·乌夜啼】

李群玉

曾波隔梦渚，一望青枫林。有乌在其间，达晓自悲吟。
是时月黑天，四野烟雨深。如闻生离哭，其声痛人心。

· 全唐诗 ·

悄悄夜正长，空山响哀音。远客不可听，坐愁华发侵。
既非蜀帝魂，恐是恒山禽。四子各分散，母声犹至今。

卷 21_39【相和歌辞·乌夜啼】

聂夷中

众鸟各归枝，乌乌尔不栖。还应知妾恨，故向绿窗啼。

卷 21_40【相和歌辞·乌夜啼】

白居易

城上归时晚，庭前宿处危。月明无叶树，霜滑有风枝。
啼涩饥喉咽，飞低冻翅垂。画堂鹦鹉鸟，冷暖不相知。

卷 21_41【相和歌辞·乌夜啼】

王建

庭树乌，尔何不向别处栖？夜夜夜半当户啼。
家人把烛出洞户，惊栖失群飞落树。一飞直欲飞上天，
回回不离旧栖处。未明重绕主人屋，欲下空中黑相触。
风飘雨湿亦不移，君家树头多好枝。

· 全唐诗 ·

卷 21_42【相和歌辞·乌夜啼】

张祜

忽忽南飞返，危弦共怨凄。暗霜移树宿，残夜绕枝啼。
咽绝声重叙，恹淫思乍迷。不妨还报喜，误使玉颜低。

卷 21_43【相和歌辞·乌栖曲】

李白

姑苏台上乌栖时，吴王宫里醉西施。吴歌楚舞欢未毕，
青山犹衔半边日。银箭金壶漏水多，起看秋月坠江波，
东方渐高奈乐何。

卷 21_44【相和歌辞·乌栖曲】

李端

白马逐牛车，黄昏入狭斜。柳树乌争宿，
争枝未得飞上屋。东房少妇婿从军，每听乌啼知夜分。

· 全唐诗 ·

卷 21_45【相和歌辞·乌栖曲】

王建

章华宫人夜上楼，君王望月西山头。
夜深宫殿门不锁，白露满山山叶堕。

卷 21_46【相和歌辞·乌栖曲】

张籍

西山作宫潮满池，宫乌晓鸣茱萸枝。
吴姬自唱采莲曲，君王昨夜舟中宿。

卷 21_47【相和歌辞·乌栖曲二首】

刘方平

蛾眉曼脸倾城国，鸣环动佩新相识。
银汉斜临白玉堂，芙蓉行障掩灯光。

画舸双艚锦为缆，芙蓉花发莲叶暗。
门前月色映横塘，感郎中夜渡潇湘。

· 全唐诗 ·

卷 21_48【相和歌辞·莫愁乐】

张祜

依居石城下，郎到石城游。自郎石城出，长在石城头。

卷 21_49【相和歌辞·莫愁曲】

李贺

草生陇坂下，鸦噪城堞头。何人此城里，城角栽石榴。
青丝系五马，黄金络双牛。白鱼驾莲船，夜作十里游。
归来无人识，暗上沉香楼。罗床倚瑶瑟，残月倾帘钩。
今日槿花落，明朝梧树秋。若负平生意，何名作莫愁。

卷 21_50【相和歌辞·估客乐】

李白

海客乘天风，将船远行役。譬如云中鸟，一去无踪迹。

卷 21_51 【相和歌辞·估客乐】

元稹

估客无住着，有利身即行。出门求火伴，入户辞父兄。
父兄相教示，求利莫求名。求名有所避，求利无不营。
伙伴相勒缚，卖假莫卖诚。交关少交假，交假本生轻。
自兹相将去，誓死意不更。一解市头语，便无乡里情。
鋤石打臂钏，糯米炊项瓔。归来村中卖，敲作金玉声。
村中田舍娘，贵贱不敢争。所费百钱本，已得十倍赢。
颜色转光净，饮食亦甘馨。子本频蕃息，货赂日兼并。
求珠驾沧海，采玉上荆衡。北买党项马，西擒吐蕃鹦。
炎洲布火浣，蜀地锦织成。越婢脂肉滑，奚僮眉眼明。
通算衣食费，不计远近程。经营天下遍，却到长安城。
城中东西市，闻客次第迎。迎客兼说客，多财为势倾。
客心本明黠，闻语心已惊。先问十常侍，次求百公卿。
侯家与主第，点缀无不精。归来始安坐，富与王家勍。
市卒酒肉臭，县胥家舍成。岂惟绝言语，奔走极使令。
大儿贩材木，巧识梁栋形。小儿贩盐卤，不入州县征。
一身偃市利，突若截海鲸。钩距不敢下，下则牙齿横。
生为估客乐，判尔乐一生。尔又生两子，钱刀何岁平。

· 全唐诗 ·

卷 21_52【相和歌辞·贾客乐】

张籍

金陵向西贾客多，船中生长乐风波。欲发移船近江口，
船头祭神各浇酒。停杯共说远行期，入蜀经蛮远别离。
金多众中为上客，夜夜算缗眠独迟。秋江初月猩猩语，
孤帆夜发满湘渚。水工持楫防暗滩，直过山边及前侣。
年年逐利西复东，姓名不在县籍中。农夫税多长辛苦，
弃业长为贩卖翁。

卷 21_53【相和歌辞·贾客词】

刘禹锡

贾客无定游，所游惟利并。眩俗杂良苦，乘时知重轻。
心计析秋毫，摇钩侔悬衡。锥刀既无弃，转化日已盈。
邀福祷波神，施财游化城。妻约雕金钏，女垂贯珠缨。
高赀比封君，奇货通幸卿。趋时鹜鸟思，藏镪盘龙形。
大艑浮通川，高楼次旗亭。行止皆有乐，关梁似无征。
农夫何为者，辛苦事寒耕。

· 全唐诗 ·

卷 21_54【相和歌辞·贾客词】

刘驾

贾客灯下起，犹言发已迟。高山有疾路，暗行终不疑。
寇盗伏其路，猛兽来相追。金玉四散去，空囊委路岐。
扬州有大宅，白骨无地归。少妇当此日，对镜弄花枝。

卷 21_55【相和歌辞·襄阳乐】

张祜

大堤花月夜，长江春水流。东风正上信，春夜特来游。

卷 21_56【相和歌辞·襄阳曲二首】

崔国辅

蕙草娇红萼，时光舞碧鸡。城中美年少，相见白铜鞮。
少年襄阳地，来往襄阳城。城中轻薄子，知妾解秦筝。

· 全唐诗 ·

卷 21_57【相和歌辞·襄阳曲】

施肩吾

大堤女儿郎莫寻，三三五五结同心。
清晨对镜冶容色，意欲取郎千万金。

卷 21_58【相和歌辞·襄阳曲】

李端

襄阳堤路长，草碧杨柳黄。谁家女儿临夜妆，
红罗帐里有灯光。雀钗翠羽动明釭，欲出不出脂粉香。
同居女伴正衣裳，中庭寒月白如霜。贾生十八称才子，
空得门前一断肠。

卷 21_59【相和歌辞·大堤曲】

张柬之

南国多佳人，莫若大堤女。玉床翠羽帐，宝袜莲花炬。
魂处自目成，色授开心许。迢迢不可见，日暮空愁予。

· 全唐诗 ·

卷 21_60【相和歌辞·大堤曲】

杨巨源

二八婵娟大堤女，开炉相对依江渚。待客登楼向水看，
邀郎卷幔临花语。细雨蒙蒙湿芰荷，巴东商侣挂帆多。
自传芳酒浣红袖，谁调妍妆回翠蛾。珍簪华灯夕阳后，
当炉理瑟矜纤手。月落星微五鼓声，春风摇荡窗前柳。
岁岁逢迎沙岸间，北人多识绿云鬟。无端嫁与五陵少，
离别烟波伤玉颜。

卷 21_61【相和歌辞·大堤曲】

李白

汉水临襄阳，花开大堤暖。佳期大堤下，泪向南云满。
春风复无情，吹我梦魂散。不见眼中人，天长音信断。

卷 21_62【相和歌辞·大堤曲】

李贺

妾家住横塘，红纱满桂香。青云教绾头上髻，
明月与作耳边钿。莲风起，江畔春。大堤上，留北人。

· 全唐诗 ·

郎食鲤鱼尾，妾食猩猩唇。莫指襄阳道，绿浦归帆少。
今日菖蒲花，明朝枫树老。

卷 21_63【相和歌辞·大堤行】

孟浩然

大堤行乐处，车马相驰突。岁岁春草生，踏青二三月。
王孙挟珠弹，游女矜罗袜。携手今莫同，江花为谁发。

卷 21_64【相和歌辞·三洲歌】

温庭筠

团圆莫作波中月，洁白莫为枝上雪。月随波动碎潋潋，
雪似梅花不堪折。李娘十六青丝发，画带双花为君结。
门前有路轻离别，惟恐归来旧香灭。

卷 21_65【相和歌辞·拔蒲歌】

张祜

拔蒲来，领郎镜湖边。郎心在何处，莫趁新莲去。
拔得无心蒲，问郎看好无。

· 全唐诗 ·

卷 21_66【相和歌辞·杨叛儿】

李白

君歌杨叛儿，妾劝新丰酒。何许最关人，乌啼白门柳。
乌啼隐杨花，君醉留妾家。博山炉中沉香火，
双咽一气凌紫霞。

卷 21_67【相和歌辞·常林欢】

温庭筠

宜城酒熟花覆桥，沙晴绿鸭鸣咬咬。秣桑绕舍麦如尾，
幽轧鸣机双燕巢。马声特特荆门道，蛮水扬光色如草。
锦荐金炉梦正长，东家呃喔鸡鸣早。

卷 21_68【相和歌辞·江南弄】

王勃

江南弄，巫山连楚梦，行雨行云几相送。
瑶轩金谷上春时，玉童仙女无见期。紫露香烟眇难托，
清风明月遥相思。遥相思，草徒绿，为听双飞凤凰曲。

· 全唐诗 ·

卷 21_69【相和歌辞·江南弄】

李贺

江中绿雾起凉波，天上迭嶂红嵯峨。水风浦云生老竹，
渚暝蒲帆如一幅。鲈鱼千头酒百斛，酒中倒卧南山绿。
吴歊越吟未终曲，江上团团帖寒玉。

卷 21_70【相和歌辞·采莲曲】

崔国辅

玉溱花红发，金塘水碧流。相逢畏相失，并着采莲舟。

卷 21_71【相和歌辞·采莲曲】

徐彦伯

妾家越水边，摇艇入江烟。既觅同心侣，复采同心莲。
折藕丝能脆，开花叶正圆。春歌弄明月，归棹落花前。

· 全唐诗 ·

卷 21_72【相和歌辞·采莲曲】

李白

若耶溪边采莲女，笑隔荷花共人语。日照新妆水底明，
风飘香袖空中举。岸上谁家游冶郎，三三五五映垂杨。
紫骝嘶入落花去，见此踟蹰空断肠。

卷 21_73【相和歌辞·采莲曲】

贺知章

稽山罢雾郁嵯峨，镜水无风也自波。
莫言春度芳菲尽，别有中流采芰荷。

卷 21_74【相和歌辞·采莲曲三首】

王昌龄

吴姬越艳楚王妃，争弄莲舟水湿衣。
来时浦口花迎入，采罢江头月送归。

荷叶罗裙一色裁，芙蓉向脸两边开。
乱入池中看不见，闻歌始觉有人来。

· 全唐诗 ·

越女作桂舟，还将桂为楫。湖上水渺漫，清江初可涉。
摘取芙蓉花，莫摘芙蓉叶。将归问夫婿，颜色何如妾。

卷 21_75【相和歌辞·采莲曲二首】

戎昱

虽听采莲曲，讵识采莲心。漾楫爱花远，回船愁浪深。
烟生极浦色，日落半江阴。同侣怜波静，看妆堕玉簪。

浔阳女儿花满头，毵毵同泛木兰舟。
春风日暮南湖里，争唱菱歌不肯休。

卷 21_76【相和歌辞·采莲曲】

储光羲

浅渚荷花繁，深塘菱叶疏。独往方自得，耻邀淇上姝。
广江无术阡，大泽绝方隅。浪中海童语，流下鲛人居。
春雁时隐舟，新荷复满湖。采采乘日暮，不思贤与愚。

· 全唐诗 ·

卷 21_77【相和歌辞·采莲曲二首】

鲍溶

弄舟去来南塘水，荷叶映身摘莲子。暑衣清净鸳鸯喜，
作浪舞花惊不起。殷勤护惜纤纤指，水菱初熟多新刺。

采莲去来水无风，莲潭如镜松如龙。夏衫短袖交斜红，
艳歌笑斗新芙蓉，戏鱼住听莲花东。

卷 21_78【相和歌辞·采莲曲】

张籍

秋江岸边莲子多，采莲女儿凭船歌。青房圆实齐戢戢，
争先竞折荡漾波。试牵绿茎下寻藕，断处丝多刺伤手。
白练束腰袖半卷，不插玉钗妆梳浅。船中未满度前洲，
借问谁家家住远。归时共待暮潮上，自弄芙蓉还荡桨。

卷 21_79【相和歌辞·采莲曲】

白居易

菱叶萦波荷飏风，荷花深处小船通。

· 全唐诗 ·

逢郎欲语低头笑，碧玉搔头落水中。

卷 21_80【相和歌辞·采莲曲】

僧齐己

越江女，越江莲，齐菡萏，双婵娟。嬉游向何处，
采摘且同船。浩唱发容与，清波生漪涟。时逢岛屿泊，
几共鸳鸯眠。襟袖既盈溢，馨香亦相传。薄暮归去来，
芰罗生碧烟。

卷 21_81【相和歌辞·采莲归】

王勃

采莲归，绿水芙蓉衣，秋风起浪鳧雁飞。
桂棹兰桡下长浦，罗裙玉腕摇轻橹。叶屿花潭极望平，
江讴越吹相思苦。相思苦，佳期不可驻。
塞外征夫犹未还，江南采莲今已暮。今已暮，摘莲花，
今渠那必尽倡家。官道城南把桑叶，何如江上采莲花。
莲花复莲花，花叶何重迭。叶翠本羞眉，花红强如颊。
佳人不兹期，怅望别离时。牵花怜共蒂，折藕爱连丝。
故情何处所，新物徒华滋。不惜南津交佩解，
还羞北海雁书迟。采莲歌有节，采莲夜未歇。
正逢浩荡江上风，又值徘徊江上月。莲浦夜相逢，

· 全唐诗 ·

吴姬越女何丰茸。共问寒江千里外，征客关山更几重。

卷 21_82【相和歌辞·采莲女】

阎朝隐

采莲女，采莲舟，春日春江碧水流。莲衣承玉钏，
莲刺冒银钩。薄暮敛容歌一曲，氛氲香气满汀洲。

卷 21_83【相和歌辞·湖边采莲妇】

李白

小姑织白纻，未解将人语。大嫂采芙蓉，溪湖千万重。
长兄行不在，莫使外人逢。愿学秋胡妇，真心比古松。

卷 21_84【相和歌辞·张静婉采莲曲】

温庭筠

兰膏坠发红玉春，燕钗拖颈抛盘云。城西杨柳向娇晚，
门前沟水波潏潏。麒麟公子朝天客，佩马玳瑁度春陌。
掌中无力舞衣轻，翦断蛟绡破春碧。抱月飘烟一尺腰，
麝脐龙髓怜娇饶。秋罗拂衣碎光动，露重花多香不销。

· 全唐诗 ·

鸂鶒胶胶塘水满，绿萍如粟莲茎短。一夜西风送雨来，
粉痕零落愁红浅。船头折藕丝暗牵，藕根莲子相留连。
郎心似月月易缺，十五十六清光圆。

卷 21_85 【相和歌辞·凤笙曲】

沉佺期

忆昔王子晋，凤笙游云空。挥手弄白日，安能恋青宫。
岂无婵娟子，结念罗帐中。怜寿不贵色，身世两无穷。

卷 21_86 【相和歌辞·凤吹笙曲】

李白

仙人十五爱吹笙，学得昆丘彩凤鸣。始闻炼气餐金液，
复道朝天赴玉京。玉京迢迢几千里，凤笙去去无边已。
欲叹离声发绛唇，更嗟别调流纤指。此时惜别讵堪闻，
此地相看未忍分。重吟真曲和清吹，却奏仙歌响绿云。
绿云紫气向函关，访道应寻缑氏山。莫学吹笙王子晋，
一遇浮丘断不还。

· 全唐诗 ·

卷 21_87【相和歌辞·采菱曲】

储光羲

浊水菱叶肥，清水菱叶鲜。义不游浊水，志士多苦言。
潮没具区薮，潦深云梦田。朝随北风去，暮逐南风还。
浦口多渔家，相与邀我船。饭稻以终日，羹莼将永年。
方冬水物穷，又欲休山樊。尽室相随从，所贵无忧患。

卷 21_88【相和歌辞·采菱行】

刘禹锡

白马湖平秋日光，紫菱如锦彩鸾翔。荡舟游女满中央，
采菱不顾马上郎。争多逐胜纷相向，时转兰桡破轻浪。
长鬟弱袂动参差，钗影钿文浮荡漾。笑语哇咬顾晚晖，
蓼花绿岸扣舷归。归来共到市桥步，野蔓系船萍满衣。
家家竹楼临广陌，下有连樯多估客。携觞荐芰夜经过，
醉踏大堤相应歌。屈平祠下沅江水，月照寒波白烟起。
一曲南音此地闻，长安北望三千里。

· 全唐诗 ·

卷 21_89【相和歌辞·阳春歌】

李白

长安白日照春空，绿杨结烟桑裊风。披香殿前花始红，
流芳发色绣户中。绣户中，相经过，飞燕皇后轻身舞，
紫宫夫人绝世歌。圣君三万六千日，岁岁年年奈乐何。

卷 21_90【相和歌辞·阳春曲】

温庭筠

云母空窗晓烟薄，香昏龙气凝辉阁。霏霏雾雨杏花天，
帘外春威着罗幕。曲栏伏槛金麒麟，沙苑芳郊连翠茵。
厩马何能啮芳草，路人不敢随流尘。

卷 21_91【相和歌辞·阳春曲】

庄南杰

紫锦红囊香满风，金鸾玉轡摇丁冬。沙鸥白羽翦晴碧，
野桃红艳烧春空。芳草绵延锁平地，垄蝶双双舞幽翠。
凤叫龙吟白日长，落花声底仙娥醉。

· 全唐诗 ·

卷 21_92【相和歌辞·阳春曲】

僧贯休

为口莫学阮嗣宗，不言是非非至公。为手须似朱云辈，
折槛英风至今在。男儿结发事君亲，须敦前贤多慷慨。
历数雍熙房与杜，魏公姚公宋开府。
尽向天上仙宫闲处坐，何不却辞上帝下下土，
忍见苍生苦苦苦。

卷 21_93【相和歌辞·朝云引】

郎大家宋氏

巴西巫峡指巴东，朝云触石上朝空。巫山巫峡高何已，
行雨行云一时起。一时起，三春暮，若言来，且就阳台路。

卷 21_94【相和歌辞·上云乐】

李白

金天之西，白日所没。康老胡雏，生彼月窟。巉岩仪容，
戍削风骨。碧玉粼粼双目瞳，黄金拳拳两鬓红。
华盖垂下睫，嵩岳临上唇。不睹谪诡貌，岂知造化神。

· 全唐诗 ·

大道是文康之严父，元气乃文康之老亲。抚顶弄盘古，
推车转天轮。云见日月初生时，铸冶火精与水银。
阳乌未出谷，顾兔半藏身。女娲戏黄土，团作愚下人。
散在六合间，蒙蒙若沙尘。生死了不尽，
谁明此胡是仙真。西海栽若木，东溟植扶桑。
别来几多时，枝叶万里长。中国有七圣，半路颓鸿荒。
陛下应运起，龙飞入咸阳。赤眉立盆子，白水兴汉光。
叱咤四海动，洪涛为簸扬。举足蹋紫微，天关自开张。
老胡感至德，东来进仙倡。五色师子，九苞凤凰。
是老胡鸡犬，鸣舞飞帝乡。淋漓飒沓，进退成行。能胡歌，
献汉酒，跪双膝，并两肘，散花指天举素手。拜龙颜，
献圣寿，北斗戾，南山摧。
天子九九八十一万岁，长倾万岁杯。

卷 21_95【相和歌辞·上云乐】

李贺

飞香走红满天春，花龙盘盘上紫云。三千宫女列金屋，
五十弦瑟海上闻。大江碎碎银沙路，赢女机中断烟素。
断烟素，缝舞衣，八月一日君前舞。

· 全唐诗 ·

卷 21_96【相和歌辞·凤台曲】

王无竞

凤台何逶迤，嬴女管参差。一旦彩云至，身去无还期。
遗曲此台上，世人多学吹。一吹一落泪，至今怜玉姿。

卷 21_97【相和歌辞·凤台曲】

李白

尝闻秦帝女，传得凤凰声。是日逢仙子，当时别有情。
人吹彩箫去，天借绿云迎。曲在身不返，空馀弄玉名。

卷 21_98【相和歌辞·凤凰曲】

李白

嬴女吹玉箫，吟弄天上春。青鸾不独去，更有携手人。
影灭彩云断，遗声落西秦。

· 全唐诗 ·

卷 21_99【相和歌辞·君道曲】

李白

大君若天覆，广运无不至。轩后爪牙常先太山稽，
如心之使臂。小白鸿翼于夷吾，刘葛鱼水本无二。
土扶可成墙，积德为厚地。

· 全唐诗 ·

第二十二卷

卷 22_1【舞曲歌辞·吴俞儿舞歌·剑俞】

陆龟蒙

枝月喉，棹霜脊，北斗离离在寒碧。龙魂清，虎尾白，
秋照海心同一色。麝影咤沙干影侧。神豪发直，
四睨之人股佶栗，欲定不定定不得。舂牍残，儿且止，
狄胡有胆大如山，怖亦死。

卷 22_2【舞曲歌辞·吴俞儿舞歌·矛俞】

陆龟蒙

手盘风，头背分，电光战扇，欲刺敲心留半线。
缠肩绕脰綰合，眩旋，卓植赴列，夺避中节。
前冲函礼穴，上指孛彗灭，与君一用来有截。

· 全唐诗 ·

卷 22_3【舞曲歌辞·吴俞儿舞歌·弩俞】

陆龟蒙

牛来开弦，人为置镞。捩机关，迸山谷。鹿骇涩，
隼击迟。析毫中睫，洞腋分龟。达坚垒，残雄师，
可以冠猛乐壮曲。抑扬蹈厉，有裂犀兕之气者非公与。

卷 22_4【舞曲歌辞·东海有勇妇】

李白

梁山感杞妻，恸器为之倾。金石忽暂开，都由激深情。
东海有勇妇，何惭苏子卿。学剑越处子，超腾若流星。
捐躯报夫仇，万死不顾生。白刃耀素雪，苍天感精诚。
十步两躡跃，三呼一交兵。斩首掉国门，蹴踏五藏行。
割此伉俪愤，粲然大义明。北海李使君，飞章奏天庭。
舍罪警风俗，流芳播沧瀛。志在列女籍，行帛已光荣。
淳于免诏狱，汉主为缙萦。津妾一棹歌，脱父于严刑。
十子若不肖，不如一女英。豫让斩空衣，有心竟无成。
要离杀庆忌，壮夫素所轻。妻子亦何辜，焚之买虚名。
岂如东海妇，事立独扬名。

· 全唐诗 ·

卷 22_5【舞曲歌辞·章和二年中（鼙舞曲）】

李贺

云萧索，风拂拂，麦芒如蕙黍和粟。关中父老百领襦，
关东吏人乏诟租。健犍春耕土膏黑，莠蒲丛丛沿水脉。
殷勤为我下田鉏，百钱携赏丝桐客。游春漫光坞花白，
野林散香神降席。拜神得寿献天子，七星贯断姮娥死。

卷 22_6【舞曲歌辞·公莫舞歌】

李贺

方花古础排九楹，刺豹淋血盛银罍。华筵鼓吹无桐竹，
长刀直立割鸣箏。横楣粗锦生红纬，日炙锦嫣王未醉。
腰下三看宝玦光，项庄掉箭拦前起。材官小臣公莫舞，
座上真人赤龙子。芒砀云瑞抱天回，咸阳王气清如水。
铁枢铁键重束关，大旗五丈撞双环。汉王今日须秦印，
绝膑刳肠臣不论。

卷 22_7【舞曲歌辞·拂舞辞】

李贺

吴娥声绝天，空云闲裴回。门外满车马，亦须生绿苔。

· 全唐诗 ·

尊有乌程酒，劝君千万寿。全胜汉武帝锦楼上，
晓望晴寒饮花露。东方日不破，天光无老时。
丹成作蛇乘白雾，千年重化玉井龟。从蛇作龟二千载。
吴堤绿草年年在。背有八卦称神仙，邪鳞顽甲滑腥涎。

卷 22_8【舞曲歌辞·白鸠辞】

李白

铿鸣钟，考朗鼓。歌白鸠，引拂舞。白鸠之白谁与邻，
霜衣雪襟诚可珍。含哺七子能平均。食不咽，性安驯。
首农政，鸣阳春。天子刻玉杖，镂形赐耆人。
白鹭亦白非纯真，外洁其色心匪仁。阙五德，无司晨，
胡为啄我葭下之紫鳞。鹰鹯雕鹗，贪而好杀。
凤凰虽大圣，不愿以为臣。

卷 22_9【舞曲歌辞·独漉篇】

李白

独漉水中泥，水浊不见月。不见月尚可，水深行人没。
越鸟从南来，胡鹰亦北度。我欲弯弓向天射，
惜其中道失归路。落叶别树，飘零随风。客无所托，
悲与此同。罗帷舒卷，似有人开。明月直入，无心可猜。
雄剑挂壁，时时龙鸣。不断犀象，绣涩苔生。国耻未雪，

· 全唐诗 ·

何由成名。神鹰梦泽，不顾鸱鸢。为君一击，抟鹏九天。

卷 22_10【舞曲歌辞·独漉歌】

王建

独独漉漉，鼠食猫肉。
乌日中，鹤露宿，黄河水直人心曲。

卷 22_11【舞曲歌辞·白紵辞二首】

崔国辅

洛阳梨花落如霰，河阳桃叶生复齐。
坐恐玉楼春欲尽，红绵粉絮裛妆啼。

董贤女弟在椒风，窈窕繁华贵后宫。
璧带金釭皆翡翠，一朝零落变成空。

卷 22_12【舞曲歌辞·白紵辞二首】

杨衡

玉纓翠佩杂轻罗，香汗微渍朱颜酡。为君起唱白紵歌，

· 全唐诗 ·

清声袅云思繁多，凝笳哀琴时相和。金壶半倾芳夜促，
梁尘霏霏暗红烛。令君安坐听终曲，坠叶飘花难再复。

蹀珠履，步琼筵。轻身起舞红烛前，芳姿艳态妖且妍。
回眸转袖暗催弦，凉风萧萧流水急。月华泛艳红莲湿，
牵裙揽带翻成泣。

卷 22_13【舞曲歌辞·白紵辞】

李白

扬清歌，发皓齿，北方佳人东邻子。且吟白紵停绿水，
长袖拂面为君起。寒云夜卷霜海空，胡风吹天飘塞鸿。
玉颜满堂乐未终，馆娃日落歌吹朦。

月寒江清夜沉沉，美人一笑千黄金，垂罗舞縠扬哀音。
郢中白雪且莫吟，子夜吴歌动君心。动君心，冀君赏，
愿作天池双鸳鸯，一朝飞去青云上。

吴刀翦彩缝舞衣，明妆丽服夺春辉，扬眉转袖若雪飞。
倾城独立世所稀，激楚结风醉忘归。高堂月落烛已微，
玉钗挂缨君莫违。

· 全唐诗 ·

卷 22_14【舞曲歌辞·白紵歌二首】

王建

天河漫漫北斗粲，宫中乌啼知夜半。新缝白紵舞衣成，
来迟邀得吴王迎。低鬟转面掩双袖，玉钗浮动秋风生。
酒多夜长夜未晓，月明灯光两相照，后庭歌声更窈窕。

馆娃宫中春日暮，荔枝木瓜花满树。城头乌栖休击鼓，
青娥弹瑟白紵舞。夜天憧憧不见星，宫中火照西江明。
美人醉起无次第，堕钗遗佩满中庭。此时但愿可君意，
回昼为宵亦不寐，年年奉君君莫弃。

卷 22_15【舞曲歌辞·白紵歌】

张籍

皎皎白紵白且鲜，将作春衫称少年。裁缝长短不能定，
自持刀尺向姑前。复恐兰膏污纤指，常遣傍人收堕珥。
衣裳着时寒食下，还把玉鞭鞭白马。

· 全唐诗 ·

卷 22_16【舞曲歌辞·白紵歌】

柳宗元

翠帷双卷出倾城，龙剑破匣霜月明。朱唇掩抑悄无声，
金簧玉磬宫中生。下沉秋水激太清，天高地迥凝日晶，
羽觞荡漾何事倾。

卷 22_17【舞曲歌辞·冬白紵歌】

元稹

吴宫夜长宫漏款，帘幕四垂灯焰暖。西施自舞王自管，
雪纛翻翻鹤翎散，促节牵繁舞腰懒。舞腰懒，王罢饮，
盖覆西施凤花锦，身作匡床臂为枕。朝佩拟拟王晏寝，
酒醒阍报门无事。子胥死后言为讳，近王之臣谕王意。
共笑越王穷惴惴，夜夜抱冰寒不睡。

卷 22_18【舞曲歌辞·霓裳辞十首】

王建

弟子部中留一色，听风听水作霓裳。
散声未足重来授，直到床前见上皇。

· 全唐诗 ·

中管五弦初半曲，遥教合上隔帘听。
一声声向天头落，效得仙人夜唱经。

自直梨园得出稀，更番上曲不教归。
一时跪拜霓裳彻，立地阶前赐紫衣。

旋翻新谱声初足，除却梨园未教人。
宣与书家分手写，中官走马赐功臣。

伴教霓裳有贵妃，从初直到曲成时。
日长耳里闻声熟，拍数分毫错总知。

弦索枞枞隔彩云，五更初发一山闻。
武皇自送西王母，新换霓裳月色裙。

敕赐宫人澡浴回，遥看美女院门开。
一山星月霓裳动，好字先从殿里来。

传呼法部按霓裳，新得承恩别作行。
应是贵妃楼上看，内人舁下彩罗箱。

朝元阁上山风起，夜听霓裳玉露寒。
宫女月中更替立，黄金梯滑并行难。

知向华清年月满，山头山底种长生。
去时留下霓裳曲，总是离宫别馆声。

· 全唐诗 ·

卷 22_19【舞曲歌辞·柘枝词】

将军奉命即须行，塞外领强兵。
闻道烽烟动，腰间宝剑匣中鸣。

卷 22_20【舞曲歌辞·柘枝词三首】

薛能

同营三十万，震鼓伐西羌。战血粘秋草，征尘搅夕阳。
归来人不识，帝里独戎装。

悬军征拓羯，内地隔萧关。日色昆仑上，风声朔漠间。
何当千万骑，飒飒贰师还。

意气成功日，春风起絮天。楼台新邸第，歌舞小婵娟。
急破催摇曳，罗衫半脱肩。

卷 22_21【舞曲歌辞·屈柘词】

温庭筠

杨柳萦桥绿，玫瑰拂地红。绣衫金騕褭，花髻玉珑璁。
宿雨香潜润，春流水暗通。画楼初梦断，晴日照湘风。

· 全唐诗 ·

第二十三卷

卷 23_1【琴曲歌辞·白雪歌】

僧贯休

列鼎佩金章，泪眼看风枝。却思食藜藿，身作屠沽儿。
负米无远近，所希升斗归。为人无贵贱，莫学鸡狗肥。
斯言如不忘，别更无光辉。斯言如或忘，即安用人为。

卷 23_2【琴曲歌辞·湘妃】

刘长卿

帝子不可见，秋风来暮思。婵娟湘江月，千载空蛾眉。

卷 23_3【琴曲歌辞·湘妃】

李贺

筠竹千年老不死，长伴秦娥盖湘水。蛮娘吟弄满寒空，

· 全唐诗 ·

九山静绿泪花红。离鸾别凤烟梧中，巫云蜀雨遥相通。
幽愁秋气上青枫，凉夜波间吟古龙。

卷 23_4【琴曲歌辞·湘妃怨】

孟郊

南巡竟不返，帝子怨逾积。万里丧蛾眉，潇湘水空碧。
冥冥荒山下，古庙收贞魄。乔木深青春，清光满瑶席。
攀芳徒有荐，灵意殊脉脉。玉佩不可亲，裴回烟波夕。

卷 23_5【琴曲歌辞·湘妃怨】

陈羽

二妃怨处云沉沉，二妃哭处湘水深。
商人酒滴庙前草，萧飒风生斑竹林。

卷 23_6【琴曲歌辞·湘妃列女操】

鲍溶

有虞夫人哭虞后，淑女何事又伤离。竹上泪迹生不尽，
寄哀云和五十丝。云和经奏钧天曲，乍听宝琴遥嗣续。

· 全唐诗 ·

三湘测测流急绿，秋夜露寒蜀帝飞。枫林月斜楚臣宿，
更疑川宫日黄昏。暗携女手殷勤言，环佩玲珑有无间。
终疑既远双悄悄，苍梧旧云岂难召，老猿心寒不可啸。
目眊眊兮意蹉跎，魂腾腾兮惊秋波。曲一尽兮忆再奏，
众弦不声且如何。

卷 23_7【琴曲歌辞·湘夫人】

邹绍先

枫叶下秋渚，二妃愁渡湘。疑山空杳蔼，何处望君王。
日落水云里，油油心自伤。

卷 23_8【琴曲歌辞·湘夫人】

李颀

九嶷日已暮，三湘云复愁。宵蔼罗袂色，潺湲江水流。
佳期来北渚，捐袂在芳洲。

卷 23_9【琴曲歌辞·湘夫人】

郎士元

娥眉对湘水，遥哭苍梧间。万乘既已歿，孤舟谁忍还。

· 全唐诗 ·

至今楚山上，犹有泪痕斑。南有涔阳路，渺渺多新愁。
昔神降回时，风波江上秋。彩云忽无处，碧水空安流。

卷 23_10【琴曲歌辞·霹雳引】

沉佺期

岁七月，火伏而金生。客有鼓瑟于门者，奏霹雳之商声。
始戛羽以騄騐，终扣宫而砰铃。电耀耀兮龙跃，
雷阗阗兮雨冥。气鸣唢以会雅，态欻翕以横生。
有如驱千旗，制五兵，截荒虺，斫长鲸。孰与广陵比，
意别鹤俦精而已。俾我雄子魄动，毅夫发立，怀恩不浅，
武义双辑。视胡若芥，翦羯如拾。岂徒慨慷中筵，
备群娱之翕习哉。

卷 23_11【琴曲歌辞·拘幽操】

韩愈

目掩掩兮其凝其盲，耳肃肃兮听不闻声。
朝不日出兮夜不见月与星，有知无知兮为死为生。
呜呼！臣罪当诛兮天王圣明。

· 全唐诗 ·

卷 23_12【琴曲歌辞·越裳操】

韩愈

雨之施，物以孳。我何意于彼为？自周之先，其艰其勤。
以有疆宇，私我后人。我祖在上，四方在下。
厥临孔威，敢戏以侮。孰荒于门，孰治于田。四海既均，
越裳是臣。

卷 23_13【琴曲歌辞·岐山操】

韩愈

我家于豳，自我先公。伊我承绪，敢有不同。
今狄之人，将土我疆。民为我战，谁使死伤。
彼岐有岵，我往独处。人莫余追，无思我悲。

卷 23_14【琴曲歌辞·履霜操】

韩愈

父兮儿寒，母兮儿饥。儿罪当笞，逐儿何为。
儿在中野，以宿以处。四无人声，谁与儿语。
儿寒何衣，儿饥何食。儿行于野，履霜以足。

· 全唐诗 ·

母生众儿，有母怜之。独无母怜，儿宁不悲。

卷 23_15【琴曲歌辞·雉朝飞操】

李白

麦陇青青三月时，白雉朝飞挟两雌。锦衣绮翼何离褻，
犊牧采薪感之悲。春天和，白日暖，啄食饮泉勇气满，
争雄斗死绣颈断。雉子班奏急管弦，心倾美酒尽玉碗。
枯杨枯杨尔生萸，我独七十而孤栖。弹弦写恨意不尽，
瞑目归黄泥。

卷 23_16【琴曲歌辞·雉朝飞操】

韩愈

雉之飞，于朝日。群雌孤雄，意气横出。当东而西，
当啄而飞。随飞随啄，群雌粥粥。嗟我虽人，
曾不如彼雉鸡。生身七十年，无一妾与妃。

卷 23_17【琴曲歌辞·雉朝飞操】

张祜

朝阳陇东泛暖景，双啄双飞双顾影。朱冠锦襦聊日整，

· 全唐诗 ·

漠漠雾中如衣綯。伤心卢女弦，七十老翁长独眠。
雄飞在草雌在田，衷肠结愤气呵天。圣人在上心不偏，
翁得女妻甚可怜。

卷 23_18【琴曲歌辞·思归引】

张祜

重重作闺清旦鐏，两耳深声长不彻。深宫坐愁百年身，
一片玉中生愤血。焦桐罢弹丝自绝，漠漠暗魂愁夜月。
故乡不归谁共穴，石上作蒲蒲九节。

卷 23_19【琴曲歌辞·猗兰操】

韩愈

兰之猗猗，扬扬其香。不采而佩，于兰何伤。
今天之旋，其曷为然。我行四方，以日以年。
雪霜贸贸，荠麦之茂。子如不伤，我不尔觐。
荠麦之茂，荠麦之有。君子之伤，君子之守。

· 全唐诗 ·

卷 23_20【琴曲歌辞·幽兰】

崔涂

幽植众能知，贞芳只暗持。自无君子佩，未是国香衰。
白露沾长早，青春每到迟。不知当路草，芳馥欲何为。

卷 23_21【琴曲歌辞·将归操】

韩愈

秋之水兮其色幽幽，我将济兮不得其由。
涉其浅兮石啮我足，乘其深兮龙入我舟。
我济而悔兮将安归尤。归乎归乎，无与石斗兮无应龙求。

卷 23_22【琴曲歌辞·龟山操】

韩愈

龟之气兮不能云雨，龟之枿兮不中梁柱，
龟之大兮只以奄鲁。知将隳兮哀莫余伍，
周公有鬼兮嗟余归辅。

· 全唐诗 ·

卷 23_23【琴曲歌辞·残形操】

韩愈

有兽维狸兮我梦得之，其身孔明兮而头不知。
吉凶何为兮觉坐而思，巫咸上天兮识者其谁。

卷 23_24【琴曲歌辞·双燕离】

李白

双燕复双燕，双飞令人羡。玉楼珠阁不独栖，
金窗绣户长相见。柏梁失火去，因入吴王宫。
吴宫又焚荡，雏尽巢亦空。憔悴一身在，孀雌忆故雄。
双飞难再得，伤我寸心中。

卷 23_25【琴曲歌辞·列女操】

孟郊

梧桐相待老，鸳鸯会双死。贞妇贵殉夫，舍生亦如此。
波澜誓不起，妾心井中水。

· 全唐诗 ·

卷 23_26【琴曲歌辞·别鹄操】

韩愈

雄鹄衔枝来，雌鹄啄泥归。巢成不生子，大义当乖离。
江汉水之大，鹄身鸟之微。更无相逢日，安可相随飞。

卷 23_27【琴曲歌辞·别鹤】

杨巨源

海鹤一为别，高程方杳然。影摇江海路，思结潇湘天。
皎然仰白日，真姿栖紫烟。含情九霄际，顾侣五云前。
遐心属清都，凄响激朱弦。超摇间云雨，迢递各山川。
东南信多水，会合当有年。雄飞戾冥冥，此意何由传。

卷 23_28【琴曲歌辞·别鹤】

王建

主人一去池水绝，池鹤散飞不相别。青天漫漫碧海重，
知向何山风雪中。万里虽然音影在，向心终是死生同。
池边巢破松树死，树头年年乌生子。

· 全唐诗 ·

卷 23_29【琴曲歌辞·别鹤】

张籍

双鹤出云溪溪，分飞各自迷。空巢在松杪，折羽落江泥。
寻水终不饮，逢林亦未栖。别离应易老，万里两凄凄。

卷 23_30【琴曲歌辞·别鹤】

杜牧

分飞共所从，六翮势摧风。声断碧云外，影孤明月中。
青田归路远，月桂旧巢空。矫翼知何处，天涯不可穷。

卷 23_31【琴曲歌辞·走马引】

李贺

我有辞乡剑，玉锋堪截云。襄阳走马客，意气自生春。
朝嫌剑光静，暮嫌剑花冷。能持剑向人，不解持照身。

· 全唐诗 ·

卷 23_32【琴曲歌辞·昭君怨】

白居易

明妃风貌最娉婷，合在椒房应四星。只得当年备宫掖，
何曾专夜奉帏屏。见疏从道迷图画，知屈那教配虏庭。
自是君恩薄如纸，不须一向恨丹青。

卷 23_33【琴曲歌辞·昭君怨二首】

张祜

万里边城远，千山行路难。举头惟见月，何处是长安。
汉庭无大议，戎虏几先和。莫羡倾城色，昭君恨最多。

卷 23_34【琴曲歌辞·昭君怨】

梁氏琼

自古无和亲，贻灾到妾身。胡风嘶去马，汉月吊行轮。
衣薄狼山雪，妆成虏塞春。回看父母国，生死毕胡尘。

· 全唐诗 ·

卷 23_35【琴曲歌辞·明妃怨】

杨凌

汉国明妃去不还，马驼弦管向阴山。
匣中纵有菱花镜，羞对单于照旧颜。

卷 23_36【琴曲歌辞·蔡氏五弄·游春曲二首】

王涯

万树江边杏，新开一夜风。满园深浅色，照在绿波中。
上苑何穷树，花开次第新。香车与丝骑，风静亦生尘。

卷 23_37【琴曲歌辞·蔡氏五弄·游春辞二首】

王涯

曲江丝柳变烟条，寒骨冰随暖气销。
才见春光生绮陌，已闻清乐动云韶。
经过柳陌与桃蹊，寻逐风光着处迷。
鸟度时时冲絮起，花繁衮衮压枝低。

· 全唐诗 ·

卷 23_38【琴曲歌辞·蔡氏五弄·游春辞三首】

令狐楚

晚游临碧殿，日上望春亭。芳树罗仙仗，晴山展翠屏。
一夜好风吹，新花一万枝。风前调玉管，花下簇金羁。
阊阖春风起，蓬莱雪水消。相将折杨柳，争取最长条。

卷 23_39【琴曲歌辞·蔡氏五弄·渌水曲】

李白

渌水明秋月，南湖采白蘋。荷花娇欲语，愁杀荡舟人。

卷 23_40【琴曲歌辞·蔡氏五弄·渌水辞】

李贺

今宵好风月，阿侯在何处。为有倾城色，翻成足愁苦。
东湖采莲叶，南湖拔蒲根。未持寄小姑，且持感愁魂。

· 全唐诗 ·

卷 23_41【琴曲歌辞·蔡氏五弄·幽居弄】

顾况

苔衣生，花露滴，月入西林荡东壁。扣商占角两三声，
洞户溪窗一冥寂。独去沧洲无四邻，身婴世网此何身。
关情命曲寄惆怅，久别江南山里人。

卷 23_42【琴曲歌辞·蔡氏五弄·秋思二首】

李白

春阳如昨日，碧树鸣黄鹂。芜然蕙草暮，飒尔凉风吹。
天秋木叶下，月冷莎鸡悲。坐愁群芳歇，白露凋华滋。

阌氏黄叶落，妾望白登台。月出碧云断，蝉声秋色来。
胡兵沙塞合，汉使玉关回。征客无归日，空悲蕙草摧。

卷 23_43【琴曲歌辞·蔡氏五弄·秋思二首】

鲍溶

胡风吹雁翼，远别无人乡。君近雁来处，几回断君肠。
昔奉千日书，抚心怨星霜。无书又千日，世路重茫茫。

· 全唐诗 ·

燕国有佳丽，蛾眉富春光。自然君归晚，花落君空堂。
君其若不然，岁晚双鸳鸯。顾兔蚀残月，幽光不如星。
女儿晚事夫，颜色同秋萤。秋日边马思，武夫不遑宁。
燕歌易水怨，剑舞蛟龙腥。风折连枝树，水翻无蒂萍。
立身多户门，何必燕山铭。生世不如鸟，双双比翼翎。

季秋天地间，万物生意足。我忧长于生，安得及草木。
试从古人愿，致酒歌秉烛。燕赵皆世人，讵能长似玉。
俯怜老期近，仰视日车速。萧飒御风君，魂梦愿相逐。
百年夜销半，端为垂纓束。

卷 23_44【琴曲歌辞·蔡氏五弄·秋思】

司空曙

静与懒相偶，年将衰共催。前途欢不集，往事恨空来。
昼景委红叶，月华铺绿苔。沉思更何有，结坐玉琴哀。

卷 23_45【琴曲歌辞·蔡氏五弄·秋思】

司空图

身病时亦危，逢秋多恸哭。风波一摇荡，天地几翻覆。
孤萤出荒池，落叶穿破屋。势利长草草，何人访幽独。

· 全唐诗 ·

卷 23_46【琴曲歌辞·蔡氏五弄·秋思二首】

王涯

网轩凉吹动轻衣，夜听更长玉漏稀。
月渡天河光转湿，鹊惊秋树叶频飞。

宫连太液见苍波，暑气微清秋意多。
一夜轻风蘋未起，露珠翻尽满池荷。

卷 23_47【琴曲歌辞·胡笳十八拍】

刘商

汉室将衰兮四夷不宾，动干戈兮征战频。
哀哀父母生育我，见离乱兮当此辰。纱窗对镜未经事，
将谓珠帘能蔽身。一朝虏骑入中国，苍黄处处逢胡人。
忽将薄命委锋镝，可惜红颜随虏尘。（第一拍）

马上将余向绝域，厌生求死死不得。戎羯腥膻岂是人，
豺狼喜怒难姑息。行尽天山足霜霰，风土萧条近胡国。
万里重阴鸟不飞，寒沙莽莽无南北。（第二拍）

如羈囚兮在縲紲，忧虑万端无处说。使余力兮翦余发，
食余肉兮饮余血。诚知杀身愿如此，以余为妻不如死。

· 全唐诗 ·

早被蛾眉累此身，空悲弱质柔如水。（第三拍）

山川路长谁记得，何处天涯是乡国。自从惊怖少精神，
不觉风霜损颜色。夜中归梦来又去，朦胧岂解传消息。
漫漫胡天叫不闻，明明汉月应相识。（第四拍）

水头宿兮草头坐，风吹汉地衣裳破。羊脂沐发长不梳，
羔子皮裘领仍左。狐襟貉袖腥复膻，昼披行兮夜披卧。
毡帐时移无定居，日月长兮不可过。（第五拍）

怪得春光不来久，胡中风土无花柳。天翻地覆谁得知，
如今正南看北斗。姓名音信两不通，终日经年常闭口。
是非取与在指撝，言语传情不如手。（第六拍）

男儿妇人带弓箭，塞马蕃羊卧霜霰。寸步东西岂自由，
偷生乞死非情愿。龟兹筚篥愁中听，碎叶琵琶夜深怨。
竟夕无云月上天，故乡应得重相见。（第七拍）

忆昔私家恣娇小，远取珍禽学驯扰。如今沦弃念故乡，
悔不当初放林表。朔风萧萧寒日暮，星河寥落胡天晓。
旦夕思归不得归，愁心想似笼中鸟。（第八拍）

当日苏武单于问，道是宾鸿解传信。学他刺血写得书，
书上千重万重恨。髯胡少年能走马，弯弓射飞无远近。
遂令边雁转怕人，绝域何由达方寸。（第九拍）

恨凌辱兮恶腥膻，憎胡地兮怨胡天。生得胡儿欲弃捐，

· 全唐诗 ·

及生母子情宛然。貌殊语异憎还爱，心中不觉常相牵。
朝朝暮暮在眼前，腹生手养宁不怜。（第十拍）

日来月往相推迁，迢迢星岁欲周天。无冬无夏卧霜霰，
水冻草枯为一年。汉家甲子有正朔，绝域三光空自悬。
几回鸿雁来又去，肠断蟾蜍亏复圆。（第十一拍）

破瓶落井空永沉，故乡望断无归心。宁知远使问姓名，
汉语泠泠传好音。梦魂几度到乡国，觉后翻成哀怨深。
如今果是梦中事，喜过悲来情不任。（第十二拍）

童稚牵衣双在侧，将来不可留又忆。还乡惜别两难分，
宁弃胡儿归旧国。山川万里复边戍，背面无由得消息。
泪痕满面对残阳，终日依依向南北。（第十三拍）

莫以胡儿可羞耻，恩情亦各言其子。手中十指有长短，
截之痛惜皆相似。还乡岂不见亲族，念此飘零隔生死。
南风万里吹我心，心亦随风渡辽水。（第十四拍）

叹息襟怀无定分，当时怨来归又恨。不知愁怨意若何，
似有锋铓扰方寸。悲欢并行情未快，心意相尤自相问。
不缘生得天属亲，岂向仇讎结恩信。（第十五拍）
去时只觉天苍苍，归日始知胡地长。重阴白日落何处，
秋雁所向应南方。平沙四顾自迷惑，远近悠悠随雁行。
征途未尽马蹄尽，不见行人边草黄。（第十六拍）

行尽胡天千万里，惟见黄沙白云起。马饥跑雪衔草根，

· 全唐诗 ·

人渴敲冰饮流水。燕山仿佛辨烽戍，鼙鼓如闻汉家垒。
努力前程是帝乡，生前免向胡中死。（第十七拍）

归来故乡见亲族，田园半芜春草绿。明烛重然煨烬灰，
寒泉更洗沉泥玉。载持巾栉礼仪好，一弄丝桐生死足。
出入关山十二年，哀情尽在胡笳曲。（第十八拍）

卷 23_48【琴曲歌辞·飞龙引二首】

李白

黄帝铸鼎于荆山，炼丹砂，丹砂成黄金。
骑龙飞上太清家，云愁海思令人嗟。宫中彩女颜如花，
飘然挥手凌紫霞。从风纵体登銮车。登銮车，侍轩辕，
遨游青天中，其乐不可言。

鼎湖流水清且闲，轩辕去时有弓剑。古人传道留其间，
后宫婵娟多花颜。乘鸾飞烟亦不还，骑龙攀天造天关。
造天关，闻天语，长云河车载玉女。载玉女，过紫皇，
紫皇乃赐白兔所捣之药，后天而老凋三光。
下视瑶池见王母，蛾眉萧飒如秋霜。

· 全唐诗 ·

卷 23_49【琴曲歌辞·乌夜啼引】

张籍

秦乌啼哑哑，夜啼长安吏人家。吏人得罪囚在狱，
倾家卖产将自赎。少妇起听夜啼乌，知是官家有赦书。
下床心喜不重寐，未明上堂贺舅姑。少妇语啼乌，
汝啼慎勿虚。借汝庭树作高巢，年年不令伤尔雏。

卷 23_50【琴曲歌辞·宛转歌】

郎大家宋氏

风已清，月朗琴复鸣。掩抑非千态，殷勤是一声。
歌宛转，宛转和且长。愿为双鸿鹄，比翼共翱翔。

日已暮，长檐鸟应度。此时望君君不来，
此时思君君不顾。歌宛转，宛转那能异栖宿。
愿为形与影，出入恒相逐。

卷 23_51【琴曲歌辞·宛转歌二首】

刘方平

星参差，月二八，灯五枝。黄鹤瑶琴将别去，

· 全唐诗 ·

芙蓉羽帐惜空垂。歌宛转，宛转恨无穷。愿为波与浪，
俱起碧流中。

晓将近，黄姑织女银河尽。九华锦衾无复情，
千金宝镜谁能引。歌宛转，宛转伤别离。愿作杨与柳，
同向玉窗垂。

卷 23_52【琴曲歌辞·宛转行】

张籍

华屋重翠幄，绮席雕象床。远漏微更疏，薄衾中夜凉。
炉氲暗裴回，寒灯背斜光。妍姿结宵态，寝臂幽梦长。
宛转复宛转，忆忆更未央。

卷 23_53【琴曲歌辞·王敬伯歌】

李端

妾本舟中客，闻君江上琴。君初感妾叹，妾亦感君心。
遂出合欢被，同为交颈禽。传杯惟畏浅，接膝犹嫌远。
侍婢奏箜篌，女郎歌宛转。宛转怨如何，中庭霜渐多。
霜多叶可惜，昨日非今夕。徒结万里欢，终成一宵客。
王敬伯，渌水青山从此隔。

· 全唐诗 ·

卷 23_54【琴曲歌辞·三峡流泉歌】

李季兰

妾家本住巫山云，巫山流水常自闻。玉琴弹出转寥夔，
直似当时梦中听。三峡流泉几千里，一时流入深闺里。
巨石奔崖指下生，飞波走浪弦中起。初疑喷涌含雷风，
又似呜咽流不通。回湍曲瀨势将尽，时复滴沥平沙中。
忆昔阮公为此曲，能使仲容听不足。一弹既罢复一弹，
愿似流泉镇相续。

卷 23_55【琴曲歌辞·风入松歌】

皎然

西岭松声落日秋，千枝万叶风飕飕。美人援琴弄成曲，
写得松间声断续。声断续，清我魂，流波坏陵安足论。
美人夜坐月明里，含少商兮照清征。风何凄兮飘凤脊，
搅寒松兮又夜起。夜未央，曲何长，金徽更促声泱泱。
何人此时不得意，意苦弦悲闻客堂。

· 全唐诗 ·

卷 23_56【琴曲歌辞·秋风引】

刘禹锡

何处秋风至，萧萧送雁群。朝来入庭树，孤客最先闻。

卷 23_57【琴曲歌辞·明月引】

卢照邻

洞庭波起兮鸿雁翔，风瑟瑟兮野苍苍。
浮云卷霭，明月流光。荆南兮赵北，碣石兮潇湘。
澄清规于万里，照离思于千行。横桂枝于西第，
绕菱花于北堂。高楼思妇，飞盖君王。文姬绝域，
侍子他乡。见胡鞍之似练，知汉剑之如霜。
试登高而极目，莫不变而回肠。

卷 23_58【琴曲歌辞·明月歌】

阎朝隐

梅花雪白柳叶黄，云雾四起月苍苍，箭水泠泠刻漏长。
挥玉指，拂罗裳，为君一奏楚明光。

· 全唐诗 ·

卷 23_59【琴曲歌辞·绿竹引】

宋之问

青溪绿潭潭水侧，修竹婵娟同一色。徒生仙实凤不游，
老死空山人讵识。妙年秉愿逃俗纷，归卧嵩丘弄白云。
含情傲慰心目，何可一日无此君。

卷 23_60【琴曲歌辞·山人劝酒】

李白

苍苍云松，落落绮皓。春风尔来为阿谁，
胡蝶忽然满芳草。秀眉霜雪颜桃花，骨青髓绿长美好。
称是秦时避世人，劝酒相欢不知老。各守兔鹿志，
耻随龙虎争。欬起佐太子，汉王乃复惊。顾谓戚夫人，
彼翁羽翼成。归来南山下，泛若云无情。举觞酹巢由，
洗耳何独清。浩歌望嵩岳，意气还相倾。

卷 23_61【琴曲歌辞·幽涧泉】

李白

拂彼白石，弹吾素琴。幽涧愀兮流泉深，

· 全唐诗 ·

善手明徽高张清。心寂历似千古，松飕飕兮万寻。
中见愁猿吊影而危处兮，叫秋木而长吟。
客有哀时失志而听者，泪淋浪以沾襟。乃缉商缀羽，
潺湲成音。吾但写声发情于妙指，殊不知此曲之古今。
幽涧泉，鸣深林。

卷 23_62【琴曲歌辞·龙宫操】

顾况

龙宫月明光参差，精卫衔石东飞时，蛟人织绡采藕丝。
翻江倒海倾吴蜀，汉女江妃杳相续，龙王宫中水不足。

卷 23_63【琴曲歌辞·飞鸢操】

刘禹锡

鸢飞杳杳青云里，鸢鸣萧萧风四起。旗尾飘扬势渐高，
箭头舐划声相似。长空悠悠霁日悬，六翮不动凝飞烟。
游鹄翔雁出其下，庆云清景相回旋。忽闻饥乌一噪聚，
瞥下云中争腐鼠。腾音砺吻相喧呼，仰天大吓疑鸳雏。
畏人避犬投高处，俯啄无声犹屡顾。青鸟自爱玉山禾，
仙禽徒贵华亭露。朴敝危巢向暮时，毵毵饱腹蹲枯枝。
游童挟弹一麾肘，臆碎羽分人不悲。天生众禽各有类，
威凤文章在仁义。鹰隼仪形蝼蚁心，虽能戾天何足贵。

· 全唐诗 ·

卷 23_64【琴曲歌辞·升仙操】

李群玉

嬴女去秦宫，琼箫生碧空。凤台闭烟雾，鸾吹飘天风。
复闻周太子，亦遇浮丘公。丛簧发仙弄，轻举紫霞中。
浊世不久住，清都路何穷。一去霄汉上，世人那得逢。

卷 23_65【琴曲歌辞·司马相如琴歌】

张祜

凤兮凤兮非无凰，山重水阔不可量。
梧桐结阴在朝阳，濯羽弱水鸣高翔。

卷 23_66【琴曲歌辞·霍将军】

崔颢

长安甲第高入云，谁家居住霍将军。日晚朝回拥宾从，
路傍揖拜何纷纷。莫言炙手手可热，须臾火尽灰亦灭。
莫言贫贱即可欺，人生富贵自有时。一朝天子赐颜色，
世上悠悠应自知。

· 全唐诗 ·

卷 23_67【琴曲歌辞·琴歌】

顾况

琴调秋些，胡风绕雪。峡泉声咽，佳人愁些。

· 全唐诗 ·

第二十四卷

卷 24_1【杂曲歌辞·秦女休行】

李白

西门秦氏女，秀色如琼花。手挥白杨刀，清昼杀仇家。
罗袖洒赤血，英声凌紫霞。直上西山去，关吏相邀遮。
媚为燕国王，身被诏狱加。犯刑若履虎，不畏落爪牙。
素颈未及断，摧眉伏泥沙。金鸡忽放赦，大辟得宽赊。
何惭聂政姊，万古共惊嗟。

卷 24_2【杂曲歌辞·出门行二首】

孟郊

长河悠悠去无极，百龄同此可叹息。秋风白露沾人衣，
壮心凋落夺颜色。少年出门将诉谁，川无梁兮路无岐。
一闻陌上苦寒奏，使我伫立惊且悲。君今得意厌粱肉，
岂复念我贫贱时。

海风萧萧天雨霜，穷愁独坐夜何长。驱车旧忆太行险，

· 全唐诗 ·

始知游子悲故乡。美人相思隔天阙，长望云端不可越。
手持琅玕欲有赠，爱而不见心断绝。南山峨峨白石烂，
碧海之波浩漫漫。参辰出没不相待，我欲横天无羽翰。

卷 24_3【杂曲歌辞·出门行】

元稹

兄弟同出门，同行不同志。淒淒分岐路，各各营所为。
兄上荆山巅，翻石辨虹气。弟沉沧海底，偷珠待龙睡。
出门不数年，同归亦同遂。俱用私所珍，升沉自兹异。
献珠龙王宫，值龙觅珠次。但喜复得珠，不求珠所自。
酬客双龙女，授客六龙辔。遣充行雨神，雨泽随客意。
零夏钟鼓繁，^宗秋玉帛积。彩色画廊庙，奴僮被珠翠。
骥騄千万双，鸳鸯七十二。言者禾稼枯，无人敢轻议。
其兄因献璞，再刖不履地。门户亲戚疏，匡床妻妾弃。
铭心有所待，视足无所愧。持璞自枕头，泪痕双血渍。
一朝龙醒寤，本问偷珠事。因知行雨偏，妻子五刑备。
仁兄捧尸哭，势友掉头讳。丧车黔首葬，吊客青蝇至。
楚有望气人，王前忽长跪。贺王得贵宝，不远王所莅。
求之果如言，剖则浮云膩。白珩无颜色，垂棘有瑕累。
在楚列地封，入赵连城贵。秦遣李斯书，书为传国瑞。
秦亡汉魏传，传者得神器。卞和名永永，与宝不相坠。
劝尔出门行，行难莫行易。易得还易失，难同亦难离。
善贾识贪廉，良田无稊稚。磨剑莫磨锥，磨锥成小利。

· 全唐诗 ·

卷 24_4【杂曲歌辞·出自蓟北门行】

李白

虏阵横北荒，胡星曜精芒。羽书速惊电，烽火昼连光。
虎竹救边急，戎车森已行。明主不安席，按剑心飞扬。
推毂出猛将，连旗登战场。兵威冲绝漠，杀气凌穹苍。
列卒赤山下，开营紫塞傍。途冬沙风紧，旌旗飒凋伤。
画角悲海月，征衣卷天霜。挥刃斩楼兰，弯弓射贤王。
单于一平荡，种落自奔亡。收功报天子，行歌归咸阳。

卷 24_5【杂曲歌辞·蓟门行五首】

高适

边城十一月，雨雪乱霏霏。元戎号令严，人马亦轻肥。
羌胡无尽日，征战几人归。

幽州多骑射，结发重横行。一朝事将军，出入有声名。
纷纷猎秋草，相向角弓鸣。

蓟门逢古老，独立思氛氲。一身既零丁，头鬓白纷纷。
勋庸今已矣，不识霍将军。

茫茫长城外，日没更烟尘。胡骑虽凭陵，汉兵不顾身。

· 全唐诗 ·

古树满空塞，黄云愁杀人。

汉家能用武，开拓穷异域。戍卒厌糠核，降胡饱衣食。
开亭试一望，吾欲涕沾臆。

卷 24_6【杂曲歌辞·蓟门行】

李希仲

旄头有精芒，胡骑猎秋草。羽檄南渡河，边庭用兵早。
汉家爱征战，宿将今已老。辛苦羽林儿，从戎榆关道。
一身救边速，烽火连蓟门。前军鸟飞断，格斗尘沙昏。
寒日鼓声急，单于夜火奔。当须徇忠义，身死报国恩。

卷 24_7【杂曲歌辞·君子有所思行】

李白

紫阁连终南，青冥天倪色。凭崖望咸阳，宫阙罗北极。
万井惊画出，九衢如弦直。渭水清银河，横天流不息。
朝野盛文物，衣冠何翕赭。厩马散连山，军容威绝域。
伊皋运元化，卫霍输筋力。歌钟乐未休，荣去老还逼。
圆光过满缺，太阳移中昃。不散东海金，何争西辉匿。
无作牛山悲，恻怆泪沾臆。

· 全唐诗 ·

卷 24_8【杂曲歌辞·君子有所思行】

僧贯休

我爱正考甫，思贤作商颂。我爱扬子云，理乱皆如凤。
振衣中夜起，露花香旖旎。扑碎骊龙明月珠，
敲出凤凰五色髓。陋巷萧萧风淅淅，缅想斯人胜珪璧。
寂寥千载不相逢，无限区区尽虚掷。君不见沉约道，
佳人不在兹，春光为谁惜。

安得龙猛笔，点石为黄金。散问酷吏家，使无贪残心。
甘棠密叶成翠幄，颍凤不来天地塞。所以倾城人，
如今不可得。

卷 24_9【杂曲歌辞·伤歌行】

张籍

黄门诏下促收捕，京兆君系御史府。出门无复部曲随，
亲戚相逢不容语。辞成谪尉南海州，受命不得须臾留。
身着青衫骑恶马，东门之东无送者。邮夫防吏急喧驱，
往往惊堕马蹄下。长安里中荒大宅，朱门已除十二戟。
高堂舞榭锁管弦，美人遥望西南天。

· 全唐诗 ·

卷 24_10【杂曲歌辞·伤歌行】

孟郊

众毒蔓贞松，一枝难久荣。岂知黄庭客，仙骨生不成。
春色舍芳蕙，秋风绕枯茎。弹琴不成曲，始觉知音倾。
馆月改旧照，吊宾写馀情。还舟空江上，波浪送铭旌。

卷 24_11【杂曲歌辞·伤歌行】

庄南杰

兔走乌飞不相见，人事依稀速如电。王母天桃一度开，
玉楼红粉千回变。车驰马走咸阳道，石家旧宅空荒草。
秋雨无情不惜花，芙蓉一一惊香倒。劝君莫谩栽荆棘，
秦皇虚费驱山力。英风一去更无言，白骨沉埋暮山碧。

卷 24_12【杂曲歌辞·悲歌】

李白

悲来乎，悲来乎，主人有酒且莫斟，听我一曲悲来吟。
悲来不吟还不笑，天下无人知我心。君有数斗酒，
我有三尺琴。琴鸣酒乐两相得，一杯不啻千钧金。

· 全唐诗 ·

悲来乎，悲来乎，天虽长，地虽久，金玉满堂应不守。
富贵百年能几何，死生一度人皆有。孤猿坐啼坟上月，
且须一尽杯中酒。悲来乎，悲来乎，凤鸟不至河无图，
微子去之箕子奴。汉帝不忆李将军，楚王放却屈大夫。
悲来乎，悲来乎，秦家李斯早追悔，虚名拨向身之外。
范子何曾爱五湖，功成名遂身自退。剑是一夫用，
书能知姓名。惠施不肯干万乘，卜式未必穷一经。
还须黑头取方伯，莫谩白首为儒生。

卷 24_13【杂曲歌辞·悲哉行】

孟云卿

孤儿去慈亲，远客丧主人。莫吟苦辛曲，谁忍闻可闻。
可闻不可说，去去无期别。行人念前程，不待参辰没。
朝亦常苦饥，暮亦常苦饥。飘飘万馀里，贫贱多是非。
少年莫远游，远游多不归。

卷 24_14【杂曲歌辞·悲哉行】

白居易

悲哉为儒者，力学不能疲。读书眼欲暗，秉笔手生胝。
十上方一第，成名常苦迟。纵有宦达者，两鬓已成丝。
可怜少壮日，适在穷贱时。丈夫老且病，焉用富贵为。

· 全唐诗 ·

沉沉朱门宅，中有乳臭儿。状貌如妇人，光明膏粱肌。
手不把书卷，身不擐戎衣。二十袭封爵，门承勋戚资。
春来日日出，服御何轻肥。朝从博徒饮，暮有倡楼期。
评封还酒债，堆金选蛾眉。声色狗马外，其馀一无知。
山苗与涧松，地势随高卑。古来无奈何，非君独伤悲。

卷 24_15【杂曲歌辞·悲哉行】

鲍溶

促促晨复昏，死生同一源。贵年不惧老，贱老伤久存。
朗朗哭前歌，绛旌引幽魂。来为千金子，去卧百草根。
黄土塞生路，悲风送回辕。金鞍旧良马，四顾不出门。
生结千岁念，荣及百代孙。黄金买性命，白刃仇一言。
宁知北山上，松柏侵田园。

卷 24_16【杂曲歌辞·妾薄命】

崔国辅

虽入秦帝宫，不上秦帝床。夜夜玉窗里，与他卷罗裳。

· 全唐诗 ·

卷 24_17【杂曲歌辞·妾薄命】

武平一

有女妖且丽，裴回湘水湄。水湄兰杜芳，采之将寄谁。
瓠犀发皓齿，双蛾颦翠眉。红脸如开莲，素肤若凝脂。
绰约多逸态，轻盈不自持。常矜绝代色，复恃倾城姿。
子夫前入侍，飞燕复当时。正悦掌中舞，宁哀团扇诗。
洛川昔云遇，高唐今尚违。幽阁禽雀噪，闲阶草露滋。
流景一何速，年华不可追。解佩安所赠，怨咽空自悲。

卷 24_18【杂曲歌辞·妾薄命】

李百药

团扇秋风起，长门夜月明。羞闻拊背入，恨说舞腰轻。
太常应已醉，刘君恒带醒。横陈每虚设，吉梦竟何成。

卷 24_19【杂曲歌辞·妾薄命】

杜审言

草绿长门闭，苔青永巷幽。宠移新爱夺，泣下故情留。
啼鸟惊残梦，飞花搅独愁。自怜春色罢，团扇复迎秋。

· 全唐诗 ·

卷 24_20【杂曲歌辞·妾薄命】

刘元淑

自从离别守空闺，遥闻征战起云梯。夜夜愁君辽海外，
年年弃妾渭桥西。阳春白日照空暖，紫燕衔花向庭满。
彩鸾琴里怨声多，飞鹊镜前妆梳断。谁家夫婿不从征，
应是渔阳别有情。莫道红颜燕地少，家家还似洛阳城。
且逐新人殊未归，还令秋至夜霜飞。北斗星前横度雁，
南楼月下捣寒衣。夜深闻雁肠欲绝，独坐缝衣灯又灭。
暗啼罗帐空自怜，梦度阳关向谁说。每怜容貌宛如神，
如何薄命不胜人。愿君朝夕燕山至，好作明年杨柳春。

卷 24_21【杂曲歌辞·妾薄命】

李白

汉帝重阿娇，贮之黄金屋。咳唾落九天，随风生珠玉。
宠极爱还歇，妒深情却疏。长门一步地，不肯暂回车。
雨落不上天，水覆难再收。君情与妾意，各自东西流。
昔日芙蓉花，今成断根草。以色事他人，能得几时好。

· 全唐诗 ·

卷 24_22【杂曲歌辞·妾薄命】

孟郊

不惜十指弦，为君千万弹。常恐新声至，坐使故声残。
弃置今日悲，即是昨日欢。将新变故易，持故为新难。
青山有蘼芜，泪叶长不干。空令后代人，采掇幽思攒。

卷 24_23【杂曲歌辞·妾薄命】

张籍

薄命妇，良家子，无事从军去万里。汉家天子平四夷，
护羌都尉裹尸归。念君此行为死别，对君裁缝泉下衣。
与君一日为夫妇，千年万岁亦相守。君爱龙城征战功，
妾愿青楼欢乐同。人生各各有所欲，讵得将心入君腹。

卷 24_24【杂曲歌辞·妾薄命三首】

李端

忆妾初嫁君，花鬟如绿云。回灯入绮帐，对面脱罗裙。
折步教人学，偷香与客熏。容颜南国重，名字北方闻。
一从失恩意，转觉身憔悴。对镜不梳头，倚窗空落泪。

· 全唐诗 ·

新人莫恃新，秋至会无春。从来闭在长门者，
必是宫中第一人。

玉垒城边争走马，铜蹄市里共乘舟。鸣环动佩思无尽，
掩袖低巾泪不流。畴昔将歌邀客醉，如今欲舞对君羞。
忍怀贱妾平生曲，独上襄阳旧酒楼。
自从君弃妾，憔悴不羞人。惟馀坏粉泪，未免映衫匀。

卷 24_25【杂曲歌辞·妾薄命】

卢纶

妾年初二八，两度嫁狂夫。薄命今犹在，坚贞扫地无。

卷 24_26【杂曲歌辞·妾薄命】

卢弼

君恩已断尽成空，追想娇欢恨莫穷。长为蕤华光晓日，
谁知团扇送秋风。黄金买赋心徒切，清路飞尘信莫通。
闲凭玉栏思旧事，几回春暮泣残红。

· 全唐诗 ·

卷 24_27【杂曲歌辞·妾薄命】

胡曾

阿娇初失汉皇恩，旧赐罗衣亦罢熏。欹枕夜悲金屋雨，
卷帘朝泣玉楼云。宫前叶落鸳鸯瓦，架上尘生翡翠裙。
龙骑不巡时渐久，长门长掩绿苔文。

卷 24_28【杂曲歌辞·妾薄命】

王贞白

薄命头欲白，频年嫁不成。秦娥未十五，昨夜事公卿。
岂有机杼力，空传歌舞名。妾专修妇德，媒氏却相轻。

卷 24_29【杂曲歌辞·羽林行】

王建

长安恶少出名字，楼下劫商楼上醉。天明下直明光宫，
散入五陵松柏中。百回杀人身合死，赦书尚有收城功。
九衢一日消息定，乡吏籍中重改姓。出来依旧属羽林，
立在殿前射飞禽。

· 全唐诗 ·

卷 24_30【杂曲歌辞·羽林行】

孟郊

朔雪寒断指，朔风劲裂冰。胡中射雕者，此日犹不能。
翩翩羽林儿，锦臂飞苍鹰。挥鞭决白马，走出黄河凌。

卷 24_31【杂曲歌辞·羽林行】

鲍溶

朝出羽林宫，入参云台议。独请万里行，不奏和亲事。
君王重年少，深纳开边利。宝马雕玉鞍，一朝从万骑。
煌煌都门外，祖帐光七贵。歌钟乐行军，云物惨别地。
箫笳整部曲，幢盖动郊次。临风亲戚怀，满袖儿女泪。
行行复何赠，长剑报恩字。

卷 24_32【杂曲歌辞·白马篇】

李白

龙马花雪毛，金鞍五陵豪。秋霜切玉剑，落日明珠袍。
斗鸡事万乘，轩盖一何高。弓摧宜山虎，手接泰山猱。
酒后竞风采，三杯弄宝刀。杀人如翦草，剧孟同游遨。

· 全唐诗 ·

发愤去函谷，从军向临洮。叱咤万战场，匈奴尽波涛。
归来使酒气，未肯拜萧曹。羞入原宪室，荒径隐蓬蒿。

卷 24_33【杂曲歌辞·升天行】

僧齐己

身不沉，骨不重。驱青鸾，驾白凤。幢盖飘飘入冷空，
天风瑟瑟星河动。瑶阙参差阿母家，楼台戏闭凝彤霞。
五三仙子乘龙车，堂前碾烂蟠桃花。回头却顾蓬山顶，
一点浓岚在深井。

卷 24_34【杂曲歌辞·神仙曲】

李贺

碧峰海面藏灵书，上帝拣作神仙居。晴时笑语闻空虚，
斗乘巨浪骑鲸鱼。春罗翦字邀王母，共宴红楼最深处。
鹤羽冲风过海迟，不如却使青龙去。犹疑王母不相许，
垂露娃鬟更传语。

· 全唐诗 ·

卷 24_35【杂曲歌辞·北风行】

李白

烛龙栖寒门，光曜犹旦开。日月照之何不及此，
惟有北风怒号天上来。燕山雪花大如席，
片片吹落轩辕台。幽州思妇十二月，停歌罢笑双蛾摧。
倚门望行人，念君长城苦寒良可哀。别时提剑救边去，
遗此虎文金鞬钗。中有一双白羽箭，蜘蛛结网生尘埃。
箭空在，人今战死不复回。不忍见此物，焚之已成灰。
黄河捧土尚可塞，北风雨雪恨难裁。

卷 24_36【杂曲歌辞·苦热行】

王维

赤日满天地，火云成山岳。草木尽焦卷，川泽皆竭涸。
轻纨觉衣重，密树苦阴薄。莞簟不可近，絺绤再三濯。
思出宇宙外，旷然在寥廓。长风万里来，江海荡烦浊。
却顾身为患，始知心未觉。忽入甘露门，宛然清凉乐。

· 全唐诗 ·

卷 24_37【杂曲歌辞·苦热行】

王毂

祝融南来鞭火龙，火旗焰焰烧天红。日轮当午凝不去，
万国如在洪炉中。五岳翠干云彩灭，阳侯海底愁波竭。
何当一夕金风发，为我扫却天下热。

卷 24_38【杂曲歌辞·苦热行】

僧皎然

六月金数伏，兹辰日在庚。炎曦曝肌肤，毒雾昏檐楹。
安得奋翅翮，超遥出云征。不知天地心，如何匠生成。
火德烧百卉，瑶草不及荣。省客当此时，忽贻怀中琼。
捧玩烦袂涤，啸歌美风生。迟君佐元气，调使四序平。
中令霜不祆，火馥气常贞。江南诗骚客，休吟苦热行。

卷 24_39【杂曲歌辞·苦热行】

僧齐己

离宫划开赤帝怒，喝起六龙奔日驭。下土熬熬若煎煮，
苍生惶惶无处处。火云峥嵘焚沍寥，东皋老农肠欲焦。

· 全唐诗 ·

何当一雨苏我苗，为君击壤歌帝尧。

卷 24_40【杂曲歌辞·太行苦热行】

刘长卿

迢迢太行路，自古称险恶。千骑俨欲前，群峰望如削。
火云从中起，仰视飞鸟落。汗马卧高原，危旌倚长薄。
清风何不至，赤日方煎烁。石露山木焦，鳞穷水泉涸。
九重今旰食，万里传明略。诸将候轩车，元凶愁鼎镬。
何劳短兵接，自有长缨缚。通越事岂难，渡泸功未博。
朝辞羊肠坂，夕望贝丘郭。漳水斜绕营，常山遥入幕。
永怀姑苏下，因寄建安作。白雪和诚难，沧波意空托。
陈琳书记好，王粲从军乐。早晚归汉庭，随君上麟阁。

卷 24_41【杂曲歌辞·太行苦热行】

独孤及

驰马上太行，修途亘辽碣。王程无留驾，日昃未遑歇。
请问此何时，恢台朱明月。长蛇稽天讨，上将方北伐。
明主命使臣，皇华得时杰。已忘羊肠险，岂惮温风入。
摇策汗滂沱，登崖思纡结。炎云如烟火，溪谷将恐竭。
昼景赭可畏，凉飙何由发。山长飞鸟堕，目极行车绝。
赵魏方俶扰，安危俟明哲。归路岂不怀，饮冰有苦节。

· 全唐诗 ·

会同传檄至，疑议立谈决。况有阮元瑜，翩翩秉书札。
起予歌赤坂，永好逾白雪。维念剖竹人，无因执羁绁。

卷 24_42【杂曲歌辞·春日行】

李白

深宫高楼入紫清，金作蛟龙盘绣楹。佳人当窗弄白日，
弦将手语弹鸣箏。春风吹落君王耳，此曲乃是升天行。
因出天池泛蓬瀛，楼船蹙沓波浪惊。三千双蛾献歌笑，
挝钟考鼓宫殿倾，万姓聚舞歌太平。我无为，人自宁。
三十六帝欲相迎，仙人飘翩下云軿。帝不去，留镐京。
安能为轩辕，独往入窅冥。小臣拜献南山寿，
陛下万古垂鸿名。

卷 24_43【杂曲歌辞·春日行】

张籍

春日融融池上暖，竹牙出土兰心短。草堂晨起酒半醒，
家童报我园花满。头上皮冠未曾整，直入花间不寻径。
树树殷勤尽绕行，举枝未遍春日暝。不用积金着青天，
不用服药求神仙。但愿园里花长好，一生饮酒花前老。

· 全唐诗 ·

卷 24_44【杂曲歌辞·朗月行】

李白

小时不识月，呼作白玉盘。又疑瑶台镜，飞在青云端。
仙人垂两足，桂树作团团。白兔捣药成，问言与谁餐。
蟾蜍蚀圆影，天明夜已残。羿昔落九乌，天人清且安。
阴精此沦惑，去去不足观。忧来其如何，惻怆摧心肝。

卷 24_45【杂曲歌辞·前有一尊酒行二首】

李白

春风东来忽相过，金尊绿酒生微波。落花纷纷稍觉多，
美人欲醉朱颜酡。青轩桃李能几何，流光欺人忽蹉跎。
君起舞，日西夕，当年意气不肯倾，白发如丝叹何益。

琴奏龙门之绿桐，玉壶美酒清若空。催弦拂柱与君饮，
看朱成碧颜始红。胡姬貌如花，当炉笑春风。笑春风，
舞罗衣，君今不醉欲安归。

· 全唐诗 ·

卷 24_46【杂曲歌辞·缓歌行】

李颀

小来托身攀贵游，倾财破产无所忧。暮拟经过石渠署，
朝将出入铜龙楼。结交杜陵轻薄子，谓言可生复可死。
一沉一浮会有时，弃我翻然如脱屣。男儿立身须自强，
十五闭户颍水阳。业就功成见明主，击钟鼎食坐华堂。
二八蛾眉梳堕马，美酒清歌曲房下。文昌宫中赐锦衣，
长安陌上退朝归。五侯宾从莫敢视，三省官僚揖者稀。
早知今日读书是，悔作从来任侠非。

卷 24_47【杂曲歌辞·结客少年场行】

虞世南

韩魏多奇节，倜傥遗名利。共矜然诺心，各负纵横志。
结友一言重，相思千里至。绿沈明月弦，金络浮云辔。
吹箫入吴市，击筑游燕肆。寻源博望侯，结客远相求。
少年重一顾，长驱背陇头。焰焰霜戈动，耿耿剑虹浮。
天山冬夏雪，交河南北流。云起龙沙暗，木落雁行秋。
轻生殉知己，非是为身谋。

· 全唐诗 ·

卷 24_48【杂曲歌辞·结客少年场行】

虞羽客

幽并侠少年，金络控连钱。窃符方救赵，击筑正怀燕。
轻生辞凤阙，挥袂上祁连。陆离横宝剑，出没惊徂旃。
蒙轮恒顾敌，超乘忽争先。摧枯逾百战，拓地远三千。
骨都魂已散，楼兰首复传。龙城含晓雾，瀚海隔遥天。
歌吹金微返，振旅玉门旋。烽火今已息，非复照甘泉。

卷 24_49【杂曲歌辞·结客少年场行】

卢照邻

长安重游侠，洛阳富才雄。玉剑浮云骑，金鞍明月弓。
斗鸡过渭北，走马向关东。孙宾遥见待，郭解暗相通。
不受千金爵，谁论万里功。将军下天上，虏骑入云中。
烽火夜似月，兵气晓成虹。横行徇知己，负羽远从戎。
龙旌昏朔雾，鸟阵卷寒风。追奔瀚海咽，战罢阴山空。
归来谢天子，何如马上翁。

· 全唐诗 ·

卷 24_50【杂曲歌辞·结客少年场行】

李白

紫燕黄金瞳，啾啾摇绿鬃。平明相驰逐，结客洛门东。
少年学剑术，凌轹白猿公。珠袍曳锦带，匕首插吴鸿。
由来万夫勇，挟此生雄风。托交从剧孟，买醉入新丰。
笑尽一杯酒，杀人都市中。羞道易水寒，从令日贯虹。
燕丹事不立，虚没秦帝宫。舞阳死灰人，安可与成功。

卷 24_51【杂曲歌辞·结客少年场行】

沉彬

重义轻生一剑知，白虹贯日报仇归。
片心惆怅清平世，酒市无人问布衣。

卷 24_52【杂曲歌辞·少年子】

李百药

少年飞翠盖，上路动金镳。始酌文君酒，新吹弄玉箫。
少年不欢乐，何以尽芳朝。千金笑里面，一搦抱中腰。
挂冠岂惮宿，迎拜不胜娇。寄语少年子，无辞归路遥。

· 全唐诗 ·

卷 24_53【杂曲歌辞·少年子】

李白

青云少年子，挟弹章台左。鞍马四边开，突如流星过。
金丸落飞鸟，夜入琼楼卧。夷齐是何人，独守西山饿。

卷 24_54【杂曲歌辞·少年乐】

李贺

芳草落花如锦地，二十长游醉乡里。红缨不重白马骄，
垂柳金丝香拂水。吴娥未笑花不开，绿鬓耸堕兰云起。
陆郎倚醉牵罗袂，夺得宝钗金翡翠。

卷 24_55【杂曲歌辞·少年乐】

张祜

二十便封侯，名居第一流。绿鬟深小院，清管下高楼。
醉把金船掷，闲敲玉铎游。带盘红鸂鶒，袍砑紫犀牛。
锦袋归调箭，罗鞋起拨球。眼前长贵盛，那信世间愁。

· 全唐诗 ·

卷 24_56【杂曲歌辞·少年行三首】

李白

击筑饮美酒，剑歌易水湄。经过燕太子，结托并州儿。
少年负壮气，奋烈自有时。因声鲁句践，争情勿相欺。

五陵年少金市东，银鞍白马度春风。
落花踏尽游何处，笑入胡姬酒肆中。

君不见淮南少年游侠客，白日球猎夜拥掷。
呼卢百万终不惜，报仇千里如咫尺。少年游侠好经过，
浑身装束皆绮罗。兰蕙相随喧妓女，风光去处满笙歌。
骄矜自言不可有，侠士堂中养来久。好鞍好马乞与人，
十千五千旋沽酒。赤心用尽为知己，黄金不惜栽桃李。
桃李栽来几度春，一回花落一回新。府县尽为门下客，
王侯皆是平交人。男儿百年且乐命，何须徇书受贫病。
男儿百年且荣身，何须徇节甘风尘。衣冠半是征战士，
穷儒浪作林泉民。遮莫枝根长百丈，不如当代多还往。
遮莫姻亲连帝城，不如当身自簪纓。看取富贵眼前者，
何用悠悠身后名。

· 全唐诗 ·

卷 24_57【杂曲歌辞·少年行四首】

王维

新丰美酒斗十千，咸阳游侠多少年。
相逢意气为君饮，系马高楼垂柳边。

汉家君臣欢宴终，高议云台论战功。
天子临轩赐侯印，将军佩出明光宫。

出身仕汉羽林郎，初随骠骑战渔阳。
孰知不向边庭苦，纵死犹闻侠骨香。

一身能臂两雕弧，虏骑千群只似无。
偏坐金鞍调白羽，纷纷射杀五单于。

卷 24_58【杂曲歌辞·少年行二首】

王昌龄

西陵侠年少，送客过长亭。青槐夹两路，白马如流星。
闻道羽书急，单于寇井陉。气高轻赴难，谁顾燕山铭。

走马还相寻，西楼下夕阴。结交期一剑，留意赠千金。
高阁歌声远，重关柳色深。夜闲须尽醉，莫负百年心。

· 全唐诗 ·

卷 24_59【杂曲歌辞·少年行】

张籍

少年从出猎长杨，禁中新拜羽林郎。独到辇前射双虎，
君王手赐黄金铛。日日斗鸡都市里，赢得宝刀重刻字。
百里报仇夜出城，平明还在倡楼醉。遥闻虏到平陵下，
不待诏书行上马。斩得名王献桂宫，封侯起第一日中。
不为六郡良家子，百战始取边城功。

卷 24_60【杂曲歌辞·少年行三首】

李嶷

十八羽林郎，戎衣事汉王。臂鹰金殿侧，挟弹玉舆旁。
驰道春风起，陪游出建章。

侍猎长杨下，承恩更射飞。尘生马影灭，箭落雁行稀。
薄暮归随仗，联翩入琐闱。

玉剑膝边横，金杯马上倾。朝游茂陵道，暮宿凤凰城。
豪吏多猜忌，无劳问姓名。

· 全唐诗 ·

卷 24_61【杂曲歌辞·少年行】

刘长卿

射飞夸侍猎，行乐爱联镳。荐枕青娥艳，鸣鞭白马骄。
曲房珠翠合，深巷管弦调。日晚春风里，衣香满路飘。

卷 24_62【杂曲歌辞·少年行四首】

令狐楚

少小边州惯放狂，骝骑蕃马射黄羊。
如今年事无筋力，犹倚营门数雁行。

家本清河住五城，须凭弓箭得功名。
等闲飞鞚秋原上，独向寒云试射声。

弓背霞明剑照霜，秋风走马出咸阳。
未收天子河湟地，不拟回头望故乡。

霜满中庭月过楼，金尊玉柱对清秋。
当年称意须为乐，不到天明未肯休。

· 全唐诗 ·

卷 24_63【杂曲歌辞·少年行二首】

杜牧

官为骏马监，职帅羽林儿。两绶藏不见，落花何处期。
猎敲白玉镫，怒袖紫金锤。田窦长留醉，苏辛曲护岐。
豪持出塞节，笑别远山眉。捷报云台贺，公卿拜寿卮。

连环羈玉声光碎，绿锦蔽泥虬卷高。
春风细雨走马去，珠落璀璀白罽袍。

卷 24_64【杂曲歌辞·少年行三首】

杜甫

莫笑田家老瓦盆，自从盛酒长儿孙。
倾银注瓦惊人眼，共醉终同卧竹根。

巢燕养雏浑去尽，红花结子已无多。
黄衫年少来宜数，不见堂前东逝波。

马上谁家白面郎，临阶下马坐人床。
不通姓字粗豪甚，指点银瓶索酒尝。

· 全唐诗 ·

卷 24_65【杂曲歌辞·少年行】

张祜

少年足风情，垂鞭卖眼行。带金师子小，裘锦骐驎狞。
选匠装金镫，推钱买钿筝。李陵虽效死，时论得虚名。

卷 24_66【杂曲歌辞·少年行】

韩翃

千点斓斒喷玉骢，青丝结尾绣缠骝。
鸣鞭晚出章台路，叶叶春依杨柳风。

卷 24_67【杂曲歌辞·少年行】

施肩吾

醉骑白马走空衢，恶少皆称电不如。
五凤街头闲勒辔，半垂衫袖揖金吾。

· 全唐诗 ·

卷 24_68【杂曲歌辞·少年行三首】

僧贯休

锦衣鲜华手擎鹘，闲行气貌多轻忽。
稼穡艰难总不知，五帝三皇是何物。

自拳五色球，进入他人宅。却捉苍头奴，玉鞭打一百。

面白如削玉，猖狂曲江曲。马上黄金鞍，适来新赌得。

卷 24_69【杂曲歌辞·少年行】

韦庄

五陵豪客多，买酒黄金贱。醉下酒家楼，美人双翠幃。
挥剑邯郸市，走马梁王苑。乐事殊未央，年华已云晚。

卷 24_70【杂曲歌辞·汉宫少年行】

李益

君不见上宫警夜营八屯，冬冬街鼓朝朱轩。
玉阶霜仗拥未合，少年排入铜龙门。暗闻弦管九天上，

· 全唐诗 ·

宫漏沉沉清吹繁。才明走马绝驰道，呼鹰挟弹通缭垣。
玉笼金琐养黄口，探雏取卵伴王孙。分曹六博快一掷，
迎宾先意笑语喧。巧为柔媚学优孟，儒衣嬉戏冠沐猿。
晚来香街经柳市，行过倡市宿桃根。相逢杯酒一言失，
回朱点白闻至尊。金张许史伺颜色，王侯将相莫敢论。
岂知人事无定势，朝欢暮戚如掌翻。椒房宠移子爱夺，
一夕秋风生戾园。徒用黄金将买赋，宁知白玉暗成痕。
持杯收水水已覆，徙薪避火火更燔。欲求四老张丞相，
南山如天不可上。

卷 24_71【杂曲歌辞·长乐少年行】

崔国辅

遗却珊瑚鞭，白马骄不行。章台折杨柳，春草路旁情。

卷 24_72【杂曲歌辞·长安少年行十首】

李廓

金紫少年郎，绕街鞍马光。身从左中尉，官属右春坊。
划戴扬州帽，重熏异国香。垂鞭踏青草，来去杏园芳。

追逐轻薄伴，闲游不着绯。长拢出猎马，数换打球衣。
晓日寻花去，春风带酒归。青楼无昼夜，歌舞歇时稀。

· 全唐诗 ·

日高春睡足，帖马赏年华。倒插银鱼袋，行随金犊车。
还携新市酒，远醉曲江花。几度归侵黑，金吾送到家。

好胜耽长行，天明烛满楼。留人看独脚，赌马换偏头。
乐奏曾无歇，杯巡不暂休。时时遥冷笑，怪客有春愁。

遨游携艳妓，装束似男儿。杯酒逢花住，笙歌簇马吹。
莺声催曲急，春色讶归迟。不以闻街鼓，华筵待月移。

赏春惟逐胜，大宅可曾归。不乐还逃席，多狂惯衩衣。
歌人踏月起，语燕卷帘飞。好妇惟相妒，倡楼不醉稀。

戟门连日闭，苦饮惜残春。开琐通新客，教姬屈醉人。
请歌牵白马，自舞蹈红茵。时辈皆相许，平生不负身。

新年高殿上，始见有光辉。玉雁排方带，金鹅立仗衣。
酒深和碗赐，马疾打珂飞。朝下人争看，香街意气归。

游市慵骑马，随姬入坐车。楼边听歌吹，帘外市钗花。
乐眼从人闹，归心畏日斜。苍头来去报，饮伴到倡家。

小妇教鹦鹉，头边唤醉醒。犬娇眠玉簟，鹰掣撼金铃。
碧地攒花障，红泥待客亭。虽然长按曲，不饮不曾听。

· 全唐诗 ·

卷 24_73【杂曲歌辞·长安少年行】

僧皎然

翠楼春酒虾蟆陵，长安少年皆共矜。
纷纷半醉绿槐道，蹀躞花骢骄不胜。

卷 24_74【杂曲歌辞·渭城少年行】

崔颢

洛阳二月梨花飞，秦地行人春忆归。扬鞭走马城南陌，
朝逢驿使秦川客。驿使前日发章台，传道长安春早来。
棠梨宫中燕初至，葡萄馆里花正开。念此使人归更早，
三月便达长安道。长安道上春可怜，摇风荡日曲河边。
万户楼台临渭水，五陵花柳满秦川。秦川寒食盛繁华，
游子春来喜见花。斗鸡下杜尘初合，走马章台日半斜。
章台帝城称贵里，青楼日晚歌钟起。贵里豪家白马骄，
五陵年少不相饶。双双挟弹来金市，两两鸣鞭上渭桥。
渭城桥头酒新熟，金鞍白马谁家宿。可怜锦瑟筝琵琶，
玉台清酒就君家。小妇春来不解羞，娇歌一曲杨柳花。

· 全唐诗 ·

卷 24_75【杂曲歌辞·邯郸少年行】

高适适

邯郸城南游侠子，自矜生长邯郸里。千场纵博家仍富，
几度报仇身不死。宅中歌笑日纷纷，门外车马如云屯。
未知肝胆向谁是，令人却忆平原君。君不见今人交态薄，
黄金用尽还疏索。以兹感激辞旧游，更于时事无所求。
且与少年饮美酒，往来射猎西山头。

卷 24_76【杂曲歌辞·邯郸少年行】

郑锡

霞鞍金口骝，豹袖紫貂裘。家住丛台下，门前漳水流。
唤人呈楚舞，借客试吴钩。见说秦兵至，甘心赴国仇。

· 全唐诗 ·

第二十五卷

卷 25_1【杂曲歌辞·轻薄篇】

李益

豪不必驰千骑，雄不在垂双鞬。天生俊气自相逐，
出与雕鹗同飞翻。朝行九衢不得意，下鞭走马城西原。
忽闻燕雁一声去，回鞭挟弹平陵园。归来青楼曲未半，
美人玉色当金尊。淮阴少年不相下，酒酣半笑倚市门。
安知我有不平色，白日欲顾红尘昏。死生容易如反掌，
得意失意由一言。少年但饮莫相问，此中报仇亦报恩。

卷 25_2【杂曲歌辞·轻薄篇二首】

僧贯休

绣林锦野，春态相压。谁家少年，马蹄蹋蹋。
斗鸡走狗夜不归，一掷赌却如花妾。惟云不颠不狂，
其名不彰，悲夫！

木落萧萧，蛩鸣唧唧。不觉朱萸脸红，霜劫鬓漆。

· 全唐诗 ·

世途多事，泣向秋日。方吟少壮不努力，老大徒伤悲，
如何？

卷 25_3【杂曲歌辞·轻薄行】

僧齐己

玉鞭金镫骅骝蹄，横眉吐气如虹霓。五陵春暖芳草齐，
笙歌到处花成泥。日沉月上且斗鸡，醉来莫问天高低。
伯阳道德何涕唾，仲尼礼乐徒卑栖。

卷 25_4【杂曲歌辞·灞上轻薄行】

孟郊

长安无缓步，况值天景暮。相逢灞浐间，亲戚不相顾。
自叹方拙身，忽随轻薄伦。常恐失所避，化为车辙尘。
此中生白发，疾走亦未歇。

卷 25_5【杂曲歌辞·游侠篇】

崔颢

少年负胆气，好勇复知机。仗剑出门去，孤城逢合围。

· 全唐诗 ·

杀人辽水上，走马渔阳归。错落金锁甲，蒙茸貂鼠衣。
还家行且猎，弓矢速如飞。地迴鹰犬疾，草深狐兔肥。
腰间悬两绶，转眄生光辉。顾谓今日战，何如随建威。

卷 25_6【杂曲歌辞·游侠行】

孟郊

壮士性刚决，火中见石裂。杀人不回头，轻生如暂别。
岂知眼有泪，肯白头上发。平生无恩酬，剑闲一百月。

卷 25_7【杂曲歌辞·侠客行】

李白

赵客缦胡缨，吴钩霜雪明。银鞍照白马，飒沓如流星。
十步杀一人，千里不留行。事了拂衣去，深藏身与名。
闲过信陵饮，脱剑膝前横。将炙啖朱亥，持觞劝侯嬴。
三杯吐然诺，五岳倒为轻。眼花耳热后，意气素霓生。
救赵挥金槌，邯郸先震惊。千秋二壮士，烜赫大梁城。
纵死侠骨香，不惭世上英。谁能书阁下，白首太玄经。

· 全唐诗 ·

卷 25_8【杂曲歌辞·侠客行】

元稹

侠客不怕死，怕在事不成。事成不肯藏姓名，
我非窃贼谁夜行。白日堂堂杀袁盎，九衢草草人面青。
此客此心师海鲸，海鲸露背横沧溟。海滨分作两处生，
海鲸分海减海力。侠客有谋人不测，三尺铁蛇延二国。

卷 25_9【杂曲歌辞·侠客行】

温庭筠

欲出鸿都门，阴云蔽城阙。宝剑黯如水，微红湿馀血。
白马夜频嘶，三更霸陵雪。

卷 25_10【杂曲歌辞·行行游且猎篇】

李白

边城儿，生年不读一字书，但知游猎夸轻趫。
胡马秋肥宜白草，骑来蹑影何矜骄。金鞭拂云挥鸣鞘，
半酣呼鹰出远郊。弓弯满月不虚发，双鸽迸落连飞髀。
海边观者皆辟易，猛气英风振沙碛。儒生不及游侠人，

· 全唐诗 ·

白首下帷复何益。

卷 25_11【杂曲歌辞·游子吟】

孟郊

慈母手中线，游子身上衣。临行密密缝，意恐迟迟归。
谁言寸草心，报得三春晖。

卷 25_12【杂曲歌辞·游子吟】

顾况

故枥思疲马，故巢思迷禽。浮云蔽我乡，踟躅游子吟。
游子悲久滞，浮云郁东岑。客堂无丝桐，落叶如秋霖。
艰哉远游子，所以悲滞淫。一为浮云词，愤塞谁能禁。
驰晖百年内，惟愿展所钦。胡为不归欤，坐使年病侵。
未老霜绕鬓，非狂火烧心。太行何艰哉，北斗不可斟。
夜晴星河出，耿耿辰与参。佳人冀青天，尺素重于金。
沉寥群动异，眇默诸境森。苔衣上闲阶，蜻蛚催寒砧。
立身计几误，道险无容针。三年不还家，万里遗锦衾。
梦魂无重阻，离忧因古今。胡为不归欤，孤负丘中琴。
腰下是何物，牵缠旷登寻。朝与名山期，夕宿楚水阴。
楚水殊演漾，名山杳岖嵚。客从洞庭来，婉变潇湘深。
橘柚在南国，鸿雁遗秋音。下有碧草洲，上有青橘林。

· 全唐诗 ·

引烛窥洞穴，凌波睥天琛。蒲荷影参差，凫鹤雏淋沔。
浩歌惜芳杜，散发轻华簪。胡为不归欤，泪下沾衣襟。
鸢飞戾霄汉，蝼蚁制螭鯨。赫赫大圣朝，日月光照临。
圣主虽启迪，奇人分堙沉。层城发云韶，玉府锵球琳。
鹿鸣志丰草，况复虞人箴。

卷 25_13【杂曲歌辞·游子吟】

李益

女羞夫婿荡，客耻主人贱。遭遇同众流，低回愧相见。
君非青铜镜，何事空照面。莫以衣上尘，不谓心如练。
人生当荣盛，待士勿言倦。君看白日驰，何异弦上箭。

卷 25_14【杂曲歌辞·壮士吟】

贾岛

壮士不曾悲，悲即无回期。如何易水上，未歌先泪垂。

卷 25_15【杂曲歌辞·壮士行】

刘禹锡

阴风振寒郊，猛虎正咆哮。徐行出烧地，连吼入黄茆。

· 全唐诗 ·

壮士走马去，镫前弯玉弭。叱之使人立，一发如铍交。
悍睛忽星坠，飞血溅林梢。彪炳为我席，膻腥充我庖。
里中欣害除，贺酒纷号呶。明日长桥上，倾城看斩蛟。

卷 25_16【杂曲歌辞·壮士行】

鲍溶

西方太白高，壮士羞病死。心知报恩处，对酒歌易水。
砂鸿噪天末，横剑别妻子。苏武执节归，班超束书起。
山河不足重，重在遇知己。

卷 25_17【杂曲歌辞·壮士行】

施肩吾

一斗之胆撑脏腑，如礞之筋碍臂骨。有时误入千人丛，
自觉一身横突兀。当今四海无烟尘，胸襟被压不得伸。
冻泉残蛰我不取，污我匣里青蛇鳞。

卷 25_18【杂曲歌辞·浩歌】

李贺

南风吹山作平地，帝遣天吴移海水。王母桃花千遍红，

· 全唐诗 ·

彭祖巫咸几回死。青毛骢马参差钱，娇春杨柳含细烟。
箏人劝我金屈卮，神血未凝身问谁。不须浪饮丁督护，
世上英雄本无主。买丝绣作平原君，有酒惟浇赵州土。
漏催水咽玉蟾蜍，卫娘发薄不胜梳。看见秋眉换深绿，
二十男儿那刺促。

卷 25_19【杂曲歌辞·浩歌行】

白居易

天长地久无终毕，昨夜今朝又明日。鬓发苍浪牙齿疏，
不觉身年四十七。前去五十有几年，把镜照面心茫然。
既无长绳系白日，又无大药驻朱颜。朱颜日渐不如故，
青史功名在何处。欲留年少待富贵，富贵不来年少去。
去复去兮如长河，东流赴海无回波。贤愚贵贱同归尽，
北邙冢墓高嵯峨。古来如此非独我，未死有酒且酣歌。
颜回短命伯夷饿，我今所得亦已多。功名富贵须待命，
命若不来知奈何。

卷 25_20【杂曲歌辞·归去来引】

张炽

归去来，归期不可违。相见故明月，浮云共我归。

· 全唐诗 ·

卷 25_21【杂曲歌辞·丽人曲】

崔国辅

红颜称绝代，欲并真无侣。独有镜中人，由来自相许。

卷 25_22【杂曲歌辞·丽人行】

杜甫

三月三日天气新，长安水边多丽人。态浓意远淑且真，
肌理细腻骨肉匀。绣罗衣裳照暮春，蹙金孔雀银麒麟。
头上何所有，翠微阖叶垂鬓唇。背后何所见，
珠压腰及稳称身。就中云幕椒房亲，赐名大国虢与秦。
紫驼之峰出翠釜，水晶之盘行素鳞。犀箸厌饫久未下，
鸾刀缕切空纷纶。黄门飞鞚不动尘，御厨丝络送八珍。
箫鼓哀吟感鬼神，宾从杂逐实要津。后来鞍马何逡巡，
当轩下马入锦茵。杨花雪落覆白蘋，青鸟飞去衔红巾。
炙手可热势绝伦，慎莫近前丞相嗔。

卷 25_23【杂曲歌辞·东飞伯劳歌】

张柬之

青田白鹤丹山凤，婺女姮娥两相送。谁家绝世绮帐前，

· 全唐诗 ·

艳粉芳脂映宝钿。窈窕玉堂褰翠幕，参差绣户悬珠箔。
绝世三五爱红妆，冶袖长裾兰麝香。春去花枝俄易改，
可叹年光不相待。

卷 25_24【杂曲歌辞·东飞伯劳歌】

李峤

传书青鸟迎箫凤，巫岭荆台数通梦。谁家窈窕住园楼，
五马千金照陌头。罗裙玉佩当轩出，点翠施红竞春日。
佳人二八盛舞歌，羞将百万呈双娥。庭前芳树朝夕改，
空驻妍华欲谁待。

卷 25_25【杂曲歌辞·东飞伯劳歌】

李暇

秦王龙剑燕后琴，珊瑚宝匣镂双心。谁家女儿抱香枕，
开衾灭烛愿侍寝。琼窗半上金缕帟，轻罗隐面不障羞。
青绮帟中坐相忆，红罗镜里见愁色。檐花照月莺对栖，
空将可怜暗中啼。

· 全唐诗 ·

卷 25_26【杂曲歌辞·鸣雁行】

李白

胡雁鸣，辞燕山，昨发委羽朝度关。一一衔芦枝，
南飞散落天地间，连行接翼往复还。客居烟波寄湘吴，
凌霜触雪毛体枯，畏逢矰缴惊相呼。闻弦虚坠良可吁，
君更弹射何为乎。

卷 25_27【杂曲歌辞·鸣雁行】

韩愈

嗷嗷鸣雁鸣且飞，穷秋南去春北归。去寒就暖识所处，
天长地阔栖息稀。风霜酸苦稻粱微，羽毛摧落身不肥。
徘徊反顾群侣违，哀鸣欲下洲渚非。江南水阔朝云多，
草长沙软无网罗，闲飞静集鸣相和。违忧怀息性匪他，
凌风一举君谓何。

卷 25_28【杂曲歌辞·鸣雁行】

鲍溶

七月朔方雁心苦，联影翻空落南土。八月江南阴复晴，

· 全唐诗 ·

浮云绕天难夜行。羽翼劳痛心虚惊，一声相呼百处鸣。
楚童夜宿烟波侧，沙上布罗连草色。月暗风悲欲下天，
不知何处容栖息。楚童胡为伤我神，尔不曾作远行人。
江南羽族本不少，宁得网罗此客鸟。

卷 25_29【杂曲歌辞·鸣雁行】

陆龟蒙

朔风动地来，吹起沙上声。闺中有边思，玉箸此时横。
莫怕儿女恨，主人烹不鸣。

卷 25_30【杂曲歌辞·空城雀】

李白

嗷嗷空城雀，身计何戚促。本与鹪鹩群，不随凤凰族。
提携四黄口，饮乳未尝足。食君糠粃馀，常恐乌鸢逐。
耻涉太行险，羞营覆车粟。天命有定端，守分绝所欲。

卷 25_31【杂曲歌辞·空城雀】

王建

空城雀，何不飞来人家住，空城无人种禾黍。

· 全唐诗 ·

土间生子草间长，满地蓬蒿幸无主。近村虽有高树枝，
雨中无食长苦饥。八月小儿挟弓箭，家家畏我田头飞。
但能不出空城里，秋时百草皆有子。黄口黄口莫啾啾，
长尔得成无横死。

卷 25_32【杂曲歌辞·空城雀】

聂夷中

一雀入官仓，所食能损几。所虑往损频，官仓乃害尔。
鱼网不在天，鸟网不在水。饮啄要自然，何必空城里。

卷 25_33【杂曲歌辞·空城雀】

刘驾

饥啄空城土，莫近太仓粟。一粒未充肠，却入公子腹。
且吊城上骨，几曾害尔族。不闻庄辛语，今日寒芜绿。

卷 25_34【杂曲歌辞·车遥遥】

孟郊

路喜到江尽，江上又通舟。舟车两无阻，何处不得游。

· 全唐诗 ·

丈夫四方志，女子安可留。郎自别日言，无令生远愁。
旅雁忽叫月，断猿寒啼秋。此夕梦君梦，君在百城楼。
寄泪无因波，寄恨无因辔。愿为驭者手，与郎回马头。

卷 25_35【杂曲歌辞·车遥遥】

张籍

征人遥遥出古城，双轮齐动驷马鸣。山川无处无归路，
念君长作万里行。野田人稀秋草绿，日暮放马车中宿。
惊鹿游兔在我傍，独唱乡歌对僮仆。君家大宅凤城隅，
年年道上随行车。愿为玉銮系华轼，终日有声在君侧。
门前旧辙久已平，无由复得君消息。

卷 25_36【杂曲歌辞·车遥遥】

张祜

东方眈眈车轧轧，地色不分新去辙。闺门半掩床半空，
斑斑枕花残泪红。君心若车千万转，妾身如辙遗渐远。
碧川迢迢山宛宛，马蹄在耳轮在眼。桑间女儿情不浅，
莫道野蚕能作茧。

· 全唐诗 ·

卷 25_37【杂曲歌辞·车遥遥】

胡曾

自从车马出门朝，便入空房守寂寥。玉枕夜残鱼信绝，
金钿秋尽雁书遥。脸边楚雨临风落，头上春云向日销。
芳草又衰还不至，碧天霜冷转无寥。

卷 25_38【杂曲歌辞·自君之出矣】

辛弘智

自君之出矣，梁尘静不飞。思君如满月，夜夜减容晖。

卷 25_39【杂曲歌辞·自君之出矣】

李康成

自君之出矣，弦吹绝无声。思君如百草，撩乱逐春生。

· 全唐诗 ·

卷 25_40【杂曲歌辞·自君之出矣】

卢仝

自君之出矣，壁上蜘蛛织。近取见妾心，夜夜无休息。
妾有双玉环，寄君表相忆。环是妾之心，玉是君之德。
驰情增悴容，蓄思损精力。玉簫寒凄凄，延想心恻恻。
风含霜月明，水泛碧天色。此水有尽时，此情无终极。

卷 25_41【杂曲歌辞·自君之出矣】

雍裕之

自君之出矣，宝镜为谁明。思君如陇水，长闻呜咽声。

卷 25_42【杂曲歌辞·自君之出矣】

张祜

自君之出矣，万物看成古。千寻葶苈枝，争奈长长苦。

· 全唐诗 ·

卷 25_41【杂曲歌辞·长相思】

郎大家宋氏

长相思，久离别。关山阻，风烟绝。
台上镜文销，袖中书字灭。不见君形影，何曾有欢悦。

卷 25_42【杂曲歌辞·长相思】

苏颋

君不见天津桥下东流水，东望龙门北朝市。
杨柳青青宛地垂，桃红李白花参差。花参差，柳堪结，
此时忆君心断绝。

卷 25_43【杂曲歌辞·长相思三首】

李白

长相思，在长安。络纬秋啼金井栏，微霜凄凄簟色寒。
孤灯不明思欲绝，卷帷望月空长叹，美人如花隔云端。
上有青冥之长天，下有绿水之波澜。天长路远魂飞苦，
梦魂不到关山难。长相思，摧心肝。

· 全唐诗 ·

日色已尽花含烟，月明欲素愁不眠。赵瑟初停凤凰柱，
蜀琴欲奏鸳鸯弦。此曲有意无人传，愿随春风寄燕然。
忆君迢迢隔青天，昔日横波目，今成流泪泉。
不信妾肠断，归来看取明镜前。

美人在时花满堂，美人去后花馀床。床中绣被卷不寝，
至今三载犹闻香。香亦竟不灭，人亦竟不来。
相思黄叶落，白露点青苔。

卷 25_44【杂曲歌辞·长相思】

张继

辽阳望河县，白首无由见。海上珊瑚枝，年年寄春燕。

卷 25_45【杂曲歌辞·长相思二首】

令狐楚

君行登陇上，妾梦在闺中。玉箸千行落，银床一半空。

绮席春眠觉，纱窗晓望迷。朦胧残梦里，犹自在辽西。

· 全唐诗 ·

卷 25_46【杂曲歌辞·长相思】

白居易

九月西风兴，月冷霜华凝。思君秋夜长，一夜魂九升。
二月东风来，草坼花心开。思君春日迟，一日肠九回。
妾住洛桥北，君住洛桥南。十五即相识，今年二十三。
有如女萝草，生在松之侧。蔓短枝苦高，萦回上不得。
人言人有愿，愿至天必成。愿作远方兽，步步比肩行。
愿作深山木，枝枝连理生。

卷 25_47【杂曲歌辞·千里思】

李白

李陵没胡沙，苏武还汉家。迢迢五原关，朔雪乱边花。
一去隔绝域，思归但长嗟。鸿雁向西北，飞书报天涯。

卷 25_48【杂曲歌辞·千里思】

李端

凉州风月美，遥望居延路。泛泛下天云，青青缘塞树。
燕山苏武上，海岛田横住。更是草生时，行人出门去。

· 全唐诗 ·

卷 25_49【杂曲歌辞·行路难】

卢照邻

君不见长安城北渭桥边，枯木横槎卧古田。
昔日含红复含紫，常时留雾亦留烟。春景春风花似雪，
香车玉輿恒阗咽。若个游人不竞攀，若个倡家不来折。
倡家宝袜蛟龙帔，公子银鞍千万骑。黄莺一向花娇春，
两两三三将子戏。千尺长条百尺枝，丹桂青榆相蔽亏。
珊瑚叶上鸳鸯鸟，凤凰巢里雏鹓儿。巢倾枝折凤归去，
条枯叶落狂风吹。一朝零落无人问，万古摧残君讵知。
人生贵贱无终始，倏忽须臾难久恃。谁家能驻西山日，
谁家能堰东流水。汉家陵树满秦川，行来行去尽哀怜。
自昔公卿二千石，咸拟荣华一万年。不见朱唇将白貌，
惟闻素棘与黄泉。金貂有时须换酒，玉麈但摇莫计钱。
寄言坐客神仙署，一生一死交情处。苍龙阙下君不来，
白鹤山前我应去。云间海上邈难期，赤心会合在何时。
但愿尧年一百万，长作巢由也不辞。

卷 25_50【杂曲歌辞·行路难】

张宏弼

君不见温家玉镜台，提携抱握九重来。
君不见相如绿绮琴，一抚一拍凤凰音。人生意气须及早，

· 全唐诗 ·

莫负当年行乐心。荆王奏曲楚妃叹，曲尽欢终夜将半。
朱楼银阁正平生，碧草青苔坐芜漫。当春对酒不须疑，
视目相看能几时。春风吹尽燕初至，此时自谓称君意。
秋露萎草鸿始归，此时衰暮与君违。人生翻覆何常足，
谁保容颜无是非。

卷 25_51【杂曲歌辞·行路难五首】

贺兰进明

君不见岩下井，百尺不及泉。君不见山上蒿，
数寸凌云烟。人生相命亦如此，何苦太息自忧煎。
但愿亲友长含笑，相逢莫吝杖头钱。寒夜邀欢须秉烛，
岂得空思花柳年。

君不见门前柳，荣曜暂时萧索久。君不见陌上花，
狂风吹去落谁家。谁家思妇见之叹，蓬首不梳心历乱。
盛年夫婿长别离，岁暮相逢色凋换。

君不见荒树枝，春花落尽蜂不窥。君不见梁上泥，
秋风始高燕不栖。荡子从军事征战，蛾眉婵娟空守闺。
独宿自然堪下泪，况复时间乌夜啼。

君不见云间月，暂盈还复缺。君不见林下风，
声远意难穷。亲故平生欲聚散，欢娱未尽尊酒空。
自叹青青陵上柏，岁寒能与几人同。

· 全唐诗 ·

君不见东流水，一去无穷已。君不见西郊云，
日夕空氛氲。群雁裴回不能去，一雁悲鸣复失群。
人生结交在终始，莫为升沉中路分。

卷 25_52【杂曲歌辞·行路难】

崔颢

君不见建章宫中金明枝，万万长条拂地垂。
二月三月花如霰，九重幽深君不见。艳彩朝含四宝宫，
香风吹入朝云殿。汉家宫女春未阑，爱此芳香朝暮看。
看去看来心不忘，攀折将安镜台上。双双素手剪不成，
两两红妆笑相向。建章昨夜起春风，一花飞落长信宫。
长信丽人见花泣，忆此珍树何嗟及。我昔初在昭阳时，
朝折暮折登玉墀。只言岁岁长相对，不寤今朝遥相思。

卷 25_53【杂曲歌辞·行路难三首】

李白

金尊清酒斗十千，玉盘珍羞直万钱。停杯投箸不能食，
拔剑四顾心茫然。欲渡黄河冰塞川，将登太行雪暗天。
闲来垂钓坐溪上，忽复乘舟梦日边。行路难，行路难，
多岐路，今安在。长风破浪会有时，直挂云帆济沧海。

· 全唐诗 ·

大道如青天，我独不得出。羞逐长安社中儿，
赤鸡白狗赌梨栗。弹剑作歌奏苦声，曳裾王门不称情。
淮阴市井笑韩信，汉朝公卿忌贾生。
君不见昔时燕家重郭隗，拥慧折腰无嫌猜。
剧辛乐毅感恩分，输肝剖胆效英才。昭王白骨萦蔓草，
谁人更扫黄金台。行路难，归去来。

有耳莫洗颖川水，有口莫食首阳蕨。含光混世贵无名。
何用孤高比云月。吾观自古贤达人，功成不退皆殒身。
子胥既弃吴江上，屈原终投湘水滨。陆机才多岂自保，
李斯税驾苦不早。华亭鹤唳讵可闻，上蔡苍鹰何足道。
君不见吴中张翰称达士，秋风忽忆江东行。
且乐生前一杯酒，何须身后千载名。

卷 25_54【杂曲歌辞·行路难三首】

顾况

君不见古来烧水银，变作北邙山上尘。藕丝挂身在虚空，
欲落不落愁杀人。睢水英雄多血刃，
建章宫阙成灰烬。淮王身死桂枝折，徐氏一去音书绝。
行路难，行路难，生死皆由天。秦皇汉武遭下脱，
汝独何人学神仙。

君不见担雪塞井徒用力，炊砂作饭岂堪吃。
一生肝胆向人尽，相识不如不相识。冬青树上挂凌霄，

· 全唐诗 ·

岁晏花凋树不凋。凡物各自有根本，种禾终不生豆苗。
行路难，行路难，何处是平道。中心无事当富贵，
今日觉君颜色好。

君不见少年头上如云发，少壮如云老如雪。
岂知灌顶有醍醐，能使清凉头不热。吕梁之水挂飞流，
鼋鼍蛟蜃不敢游。少年恃险若平地，独倚长剑凌清秋。
行路难，行路难，昔少年，今已老。前朝竹帛事皆空，
日暮牛羊古城草。

卷 25_55【杂曲歌辞·行路难】

李颀

汉家名臣杨德祖，四代五公享茅土。父兄子弟绾银黄，
跃马鸣珂朝建章。火浣单衣绣方领，茱萸锦带玉盘囊。
宾客填街复满坐，片言出口生辉光。世人逐势争奔走，
沥胆隳肝惟恐后。当时一顾生青云，自谓生死长随君。
一朝谢病还乡里，穷巷苍茫绝知己。秋风落叶闭重门，
昨日论交竟谁是。薄俗嗟嗟难重陈，深山麋鹿下为邻。
鲁连所以蹈沧海，古往今来称达人。

· 全唐诗 ·

卷 25_56【杂曲歌辞·行路难二首】

高适适

君不见富家翁，昔时贫贱谁比数。一朝金多结豪贵，
万事胜人健如虎。子孙成长满眼前，妻能管弦妾能舞。
自矜一朝忽如此，却笑傍人独悲苦。东邻少年安所如，
席门穷巷出无车。有才不肯学干谒，何用年年空读书。

长安少年不少钱，能骑骏马鸣金鞭。五侯相逢大道边，
美人弦管争留连。黄金如斗不敢惜，片言如山莫弃捐。
安知憔悴读书者，暮宿虚台私自怜。

卷 25_57【杂曲歌辞·行路难】

张籍

湘东行人长叹息，十年离家归未得。弊裘羸马苦难行，
僮仆饥寒少筋力。君不见床头黄金尽，壮士无颜色。
龙蟠泥中未有云，不能生彼升天翼。

· 全唐诗 ·

卷 25_58【杂曲歌辞·行路难】

聂夷中

莫言行路难，夷狄如中国。谓言骨肉亲，中门如异域。
出处全在人，路亦无通塞。门前两条辙，何处去不得。

卷 25_59【杂曲歌辞·行路难】

韦应物

荆山之白玉兮，良工雕琢双环连，月蚀中央镜心穿。
故人赠妾初相结，恩在环中寻不绝。人情厚薄苦须臾，
昔似连环今似玦。连环可碎不可离，如何物在人自移。
上客勿遽欢，听妾歌路难。傍人见环环可怜，
不知中有长恨端。

卷 25_60【杂曲歌辞·行路难三首】

柳宗元

君不见夸父逐日窥虞渊，跳踉北海超昆仑。
披霄决汉出沆瀣，瞥裂左右遗星辰。须臾力尽道渴死，
狐鼠蜂蚁争噬吞。北方竚人长九寸，开口抵掌更笑喧。

· 全唐诗 ·

啾啾饮食滴与粒，生死亦足终天年。睢盱大志少成遂，
坐使儿女相悲怜。

虞衡斤斧罗千山，工命采斫栈与椽。深林土翦十取一，
百牛连鞅摧双辕。万围千寻妨道路，东西蹶倒山火焚。
遗馀毫末不见保，躑躅礧壑何当存。群材未成质已夭，
突兀磳豁空岩峦。柏梁天灾武库火，匠石狼顾相愁冤。
君不见南山栋梁益稀少，爱材养育谁复论。

飞雪断道冰成梁，侯家炽炭雕玉房。蟠龙吐耀虎喙张，
熊蹲豹掷争低昂。攒峦业岨射朱光，丹霞翠雾飘奇香。
美人四向回明珰，雪山冰谷晞太阳。星躔奔走不得止，
奄忽双燕栖虹梁。风台露榭生光饰，死灰弃置参与商。
盛时一去贵反贱，桃笙葵扇安可常。

卷 25_61 【杂曲歌辞·行路难】

鲍溶

玉堂向夕如无人，丝竹俨然宫商死。细人何言入君耳，
尘生金尊酒如水。君今不念岁蹉跎，雁天明明凉露多。
华灯青凝久照夜，彩童窈窕虚垂罗。入宫见妒君不察，
莫入此地出风波。此时不乐早休息，女颜易老君如何。

· 全唐诗 ·

卷 25_62【杂曲歌辞·行路难五首】

僧贯休

不会当时作天地，刚有多般愚与智。到头还用真宰心，
何如上下皆清气。大道冥冥不知处，那堪顿得羲和轡。
义不义兮仁不仁，拟学长生更容易。负心为炉复为火，
缘木求鱼应且止。君不见烧金炼石古帝王，
鬼火荧荧白杨里。

君不见道傍废井生古木，本是骄奢贵人屋。
几度美人照影来，素绠银瓶濯纤玉。云飞雨散今如此，
绣阁雕甍作荒谷。沸渭笙歌君莫夸，不应长是西家哭。
休说遗编行者几，至竟终须合天理。败他成此亦何功，
苏张终作多言鬼。行路难，行路难，不在羊肠里。

九有茫茫共尧日，浪死虚生亦非一。清净玄音竟不闻，
花眼酒肠暗如漆。或偶因片言只字登第光二亲，
又不能献可替不航要津。口谈羲轩与周孔，
履行不及屠沽人。行路难，行路难，日暮途远空悲叹。

君不见道傍树有寄生枝，青青郁郁同荣衰。
无情之物尚如此，为人不及还堪悲。父归坟兮未朝夕，
已分黄金争田宅。高堂老母头似霜，心作数支泪常滴。
我闻忽如负芒刺，不独为君空叹息。古人尺布犹可缝，
浔阳义犬令人忆。寄言世上为人子，孝义团圆莫如此。

· 全唐诗 ·

若如此，不遑死兮更何俟。

君不见山高海深人不测，古往今来转青碧。
浅近轻浮莫与交，池卑只解生荆棘。谁道黄金如粪土，
张耳陈馥断消息。行路难，行路难，君自看。

卷 25_63【杂曲歌辞·行路难二首】

僧齐己

行路难，君好看，惊波不在艤艫间，
小人心里藏奔湍。七盘九折寒嶮崿，翻车倒盖犹堪出。
未似是非唇舌危，暗中潜毁平人骨。君不见楚灵均，
千古沉冤湘水滨。又不见李太白，一朝却作江南客。

下浸与高盘，不为行路难。是非真险恶，翻覆作峰峦。
漆愧同时黑，朱惭巧处丹。令人畏相识，欲画白云看。

卷 25_64【杂曲歌辞·行路难】

翁绶

行路艰难不复歌，故人荣达我蹉跎。双轮晚上铜梁雪，
一叶春浮瘴海波。自古要津皆若此，方今失路欲如何。
君看西汉翟丞相，凤沼朝辞暮雀罗。

· 全唐诗 ·

卷 25_65【杂曲歌辞·行路难】

薛能

何处力堪殚，人心险万端。藏山难测度，暗水自波澜。
对面如千里，回肠似七盘。已经吴坂困，欲向雁门难。
南北诚须泣，高深不可干。无因善行止，车辙得平安。

卷 25_66【杂曲歌辞·从军中行路难二首】

骆宾王

君不见封狐雄虺自成群，冯深负固结妖氛。
玉玺分兵征恶少，金坛受律动将军。将军拥旄宣庙略，
战士横行静夷落。长驱一息背铜梁，直指三巴逾剑阁。
阁道苔上戍楼，剑门遥裔俯灵丘。邛关九折无平路，
江水双源有急流。征役无期返，他乡岁华晚。
杳杳丘陵出，苍苍林薄远。途危紫盖峰，路涩青泥坂。
去去指哀牢，行行入不毛。绝壁千里险，连山四望高。
中外分区宇，夷夏殊风土。交趾枕南荒，昆弥临北户。
川源饶毒雾，溪谷多淫雨。行潦四时流，崩查千岁古。
漂梗飞蓬不自安，扞藤引葛度危峦。昔时闻道从军乐，
今日方知行路难。苍江绿水东流驶，炎洲丹徼南中地。
南中南斗映星河，秦川秦塞阻烟波。三春边地风光少，
五月泸中瘴疠多。朝驱疲斥候，夕息倦谁何。

· 全唐诗 ·

向月弯繁弱，连星转太阿。重义轻生怀一顾，
东伐西征凡几度。夜夜朝朝斑鬓新，年年岁岁戎衣故。
灞城隅，滇池水，天涯望转积，地际行无已。
徒觉炎凉节物非，不知关山千万里。弃置勿重陈，
重陈多苦辛。且悦清笳杨柳曲，讵忆芳园桃李人。
绛节朱旗分白羽，丹心白刃酬明主。但令一技君王识，
谁惮三边征战苦。行路难，行路难，岐路几千端。
无复归云凭短翰，望日想长安。

君不见玉关尘色暗边亭，铜鞮杂虏寇长城。
天子按剑征馀勇，将军受脤事横行。七德龙韬开玉帐，
千里鼙鼓迭金钲。阴山苦雾埋高垒，交河孤月照连营。
连营去去无穷极，拥旆遥遥过绝国。阵云朝结晦天山，
寒沙夕涨迷疏勒。龙鳞水上开鱼贯，马首山前振雕翼。
长驱万里警祁连，分麾三命武功宣。百发乌号遥碎柳，
七尽龙文迥照莲。春来秋去移灰管，兰闺柳市芳尘断。
雁门迢递尺书稀，鸳被相思双带缓。行路难。
誓令氛祲静皋兰。但使封侯龙额贵，讵随中妇凤楼寒。

卷 25_63【杂曲歌辞·变行路难】

王昌龄

向晚横吹悲，风动马嘶合。前驱引旗节，千重阵云匝。
单于下阴山，砂砾空飒飒。封侯取一战，岂复念闺阁。

· 全唐诗 ·

第二十六卷

卷 26_1【杂曲歌辞·古别离】

沉佺期

白水东悠悠，中有西行舟。舟行有返棹，水去无还流。
奈何生别者，戚戚怀远游。远游谁当惜，所悲会难收。
自君间芳履，青阳四五遒。皓月掩兰室，光风虚蕙楼。
相思无明晦，长叹累冬秋。离居分迟暮，驾高何淹留。

卷 26_2【杂曲歌辞·古别离】

孟云卿

朝日上高台，离人怨秋草。但见万里天，不见万里道。
君行本遥远，苦乐良难保。宿昔梦同衾，忧心梦颠倒。
含酸欲谁诉，转转伤怀抱。结发年已迟，征行去何早。
寒暄有时谢，憔悴难再好。人皆算年寿，死者何曾老。
少壮无见期，水深风浩浩。

· 全唐诗 ·

卷 26_3【杂曲歌辞·古别离】

李益

双剑欲别风凄然，雌沉水底雄上天。江回汉转两不见，
云交雨合知何年。古来万事皆由命，何用临岐苦涕涟。

卷 26_4【杂曲歌辞·古别离二首】

于湊

入室少情意，出门多路岐。黄鹤有归日，荡子无还时。
人谁无分命，妾身何太奇。君为东南风，妾作西北枝。
青楼邻里妇，终年画长眉。自倚对良匹，笑妾空罗帏。

郎本东家儿，妾本西家女。对门中道间，终谓无离阻。
岂知中道间，遣作空闺主。自是爱封侯，非关备胡虏。
知子去从军，何处无良人。

卷 26_5【杂曲歌辞·古别离二首】

李端

水国叶黄时，洞庭霜落夜。行舟闻商估，宿在枫林下。

· 全唐诗 ·

此地送君还，茫茫似梦间。后期知几日，前路转多山。
巫峡通湘浦，迢迢隔云雨。天晴见海樯，月落闻津鼓。
人老自多愁，水深难急流。清宵歌一曲，白首对汀洲。

与君桂阳别，令君岳阳待。后事忽差池，前期日空在。
木落雁嗷嗷，洞庭波浪高。远山云似盖，极浦树如毫。
朝发能几里，暮来风又起。如何两处愁，皆在孤舟里。
昨夜天月明，长川寒且清。菊花开欲尽，茱萸拍来生。
下江帆势速，五两遥相逐。欲问去时人，知投何处宿。
空令猿啸时，泣对湘潭竹。

卷 26_6【杂曲歌辞·古别离】

王缙

下阶欲离别，相对映兰丛。含辞未及吐，泪落兰丛中。
高堂静秋日，罗衣飘暮风。谁能待明月，回首见床空。

卷 26_7【杂曲歌辞·古别离】

僧皎然

太湖三山口，吴王在时道。寂寞千载心，无人见春草。
谁堪缄怨者，持此伤怀抱。孤舟畏狂风，一点宿烟岛。
望所思兮若何，月荡漾兮空波。云离离兮北断，

· 全唐诗 ·

雁眇眇兮南多。身去兮天畔，心折兮湖岸。
春山胡为兮塞路，使我归梦兮撩乱。

卷 26_8【杂曲歌辞·古别离】

聂夷中

欲别牵郎衣，问郎游何处。不恨归日迟，莫向临邛去。

卷 26_9【杂曲歌辞·古别离二首】

施肩吾

古人谩歌西飞燕，十年不见狂夫面。三更风作切梦刀，
万转愁成系肠线。所嗟不及牛女星，一年一度得相见。

老母别爱子，少妻送征郎。血流既四面，乃亦断二肠。
不愁寒无衣，不怕饥无粮。惟恐征战不还乡，
母化为鬼妻为孀。

卷 26_10【杂曲歌辞·古别离】

吴融

紫燕黄鹄虽别离，一举千里何难追。犹闻啼风与叫月，

· 全唐诗 ·

流连断续令人悲。赋情更有深缱绻，碧甃千寻尚为浅。
蟾蜍正向清夜流，蛱蝶须教堕丝罥。莫道断丝不可续，
丹穴凤凰胶不远。草草通流水不回，海上两潮长不返。

卷 26_11【杂曲歌辞·古离别】

王适适

昔岁惊杨柳，高楼悲独守。今年芳树枝，孤栖怨别离。
珠帘昼不卷，罗幔晓长垂。苦调琴先觉，愁容镜独知。
频来雁度无消息，罢去鸳文何用织。夜还罗帐空有情，
春着裙腰自无力。青轩桃李落纷纷，紫庭兰蕙日氛氲。
已能憔悴今如此，更复含情一待君。

卷 26_12【杂曲歌辞·古离别】

常理

君御狐白裘，妾居缃绮帟。粟钿金夹膝，花错玉搔头。
离别生庭草，征行断戍楼。蟪蛄网清曙，菡萏落红秋。
小胆空房怯，长眉满镜愁。为传儿女意，不用远封侯。

· 全唐诗 ·

卷 26_13【杂曲歌辞·古离别】

姚系

凉风已袅袅，露重木兰枝。独上高楼望，行人远不知。
轻寒入洞户，明月满秋池。燕去鸿方至，年年是别离。

卷 26_14【杂曲歌辞·古离别】

张彪

离别无远近，事欢情亦悲。不闻车轮声，后会将何时。
去日忘寄书，来日乖前期。纵知明当还，一夕千万思。

卷 26_15【杂曲歌辞·古离别】

赵微明

违别未几日，一日如三秋。犹疑望可见，日日上高楼。
惟见分手处，白蘋满芳洲。寸心宁死别，不忍生离愁。

· 全唐诗 ·

卷 26_16【杂曲歌辞·古离别二首】

孟郊

松山云缭绕，萍路水分离。云去有归日，水分无合时。
春芳役双眼，春色柔四支。杨柳织别愁，千条万条丝。

山川古今路，纵横无断绝。来往天地间，人皆有离别。
行衣未束带，中肠已先结。不用看镜中，自知生白发。
欲陈去留意，声向言前咽。愁结填心胸，茫茫若为说。
荒郊烟莽苍，旷野风凄切。处处得相随，人那不如月。

卷 26_17【杂曲歌辞·古离别】

顾况

西江上，风动麻姑嫁时浪。
西山为水水为尘，不是人间离别人。

卷 26_18【杂曲歌辞·古离别】

僧贯休

离恨如旨酒，古今饮皆醉。只恐长江水，尽是儿女泪。

· 全唐诗 ·

伊余非此辈，送人空把臂。他日再相逢，清风动天地。

卷 26_19【杂曲歌辞·古离别】

韦庄

晴烟漠漠柳毵毵，不那离情酒半酣。
更把马鞭云外指，断肠春色在江南。

卷 26_20【杂曲歌辞·生别离】

孟云卿

结发生别离，相思复相保。何知日已久，五变庭中草。
眇眇天海途，悠悠吴江岛。但恐不出门，出门无远道。
远道行既难，家贫衣服单。严风吹积雪，晨起鼻何酸。
人生各有恋，岂不怀所安。分明天上日，生死誓同欢。

卷 26_21【杂曲歌辞·生别离】

白居易

食檠不易食梅难，檠能苦兮梅能酸。未如生别之为难，
苦在心兮酸在肝。晨鸡载鸣残月没，征马重嘶行人出。

· 全唐诗 ·

回看骨肉哭一声，梅酸槩苦甘如蜜。黄河水白黄云秋，
行人河边相对愁。天寒野旷何处宿，棠梨叶战风飕飕。
生离别，生离别，忧从中来无断绝。忧积心劳血气衰，
末年三十生白发。

卷 26_22【杂曲歌辞·远别离】

李白

远别离，古有皇英之二女，乃在洞庭之南，潇湘之浦。
海水直下万里深，谁人不言此离苦。日惨惨兮云冥冥，
猩猩啼烟兮鬼啸雨。我纵言之将何补？
皇穹窃恐不照余之忠诚，雷冯冯兮欲吼怒。
尧舜当之亦禅禹。君失臣兮龙为鱼，权归臣兮鼠变虎。
或云尧幽囚，舜野死，九疑联绵皆相似，
重瞳孤坟竟何是。帝子泣兮绿云间，随风波兮去无还。
恸哭兮远望，见苍梧之深山。苍梧山崩湘水绝，
竹上之泪乃可灭。

卷 26_23【杂曲歌辞·远别离】

张籍

莲叶团团杏花拆，长江鲤鱼鳍鬣赤。念君少年弃亲戚，
千里万里独为客。谁言远别心不易，天星坠地能为石。

· 全唐诗 ·

几时断得城南陌，勿使居人有行役。

卷 26_24【杂曲歌辞·远别离二首】

令狐楚

杨柳黄金穗，梧桐碧玉枝。春来消息断，早晚是归时。

玳织鸳鸯履，金装翡翠簪。畏人相问着，不拟到城南。

卷 26_25【杂曲歌辞·久别离】

李白

别来几春未还家，玉窗五见樱桃花。况有锦字书，
开缄使人嗟。至此肠断彼心绝，云鬟绿鬓罢揽结，
愁如回飙乱白雪。去年寄书报阳台，今年寄书重相催。
胡为东风为我吹行云，使西来；待来竟不来，
落花寂寂委青苔。

卷 26_26【杂曲歌辞·新别离】

戴叔伦

手把杏花枝，未曾经别离。黄昏掩闺后，寂寞自心知。

· 全唐诗 ·

卷 26_27【杂曲歌辞·今别离】

崔国辅

送别未能旋，相望连水口。船行欲映洲，几度急摇手。

卷 26_28【杂曲歌辞·暗别离】

刘氏瑶

槐花结子桐叶焦，单飞越鸟啼青霄。翠轩辗云轻遥遥，
燕脂泪进红线条。瑶草歇芳心耿耿，玉佩无声画屏冷。
朱弦暗断不见人，风动花枝月中影。青鸾脉脉西飞去，
海阔天高不知处。

卷 26_29【杂曲歌辞·潜别离】

白居易

不得哭，潜别离。不得语，暗相思。两心之外无人知。
深笼夜锁独栖鸟，利剑春断连理枝。河水虽浊有清日，
乌头虽黑有白时。惟有潜离与暗别，彼此甘心无后期。

· 全唐诗 ·

卷 26_30【杂曲歌辞·别离曲】

张籍

行人结束出门去，马蹄几时踏门路。忆昔君初纳彩时，
不言身属辽阳戍。早知今日当别离，成君家计良为谁。
男儿生身自有役，那得误我少年时。不如逐君征战死，
谁能独老空闺里。

卷 26_31【杂曲歌辞·别离曲】

陆龟蒙

丈夫非无泪，不洒离别间。仗剑对尊酒，耻为游子颜。
蝮蛇一螫手，壮士疾解腕。所思在功名，离别何足叹。

卷 26_32【杂曲歌辞·西洲曲】

温庭筠

悠悠复悠悠，昨日下西洲。西洲风色好，遥见武昌楼。
武昌何郁郁，侬家定无匹。小妇被流黄，登楼抚瑶瑟。
朱弦繁复轻，素手直凄清。一弹三四解，掩抑似含情。
南楼登且望，西江广复平。艇子摇两桨，催过石头城。
门前乌臼树，惨澹天将曙。鸂鶒飞复还，郎随早帆去。

· 全唐诗 ·

回头语同伴，定复负情侬。去帆不安幅，作抵使西风。
他日相寻索，莫作西洲客。西洲人不归，春草年年碧。

卷 26_33【杂曲歌辞·荆州乐】

李白

白帝城边足风波，瞿塘五月谁敢过。荆州麦熟茧成蛾，
缫丝忆君头绪多。拨谷飞鸣奈妾何。

卷 26_34【杂曲歌辞·荆州乐二首】

刘禹锡

渚宫杨柳暗，麦城朝雉飞。可怜踏青伴，乘暖着轻衣。

今日好南风，商旅相催发。沙头檣竿上，始见春江阔。

卷 26_35【杂曲歌辞·荆州泊】

李端

南楼西下时，月里闻来棹。桂水舳舻回，荆州津济闹。
移帷望星汉，引带思容貌。今夜一江人，惟应妾身觉。

· 全唐诗 ·

卷 26_36【杂曲歌辞·纪南歌】

刘禹锡

风烟纪南城，尘土荆门路。天寒猎兽者，走上樊姬墓。

卷 26_37【杂曲歌辞·宜城歌】

刘禹锡

野水绕空城，行尘起孤驿。花台侧生树，石碣阳镌额。
靡靡度行人，温风吹宿麦。知

卷 26_38【杂曲歌辞·长干曲四首】

崔颢

君家定何处，妾住在横塘。停舟暂借问，或恐是同乡。
家临九江水，去来九江侧。同是长干人，生小不相识。
下渚多风浪，莲舟渐觉稀。那能不相待，独自逆潮归。
三江潮水急，五湖风浪涌。由来花性轻，莫畏莲舟重。

· 全唐诗 ·

卷 26_39【杂曲歌辞·长干行二首】

李白

妾发初覆额，折花门前剧。郎骑竹马来，绕床弄青梅。
同居长干里，两小无嫌猜。十四为君妇，羞颜尚不开。
低头向暗壁，千唤不一回。十五始展眉，愿同尘与灰。
常存抱柱信，岂上望夫台。十六君远行，瞿塘滟预堆。
五月不可触，猿鸣天上哀。门前迟行迹，一一生绿苔。
苔深不能扫，落叶秋风早。八月蝴蝶来，双飞西园草。
感此伤妾心，坐愁红颜老。早晚下三巴，预将书报家。
相迎不道远，直至长风沙。

忆妾深闺里，烟尘不曾识。嫁与长干人，沙头候风色。
五月南风兴，思君在巴陵。八月西风起，想君发扬子。
去来悲如何，见少别离多。湘潭几日到，妾梦越风波。
昨夜狂风度，吹折江头树。淼淼暗无边，行人在何处。
北客真王公，朱衣满江中。日暮来投宿，数朝不肯东。
好乘浮云骢，佳期兰渚东。鸳鸯绿浦上，翡翠锦屏中。
自怜十五馀，颜色桃李红。那作商人妇，愁水复愁风。

卷 26_40【杂曲歌辞·长干行】

张潮

婿贫如珠玉，婿富如埃尘。贫时不忘旧，富贵多宠新。

· 全唐诗 ·

妾本富家女，与君为偶匹。惠好一何深，中门不曾出。
妾有绣衣裳，葳蕤金缕光。念君贫且贱，易此从远方。
远方三千里，发去悔不已。日暮情更来，空望去时水。
孟夏麦始秀，江上多南风。商贾归欲尽，君今尚巴东。
巴东有巫山，窈窕神女颜。常恐游此山，果然不知还。

卷 26_41【杂曲歌辞·小长干曲】

崔国辅

月暗送湖风，相寻路不通。菱歌唱不辍，知在此塘中。

卷 26_42【杂曲歌辞·杞梁妻】

僧贯休

秦之无道兮四海枯，筑长城兮遮北胡。筑人筑土一万里，
杞梁贞妇啼呜呜。上无父兮中无夫，下无子兮孤复孤。
一号城崩塞色苦，再号杞梁骨出土。疲魂饥魄相逐归，
陌上少年莫相非。

· 全唐诗 ·

卷 26_43【杂曲歌辞·卢女曲】

崔颢

二月春来半，宫中日渐长。柳垂金屋暖，花覆玉楼香。
拂匣先临镜，调笙更炙簧。还将卢女曲，夜夜奉君王。

卷 26_44【杂曲歌辞·卢姬篇】

崔颢

卢姬小小魏王家，绿鬓红唇桃李花。魏玉绮楼十二重，
水精帘箔绣芙蓉。白玉阑干金作柱，楼上朝朝学歌舞。
前堂后堂罗袖人，南窗北窗花发春。翠幌珠帘斗弦管，
一奏一弹云欲断。君王日晚下朝归，鸣环佩玉生光辉。
人生今日得骄贵，谁道卢姬身细微。

卷 26_45【杂曲歌辞·邯郸才人嫁为厮养卒妇】

李白

妾本丛台女，扬蛾入丹阙。自倚颜如花，宁知有凋歇。
一辞玉阶下，去若朝云没。每忆邯郸城，深宫梦秋月。
君王不可见，惆怅至明发。

· 全唐诗 ·

卷 26_46【杂曲歌辞·杨白花】

柳宗元

杨白花，风吹度江水。坐令宫树无颜色，
摇荡春光千万里。茫茫晓日下长秋，哀歌未断城鸦起。

卷 26_47【杂曲歌辞·茱萸女】

万楚

山阴柳家女，九日采茱萸。复得东邻伴，双为陌上姝。
插花向高髻，结子置长裾。作性恒迟缓，非关诧丈夫。
平明折林树，日入反城隅。侠客邀罗袖，行人挑短书。
蛾眉自有主，年少莫踟蹰。

卷 26_48【杂曲歌辞·于阗采花】

李白

于阗采花人，自言花相似。明妃一朝西入胡，
胡中美女多羞死。乃知汉地多名姝，胡中无花可方比。
丹青能令丑者妍，无盐翻在深宫里。
自古妒蛾眉，胡沙埋皓齿。

· 全唐诗 ·

卷 26_49【杂曲歌辞·秦女卷衣】

李白

天子居未央，妾侍卷衣裳。顾无紫宫宠，敢拂黄金床。
水至亦不去，熊来尚可当。微身奉日月，飘若萤火光。
愿君采葑菲，无以下体妨。

卷 26_50【杂曲歌辞·爱妾换马】

张祜

一面妖桃千里蹄，娇姿骏骨价应齐。乍牵玉勒辞金栈，
催整花钿出绣闺。去日岂无沾袂泣，归时还有顿衔嘶。
婵娟躑躅春风里，挥手摇鞭杨柳堤。

绮阁香销华厩空，忍将行雨换追风。休怜柳叶双眉翠，
却爱桃花两耳红。侍宴永辞春色里，趁朝休立漏声中。
恩劳未尽情先尽，暗泣嘶风两意同。

卷 26_51【杂曲歌辞·枯鱼过河泣】

李白

白龙改常服，偶被豫且制。谁使尔为鱼，徒劳诉天帝。

· 全唐诗 ·

作书报鲸鲵，勿恃风涛势。涛落归泥沙，翻遭蝼蚁噬。
万乘慎出入，柏人以为诫。

卷 26_52【杂曲歌辞·饮酒乐】

聂夷中

日月似有事，一夜行一周。草木犹须老，人生得无愁。
一饮解百结，再饮破百忧。白发欺贫贱，不入醉人头。
我愿东海水，尽向杯中流。安得阮步兵，同入醉乡游。

卷 26_53【杂曲歌辞·王孙游】

崔国辅

自与王孙别，频看黄鸟飞。应由春草误，着处不成归。

卷 26_54【杂曲歌辞·发白马】

李白

将军发白马，旌节渡黄河。箫鼓聒川岳，沧溟涌洪波。
武安有振瓦，易水无寒歌。铁骑若雪山，饮流涸滹沱。
扬兵猎月窟，转战略朝那。倚剑登燕然，边峰列嵯峨。

· 全唐诗 ·

萧条万里外，耕作五原多。一扫清大漠，包虎戢金戈。

卷 26_55【杂曲歌辞·结袜子】

李白

燕南壮士吴门豪，筑中置铅鱼隐刀。
感君恩重许君命，泰山一掷轻鸿毛。

卷 26_56【杂曲歌辞·沐浴子】

李白

沐芳莫弹冠，浴兰莫振衣。处世忌太洁，志人贵藏辉。
沧浪有钓叟，吾与尔同归。

卷 26_57【杂曲歌辞·三台二首】

韦应物

一年一年老去，明日后日花开。
未报长安平定，万国岂得衔杯。

冰泮寒塘始绿，雨馀百草皆生。

· 全唐诗 ·

朝来门阁无事，晚下高斋有情。

卷 26_58【杂曲歌辞·上皇三台】

韦应物

不寐倦长更，披衣出户行。月寒秋竹冷，风切夜窗声。

卷 26_59【杂曲歌辞·突厥三台】

韦应物

雁门山上雁初飞，马邑阑中马正肥。
日旰山西逢驿使，殷勤南北送征衣。

卷 26_60【杂曲歌辞·宫中三台二首】

王建

鱼藻池边射鸭，芙蓉园里看花。
日色柸袍相似，不着红鸾扇遮。

池北池南草绿，殿前殿后花红。
天子千年万岁，未央明月清风。

· 全唐诗 ·

卷 26_61【杂曲歌辞·江南三台四首】

王建

扬州桥边小妇，长干市里商人。
三年不得消息，各自拜鬼求神。

青草湖边草色，飞猿岭上猿声。
万里三湘客到，有风有雨人行。

树头花落花开，道上人去人来。
朝愁暮愁即老，百年几度三台。

闻身强健且为，头白齿落难追。
准拟百年千岁，能得几许多时。

卷 26_62【杂曲歌辞·筑城曲】

张籍

筑城去，千人万人齐抱杵。重重土坚试行锥，
军吏执鞭催作迟。来时一年深碛里，着尽短衣渴无水。
力尽不得抛杵声，杵声未定人皆死。家家养男当门户，
今日作君城下土。

· 全唐诗 ·

卷 26_63【杂曲歌辞·筑城曲五解】

元稹

年年塞下丁，长作出塞兵。自从冒顿强，官筑遮虏城。
筑城须努力，城高遮得贼。但恐贼路多，有城遮不得。
丁口传父口，莫问城坚不。平城被虏围，汉斲城墙走。
因兹虏请和，虏往骑来多。半疑兼半信，筑城犹嵯峨。
筑城安敢烦，愿听丁一言。请筑鸿胪寺，兼愁虏出关。

卷 26_64【杂曲歌辞·筑城曲】

陆龟蒙

城上一培土，手中千万杵。筑城畏不坚，坚城在何处。
莫叹筑城劳，将军要却敌。城高功亦高，尔命何处惜。

· 全唐诗 ·

卷 26_65【杂曲歌辞·湖阴曲】

温庭筠

祖龙黄须珊瑚鞭，铁骢金面青连钱。虎髯拔剑欲成梦，
日压贼营如血鲜。海旗风急惊眠起，甲重光摇照湖水。
苍黄追骑尘外归，森索妖星阵前死。五陵愁碧春萋萋，
灞川玉马空中嘶。羽书如电入青琐，雪腕如捶催画鞿。
白虬天子金煌铎，高临帝座回龙章。吴波不动楚山晚，
花压阑干春昼长。

卷 26_66【杂曲歌辞·无愁果有愁曲】

李商隐

东有青龙西白虎，中含福皇包世度。玉壶渭水笑清潭，
凿天不到牵牛处。骐驎踏云天马狞，牛山撼碎珊瑚声。
秋娥点滴不成泪，十二玉楼无故钉。推烟唾月抛千里，
十番红桐一行死。白杨别屋鬼迷人，空留暗记如蚕纸。
日暮向风牵短丝，血凝血散今谁是。

· 全唐诗 ·

卷 26_67【杂曲歌辞·起夜来】

施肩吾

香销连理带，尘覆合欢杯。懒卧相思枕，愁吟起夜来。

卷 26_68【杂曲歌辞·起夜半】

聂夷中

念远心如烧，不觉中夜起。桃花带露泛，立在月明里。

卷 26_69【杂曲歌辞·独不见】

沉佺期

卢家小妇郁金香，海燕双栖玳瑁梁。九月寒砧催下叶，
十年征戍忆辽阳。白狼河北音书断，丹凤城南秋夜长。
谁知含愁独不见，使妾明月照流黄。

· 全唐诗 ·

卷 26_70【杂曲歌辞·独不见】

王训

日晚宜春暮，风软上林朝。对酒近初节，开楼荡夜娇。
石桥通小涧，竹路上青霄。持底谁见许，长愁成细腰。

卷 26_71【杂曲歌辞·独不见】

杨巨源

东风艳阳色，柳绿花如霰。竞理同心鬟，争持合欢扇。
香传贾娘手，粉离何郎面。最恨卷帘时，含情独不见。

卷 26_72【杂曲歌辞·独不见】

李白

白马谁家子，黄龙边塞儿。天山三丈雪，岂是远行时。
春蕙忽秋草，莎鸡鸣曲池。风催寒棕响，月入霜闺悲。
忆与君别年，种桃齐蛾眉。桃今百馀尺，花落成枯枝。
终然独不见，流泪空自知。

· 全唐诗 ·

卷 26_73【杂曲歌辞·独不见】

戴叔伦

前宫路非远，旧苑春将遍。玉户看早梅，雕梁数归燕。
身轻逐舞袖，香暖传歌扇。自和秋风词，长侍昭阳殿。
谁信后庭人，年年独不见。

卷 26_74【杂曲歌辞·独不见】

胡曾

玉关一自有氛埃，年少从军竟未回。门外尘凝张乐榭，
水边香灭按歌台。窗残夜月人何处，帘卷春风燕复来。
万里寂寥音信绝，寸心争忍不成灰。

卷 26_75【杂曲歌辞·携手曲】

田娥

携手共惜芳菲节，莺啼锦花满城阙。行乐逶迤念容色，
色衰只恐君恩歇。凤笙龙管白日阴，盈亏自感青天月。

· 全唐诗 ·

卷 26_76【杂曲歌辞·大垂手】

聂夷中

金刀翦轻云，盘用黄金缕。装束赵飞燕，教来掌上舞。
舞罢飞燕死，片片随风去。

卷 26_77【杂曲歌辞·夜夜曲】

田娥

愁人夜独伤，灭烛卧兰房。只恐多情月，旋来照妾床。

卷 26_78【杂曲歌辞·夜夜曲】

王偃

北斗星移银汉低，班姬愁思凤城西。
青槐陌上人行绝，明月楼前乌夜啼。

· 全唐诗 ·

卷 26_79【杂曲歌辞·夜夜曲】

僧贯休

蟋蟀切切风骚骚，芙蓉喷香蟾蜍高。
孤灯耿耿征妇劳，更深扑落金错刀。

卷 26_80【杂曲歌辞·秋夜长】

王勃

秋夜长，殊未央，月明白露澄清光，层城绮阁遥相望。
遥相望，川无梁，北风受节雁南翔，崇兰委质时菊芳。
鸣环曳履出长廊，为君秋夜捣衣裳。纤罗对凤凰，
丹绮双鸳鸯。调砧乱杵思自伤。思自伤，
征夫万里戍他乡。鹤关音信断，龙门道路长。
所在天一方，寒衣徒自香。

卷 26_81【杂曲歌辞·秋夜长】

张籍

秋天如水夜未央，天汉东西月色光。愁人不寐畏枕席，
暗虫唧唧绕我傍。荒城为村无更声，起看北斗天未明。

· 全唐诗 ·

白露满田风袅袅，千声万声鹧鸪鸣。

卷 26_82【杂曲歌辞·秋夜曲二首】

王建

天清漏长霜泊泊，兰绿收荣桂膏涸。高楼云鬟弄婵娟，
古瑟暗断秋风弦。玉关遥隔万里道，金刀不翦双泪泉。
香囊火死香气少，向帷合眼何时晓。城乌作营啼野月，
秦川少妇生离别。

秋灯向壁掩洞房，良人此夜直明光。
天河悠悠漏水长，南楼北斗两相当。

卷 26_83【杂曲歌辞·秋夜曲】

张仲素

丁丁漏水夜何长，漫漫轻云露月光。
秋壁暗虫通夕响，寒衣未寄莫飞霜。

· 全唐诗 ·

卷 26_84【杂曲歌辞·秋夜曲】

王涯

桂魄初生秋露微，轻罗已薄未更衣。
银筝夜久殷勤弄，心怯空房不忍归。

卷 26_85【杂曲歌辞·夜坐吟】

李白

冬夜夜寒觉夜长，沉吟久坐坐北堂。冰合井泉月入闺，
青缸凝明照悲啼。青缸灭，啼转多。掩妾泪，听君歌。
歌有声，妾有情。情声合，两无违。
一语不入意，从君万曲梁尘飞。

卷 26_86【杂曲歌辞·夜坐吟】

李白

踏踏马头谁见过，眼看北斗直天河。西风罗幕生翠波，
铅华笑妾颦青蛾。为君起唱长相思。帘外严霜皆倒飞，
明星烂烂东方陲。红霞稍出东南涯，陆郎去矣乘斑骝。

· 全唐诗 ·

卷 26_87【杂曲歌辞·夜寒吟】

鲍溶

九衢金吾夜行行，上宫玉漏遥分明。霜飙乘阴扫地起，
旅鸿迷雪绕枕声，远人归梦既不成。留家惜夜欢心发，
罗幕画堂深皎洁。兰烟对酒客几人，兽火扬光二三月。
细腰楚姬丝竹间，白苎长袖歌闲闲，岂识苦寒损朱颜。

卷 26_88【杂曲歌辞·定情篇】

乔知之

共君结新婚，岁寒心未卜。相与游春园，各随情所逐。
君念菖蒲花，妾感苦寒竹。菖花多艳姿，寒竹有贞叶。
此时妾比君，君心不如妾。簪玉步河堤，妖韶援绿轂。
凫雁将子游，莺燕从双栖。君念春光好，妾向春光啼。
君时不得意，妾弃还金闺。结言本同心，悲欢何未齐。
怨咽前致辞，愿得中所悲。人间丈夫易，世路妇难为。
始经天月照，终若流星驰。长信佳丽人，失意非蛾眉。
庐江小吏妇，非关织作迟。本愿长相对，今已长相思。
复有游宦子，结援从梁陈。燕居崇三朝，去来历九春。
誓心接终始，蚕桑奉所亲。归愿未克从，黄金赠路人。
洁妇怀明义，从泛河之津。于今千万年，谁当问水滨。
更忆倡家楼，夫婿事封侯。去时思灼灼，去罢心悠悠。

· 全唐诗 ·

不怜妾岁晏，千载陇西头。以兹常惕惕，百虑恒盈积。
由来共结缡，几人同匪石。故岁雕梁燕，双去今来只。
今日玉庭梅，朝红暮成碧。碧荣始芬敷，黄叶已淅沥。
何用念芳春，芳春有流易。何用重欢娱，欢娱俄戚戚。
家本巫山阳，归去路何长。叙言情未尽，采芣已盈筐。
桑榆日映物，草色盈高冈。下有碧流水，上有丹桂香。
桂枝不须折，碧流清且洁。赠君比芳菲，受惠常不灭。
赠君泪潺湲，相思无断绝。妾有秦家镜，宝匣装珠玑。
鉴来年二八，不记易阴晖。妾无光寂寂，委照影依依。
今日持为赠，相识莫相违。

卷 26_89【杂曲歌辞·定情乐】

施肩吾

敢嗟君不怜，自是命不谐。着破三条裾，却还双股钗。

卷 26_90【杂曲歌辞·春江曲】

郭元振

江水春沉沉，上有双竹林。竹叶坏水色，郎亦坏人心。

· 全唐诗 ·

卷 26_91【杂曲歌辞·春江曲】

张籍

春江无云潮水平，蒲心出水鳧雏鸣。长干夫婿爱远行，
自染春衣缝已成。妾身生长金陵侧，去年随夫住江北。
春来未到父母家，舟小风多渡不得。欲辞舅姑先问人，
私向江头祭水神。

卷 26_92【杂曲歌辞·春江曲】

王涯

摇漾越江春，相将看白蘋。归时不觉夜，出浦月随人。

卷 26_93【杂曲歌辞·春江曲二首】

张仲素

家寄征江岸，征人几岁游。不知潮水信，每日到沙头。

乘晓南湖去，参差迭浪横。前洲在何处，雾里雁嚶嚶。

· 全唐诗 ·

卷 26_94【杂曲歌辞·江上曲】

李嘉佑

江上澹澹芙蓉花，江口蛾眉独浣纱。可怜应是阳台女，
坐对鸂鶒娇不语。掩面羞看北地人，回首忽作空山雨。

苍梧秋色不堪论，千载依依帝子魂。
君看峰上斑斑竹，尽是湘妃泣泪痕。

卷 26_95【杂曲歌辞·桃花曲】

顾况

魏帝宫人舞凤楼，隋家天子泛龙舟。
君王夜醉春眠晏，不觉桃花逐水流。

卷 26_96【杂曲歌辞·树中草】

李白

鸟衔野田草，误入枯桑里。客土植危根，逢春犹不死。
草木虽无情，因依尚可生。如何同枝叶，各自有枯荣。

· 全唐诗 ·

卷 26_97【杂曲歌辞·树中草】

张祜

青青树中草，托根非不危。草生树却死，荣枯君可知

卷 26_98【杂曲歌辞·春游吟】

李章

初春遍芳甸，千里霭盈瞩。美人摘新英，步步玩春绿。
所思杳何处，宛在吴江曲。可怜不得共芳菲，
日暮归来泪满衣。

卷 26_99【杂曲歌辞·春游乐】

施肩吾

一年三百六十日，赏心那似春中物。
草迷曲坞花满园，东家少年西家出。

· 全唐诗 ·

卷 26_100【杂曲歌辞·春游乐二首】

李端

游童苏合带，倡女蒲葵扇。初日映城时，相思忽相见。
褰裳踏露草，理鬓回花面。薄暮不同归，留情此芳甸。

柘弹连钱马，银钩妥堕鬟。采桑春陌上，踏草夕阳间。
意合辞先露，心诚貌却闲。明朝若相忆，云雨出巫山。

卷 26_101【杂曲歌辞·春游曲三首】

张仲素

烟柳飞轻絮，风榆落小钱。蒙蒙百花里，罗绮竞秋千。

骋望登香阁，争高下砌台。林间踏青去，席上意钱来。

行乐三春节，林花百和香。当年重意气，先占斗鸡场。

卷 26_102【杂曲歌辞·乐府二首】

刘言史

花钿红鬋一向偏，绿槐香陌欲朝天。

· 全唐诗 ·

仍嫌众里娇行疾，傍镫深藏白玉鞭。

喷珠团香小桂条，玉鞭兼赐霍嫖姚。
弄影便从天禁出，碧蹄声碎五门桥。

卷 26_103【杂曲歌辞·乐府】

顾况

暖谷春光至，宸游近甸荣。云随天仗转，风入御帘轻。
翠盖浮佳气，朱楼倚太清。朝臣冠剑退，宫女管弦迎。
细草承雕辇，繁花入幔城。文房开圣藻，武卫宿天营。
玉醴随觞至，铜壶逐漏行。五星含土德，万姓彻中声。
亲祀先崇典，躬推示劝耕。国风新正乐，农器近消兵。
道德关河固，刑章日月明。野人同鸟兽，率舞感升平。

卷 26_104【杂曲歌辞·乐府】

权德舆

光风澹荡百花吐，楼上朝朝学歌舞。身年二八婿侍中，
幼妹承恩兄尚主。绿窗珠箔绣鸳鸯，侍婢先焚百和香。
莺啼日出不知曙，寂寂罗帏春梦长。

· 全唐诗 ·

卷 26_105【杂曲歌辞·乐府三首】

孟郊

莲子不可得，荷花生水中。犹胜道傍柳，无事荡春风。

绿萍与荷叶，同此一水中。风吹荷叶在，绿萍西复东。

莲花未开时，苦心终日卷。春水徒荡漾，荷花未开展。

卷 26_106【杂曲歌辞·乐府】

陆长源

芙蓉初出水，菡萏露中花。风吹着枯木，无奈值空槎。

卷 26_107【杂曲歌辞·杂曲】

王勃

智琼神女，来访文君。蛾眉始约，罗袖初熏。歌齐曲韵，
舞乱行分。若向阳台荐枕，何啻得胜朝云。

· 全唐诗 ·

卷 26_108【杂曲歌辞·古曲五首】

施肩吾

可怜江北女，惯唱江南曲。摇荡木兰舟，双凫不成浴。
郎为匕上香，妾为笼上灰。归时虽暖热，去罢生尘埃。
夜裁鸳鸯绮，朝织蒲桃绫。欲试一寸心，待缝三尺冰。
怜时鱼得水，怨罢商与参。不如山支子，却解结同心。
红颜感暮花，白日同流水。思君如孤灯，一夜一心死。

卷 26_109【杂曲歌辞·高句丽】

李白

金花折风帽，白马小迟回。翩翩舞广袖，似鸟海东来。

卷 26_110【杂曲歌辞·摩多楼子】

李贺

玉塞去金人，二万四千里。风吹沙作云，一时渡辽水。

· 全唐诗 ·

天白水如练，甲丝双串断。行行莫苦辛，城月犹残半。
晓气朔烟上，赳赳胡马蹄。行人听水别，隔陇长东西。

· 全唐诗 ·

第二十七卷

卷 27_1【杂曲歌辞·辽东行】

王建

辽东万里辽水曲，古戍无城复无屋。黄云盖地雪作山，
不惜黄金买衣服。战回各自收弓箭，正西回面家乡远。
年年郡县送征人，将与辽东作丘坂。宁为草木乡中生，
有身不向辽东行。

卷 27_2【杂曲歌辞·渡辽水】

王建

渡辽水，此去咸阳五千里。来时父母知隔生，
重着衣裳如送死。亦有白骨归咸阳，营家各与题本乡。
身在应无回渡日，驻马相看辽水傍。

· 全唐诗 ·

卷 27_3【杂曲歌辞·昔昔盐·垂柳覆金堤】

赵嘏

新年垂柳色，袅袅对空闺。不畏芳菲好，自缘离别啼。
因风飘玉户，向日映金堤。驿使何时度，还将赠陇西。

卷 27_4【杂曲歌辞·昔昔盐·蘼芜叶复齐】

赵嘏

提筐红叶下，度日采蘼芜。掬翠香盈袖，看花忆故夫。
叶齐谁复见，风暖恨偏孤。一被春光累，容颜与昔殊。

卷 27_5【杂曲歌辞·昔昔盐·水溢芙蓉沼】

赵嘏

渌沼春光后，青青草色浓。绮罗惊翡翠，暗粉妒芙蓉。
云遍窗前见，荷翻镜里逢。将心托流水，终日渺无从。

· 全唐诗 ·

卷 27_6【杂曲歌辞·昔昔盐·花飞桃李蹊】

赵嘏

远期难可托，桃李自依依。花径无容迹，戎裘未下机。
随风开又落，度日扫还飞。欲折枝枝赠，那知归不归。

卷 27_7【杂曲歌辞·昔昔盐·采桑秦氏女】

赵嘏

南陌采桑出，谁知妾姓秦。独怜倾国貌，不负早莺春。
珠履荡花湿，龙钩折桂新。使君那驻马，自有侍中人。

卷 27_8【杂曲歌辞·昔昔盐·织锦窦家妻】

赵嘏

当年谁不羨，分作窦家妻。锦字行行苦，罗帷日日啼。
岂知登陇远，只恨下机迷。直候阳关使，殷勤寄海西。

· 全唐诗 ·

卷 27_9【杂曲歌辞·昔昔盐·关山别荡子】

赵嘏

那堪闻荡子，迢递涉关山。肠为马嘶断，衣从泪滴斑。
愁看塞上路，讵惜镜中颜。傥见征西雁，应传一字还。

卷 27_10【杂曲歌辞·昔昔盐·风月守空闺】

赵嘏

良人犹远戍，耿耿夜闺空。绣户流宵月，罗帷坐晓风。
魂飞沙帐北，肠断玉关中。尚自无消息，锦衾那得同。

卷 27_11【杂曲歌辞·昔昔盐·恒敛千金笑】

赵嘏

玉颜恒自敛，羞出镜台前。早惑阳城客，今悲华锦筵。
从军人更远，投喜鹊空传。夫婿交河北，迢迢路几千。

· 全唐诗 ·

卷 27_12【杂曲歌辞·昔昔盐·长垂双玉啼】

赵嘏

双双红泪堕，度日暗中啼。雁出居延北，人犹辽海西。
向灯垂玉枕，对月洒金闺。不惜罗衣湿，惟愁归意迷。

卷 27_13【杂曲歌辞·昔昔盐·蟠龙随镜隐】

赵嘏

鸾镜无由照，蛾眉岂忍看。不知愁发换，空见隐龙蟠。
那惬红颜改，偏伤白日残。今朝窥玉匣，双泪落阑干。

卷 27_14【杂曲歌辞·昔昔盐·彩凤逐帷低】

赵嘏

巧绣双飞凤，朝朝伴下帷。春花那见照，暮色已频欺。
欲卷思君处，将啼裛泪时。何年征戍客，传语报佳期。

· 全唐诗 ·

卷 27_15【杂曲歌辞·昔昔盐·惊魂同夜鹊】

赵嘏

万里无人见，众情难与论。思君常入梦，同鹊屡惊魂。
孤寝红罗帐，双啼玉箸痕。妾心甘自保，岂复暂忘恩。

卷 27_16【杂曲歌辞·昔昔盐·倦寝听晨鸡】

赵嘏

去去边城骑，愁眠掩夜闺。披衣窥落月，拭泪待鸣鸡。
不愤连年别，那堪长夜啼。功成应自恨，早晚发辽西。

卷 27_17【杂曲歌辞·昔昔盐·暗牖悬蛛网】

赵嘏

暗中蛛网织，历乱绮窗前。万里终无信，一条徒自悬。
分从珠露滴，愁见隙风牵。妾意何聊赖，看看剧断弦。

· 全唐诗 ·

卷 27_18【杂曲歌辞·昔昔盐·空梁落燕泥】

赵嘏

春至今朝燕，花时伴独啼。飞斜珠箔隔，语近画梁低。
帷卷闲窥户，床空暗落泥。谁能长对此，双去复双栖。

卷 27_19【杂曲歌辞·昔昔盐·前年过代北】

赵嘏

代北几千里，前年又复经。燕山云自合，胡塞草应青。
铁马喧鼙鼓，蛾眉怨锦屏。不知羌笛曲，掩泪若为听。

卷 27_20【杂曲歌辞·昔昔盐·今岁往辽西】

赵嘏

万里飞书至，闻君已渡辽。只谙新别苦，忘却旧时娇。
烽戍年将老，红颜日向凋。胡沙兼汉苑，相望几迢迢。

· 全唐诗 ·

卷 27_21【杂曲歌辞·昔昔盐·一去无还意】

赵嘏

良人征绝域，一去不言还。百战攻胡虏，三冬阻玉关。
萧萧边马思，猎猎戍旗闲。独把千重恨，连年未解颜。

卷 27_22【杂曲歌辞·昔昔盐·那能惜马蹄】

赵嘏

云中路杳杳，江畔草萋萋。妾久垂珠泪，君何惜马蹄。
边风悲晓角，营月怨春鼙。未道休征战，愁眉又复低。

卷 27_23【杂曲歌辞·水调歌第一】

平沙落日大荒西，陇上明星高复低。
孤山几处看烽火，壮士连营候鼓鼙。

卷 27_24【杂曲歌辞·水调歌第二】

猛将关西意气多，能骑骏马弄雕戈。
金鞍宝铎精神出，笛倚新翻水调歌。

· 全唐诗 ·

卷 27_25【杂曲歌辞·水调歌第三】

王孙别上绿珠轮，不羨名公乐此身。
户外碧潭春洗马，楼前红烛夜迎人。

卷 27_26【杂曲歌辞·水调歌第四】

陇头一段气长秋，举目萧条总是愁。
只为征人多下泪，年年添作断肠流。

卷 27_27【杂曲歌辞·水调歌第五】

双带仍分影，同心巧结香。不应须换彩，意欲媚浓妆。

卷 27_28【杂曲歌辞·入破第一】

细草河边一雁飞，黄龙关里挂戎衣。
为受明王恩宠甚，从事经年不复归。

卷 27_29【杂曲歌辞·入破第二】

锦城丝管日纷纷，半入江风半入云。

· 全唐诗 ·

此曲只应天上去，人间能得几回闻。

卷 27_30【杂曲歌辞·入破第三】

昨夜遥欢出建章，今朝缀赏度昭阳。
传声莫闭黄金屋，为报先开白玉堂。

卷 27_31【杂曲歌辞·入破第四】

日晚笳声咽戍楼，陇云漫漫水东流。
行人万里向西去，满目关山空恨愁。

卷 27_32【杂曲歌辞·入破第五】

千年一遇圣明朝，愿对君王舞细腰。
乍可当熊任生死，谁能伴凤上云霄。

卷 27_33【杂曲歌辞·第六彻】

闺烛无人影，罗屏有梦魂。近来音耗绝，终日望君门。

· 全唐诗 ·

卷 27_34【杂曲歌辞·水调】

吴融

凿河千里走黄沙，浮殿西来动日华。
可道新声是亡国，且贪惆怅后庭花。

卷 27_35【杂曲歌辞·堂堂】

李义府

镂月成歌扇，裁云作舞衣。自怜回雪影，好取洛川归。
懒正鸳鸯被，羞褰玳瑁床。春风别有意，密处也寻香。

卷 27_36【杂曲歌辞·堂堂】

李义府

堂堂复堂堂，红脱梅灰香。十年粉蠹生画梁，
饥虫不食推碎黄。蕙花已老桃叶长，禁院悬帘隔御光。
华清源中礬石汤，裴回百凤随君王。

· 全唐诗 ·

卷 27_37【杂曲歌辞·凉州歌第一】

汉家宫里柳如丝，上苑桃花连碧池。
圣寿已传千岁酒，天文更赏百僚诗。

卷 27_38【杂曲歌辞·凉州歌第二】

朔风吹叶雁门秋，万里烟尘昏戍楼。
征马长思青海北，胡笳夜听陇山头。

卷 27_39【杂曲歌辞·凉州歌第三】

开筐泪沾襦，见君前日书。夜台空寂寞，犹见紫云车。

卷 27_40【杂曲歌辞·排遍第一】

三秋陌上早霜飞，羽猎平田浅草齐。
锦背苍鹰初出按，五花骢马喂来肥。

卷 27_41【杂曲歌辞·排遍第二】

鸳鸯殿里笙歌起，翡翠楼前出舞人。

· 全唐诗 ·

唤上紫微三五夕，圣明方寿一千春。

卷 27_42【杂曲歌辞·凉州词】

耿纬

国使翩翩随旆旌，陇西岐路足荒城。
毡裘牧马胡雏小，日暮蕃歌三两声。

卷 27_43【杂曲歌辞·凉州词】

张籍

边城暮雨雁飞低，芦笋初生渐欲齐。
无数铃声遥过碛，应驮白练到安西。

古镇城门白碛开，胡兵往往傍沙堆。
巡边使客行应早，每待平安火到来。

凤林关里水东流，白草黄榆六十秋。
边将皆承主恩泽，无人解道取凉州。

· 全唐诗 ·

卷 27_44【杂曲歌辞·凉州词】

薛逢

昨夜蕃兵报国仇，沙州都护破凉州。
黄河九曲今归汉，塞外纵横战血流。

卷 27_45【杂曲歌辞·太和第一】

国门卿相旧山庄，圣主移来宴绿芳。
帘外辄为车马路，花间踏出舞人场。

卷 27_46【杂曲歌辞·太和第二】

国鸟尚含天乐转，寒风犹带御衣香。
为报碧潭明月夜，会须留赏待君王。

卷 27_47【杂曲歌辞·太和第三】

庭前鹊绕相思树，井上莺歌争刺桐。
含情少妇悲春草，多是良人学转蓬。

· 全唐诗 ·

卷 27_48【杂曲歌辞·太和第四】

塞北江南共一家，何须泪落怨黄沙。
春酒半酣千日醉，庭前还有落梅花。

卷 27_49【杂曲歌辞·太和第五彻】

我皇膺运太平年，四海朝宗会百川。
自古几多明圣主，不如今帝胜尧天。

卷 27_50【杂曲歌辞·伊川歌第一】

秋风明月独离居，荡子从戎十载馀。
征人去日殷勤属，归雁来时数寄书。

卷 27_51【杂曲歌辞·伊川歌第二】

彤闱晓辟万鞍回，玉辂春游薄晚开。
渭北清光摇草树，州南嘉景入楼台。

· 全唐诗 ·

卷 27_52【杂曲歌辞·伊川歌第三】

闻道黄花戍，频年不解兵。可怜闺里月，偏照汉家营。

卷 27_53【杂曲歌辞·伊川歌第四】

千里东归客，无心忆旧游。挂帆游白水，高枕到青州。

卷 27_54【杂曲歌辞·伊川歌第五】

桂殿江乌对，雕屏海燕重。只应多酿酒，醉罢乐高钟。

卷 27_55【杂曲歌辞·入破第一】

千门今夜晓初晴，万里天河彻帝京。
璨璨繁星驾秋色，棱棱霜气韵钟声。

卷 27_56【杂曲歌辞·入破第二】

长安二月柳依依，西出流沙路渐微。
阌氏山上春光少，相府庭边驿使稀。

· 全唐诗 ·

卷 27_57【杂曲歌辞·入破第三】

三秋大漠冷溪山，八月严霜变草颜。
卷旆风行宵渡碛，衔枚电扫晓应还。

卷 27_58【杂曲歌辞·入破第四】

行乐三阳早，芳菲二月春。闺中红粉态，陌上看花人。

卷 27_59【杂曲歌辞·入破第五】

君住孤山下，烟深夜径长。辕门渡绿水，游苑绕垂杨。

卷 27_60【杂曲歌辞·陆州歌第一】

分野中峰变，阴晴众壑殊。欲投人处宿，隔浦问樵夫。

卷 27_61【杂曲歌辞·陆州歌第二】

共得烟霞径，东归山水游。萧萧望林夜，寂寂坐中秋。

· 全唐诗 ·

卷 27_62【杂曲歌辞·陆州歌第三】

香气传空满，妆花映薄红。歌声天仗外，舞态御楼中。

卷 27_63【杂曲歌辞·排遍第一】

树发花如锦，莺啼柳若丝。更逢欢宴地，愁见别离时。

卷 27_64【杂曲歌辞·排遍第二】

明月照秋叶，西风响夜砧。强言徒自乱，往事不堪寻。

卷 27_65【杂曲歌辞·排遍第三】

坐对银缸晓，停留玉箸痕。君门常不见，无处谢前恩。

卷 27_66【杂曲歌辞·排遍第四】

曙月当窗满，征人出塞遥。画楼终日闭，清管为谁调。

· 全唐诗 ·

卷 27_67【杂曲歌辞·簇拍陆州】

西去轮台万里馀，故乡音耗日应疏。
陇山鹦鹉能言语，为报闺人数寄书。

卷 27_68【杂曲歌辞·石州】

自从君去远巡边，终日罗帏独自眠。看花情转切，
揽镜泪如泉。一自离君后，啼多双脸穿。
何时狂虏灭，免得更留连。

卷 27_69【杂曲歌辞·盖罗缝】

秦时明月汉时关，万里征人尚未还。
但愿龙庭神将在，不教胡马渡阴山。

音书杜绝白狼西，桃李无颜黄鸟啼。
寒鸟春深归去尽，出门肠断草萋萋。

卷 27_70【杂曲歌辞·双带子】

私言切语谁人会，海燕双飞绕画梁。
君学秋胡不相识，妾亦无心去采桑。

· 全唐诗 ·

卷 27_71【杂曲歌辞·昆仑子】

扬子谭经去，淮王载酒过。醉来啼鸟唤，坐久落花多。

卷 27_72【杂曲歌辞·祓禊曲】

昨见春条绿，那知秋叶黄。蝉声犹未断，寒雁已成行。

金谷园中柳，春来已舞腰。那堪好风景，独上洛阳桥。

何处堪愁思，花间长乐宫。君王不重客，泣泪向春风。

卷 27_73【杂曲歌辞·上巳乐】

张祜

猩猩血彩系头标，天上齐声举画桡。

却是内人争意切，六宫罗袖一时招。

卷 27_74【杂曲歌辞·穆护砂】

玉管朝朝弄，清歌日日新。折花当驿路，寄与陇头人。

· 全唐诗 ·

卷 27_75【杂曲歌辞·思归乐】

晚日催弦管，春风入绮罗。杏花如有意，偏落舞衫多。

万里春应尽，三江雁亦稀。连天汉水广，孤客未言归。

卷 27_76【杂曲歌辞·金殿乐】

入夜秋砧动，千门起四邻。不缘楼上月，应为陇头人。

卷 27_77【杂曲歌辞·胡渭州】

亭亭孤月照行舟，寂寂长江万里流。

乡国不知何处是，云山漫漫使人愁。

杨柳千寻色，桃花一苑芳。风吹入帘里，惟有惹衣香。

卷 27_78【杂曲歌辞·戎浑】

风劲角弓鸣，将军猎渭城。草枯鹰眼疾，雪尽马蹄轻。

· 全唐诗 ·

卷 27_79【杂曲歌辞·墙头花】

蟋蟀鸣洞房，梧桐落金井。为君裁舞衣，天寒剪刀冷。

妾有罗衣裳，秦王在时作。为舞春风多，秋来不堪着。

卷 27_80【杂曲歌辞·采桑】

自古多征战，由来尚甲兵。长驱千里去，一举两蕃平。
按剑从沙漠，歌谣满帝京。寄言天下将，须立武功名。

卷 27_81【杂曲歌辞·杨下采桑】

飞丝惹绿尘，软叶对孤轮。今朝入园去，物色强看人。

卷 27_82【杂曲歌辞·破阵乐】

秋来四面足风沙，塞外征人暂别家。
千里不辞行路远，时光早晚到天涯。

汉兵出顿金微，照日明光铁衣。百里火幡焰焰，
千行云骑騑騑。蹙踏辽河自竭，鼓噪燕山可飞。
正属四方朝贺，端知万舞皇威。

· 全唐诗 ·

少年胆气凌云，共许骁雄出群。匹马城南挑战，
单刀蓟北从军。一鼓鲜卑送款，五饵单于解纷。
誓欲成名报国，羞将开口论勋。

卷 27_83【杂曲歌辞·战胜乐】

百战得功名，天兵意气生。三边永不战，此是我皇英。

卷 27_84【杂曲歌辞·剑南臣】

不分君恩断，观妆视镜中。容华尚春日，娇爱已秋风。
枕席临窗晓，屏帷对月空。年年后庭树，芳悴在深宫。

卷 27_85【杂曲歌辞·征步郎】

塞外虏尘飞，频年度碛西。死生随玉剑，辛苦向金微。

卷 27_86【杂曲歌辞·叹疆场】

闻道行人至，妆梳对镜台。泪痕犹尚在，笑靥自然开。

· 全唐诗 ·

卷 27_87【杂曲歌辞·塞姑】

昨日卢梅塞口，
整见诸人镇守。
都护三年不归，
折尽江边杨柳。

卷 27_88【杂曲歌辞·水鼓子】

雕弓白羽猎初回，
薄夜牛羊复下来。
梦水河边秋草合，
黑山峰外阵云开。

卷 27_89【杂曲歌辞·婆罗门】

回乐峰前沙似雪，
受降城外月如霜。
不知何处吹芦管，
一夜征人尽望乡。

卷 27_90【杂曲歌辞·浣沙女】

南陌春风早，
东邻去日斜。
千花开瑞锦，
香扑美人车。

长乐青门外，
宜春小苑东。
楼开万户上，
人向百花中。

· 全唐诗 ·

卷 27_91【杂曲歌辞·镇西】

天边物色更无春，只有羊群与马群。
谁家营里吹羌笛，哀怨教人不忍闻。

岁去年来拜圣朝，更无山阙对溪桥。
九门杨柳浑无半，犹自千条与万条。

卷 27_92【杂曲歌辞·回纥】

曾闻瀚海使难通，幽闺少妇罢裁缝。缅想边庭征战苦，
谁能对镜冶愁容。久戍人将老，须臾变作白头翁。

卷 27_93【杂曲歌辞·长命女】

云送关西雨，风传渭北秋。孤灯然客梦，寒杵捣乡愁。

卷 27_94【杂曲歌辞·醉公子】

昨日春园饮，今朝倒接篱。谁人扶上马，不省下楼时。

· 全唐诗 ·

卷 27_95【杂曲歌辞·一片子】

柳色青山映，梨花雪鸟藏。绿窗桃李下，闲坐叹春芳。

卷 27_96【杂曲歌辞·甘州】

欲使传消息，空书意不任。寄君明月镜，偏照故人心。

卷 27_97【杂曲歌辞·濮阳女】

雁来书不至，月照独眠房。贱妾多愁思，不堪秋夜长。

卷 27_98【杂曲歌辞·相府莲】

夜闻邻妇泣，切切有馀哀。即问缘何事，征人战未回。

卷 27_99【杂曲歌辞·簇拍相府莲】

莫以今时宠，宁无旧日恩。看花满眼泪，不共楚王言。
闺烛无人影，罗屏有梦魂。近来音耗绝，终日望应门。

· 全唐诗 ·

卷 27_100【杂曲歌辞·离别难】

此别难重陈，花深复变人。来时梅覆雪，去日柳含春。
物候催行客，归途淑气新。剡川今已远，魂梦暗相亲。

卷 27_101【杂曲歌辞·离别难】

白居易

绿杨陌上送行人，马去车回一望尘。
不觉别时红泪尽，归来无泪可沾巾。

卷 27_102【杂曲歌辞·山鹧鸪】

玉关征戍久，空闺人独愁。寒露湿青苔，别来蓬鬓秋。
人坐青楼晚，莺语百花时。愁人多自老，肠断君不知。

卷 27_103【杂曲歌辞·鹧鸪词】

李益

湘江斑竹枝，锦翼鹧鸪飞。处处湘阴合，郎从何处归。

· 全唐诗 ·

卷 27_104【杂曲歌辞·鹧鸪词】

李涉

湘江烟水深，沙岸隔枫林。何处鹧鸪飞，日斜斑竹阴。
二女虚垂泪，三闾枉自沉。惟有鹧鸪鸟，独伤行客心。

越冈连越井，越鸟更南飞。何处鹧鸪啼，夕烟东岭归。
岭头行人少，天涯北客稀。鹧鸪啼别处，相对泪沾衣。

卷 27_105【杂曲歌辞·乐世】

白居易

管急丝繁拍渐稠，绿腰宛转曲终头。
诚知乐世声声乐，老病人听未免愁。

卷 27_106【杂曲歌辞·急乐世】

白居易

正抽碧线绣红罗，忽听黄莺敛翠蛾。
秋思冬愁春恨望，大都不得意时多。

· 全唐诗 ·

卷 27_107【杂曲歌辞·何满子】

白居易

世传满子是人名，临就刑时曲始成。
一曲四词歌八迭，从头便是断肠声。

卷 27_108【杂曲歌辞·何满子】

薛逢

系马宫槐老，持怀店菊黄。故交今不见，流恨满川光。

卷 27_109【杂曲歌辞·清平调】

李白

云想衣裳花想容，春风拂槛露华浓。
若非群玉山头见，会向瑶台月下逢。

一枝红艳露凝香，云雨巫山枉断肠。
借问汉宫谁得似，可怜飞燕倚新妆。

名花倾国两相欢，长得君王带笑看。

· 全唐诗 ·

解释春风无限恨，沉香亭北倚阑干。

卷 27_110【杂曲歌辞·回波乐】

李景伯

回波尔时酒后，微臣职在箴规。
侍宴既过三爵，喧哗窃恐非仪。

卷 27_111【杂曲歌辞·圣明乐】

张仲素

玉帛殊方至，歌钟比屋闻。华夷今一贯，同贺圣明君。
九陌祥烟合，千春瑞月明。宫花将苑柳，先发凤凰城。

卷 27_112【杂曲歌辞·圣明乐】

令狐楚

海浪恬丹徼，边尘靖黑山。从今万里外，不复镇萧关。

· 全唐诗 ·

卷 27_113【杂曲歌辞·大酺乐（商调曲）】

泪滴珠难尽，容残玉易销。恍随明月去，莫道梦魂遥。

卷 27_114【杂曲歌辞·大酺乐】

杜审言

圣后乘干日，皇明御历辰。紫宫初启坐，苍璧正临春。
雷雨垂膏泽，金钱赐下人。诏酺欢赏遍，交泰睹惟新。

毗陵震泽九州通，士女欢娱万国同。伐鼓撞钟惊海上，
新妆袿服照江东。梅花落处疑残雪，柳叶开时任好风。
大德不官逢道泰，天长地久属年丰。

卷 27_115【杂曲歌辞·大酺乐】

张祜

车驾东来值太平，大酺三日洛阳城。
小儿一伎竿头绝，天下传呼万岁声。

紫陌酺归日欲斜，红尘开路薛王家。
双鬟前说楼前鼓，两伎争轮好结花。

· 全唐诗 ·

卷 27_116【杂曲歌辞·千秋乐】

张祜

八月平时花萼楼，万方同乐奏千秋。
倾城人看长竿出，一伎初成赵解愁。

卷 27_117【杂曲歌辞·火凤辞】

李百药

歌声扇里出，妆影扇中轻。未能令掩笑，何处欲鄣声。
知音自不惑，得念是分明。莫见双嚬敛，疑人含笑情。

佳人靓晚妆，清唱动兰房。影入含风扇，声飞照日梁。
娇嚬眉际敛，逸韵口中香。自有横陈分，应怜秋夜长。

卷 27_119【杂曲歌辞·热戏乐】

张祜

热戏争心剧火烧，铜槌暗执不相饶。
上皇失喜宁王笑，百尺幢竿果动摇。

· 全唐诗 ·

卷 27_120【杂曲歌辞·春莺啭】

张祜

兴庆池南柳未开，太真先把一枝梅。
内人已唱春莺啭，花下傁傁软舞来。

卷 27_121【杂曲歌辞·达摩支】

温庭筠

捣麝成尘香不灭，拗莲作寸丝难绝。红泪文姬洛水春，
白头苏武天山雪。君不见无愁高纬花漫漫，
漳浦宴馀清露寒。一旦臣僚共囚虏，欲吹羌管先洊澜。
旧臣头鬓霜华早，可惜雄心醉中老。万古春归梦不归，
邺城风雨连天草。

卷 27_122【杂曲歌辞·如意娘】

武则天

看朱成碧思纷纷，憔悴支离为忆君。
不信比来长下泪，开箱验取石榴裙。

· 全唐诗 ·

卷 27_123【杂曲歌辞·雨霖铃】

张祜

雨霖铃夜却归秦，犹是张徽一曲新。
长说上皇垂泪教，月明南内更无人。

卷 27_124【杂曲歌辞·桂花曲】

可怜天上桂花孤，试问姮娥更要无。
月宫幸有闲田地，何不中央种两株。

卷 27_125【杂曲歌辞·渭城曲】

王维

渭城朝雨浥轻尘，客舍青青柳色春。
劝君更尽一杯酒，西出阳关无故人。

· 全唐诗 ·

第二十八卷

卷 28_1【杂曲歌辞·竹枝】

顾况

帝子苍梧不复归，洞庭叶下荆云飞。
巴人夜唱竹枝后，肠断晓猿声渐稀。

卷 28_2【杂曲歌辞·竹枝】

刘禹锡

白帝城头春草生，白盐山下蜀江清。
南人上来歌一曲，北人莫上动乡情。

山桃红花满上头，蜀江春水拍江流。
花红易衰似郎意，水流无限似侬愁。

江上朱楼新雨晴，瀼西春水縠文生。
桥东桥西好杨柳，人来人去唱歌行。

· 全唐诗 ·

日出三竿春雾消，江头蜀客驻兰桡。
凭寄狂夫书一纸，住在成都万里桥。

两岸山花似雪开，家家春酒满银杯。
昭君坊中多女伴，永安宫外踏青来。

瞿塘嘈嘈十二滩，此中道路古来难。
长恨人心不如水，等闲平地起波澜。

巫峡苍苍烟雨时，清猿啼在最高枝。
个里愁人肠自断，由来不是此声悲。

城西门前滟滪堆，年年波浪不能摧。
懊恼人心不如石，少时东去复西来。

山上层层桃李花，云间烟火是人家。
银钏金钗来负水，长刀短笠去烧畲。

杨柳青青江水平，闻郎江上唱歌声。
东边日出西边雨，道是无情还有情。

楚水巴山江雨多，巴人能唱本乡歌。
今朝北客思归去，回入纥那披绿罗。

· 全唐诗 ·

卷 28_3【杂曲歌辞·竹枝】

白居易

瞿塘峡口冷烟低，白帝城头月向西。
唱到竹枝声咽处，寒猿晴鸟一时啼。

竹枝苦怨怨何人，夜静山空歇又闻。
蛮儿巴女齐声唱，愁杀江楼病使君。

巴东船舫上巴西，波面风生雨脚齐。
水蓼冷花红簇簇，江蓠湿叶碧萋萋。

江畔谁人唱竹枝，前声断咽后声迟。
怪来调苦缘词苦，多是通州司马诗。

卷 28_4【杂曲歌辞·竹枝】

李涉

荆门滩急水潺潺，两岸猿啼烟满山。
渡头年少应官去，月落西陵望不还。

巫峡云开神女祠，绿潭红树影参差。
下牢戍口初相问，无义滩头剩别离。

· 全唐诗 ·

石壁千重树万重，白云斜掩碧芙蓉。
昭君溪上年年月，独自婵娟色最浓。

十二峰头月欲低，空蒙江上子规啼。
孤舟一夜东归客，泣向春风忆建溪。

卷 28_5【杂曲歌辞·竹枝】

孙光宪

门前春水白蘋花，岸上无人小艇斜。
商女经过江欲暮，散抛残食饲神鸦。

乱绳千结绊人深，越罗万丈表长寻。
杨柳在身垂意绪，藕花落尽见莲心。

卷 28_6【杂曲歌辞·杨柳枝】

白居易

一树春风万万枝，嫩于金色软于丝。
永丰西角荒园里，尽日无人属阿谁。

一树衰残委泥土，双枝荣耀植天庭。
定知玄象今春后，柳宿光中添两星。

· 全唐诗 ·

卷 28_7【杂曲歌辞·杨柳枝】

白居易

六幺水调家家唱，白雪梅花处处吹。
古歌旧曲君休听，听取新翻杨柳枝。

陶令门前四五树，亚夫营里百千条。
何似东都正二月，黄金枝映洛阳桥。

依依袅袅复青青，勾引清风无限情。
白雪花繁空扑地，绿丝条弱不胜莺。

红板江桥青酒旗，馆娃宫暖日斜时。
可怜雨歇东风定，万树千条各自垂。

苏州杨柳任君夸，更有钱塘胜馆娃。
若解多情寻小小，绿杨深处是苏家。

苏家小女旧知名，杨柳风前别有情。
剥条盘作银环样，卷叶吹为玉笛声。

叶含浓露如啼眼，枝袅轻风似舞腰。
小树不禁攀折苦，乞君留取两三条。

人言柳叶似愁眉，更有愁肠似柳丝。

· 全唐诗 ·

柳丝挽断肠牵断，彼此应无续得期。

卷 28_8【杂曲歌辞·杨柳枝】

卢贞

一树依依在永丰，两枝飞去杳无踪。
玉皇曾采人间曲，应逐歌声入九重。

卷 28_9【杂曲歌辞·杨柳枝】

刘禹锡

塞北梅花羌笛吹，淮南桂树小山词。
请君莫奏前朝曲，听唱新翻杨柳枝。

南陌东城春早时，相逢何处不依依。
桃红李白皆夸好，须得垂杨相发辉。

凤阙轻遮翡翠帷，龙墀遥望曲尘丝。
御沟春水柳晖映，狂杀长安年少儿。

金谷园中莺乱飞，铜驼陌上好风吹。
城东桃李须臾尽，争似垂杨无限时。

花萼楼前初种时，美人楼上斗腰支。

· 全唐诗 ·

如今抛掷上街里，露叶如啼欲恨谁。

炀帝行宫汴水滨，数株残柳不胜春。
昨来风起花如雪，飞入宫墙不见人。

御陌青门拂地垂，千条金缕万条丝。
如今绾作同心结，将赠行人知不知。

城外春风满酒旗，行人挥袂日西时。
长安陌上无穷树，唯有垂杨管别离。

轻盈袅娜占春华，舞榭妆楼处处遮。
春尽絮飞留不得，随风好去落谁家。

卷 28_10【杂曲歌辞·杨柳枝】

刘禹锡

扬子江头烟景迷，隋家宫树拂金堤。
嵯峨犹有当时色，半蘸波中水鸟栖。

迎得春光先到来，浅黄轻绿映楼台。
只缘袅娜多情思，便被春风长请挼。

巫峡巫山杨柳多，朝云暮雨远相和。
因想阳台无限事，为君回唱竹枝歌。

· 全唐诗 ·

卷 28_11【杂曲歌辞·杨柳枝】

李商隐

暂凭樽酒送无憀，莫损愁眉与细腰。
人世死前唯有别，春风争拟惜长条。

含烟惹雾每依依，万绪千条拂落晖。
为报行人休尽折，半留相送半迎归。

卷 28_12【杂曲歌辞·杨柳枝】

韩琬

梁苑隋堤事已空，万条犹舞旧春风。
那堪更想千年后，谁见杨花入汉宫。

卷 28_13【杂曲歌辞·杨柳枝】

施肩吾

伤见路傍杨柳春，一枝折尽一重新。
今年还折去年处，不送去年离别人。

· 全唐诗 ·

卷 28_14【杂曲歌辞·杨柳枝】

温庭筠

宜春苑外最长条，闲袅春风伴舞腰。
正是玉人肠断处，一渠春水赤栏桥。

南内墙东御路傍，预知春色柳丝黄。
杏花未肯无情思，何事情人最断肠。

苏小门前柳万条，毵毵金线拂平桥。
黄莺不语东风起，深闭朱门伴细腰。

金缕毵毵碧瓦沟，六宫眉黛惹春愁。
晚来更带龙池雨，半拂栏干半入楼。

馆娃宫外邺城西，远映征帆近拂堤。
系得王孙归意切，不关春草绿萋萋。

两两黄鹂色似金，袅枝啼露动芳音。
春来幸自长如线，可惜牵缠荡子心。

御柳如丝映九重，凤凰窗柱绣芙蓉。
景阳楼伴千条露，一面新妆待晓钟。

织锦机边莺语频，停梭垂泪忆征人。

· 全唐诗 ·

塞门三月犹萧索，纵有垂杨未觉春。

卷 28_15【杂曲歌辞·杨柳枝】

皇甫松

春入行宫映翠微，玄宗侍女舞烟丝。
如今柳向空城绿，玉笛何人更把吹。

烂漫春归水国时，吴王宫殿柳垂丝。
黄莺长叫空闺畔，西子无因更得知。

卷 28_16【杂曲歌辞·杨柳枝】

僧齐己

凤楼高映绿阴阴，凝碧多含雨露深。
莫谓一枝柔软力，几曾牵破别离心。

馆娃宫畔响廊前，依托吴王养翠烟。
剑去国亡台榭毁，却随红树噪秋蝉。

浓低似中陶潜酒，软极如伤宋玉风。
多谢将军绕营种，翠中闲卓战旗红。

· 全唐诗 ·

高僧爱惜遮江寺，游子伤残露野桥。
争似着行垂上苑，碧桃红杏对摇摇。

卷 28_17【杂曲歌辞·杨柳枝】

张祜

莫折宫前杨柳枝，玄宗曾向笛中吹。
伤心日暮烟霞起，无限春愁生翠眉。

凝碧池边敛翠眉，景阳台下绾青丝。
那胜妃子朝元阁，玉手和烟弄一枝。

卷 28_18【杂曲歌辞·杨柳枝】

孙鲂

灵和风暖太昌春，舞线摇丝向昔人。
何似晓来江雨后，一行如画隔遥津。

彭泽初栽五树时，只应闲看一枝枝。
不知天意风流处，要与佳人学画眉。

暖傍离亭静拂桥，入流穿槛绿摇摇。
不知落日谁相送，魂断千条与万条。

· 全唐诗 ·

春来绿树遍天涯，未见垂杨未可夸。
晴日万株烟一阵，闲坊兼是莫愁家。

十首当年有旧词，唱青歌翠几无遗。
未曾得向行人道，不为离情莫折伊。

卷 28_19【杂曲歌辞·杨柳枝】

薛能

华清高树出离宫，南陌柔条带暖风。
谁风轻阴是良夜，瀑泉声畔月明中。

洛桥晴影覆江船，羌笛秋声湿塞烟。
闲想习池公宴罢，水蒲风絮夕阳天。

嫩绿轻悬似缀旒，路人遥见隔宫楼。
谁能更近丹墀种，解播皇风入九州。

暖风晴日断浮埃，废路新条发钓台。
处处轻轻可惆怅，后人攀处古人栽。

潭上江边袅袅垂，日高风静絮相随。
青楼一树无人见，正是女郎眠觉时。

汴水高悬百万条，风清两岸一时摇。

· 全唐诗 ·

隋家力尽虚栽得，无限春风属圣朝。

和花烟树九重城，夹路春阴十万营。
唯向边头不堪望，一株憔悴少人行。
窗外齐垂旭日初，楼边轻好暖风徐。
游人莫道栽无益，桃李清阴却不如。

众木犹寒独早青，御沟桥畔曲江亭。
陶家旧日应如此，一院春条绿绕厅。

帐偃纓垂细复繁，令人心想石家园。
风条月影皆堪重，何事侯门爱树萱。

数首新词带恨成，柳丝牵我我伤情。
柔娥幸有腰支稳，试踏吹声作唱声。

高出军营远映桥，贼兵曾斫火曾烧。
风流性在终难改，依旧春来万万条。

县依陶令想嫌迂，营伴将军即大粗。
此日与君除万恨，数篇风调更应无。

狂似纤腰软胜绵，自多情态更谁怜。
游人不折还堪恨，抛向桥边与路边。

朝阳晴照绿杨烟，一别通波十七年。
应有旧枝无处觅，万株风里卓旌旗。

· 全唐诗 ·

晴垂芳态吐牙新，雨摆轻条湿面春。
别有出墙高数尺，不知摇动是何人。

暖梳簪朵事登楼，因挂垂杨立地愁。
牵断绿丝攀不得，半空悬着玉搔头。

西园高树后庭根，处处寻芳有折痕。
终忆旧游桃叶舍，一株斜映竹篱门。

刘白苏台总近时，当初章句是谁推。
纤腰舞尽春杨柳，未有侬家一首诗。

卷 28_20【杂曲歌辞·杨柳枝】

牛峤

解冻风来末上青，解垂罗袖拜卿卿。
无端袅娜临官路，舞送行人过一生。

吴王宫里色偏深，一簇纤条万缕金。
不愤钱塘苏小小，引郎枝下结同心。

桥北桥南千万条，恨伊张绪不相饶。
金羈白马临风望，认得羊家静婉腰。

狂雪随风扑马飞，惹烟无力被风欹。

· 全唐诗 ·

莫交移入灵和殿，宫女三千又妒伊。

裊翠笼烟拂暖波，舞裙新染曲尘罗。
章华台畔隋堤上，倚得春风尔许多。

卷 28_21【杂曲歌辞·杨柳枝】

和凝

软碧摇烟似送人，映花时把翠眉颦。
青青自是风流主，漫贴金丝待洛神。

瑟瑟罗裙金缕腰，黛眉偎破未重描。
醉来咬损新花子，拽住仙郎尽放娇。

鹊桥初就咽银河，今夜仙郎自性和。
不是昔年攀桂树，岂能月里索姮娥。

卷 28_22【杂曲歌辞·杨柳枝】

孙光宪

閨门风暖落花干，飞遍江南雪不寒。
独有晚来临水驿，闲人多凭赤阑干。

· 全唐诗 ·

有池有榭即蒙蒙，浸润翻成长养功。
恰似有人长点检，着行排立向春风。

根柢虽然傍浊河，无妨终日近笙歌。
骊驹金带谁堪比，还笑黄莺不较多。

万株枯槁怨亡隋，似吊吴台各自垂。
好是淮阴明月里，酒楼横笛不胜吹。

卷 28_23【杂曲歌辞·浪淘沙】

刘禹锡

九曲黄河万里沙，浪淘几簸自天涯。
如今直上银河去，同到牵牛织女家。

洛水桥边春日斜，碧流轻浅见琼沙。
无端陌上狂风急，惊起鸳鸯出浪花。

汴水东流虎眼文，清淮晓色鸭头春。
君看渡口淘沙处，渡却人间多少人。

鹦鹉洲头浪飐沙，青楼春望日将斜。
衔泥燕子争归舍，独自狂夫不忆家。

濯锦江边两岸花，春风吹浪正淘沙。

· 全唐诗 ·

女郎剪下鸳鸯锦，将向中流匹晚霞。

日照澄洲江雾开，淘金女伴满江隈。
美人首饰侯王印，尽是沙中浪底来。

八月涛声吼地来，头高数丈触山回。
须臾却入海门去，卷起沙堆似雪堆。

莫道谗言如浪深，莫言迁客似沙沉。
千淘万漉虽辛苦，吹尽狂沙始到金。

流水淘沙不暂停，前波未灭后波生。
令人忽忆潇湘渚，回唱迎神三两声。

卷 28_24 【杂曲歌辞·浪淘沙】

白居易

一泊沙来一泊去，一重浪灭一重生。
相搅相淘无歇日，会交山海一时平。

白浪茫茫与海连，平沙浩浩四无边。
暮去朝来淘不住，遂令东海变桑田。

青草湖中万里程，黄梅雨里一人行。
愁见滩头夜泊处，风翻暗浪打船声。

· 全唐诗 ·

借问江湖与海水，何似君情与妾心。
相恨不如潮有信，相思始觉海非深。

海底飞尘终有日，山头化石岂无时。
谁道小郎抛小妇，船头一去没回期。

随波逐浪到天涯，迁客生还有几家。
却到帝乡重富贵，请君莫忘浪淘沙。

卷 28_25【杂曲歌辞·浪淘沙】

皇甫松

滩头细草接疏林，浪恶罾船半欲沉。
宿鹭眠洲非旧浦，去年沙觜是江心。

蛮歌豆蔻北人愁，松雨蒲风夜艇秋。
浪起鵾鵒眠不得，寒沙细细入江流。

卷 28_26【杂曲歌辞·纥那曲】

刘禹锡

杨柳郁青青，竹枝无限情。同郎一回顾，听唱纥那声。

· 全唐诗 ·

踏曲兴无穷，调同词不同。愿郎千万寿，长作主人翁。

卷 28_27【杂曲歌辞·潇湘神二曲】

刘禹锡

湘水流，湘水流，九疑云物至今愁。君问二妃何处所，
零陵香草露中秋。

斑竹枝，斑竹枝，泪痕点点寄相思。楚客欲听瑶瑟怨，
潇湘深夜月明时。

卷 28_28【杂曲歌辞·抛球乐】

刘禹锡

五彩绣团团，登君玳瑁筵。最宜红烛下，偏称落花前。
上客如先起，应须赠一船。

春早见花枝，朝朝恨发迟。及看花落后，却忆未开时。
幸有抛球乐，一杯君莫辞。

· 全唐诗 ·

卷 28_29【杂曲歌辞·太平乐】

白居易

岁丰仍节俭，时泰更销兵。圣念长如此，何忧不太平。

湛露浮尧酒，熏风起舜歌。愿同尧舜意，所乐在人和。

卷 28_30【杂曲歌辞·太平乐】

王涯

风俗今和厚，君王在穆清。行看采花曲，尽是太阶平。

卷 28_31【杂曲歌辞·太平乐】

张仲素

圣德超千古，皇威静四方。苍生今息战，无事觉时长。

· 全唐诗 ·

卷 28_32【杂曲歌辞·升平乐】

薛能

正气绕宫楼，皇居信上游。远冈延圣祚，平地载神州。
会合皆重译，潺湲近八流。中兴岂假问，据此自千秋。

寥泯敞延英，朝班立位横。宣传无草动，拜舞有衣声。
鸳瓦云消湿，虫丝日照明。辛勤自不到，遥见似前生。

处处足欢声，时康岁已深。不同三尺剑，应似五弦琴。
寿笑山犹尽，明嫌日有阴。何当怜一物，亦遣断愁吟。

曙质绝埃氛，彤庭列禁军。圣颜初对日，龙尾竞缘云。
佩响交成韵，帘阴暖带纹。逍遥岂有事，于此咏南熏。

一物周天至，洪纤尽晏然。车书无异俗，甲子并丰年。
奇技皆归朴，征夫亦服田。君王故不有，台鼎合韦弦。

日日听歌谣，区中尽祝尧。虫蝗初不害，夷狄近全销。
史笔唯书瑞，天台绝见祧。因令匹夫志，转欲事清朝。

品物尽昭苏，神功复帝谟。他时应有寿，当代且无虞。
赐历通遐俗，移关入半胡。鹓鹤一何幸，于此寄微躯。

无战复无私，尧时即此时。焚香临极早，待月卷帘迟。

· 全唐诗 ·

端拱乾坤内，何言黻纁垂。君看圣明验，只此是神龟。

旭日上清穹，明堂坐圣聪。衣裳承瑞气，冠冕盖重瞳。
花木经宵露，旌旗立仗风。何期于此地，见说似仙宫。

五帝三皇主，萧曹魏邴臣。文章惟反朴，戈甲尽生尘。
谏纸应无用，朝纲自有伦。升平不可纪，所见是闲人。

卷 28_33【杂曲歌辞·金缕衣】

劝君莫惜金缕衣，劝君惜取少年时。
花开堪折直须折，莫待无花空折枝。

卷 28_34【杂曲歌辞·凤归云】

滕潜

金井栏边见羽仪，梧桐树上宿寒枝。
五陵公子怜文彩，画与佳人刺绣衣。

饮啄蓬山最上头，和烟飞下禁城秋。
曾将弄玉归云去，金翮斜开十二楼。

· 全唐诗 ·

卷 28_35【杂曲歌辞·拜新月】

李端

开帘见新月，便即下阶拜。细语人不闻，北风吹裙带。

卷 28_36【杂曲歌辞·拜新月】

吉中孚妻

拜新月，拜月出堂前，暗魄深笼桂，虚弓未引弦。
拜新月，拜月妆楼上，鸾镜未安台，蛾眉已相向。
拜新月，拜月不胜情，庭前风露清，月临人自老，
望月更长生。东家阿母亦拜月，一拜一悲声断绝。
昔年拜月逞容仪，如今拜月双泪垂。回看众女拜新月，
却忆红闺年少时。

卷 28_37【杂曲歌辞·忆江南】

白居易

江南好，风景旧曾谙。日出江花红胜火，
春来江水绿如蓝。能不忆江南。

· 全唐诗 ·

江南忆，最忆是杭州。山寺月中寻桂子，
郡亭枕上看潮头。何日更重游。

江南忆，其次忆吴宫。吴酒一杯春竹叶，
吴娃双舞醉芙蓉。早晚复相逢。

卷 28_38【杂曲歌辞·忆江南】

刘禹锡

春过也，共惜艳阳年。犹有桃花流水上，
无辞竹叶醉樽前，惟待见青天。

春去也，多谢洛城人。弱柳从风疑举袂，
丛兰裊露似沾巾，独笑亦含颦。

卷 28_39【杂曲歌辞·宫中调笑】

王建

团扇，团扇，美人病来遮面。玉颜憔悴三年，
谁复商量管弦。弦管，弦管，春草昭阳路断。

胡蝶，胡蝶，飞上金花枝叶。君前对舞春风，
百叶桃花树红。红树，红树，燕语莺啼日暮。

· 全唐诗 ·

罗袖，罗袖，暗舞春风依旧。遥看歌舞玉楼，
好日新妆坐愁。愁坐，愁坐，一世虚生虚过。

杨柳，杨柳，日暮白沙渡口。船头江水茫茫，
商人少妇断肠。肠断，肠断，鹧鸪夜飞失伴。

卷 28_40【杂曲歌辞·宫中调笑】

韦应物

胡马，胡马，远放燕支山下。咆沙咆雪独嘶，
东望西望路迷。迷路，迷路，边草无穷日暮。

河汉，河汉，晓挂秋城漫漫。愁人起望相思，
江南塞北别离。离别，离别，河汉虽同路绝。

卷 28_41【杂曲歌辞·转应词】

戴叔伦

边草，边草，边草尽来兵老。山南山北雪晴，
千里万里月明。明月，明月，胡笳一声愁绝。

· 全唐诗 ·

卷 28_42【杂曲歌辞·宫中行乐词】

李白

小小生金屋，盈盈在紫微。山花插宝髻，石竹绣罗衣。
每出深宫里，常随步辇归。只愁歌舞散，化作彩云飞。

柳色黄金嫩，梨花白雪香。玉楼巢翡翠，金殿锁鸳鸯。
选妓随雕辇，征歌出洞房。宫中谁第一，飞燕在昭阳。

卢橘为秦树，葡萄出汉宫。烟花宜落日，丝管醉春风。
笛奏龙鸣水，箫吟凤下空。君王多乐事，何必向回中。

玉树春归日，金宫乐事多。后庭朝未入，轻辇夜相过。
笑出花间语，娇来烛下歌。莫教明月去，留着醉姮娥。

绣户香风暖，纱窗曙色新。宫花争笑日，池草暗生春。
绿树闻歌鸟，青楼见舞人。昭阳桃李月，罗绮自相亲。

今日明光里，还须结伴游。春风开紫殿，天乐下珠楼。
艳舞全知巧，娇歌半欲羞。更怜花月夜，宫女笑藏钩。

寒雪梅中尽，春风柳上归。宫莺娇欲醉，檐燕语还飞。
迟日明歌席，新花艳舞衣。晚来移彩仗，行乐泥光辉。

水绿南熏殿，花红北阙楼。莺歌闻太液，凤吹绕瀛洲。

· 全唐诗 ·

素女鸣珠佩，天人弄彩球。今朝风日好，宜入未央游。

卷 28_43【杂曲歌辞·宫中乐】

令狐楚

楚塞金陵静，巴山玉垒空。万方无一事，端拱大明宫。

霜霁长杨苑，冰开太液池。宫中行乐日，天下盛明时。

柳色烟相似，梨花雪不如。春风真有意，一一丽皇居。

月上宫花静，烟含苑树深。银台门已闭，仙漏夜沉沉。

九重青锁闼，百尺碧云楼。明月秋风起，珠帘上玉钩。

卷 28_44【杂曲歌辞·宫中乐】

张仲素

网户交如绮，纱窗薄似烟。乐吹天上曲，人是月中仙。

翠匣开寒镜，珠钗挂步摇。妆成只畏晓，更漏促春宵。

江果瑶池实，金盘露井冰。甘泉将避暑，台殿晓光凝。

· 全唐诗 ·

月彩浮鸾殿，砧声隔凤楼。笙歌临水槛，红烛乍迎秋。

奇树留寒翠，神池结夕波。黄山一夜雪，渭水雁声多。

卷 28_45【杂曲歌辞·踏歌词】

崔液

彩女迎金屋，仙姬出画堂。鸳鸯裁锦袖，翡翠帖花黄。
歌响舞分行，艳色动流光。

庭际花微落，楼前汉已横。金壶催夜尽，罗袖拂寒轻。
乐笑畅欢情，未半着天明。

卷 28_46【杂曲歌辞·踏歌词】

谢偃

春景娇春台，新露泣新梅。春叶参差吐，新花重迭开。
花影飞莺去，歌声度鸟来。倩看飘飘雪，何如舞袖回。

逶迤度香阁，顾步出兰闺。欲绕鸳鸯殿，先过桃李蹊。
风带舒还卷，簪花举复低。欲问今宵乐，但听歌声齐。

夜久星沉没，更深月影斜。裙轻才动佩，鬟薄不胜花。

· 全唐诗 ·

细风吹宝袜，轻露湿红纱。相看乐未已，兰灯照九华。

卷 28_47【杂曲歌辞·踏歌词】

张说

花萼楼前雨露新，长安城里太平人。
龙衔火树千灯艳，鸡踏莲花万岁春。

帝宫三五戏春台，行雨流风莫妒来。
西域灯轮千影合，东华金阙万重开。

卷 28_48【杂曲歌辞·踏歌行】

刘禹锡

春江月出大堤平，堤上女郎连袂行。
唱尽新词看不见，红霞影树鹧鸪鸣。

桃蹊柳陌好经过，灯下妆成月下歌。
为是襄王故宫地，至今犹自细腰多。

新词宛转递相传，振袖倾鬟风露前。
月落乌啼云雨散，游童陌上拾花钿。

· 全唐诗 ·

日暮江头闻竹枝，南人行乐北人悲。
自从雪里唱新曲，直至三春花尽时。

卷 28_49【杂曲歌辞·天长地久词】

卢纶

玉砌红花树，香风不敢吹。春光解天意，偏发殿南枝。

虹桥千步廊，半在水中央。天子方清暑，宫人重暮妆。

辞辇复当熊，倾心奉上宫。君王若看貌，甘在众妃中。

云日呈祥礼物殊，北庭生献五单于。
塞天万里无飞鸟，可在边城用郅都。

台殿云凉风日微，君王初赐六宫衣。
楼船罢泛归犹早，行道才人斗射飞。

卷 28_50【杂曲歌辞·漳乃曲】

元结

偏存名迹在人间，顺俗与时未安闲。
来谒大官兼问政，扁舟却入九疑山。

· 全唐诗 ·

湘江二月春水平，满月和风宜夜行。
唱桡欲过平阳戍，守吏相呼问姓名。

千里枫林烟雨深，无朝无暮有猿吟。
停桡静听曲中意，好是云山韶濩音。

零陵郡北湘水东，沅溪形胜满湘中。
溪口石颠堪自逸，谁能相伴作渔翁。

下泂船似入深渊，上泂船似欲升天。
泂南始到九疑郡，应绝高人乘兴船。

卷 28_51 【杂曲歌辞·十二月乐辞·正月】

李贺

上楼迎春新春归，暗黄着柳宫漏迟。薄薄淡霭弄野姿，
寒绿幽泥生短丝。锦床晓卧玉肌冷，露脸未开对朝暝。
官街柳带不堪折，早晚菖蒲胜绾结。

卷 28_52 【杂曲歌辞·十二月乐辞·二月】

李贺

二月饮酒采桑津，宜男草生兰笑人。蒲如交剑风如熏，

· 全唐诗 ·

劳劳胡燕怨酣春。薇帐逗烟生绿尘，金翅峨髻愁暮云，
沓飒起舞真珠裙。津头送别唱流水，酒客背寒南山死。

卷 28_53【杂曲歌辞·十二月乐辞·三月】

李贺

东方风来满眼春，花城柳暗愁几人。复宫深殿竹风起，
新翠舞襟静如水。光风转蕙百馀里，暖雾驱云扑天地。
军装宫妓扫蛾浅，摇摇锦旗夹城暖。曲水飘香去不归，
梨花落尽成秋苑。

卷 28_54【杂曲歌辞·十二月乐辞·四月】

李贺

晓凉暮凉树如盖，千山浓绿生云外。依微香雨青氛氲，
腻叶蟠花照曲门。金塘闲水摇碧漪，老景沉重无惊飞，
堕红残萼暗参差。

卷 28_55【杂曲歌辞·十二月乐辞·五月】

李贺

雕玉押帘上，轻韞笼虚门。井汲铅华水，扇织鸳鸯文。

· 全唐诗 ·

回雪舞凉殿，甘露洗空绿。罗袖从徊翔，香汗沾宝粟。

卷 28_56【杂曲歌辞·十二月乐辞·六月】

李贺

裁生罗，伐湘竹，帔拂疏霜簟秋玉。炎炎红镜东方开，
晕如车轮上徘徊，啾啾赤帝骑龙来。

卷 28_57【杂曲歌辞·十二月乐辞·七月】

李贺

星依云渚冷，露滴盘中圆。好花生木末，衰蕙愁空园。
夜天如玉砌，池叶极青钱。仅厌舞衫薄，稍知花簟寒。
晓风何拂拂，北斗光阑干。

卷 28_58【杂曲歌辞·十二月乐辞·八月】

李贺

嬾妾怨长夜，独客梦归家。傍檐虫缉丝，向壁灯垂花。
檐外月光吐，帘中树影斜。悠悠飞露姿，点缀池中荷。

· 全唐诗 ·

卷 28_59【杂曲歌辞·十二月乐辞·九月】

李贺

离宫散萤天似水，竹黄池冷芙蓉死。月缀金铺光脉脉，
凉苑虚庭空澹白。霜花飞飞风草草，翠锦斓斑满层道。
鸡人罢唱晓珑璁，鸦啼金井下疏桐。

卷 28_60【杂曲歌辞·十二月乐辞·十月】

李贺

玉壶银箭稍难倾，釭花夜笑凝幽明。碎霜斜舞上罗幕，
烛笼两行照飞阁。珠帷怨卧不成眠，金凤刺衣着体寒，
长眉对月斗弯环。

卷 28_61【杂曲歌辞·十二月乐辞·十一月】

李贺

宫城团回凛严光，白天碎碎堕琼芳。挝钟高饮千日酒，
却天凝寒作君寿。御沟泉合如环素，火井温水在何处。

· 全唐诗 ·

卷 28_62【杂曲歌辞·十二月乐辞·十二月】

李贺

日脚淡光红洒洒，薄霜不销桂枝下。
依稀和气解冬严，已就长日辞长夜。

卷 28_63【杂曲歌辞·十二月乐辞·闰月】

李贺

帝重光，年重时，七十二候回环推。天官玉管灰剩飞，
今岁何长来岁迟。王母移桃献天子，羲氏和氏迂龙辔。

卷 28_64【杂曲歌辞·桃花行】

李峤

岁去无言忽憔悴，时来含笑吐氛氲。
不能拥路迷仙客，故欲开蹊侍圣君。

· 全唐诗 ·

卷 28_65【杂曲歌辞·桃花行】

李义

绮萼成蹊遍籊芳，红英扑地满筵香。
莫将秋宴传王母，来比春华寿圣皇。

卷 28_66【杂曲歌辞·桃花行】

徐彦伯

源水丛花无数开，丹跗红萼间青梅。
从今结子三千岁，预喜仙游复摘来。

卷 28_67【杂曲歌辞·桃花行】

苏颋

桃花灼灼有光辉，无数成蹊点更飞。
为见芳林含笑待，遂同温树不言归。

· 全唐诗 ·

卷 28_68【杂曲歌辞·桃花行】

赵彦昭

红萼竞妍春苑曙，粉茸新向御筵开。
长年愿奉西王宴，近侍惭无东朔才。

卷 28_69【杂曲歌辞·苏摩遮】

张说

摩遮本出海西胡，琉璃宝服紫髯胡。
闻道皇恩遍宇宙，来时歌舞助欢娱。

绣装帕额宝花冠，夷歌骑舞借人看。
自能激水成阴气，不虑今年寒不寒。

腊月凝阴积帝台，豪歌击鼓送寒来。
油囊取得天河水，将添上寿万年杯。

寒气宜人最可怜，故将寒水散庭前。
惟愿圣君无限寿，长取新年续旧年。

昭成皇后帝家亲，荣乐诸人不比伦。
往日霜前花委地，今年雪后树逢春。

· 全唐诗 ·

卷 28_70【杂曲歌辞·舞马词】

张说

万玉朝宗凤宸，千金率领龙媒。
眄鼓凝骄躩蹀，听歌弄影徘徊。

天禄遥征卫叔，日龙上借羲和。
将共两骖争舞，来随八骏齐歌。

彩旄八佾成行，时龙五色因方。
屈膝衔杯赴节，倾心献寿无疆。

帝皂龙驹沛艾，星兰骥子权奇。
腾倚骧洋应节，繁骄接迹不移。

二圣先天合德，群灵率土可封。
击石骧𩇑紫燕，拊金顾步苍龙。

圣君出震应策，神马浮河献图。
足踏天庭鼓舞，心将帝乐踟蹰。

· 全唐诗 ·

卷 28_71【杂曲歌辞·舞马千秋万岁乐府词】

张说

金天诞圣千秋节，玉醴还分万寿觞。试听紫骝歌乐府，
何如騄骥舞华冈。连骞势出鱼龙变，蹀躞骄生鸟兽行。
岁岁相传指树日，翩翩来伴庆云翔。

圣王至德与天齐，天马来仪自海西。腕足齐行拜两膝，
繁骄不进蹈千蹄。髣髴奋鬣时蹲踏，鼓怒骧身忽上跻。
更有衔杯终宴曲，垂头掉尾醉如泥。

远听明君爱逸才，玉鞭金翅引龙媒。不因兹白人间有，
定是飞黄天上来。影弄日华相照耀，喷含云色且徘徊。
莫言阙下桃花舞，别有河中兰叶开。

卷 28_72【杂曲歌辞·小曲新词】

白居易

霁色鲜宫殿，秋声脆管弦。圣明千岁乐，岁岁似今年。

红裙明月夜，碧殿早秋时。好向昭阳宿，天凉玉漏迟。

· 全唐诗 ·

卷 28_73【杂曲歌辞·闺怨词】

白居易

朝憎莺百啭，夜妒燕双栖。不惯经春别，谁知到晓啼。
珠箔笼寒月，纱窗背晓灯。夜来巾上泪，一半是春冰。
关山征戍远，闺阁别离难。苦战应憔悴，寒衣不要宽。

卷 28_74【杂曲歌辞·皇帝感词】

卢纶

提剑云雷动，垂衣日月明。禁花呈瑞色，国老见星精。
发棹鱼先跃，窥巢鸟不惊。山呼一万岁，直入九重城。
天衣五凤彩，御马六龙文。雨露清驰道，风雷翊上军。
高旂花外转，行漏乐前闻。时见金鞭举，空中指瑞云。
妙算干戈止，神谋宇宙清。两阶文物盛，七德武功成。
校猎长杨苑，屯军细柳营。归来献明主，歌舞隘春城。
天乐下天中，云輶俨在空。铅黄艳河汉，语笑合笙镛。
已见长随凤，仍闻不避熊。君王亲试舞，阊阖静无风。

· 全唐诗 ·

第二十九卷

卷 29_1【杂歌谣辞·渔父歌】

张志和

西塞山边白鹭飞，桃花流水鳊鱼肥。青箬笠，绿蓑衣，
春江细雨不须归。

钓台渔父褐为裘，两两三三舴艋舟。能纵棹，惯乘流，
长江白浪不曾忧。

霅溪湾里钓鱼翁，舴艋为家西复东。江上雪，浦边风，
笑着荷衣不叹穷。

松江蟹舍主人欢，菰饭莼羹亦共餐。枫叶落，荻花干，
醉宿渔舟不觉寒。

青草湖中月正圆，巴陵渔父棹歌连。钓车子，掘头船，
乐在风波不用仙。

· 全唐诗 ·

卷 29_2【杂歌谣辞·渔父歌】

和凝

白芷汀寒立鹭鸶，蘋风轻翦浪花时。烟幂幂，日迟迟，
香引芙蓉惹钓丝。

卷 29_3【杂歌谣辞·渔父歌】

欧阳炯

风浩寒溪照胆明，小君山上玉蟾生。荷露坠，翠烟轻，
拨刺游鱼几处惊。

卷 29_4【杂歌谣辞·渔父歌】

李珣

水接衡门十里馀，信船归去卧看书。轻爵禄，慕玄虚，
莫道渔人只为鱼。

避世垂纶不记年，官高争得似君闲。倾白酒，对青山，
笑指柴门待月还。

· 全唐诗 ·

棹警鸥飞水溅袍，影侵潭面柳垂绦。终日醉，绝尘劳，
曾见钱塘八月涛。

卷 29_5【杂歌谣辞·鸡鸣曲】

王建

鸡初鸣，明星照东屋。鸡再鸣，红霞生海腹。
百官待漏双阙前，圣人亦挂山龙服。宝钗命妇灯下起，
环佩玲珑晓光里。直内初烧玉案香，司更尚滴铜壶水。
金吾卫里直郎妻，到明不睡听晨鸡。天头日月相送迎，
夜栖旦鸣人不迷。

卷 29_6【杂歌谣辞·鸡鸣曲】

李廓

星稀月没上五更，胶胶角角鸡初鸣。征人牵马出门立，
辞妾欲向安西行。再鸣引颈檐头下，月中角声催上马。
才分地色第三鸣，旌旗红尘已出城。妇人上城乱招手，
夫婿不闻遥哭声。长恨鸡鸣别时苦，不遣鸡栖近窗户。

· 全唐诗 ·

卷 29_7【杂歌谣辞·吴楚歌（一曰燕美人歌）】

张籍

庭前春鸟啄林声，红夹罗襦缝未成。
今朝社日停针线，起向朱樱树下行。

卷 29_8【杂歌谣辞·李夫人歌】

李商隐

一带不结心，两股方安髻。惭愧白茅人，月没教星替。

剩结茱萸枝，多擘秋莲的。独自看波光，彩囊盛不得。

蛮丝系条脱，妍眼和香屑。寿宫不惜铸南人，
柔肠早被秋波割。清澄有馀幽素香，鰕鱼渴凤真珠房。
不知瘦骨类冰井，更许夜帘通晓霜。土花漠碧云茫茫，
黄河欲尽天苍黄。

卷 29_9【杂歌谣辞·李夫人歌】

李贺

紫皇宫殿重重开，夫人飞入琼瑶台。绿香绣帐何时歇，

· 全唐诗 ·

青云无光宫水咽。翩联桂花坠秋月，孤鸾惊啼商丝发。
红壁阑珊悬佩当，歌台小妓遥相望。玉蟾滴水鸡人唱，
露华兰叶参差光。

卷 29_10【杂歌谣辞·李夫人歌】

鲍溶

璇闺羽帐华烛陈，方士夜降夫人神。葳蕤半露芙蓉色，
窈窕将期环佩身。丽如三五月，可望难亲近。
颦黛含犀竟不言，春思秋怨谁能问。欲求巧笑如生时，
歌坐在空瑟衔丝。神来未及梦相见，帝比初亡心更悲。
爱之欲其生又死，东流万代无回水。宫漏丁丁夜向晨，
烟销雾散愁方士。

卷 29_11【杂歌谣辞·李夫人歌】

张祜

延年不语望三星，莫说夫人上涕零。
争奈世间惆怅在，甘泉宫夜看图形。

· 全唐诗 ·

卷 29_12【杂歌谣辞·中山孺子妾歌】

李白

中山孺子妾，特以色见珍。虽不如延年妹，
亦是当时绝世人。桃李出深井，花艳惊上春。
一贵复一贱，关天岂由身。芙蓉老秋霜，团扇羞网尘。
戚姬髡入春市，万古共悲辛。

卷 29_13【杂歌谣辞·临江王节士歌】

李白

洞庭白波木叶稀，燕鸿始入吴云飞。吴云寒，燕鸿苦，
风号沙宿潇湘浦，节士感秋泪如雨。白日当天心，
照之可以事明主。壮士愤，雄风生，安得倚天剑，
跨海斩长鲸。

卷 29_14【杂歌谣辞·司马将军歌（代陇上健儿陈安）】

李白

狂风吹古月，窃弄章华台。北落明星动光彩，
南征猛将如云雷。手中电曳倚天剑，直斩长鲸海水开。

· 全唐诗 ·

我见楼船壮心目，颇似龙骧下三蜀。扬兵习战张虎旗，
江中白浪如银屋。身居玉帐临河魁，紫髯若戟冠崔嵬。
细柳开营揖天子，始知灞上为婴孩。羌笛横吹阿鞞回，
向月楼中吹落梅。将军自起舞长剑，壮士呼声动九垓。
功成献凯见明主，丹青画像麒麟台。

卷 29_15【杂歌谣辞·郑樱桃歌】

李颀

石季龙，僭天禄，擅雄豪，美人姓郑名樱桃。
樱桃美颜香且泽，娥娥侍寝专宫掖。后庭卷衣三万人，
翠眉清镜不得亲。官军女骑一千匹，繁花照耀漳河春。
织成花映红纶巾，红旗掣曳卤簿新。鸣鞞走马接飞鸟，
铜驮琴瑟随去尘。凤阳重门如意馆，百尺金梯倚银汉。
自言富贵不可量，女为公主男为王。赤花双簪珊瑚床，
盘龙斗帐琥珀光。淫昏伪位神所恶，灭石者陵终不误。
邺城苍苍白露微，世事翻覆黄云飞。

卷 29_16【杂歌谣辞·襄阳歌】

李白

落日欲没岷山西，倒着接篱花下迷。襄阳小儿齐拍手，
拦街争唱白铜鞮。傍人借问笑何事，笑杀山公醉似泥。

· 全唐诗 ·

鸛鵒杓，鸛鵒杯，百年三万六千日，一日须倾三百杯。
遥看汉水鸭头绿，恰似葡萄初醖醅。此江若变作春酒，
垒曲便筑糟丘台。千金骏马换少妾，醉坐雕鞍歌落梅。
车傍侧挂一壶酒，凤笙龙管行相催。咸阳市上叹黄犬，
何如月下倾金罍。君不见晋朝羊公一片石，
龟龙剥落生莓苔。泪亦不能为之堕，心亦不能为之哀。
谁能忧彼身后事，金凫银鸭葬死灰。
清风朗月不用一钱买，玉山自倒非人推。
舒州杓，力士铛，李白与尔同死生。襄王云雨今安在，
江水东流猿夜声。

卷 29_23【杂歌谣辞·襄阳曲】

李白

襄阳行乐处，歌舞白铜鞮。江城回渌水，花月使人迷。
山公醉酒时，酩酊襄阳下。头上白接篱，倒着还骑马。
岘山临汉江，水渌沙如雪。上有堕泪碑，青苔久磨灭。
且醉习家池，莫看堕泪碑。山公欲上马，笑杀襄阳儿。

· 全唐诗 ·

卷 29_33【杂歌谣辞·苏小小歌】

李贺

幽兰露，如啼眼。无物结同心，烟花不堪翦。草如茵，
松如盖。风为裳，水为佩。油壁车，久相待。
冷翠烛，劳光彩。西陵下，风吹雨。

卷 29_34【杂歌谣辞·苏小小歌】

温庭筠

买莲莫破券，买酒莫解金。酒里春容抱离恨，
水中莲子怀芳心。吴公女儿腰似束，家在钱塘小江曲。
一自檀郎逐便风，门前春水年年绿。

卷 29_35【杂歌谣辞·苏小小歌】

张祜

车轮不可遮，马足不可绊。长怨十字街，使郎心四散。
新人千里去，故人千里来。剪刀横眼底，方觉泪难裁。

· 全唐诗 ·

登山不愁峻，涉海不愁深。中擘庭前枣，教郎见赤心。

卷 29_36【杂歌谣辞·挟瑟歌】

陆龟蒙

挟瑟为君抚，君嫌声太古。寥寥倚浪丝，
杳杳祭沉湘语。赖有秋风知，清冷吹玉柱。

卷 29_37【杂歌谣辞·敕勒歌】

敕勒金隗壁，阴山无岁华。帐外风飘雪，营前月照沙。
羌儿吹玉管，胡姬踏锦花。却笑江南客，梅落不归家。

卷 29_38【杂歌谣辞·黄獐歌】

黄獐黄獐草里藏，弯弓射尔伤。

卷 29_39【杂歌谣辞·得体歌】

得体乞那也，乞囊得体那。潭里船车闹，扬州铜器多。
三郎当殿坐，听唱得体歌。

· 全唐诗 ·

卷 29_40【杂歌谣辞·得宝歌】

得宝弘农野，弘农得宝那。潭里船车闹，扬州铜器多。
三郎当殿坐，听唱得宝歌。

卷 29_41【杂歌谣辞·黄台瓜辞】

李贤

种瓜黄台下，瓜熟子离离。一摘使瓜好，再摘令瓜稀。
三摘尚自可，摘绝抱蔓归。

卷 29_42【杂歌谣辞·古歌】

沉佺期

落叶流风向玉台，夜寒秋思洞房开。水精帘外金波下，
云母窗前银河回。玉阶阴阴苔藓色，君王履綦难再得。
璇闺窈窕秋夜长，绣户徘徊秋月光。燕姬彩帐芙蓉色，
秦子金炉兰麝香。北斗七星横夜半，清歌一曲断君肠。

· 全唐诗 ·

卷 29_43【杂歌谣辞·古歌】

薛维翰

美人怨何深，含情倚金阁。不嚬复不语，红泪双双落。

美人闭红烛，烛坐裁新锦。频放剪刀声，夜寒知未寝。

卷 29_44【杂歌谣辞·黄昙子歌】

温庭筠

参差绿蒲短，摇艳云塘满。红湫荡融融，莺翁鸂鶒暖。

菱芊小城路，马上修蛾懒。罗衫杳向风，点粉金鹂卵。

卷 29_45【杂歌谣辞·邯郸郭公辞】

温庭筠

金笳悲故曲，玉座积深尘。言是邯郸伎，不易邺城人。

青苔竟埋骨，红粉自伤神。唯有漳河柳，还向旧营春。

· 全唐诗 ·

卷 29_46【杂歌谣辞·箜篌谣】

李白

攀天莫登龙，走山莫骑虎。贵贱结交心不移，
唯有严陵及光武。周公称大圣，管蔡宁兼容。
汉谣一斗粟，不与淮南舂。兄弟尚路人，吾心安所从。
它人方寸间，山海几千重。轻言托朋友，对面九疑峰。
多花必早落，桃李不如松。管鲍久已死，何人继其踪。

卷 29_47【杂歌谣辞·邺城童子谣】

李贺

邺城中，暮尘起。将黑丸，斫文吏。棘为鞭，虎为马。
团团走，邺城下。切玉剑，射日弓。献何人，奉相公。
扶毂来，关右儿。香扫途，相公归。

卷 29_48【杂歌谣辞·大麦行】

杜甫

大麦干枯小麦黄，妇人行泣夫走藏。东至集壁西梁洋，
问谁腰镰胡与羌。岂无蜀兵三千人，部领辛苦江山长。

· 全唐诗 ·

安得如鸟有羽翅，托身白云还故乡。

卷 29_49【杂歌谣辞·白鼉鸣】

张籍

天欲雨，有东风，南溪白鼉鸣窟中。六月人家井无水，
夜闻白鼉人尽起。

卷 29_50【杂歌谣辞·步虚词】

陈羽

汉武清斋读鼎书，内官扶上画云车。
坛上月明宫殿闭，仰看星斗礼空虚。

卷 29_51【杂歌谣辞·步虚词】

顾况

回步游三洞，清心礼七真。飞符超羽翼，禁火醮星辰。
残药沾鸡犬，灵香出凤麟。壶中无窄处，愿得一容身。

· 全唐诗 ·

卷 29_52【杂歌谣辞·步虚词】

刘禹锡

阿母种桃云海际，花落子成二千岁。
海风吹折最繁枝，跪捧琼盘献天帝。

华表千年鹤一归，凝丹为顶雪为衣。
星星仙语人听尽，却向五云翻翅飞。

卷 29_53【杂歌谣辞·步虚词】

韦渠牟

玉简真人降，金书道篆通。烟霞方蔽日，云雨已生风。
四极威仪异，三天使命同。那将人世恋，不去上清宫。

羽驾正翩翩，云鸿最自然。霞冠将月晓，珠佩与星连。
镂玉留新诀，雕金得旧编。不知飞鸟学，更有几人仙。

上帝求仙使，真符取玉郎。三才闲布象，二景郁生光。
骑吏排龙虎，笙歌走凤凰。天高人不见，暗入白云乡。

鸾鹤共徘徊，仙官使者催。香花三洞启，风雨百神来。
凤篆文初定，龙泥印已开。何须生羽翼，始得上瑶台。

· 全唐诗 ·

羽节忽排烟，苏君已得仙。命风驱日月，缩地走山川。
几处留丹灶，何时种玉田。一朝骑白虎，直上紫微天。

静发降灵香，思神意智长。虎存时促步，龙想更成章。
扣齿风雷响，挑灯日月光。仙云在何处，仿佛满空堂。

几度游三洞，何方召百神。风云皆守一，龙虎亦全真。
执节仙童小，烧香玉女春。应须绝岩内，委曲问皇人。

上法杳无营，玄修似有情。道宫琼作想，真帝玉为名。
召岳驱旌节，驰雷发吏兵。云车降何处，斋室有仙卿。

羽卫一何鲜，香云起暮烟。方朝太素帝，更向玉清天。
凤曲凝犹吹，龙骖俨欲前。真文几时降，知在永和年。

大道何年学，真符此日催。还持金作印，未要玉为台。
羽节分明授，霞衣整顿裁。应缘五云使，教上列仙来。

独自授金书，萧条咏紫虚。龙行还当马，云起自成车。
九转风烟合，千年井灶馀。参差从太一，寿等混元初。

道学已通神，香花会女真。霞床珠斗帐，金荐玉舆轮。
一室心偏静，三天夜正春。灵官竟谁降，仙相有夫人。

上界有黄房，仙家道路长。神来知位次，乐变协宫商。
竞把琉璃碗，谁倾白玉浆。霞衣最芬馥，苏合是灵香。

· 全唐诗 ·

珠佩紫霞纓，夫人会八灵。太霄犹有观，绝宅岂无形。
暮雨徘徊降，仙歌宛转听。谁逢玉妃辇，应检九真经。

西海辞金母，东方拜木公。云行疑带雨，星步欲凌风。
羽袖挥丹凤，霞巾曳彩虹。飘飘九霄外，下视望仙宫。

玉树杂金花，天河织女家。月邀丹凤舄，风送紫鸾车。
雾縠笼绡带，云屏列锦霞。瑶台千万里，不觉往来赊。

舞凤凌天出，歌麟入夜听。云容衣眇眇，风韵曲泠泠。
扣齿端金简，焚香检玉经。仙宫知不远，只近太微星。

紫府与玄洲，谁来物外游。无烦骑白鹿，不用驾青牛。
金化颜应驻，云飞鬓不秋。仍闻碧海上，更用玉为楼。

鸾鹤复骖鸾，全家去不难。鸡声随羽化，犬影入云看。
酿玉当成酒，烧金且转丹。何妨五色绶，次第给仙官。

卷 29_54【杂歌谣辞·步虚词】

皎然

予因览真诀，遂感西域君。玉笙下青冥，人间未曾闻。
日华炼魂魄，皎皎无垢氛。谓我有仙骨，且令饵氤氲。
俯仰愧灵颜，愿随鸾鹤群。俄然动风驭，缥缈归青云。

· 全唐诗 ·

卷 29_55【杂歌谣辞·步虚词】

高骈

青溪道士人不识，上天下天鹤一只。
洞门深锁碧窗寒，滴露研朱写周易。

卷 29_56【杂歌谣辞·步虚引】

陈陶

小隐山人十洲客，莓苔为衣双耳白。青编为我忽降书，
暮雨虹霓一千尺。赤城门闭六丁直，晓日已烧东海色。
朝天半夜闻玉鸡，星斗离离碍龙翼。

· 全唐诗 ·

第三十卷

卷 30_1 【咏汉高祖】

王珪

汉祖起丰沛，乘运以跃鳞。手奋三尺剑，西灭无道秦。
十月五星聚，七年四海宾。高抗威宇宙，贵有天下人。
忆昔与项王，契阔时未伸。鸿门既薄蚀，荥阳亦蒙尘。
虬虱生介冑，将卒多苦辛。爪牙驱信越，腹心谋张陈。
赫赫西楚国，化为丘与榛。

卷 30_2 【咏淮阴侯】

王珪

秦王日凶慝，豪杰争共亡。信亦胡为者，剑歌从项梁。
项羽不能用，脱身归汉王。道契君臣合，时来名位彰。
北讨燕承命，东驱楚绝粮。斩龙堰濉水，擒豹僭夏阳。
功成享天禄，建旗还南昌。千金答漂母，百钱酬下乡。
吉凶成纠缠，倚伏难预详。弓藏狡兔尽，慷慨念心伤。

· 全唐诗 ·

卷 30_3【早春桂林殿应诏】

陈叔达

金铺照春色，玉律动年华。朱楼云似盖，丹桂雪如花。
水岸衔阶转，风条出柳斜。轻舆临太液，湛露酌流霞。

卷 30_4【后渚置酒】

陈叔达

大渚初惊夜，中流沸鼓鼙。寒沙满曲浦，夕雾上邪溪。
岸广凫飞急，云深雁度低。严关犹未遂，此夕待晨鸡。

卷 30_5【听邻人琵琶】

陈叔达

本是龙门桐，因妍入汉宫。香缘罗袖里，声逐朱弦中。
虽有相思韵，翻将入塞同。关山临却月，花蕊散回风。
为将金谷引，添令曲未终。

· 全唐诗 ·

卷 30_6【州城西园入斋祠社】

陈叔达

升坛预洁祀，诘早肃分司。达气风霜积，登光日色迟。
农教先八政，阳和秩四时。祈年服垂冕，告币动褰帷。
瘞地尊馐奠，人天庶有资。椒兰卒清酌，簠簋彻香蕤。
折俎分归胙，充庭降受厘。方凭知礼节，况奉化雍熙。

卷 30_7【春首】

陈叔达

雪花联玉树，冰彩散瑶池。翔禽遥出没，积翠远参差。

卷 30_8【初年】

陈叔达

和风起天路，严气消冰井。索索枝未柔，厌厌漏犹永。

· 全唐诗 ·

卷 30_9【咏菊】

陈叔达

霜间开紫蒂，露下发金英。但令逢采摘，宁辞独晚荣。

卷 30_10【自君之出矣（一作贾冯吉诗）】

陈叔达

自君之出矣，红颜转憔悴。思君如明烛，煎心且衔泪。

自君之出矣，明镜罢红妆。思君如夜烛，煎泪几千行。

卷 30_11【赋饮马长城窟】

袁朗

朔风动秋草，清跸长安道。长城连不穷，所以隔华戎。
规模惟圣作，负荷晓成功。鸟庭已向内，龙荒更凿空。
玉关尘卷静，金微路已通。汤征随北怨，舜咏起南风。
画地功初立，绥边事云集。朝服践狼居，凯歌旋马邑。
山响传凤吹，霜华藻琼钗。属国拥节归，单于款关入。
日落寒风起，惊蓬被原隰。零落叶已寒，河流清且急。

· 全唐诗 ·

四时徭役尽，千载干戈戢。太平今若斯，汗马竟无施。
唯当事笔砚，归去草封禅。

卷 30_12【和洗掾登城南坂望京邑】

袁朗

二华连陌塞，九陇统金方。奥区称富贵，重险擅雄强。
龙飞灞水上，凤集岐山阳。神皋多瑞迹，列代有兴王。
我后膺灵命，爰求宅兹土。宸居法太微，建国资天府。
玄风叶黎庶，德泽浸区宇。醒醉各相扶，讴歌从圣主。
南登少陵岸，还望帝城中。帝城何郁郁，佳气乃葱葱。
金凤凌绮观，璇题敞兰宫。复道东西合，交衢南北通。
万国朝前殿，群公议宣室。鸣佩含早风，华蝉曜朝日。
柏梁宴初罢，千钟欢未毕。端拱肃岩廊，思贤听琴瑟。
逶迤万雉列，隐轸千闾布。飞甍夹御沟，曲台临上路。
处处歌钟鸣，喧阗车马度。日落长楸间，含情两相顾。
是月冬之季，阴寒昼不开。惊风四面集，飞雪千里回。
狐白登廊庙，牛衣出草莱。讵知韩长孺，无复重然灰。

卷 30_13【秋日应诏】

袁朗

玉树凉风举，金塘细草萎。叶落商飙观，鸿归明月池。

· 全唐诗 ·

迎寒桂酒熟，含露菊花垂。一奉章台宴，千秋长愿斯。

卷 30_14【秋夜独坐（一作邢邵诗）】

袁朗

危弦断客心，虚弹落惊禽。新秋百虑净，独夜九愁深。
枯蓬唯逐吹，坠叶不归林。如何悲此曲，坐作白头吟。

卷 30_15【出塞曲】

窦威

匈奴屡不平，汉将欲纵横。看云方结阵，却月始连营。
潜军度马邑，扬旆掩龙城。会勒燕然石，方传车骑名。

卷 30_16【新曲二首】

长孙无忌

侂阿家住朝歌下，早传名。结伴来游淇水上，旧长情。
玉佩金钿随步远，云罗雾縠逐风轻。转目机心悬自许，
何须更待听琴声。

· 全唐诗 ·

回雪凌波游洛浦，遇陈王。婉约娉婷工语笑，侍兰房。
芙蓉绮帐还开掩，翡翠珠被烂齐光。长愿今宵奉颜色，
不爱吹箫逐凤凰。

卷 30_17【灞桥待李将军】

长孙无忌

飒飒风叶下，遥遥烟景曛。霸陵无醉尉，谁滞李将军。

卷 30_18【奉和正日临朝】

颜师古

七府璿衡始，三元宝历新。负宸延百辟，垂旒御九宾。
肃肃皆鹓鹭，济济盛簪绅。天涯致重译，日域献奇珍。

卷 30_19【召拜御史大夫赠袁天纲】

杜濬

伊吕深可慕，松乔定是虚。系风终不得，脱屣欲安如。
且珍纨素美，当与薜萝疏。既逢杨得意，非复久闲居。

· 全唐诗 ·

卷 30_20 【咏寒食斗鸡应秦王教】

杜淹

寒食东郊道，扬鞞竞出笼。花冠初照日，芥羽正生风。
顾敌知心勇，先鸣觉气雄。长翘频扫阵，利爪屡通中。
飞毛遍绿野，洒血渍芳丛。虽然百战胜，会自不论功。

卷 30_21 【寄赠齐公】

杜淹

冠盖游梁日，诗书问志年。佩兰长坂上，攀桂小山前。
结交澹若水，履道直如弦。此欢终未极，于兹独播迁。
赭衣登蜀道，白首别秦川。泪随沟水逝，心逐晓旌悬。
去去逾千里，悠悠隔九天。郊野间长薄，城阙隐凝烟。
关门共月对，山路与云连。此时寸心里，难用尺书传。

· 全唐诗 ·

第三十一卷

卷 31_1【五郊乐章·黄帝宫音】

魏征

黄中正位，含章居贞。既长六律，兼和五声。
毕陈万舞，乃荐斯牲。神其下降，永祚休平。

卷 31_2【五郊乐章·肃和】

魏征

眇眇方舆，苍苍圜盖。至哉枢纽，宅中图大。
气调四序，风和万籁。祚我明德，时雍道泰。

卷 31_3【五郊乐章·雍和】

魏征

金悬夕肆，玉俎朝陈。飨荐黄道，芬流紫宸。
乃诚乃敬，载享载饔。崇荐斯在，惟皇是宾。

· 全唐诗 ·

卷 31_4【五郊乐章·舒和】

魏征

御征乘宫出郊甸，安歌率舞递将迎。
自有云门符帝赏，犹持雷鼓答天成。

卷 31_5【五郊乐章·青帝角音】

魏征

鹤云旦起，鸟星昏集。律候新风，阳开初蛰。
至德可飧，行潦斯挹。锡以无疆，烝人乃粒。

卷 31_6【五郊乐章·肃和】

魏征

玄鸟司春，苍龙登岁。节物变柳，光风转蕙。
瑶席降神，朱弦飨帝。诚备祝嘏，礼殚珪币。

· 全唐诗 ·

卷 31_7【五郊乐章·雍和】

魏征

大乐稀音，至诚简礼。文物棣棣，声名济济。
六变有成，三登无体。乃眷丰絜，恩覃恺悌。

卷 31_8【五郊乐章·舒和】

魏征

笙歌箫舞属年韶，鹭鼓鳀钟展时豫。
调露初迎绮春节，承云遽践苍霄驭。

卷 31_9【五郊乐章·赤帝征音】

魏征

青阳告谢，朱明戒序。咸长是祈，敬陈椒醑。
博硕斯荐，笙镛备举。庶尽肃恭，非馨稷黍。

· 全唐诗 ·

卷 31_10【五郊乐章·肃和】

魏征

离位克明，火中宵见。峰云暮起，景风晨扇。
木槿初荣，含桃可荐。芬馥百品，铿锵三变。

卷 31_11【五郊乐章·雍和】

魏征

昭昭丹陆，帟帟炎方。礼陈牲币，乐备篪簧。
琼羞溢俎，玉醑浮觞。恭惟正直，歆此馨香。

卷 31_12【五郊乐章·舒和】

魏征

千里温风飘降羽，十枝炎景睴朱干。
陈觞荐俎歌三献，拊石攄金会七盘。

· 全唐诗 ·

卷 31_13【五郊乐章·白帝商音】

魏征

白藏应节，天高气清。岁功既阜，庶类收成。
万方静谧，九土和平。馨香是荐，受祚聪明。

卷 31_14【五郊乐章·肃和】

魏征

金行在节，素灵居正。气肃霜严，林凋草劲。
豺祭隼击，潦收川镜。九谷已登，万箱流咏。

卷 31_15【五郊乐章·雍和】

魏征

律应西成，气躔南吕。珪币咸列，笙竽备举。
苾苾兰羞，芬芬桂醑。式资宴飨，用调霜序。

· 全唐诗 ·

卷 31_16【五郊乐章·舒和】

魏征

璿仪气爽惊缇籥，玉吕灰飞含素商。
鸣鞀奏管芳羞荐，会舞安歌葆彤扬。

卷 31_17【五郊乐章·黑帝羽音】

魏征

严冬季月，星回风厉。享祀报功，方祚来岁。

卷 31_18【五郊乐章·肃和】

魏征

律周玉琯，星回金度。次极阳乌，纪穷阴兔。
火林散雪，阳泉凝沍。八蜡已登，三农息务。

卷 31_19【五郊乐章·雍和】

魏征

阳月斯纪，应钟在候。载絜牲牷，爰登俎豆。

· 全唐诗 ·

既高既远，无声无臭。静言格思，惟神保佑。

卷 31_20【五郊乐章·舒和】

魏征

执籥持羽初终曲，朱干玉戚始分行。
七德九功咸已畅，明灵降福具穰穰。

卷 31_21【享太庙乐章·永和】

魏征

于穆烈祖，弘此丕基。永言配命，子孙保之。
百神既洽，万国在兹。是用孝享，神其格思。

卷 31_22【享太庙乐章·肃和】

魏征

大哉至德，允兹明圣。格于上下，聿遵诚敬。
嘉乐斯登，鸣球以咏。神其降止，式隆景命。

· 全唐诗 ·

卷 31_23【享太庙乐章·雍和】

魏征

崇兹享祀，诚敬兼至。乐以感灵，礼以昭事。
粢盛咸絜，牲牷孔备。永言孝思，庶几不匮。

卷 31_24【享太庙乐章·长发舞】

魏征

濬哲惟唐，长发其祥。帝命斯祐，王业克昌。
配天载德，就日重光。本枝百代，申锡无疆。

卷 31_25【享太庙乐章·大基舞】

魏征

猗与祖业，皇矣帝先。剪商德厚，封唐庆延。
在姬犹稷，方晋逾宣。基我鼎运，于斯万年。

· 全唐诗 ·

卷 31_26【享太庙乐章·大成舞】

魏征

周穆王季，晋美帝文。明明盛德，穆穆齐芬。
藏用四履，屈道参分。铿锵钟石，载纪鸿勋。

卷 31_27【享太庙乐章·大明舞】

魏征

五纪更运，三正递升。勋华既没，禹汤勃兴。神武命代，
灵眷是膺。望云彰德，察纬告征。上纽天维，下安地轴。
征师涿野，万国咸服。偃伯灵台，九官允穆。殊域委赆，
怀生介福。大礼既饰，大乐已和。黑章扰圉，赤字浮河。
功宣载籍，德被咏歌。克昌厥后，百禄是荷。

卷 31_28【享太庙乐章·寿和】

魏征

八音斯奏，三献毕陈。宝祚惟永，晖光日新。

· 全唐诗 ·

卷 31_29【享太庙乐章·舒和】

魏征

圣敬通神光七庙，灵心荐祚和万方。
严禋克配鸿基远，明德惟馨凤历昌。

卷 31_30【享太庙乐章·雍和】

魏征

于穆清庙，聿修严祀。四县载陈，三献斯止。
笾豆撤荐，人祗介祉。神惟格思，锡祚不已。

卷 31_31【享太庙乐章·永和】

魏征

肃肃清祀，蒸蒸孝思。荐享昭备，虔恭在兹。
雍歌撤俎，祝嘏陈辞。用光武志，永固鸿基。

· 全唐诗 ·

卷 31_32【赋西汉】

魏征

受降临轺道，争长趣鸿门。驱传渭桥上，观兵细柳屯。
夜宴经柏谷，朝游出杜原。终藉叔孙礼，方知皇帝尊。

卷 31_33【暮秋言怀】

魏征

首夏别京辅，杪秋滞三河。沉沉蓬莱阁，日夕乡思多。
霜剪凉阶蕙，风捎幽渚荷。岁芳坐沦歇，感此式微歌。

卷 31_34【述怀（出关）】

魏征

中原初逐鹿，投笔事戎轩。纵横计不就，慷慨志犹存。
杖策谒天子，驱马出关门。请缨系南粤，凭轼下东藩。
郁纡陟高岫，出没望平原。古木鸣寒鸟，空山啼夜猿。
既伤千里目，还惊九折魂。岂不惮艰险，深怀国土恩。
季布无二诺，侯嬴重一言。人生感意气，功名谁复论。

· 全唐诗 ·

卷 31_35【奉和正日临朝应诏】

魏征

百灵侍轩后，万国会涂山。岂如今睿哲，迈古独光前。
声教溢四海，朝宗引百川。锵洋鸣玉佩，灼烁耀金蝉。
淑景辉雕辇，高旌扬翠烟。庭实超王会，广乐盛钧天。
既欣东日户，复咏南风篇。愿奉光华庆，从斯亿万年。

· 全唐诗 ·

第三十二卷

卷 32_1【祈谷乐章·肃和】

褚亮

履艮斯绳，居中体正。龙运垂祉，昭符启圣。
式事严禋，聿怀嘉庆。惟帝永锡，时皇休命。

卷 32_2【祈谷乐章·雍和】

褚亮

，
殷荐乘春，太坛临曙。八簋盈和，六瑚登御。
嘉稷匪歆，德馨斯饫。祝嘏无易，灵心有豫。

卷 32_3【祈谷乐章·舒和】

褚亮

玉帛牺牲申敬享，金丝戚羽盛音容。

· 全唐诗 ·

庶俾亿龄禔景福，长欣万宇洽时邕。

卷 32_4【明堂乐章·肃和】

褚亮

象天御宇，乘时布政。严配申虔，宗禋展敬。
樽壺盈列，树羽交映。玉帛通诚，祚隆皇圣。

卷 32_5【明堂乐章·雍和】

褚亮

八牖晨披，五精朝奠。雾凝璇筐，风清金悬。
神涤备全，明粢丰衍。载絜彝俎，陈诚以荐。

卷 32_6【明堂乐章·舒和】

褚亮

御宸合宫承宝历，席图重馆奉明灵。
偃武修文九围泰，沉烽静柝八荒宁。

· 全唐诗 ·

卷 32_7【雩祀乐章·肃和】

褚亮

朱鸟开辰，苍龙启映。大帝昭飨，群生展敬。
礼备怀柔，功宣舞咏。旬液应序，年祥叶庆。

卷 32_8【雩祀乐章·雍和】

褚亮

绀筵分彩，宝图吐绚。凤管晨凝，云歌晓啖。
肃事蘋藻，虔申桂奠。百谷斯登，万箱攸荐。

卷 32_9【雩祀乐章·舒和】

褚亮

凤曲登歌调令序，龙雩集舞泛祥风。
彩旄云回昭睿德，朱干电发表神功。

· 全唐诗 ·

卷 32_10【享先农乐章·诚和】

褚亮

粒食伊始，农之所先。古今攸赖，是曰人天。
耕斯帝籍，播厥公田。式崇明祀，神其福焉。

卷 32_11【享先农乐章·肃和】

褚亮

樽彝既列，瑚簋方荐。歌工载登，币礼斯奠。
肃肃享祀，颙颙纓弁。神之听之，福流寰县。

卷 32_12【享先农乐章·雍和】

褚亮

前夕视牲，质明奉俎。沐芳整弁，其仪式序。
盛礼毕陈，嘉乐备举。歆我懿德，非馨稷黍。

· 全唐诗 ·

卷 32_13【享先农乐章·舒和】

褚亮

羽籥低昂文缀已，干戚蹈厉武行初。
望岁祈农神所听，延祥介福岂云虚。

卷 32_14【祭神州乐章·肃和】

褚亮

大矣坤仪，至哉神县。包含日域，牢笼月竈。
露絜三清，风调六变。皇祇届止，式歆恭荐。

卷 32_15【祭神州乐章·雍和】

褚亮

泰圻严享，阴郊展敬。礼以导神，乐以和性。
黝牲在列，黄琮俯映。九土既平，万邦贻庆。

· 全唐诗 ·

卷 32_16【祭神州乐章·舒和】

褚亮

坤道降祥和庶品，灵心载德厚群生。
水土既调三极泰，文武毕备九区平。

卷 32_17【祭方丘乐章·顺和】

褚亮

万物资以化，交泰属升平。易从业惟简，得一道斯宁。
具仪光玉帛，送舞变咸英。黍稷良非贵，明德信惟馨。

卷 32_18【祭方丘乐章·肃和】

褚亮

至矣坤德，皇哉地祇。开元统纽，合大承规。
九宫肃列，六典相仪。永言配命，长保无亏。

· 全唐诗 ·

卷 32_19【祭方丘乐章·雍和】

褚亮

柔而能方，直而能敬。厚载以德，大亨以正。
有涤斯牲，有馨斯盛。介兹景福，祚我休庆。

卷 32_20【祭方丘乐章·舒和】

褚亮

玉帛牲牷分荐享，羽旄干戚递成容。
一德惟宁两仪泰，三材保合四时邕。

卷 32_21【祭方丘乐章·顺和】

褚亮

阴祗协赞，厚载方贞。牲币具举，箫管备成。
其礼惟肃，其德惟明。神之听矣，式鉴虔诚。

· 全唐诗 ·

卷 32_22 【临高台】

褚亮

高台暂俯临，飞翼耸轻音。浮光随日度，漾影逐波深。
回瞰周平野，开怀畅远襟。独此三休上，还伤千岁心。

卷 32_23 【赋得蜀都】

褚亮

列宿光参井，分芒跨梁岷。沉犀对江浦，驷马入城闉。
英图多霸迹，历选有名臣。连骑簪缨满，含章词赋新。
得上仙槎路，无待访严遵。

卷 32_24 【奉和咏日午】

褚亮

曦车日亭午，浮箭未移晖。日光无落照，树影正中围。
草萎看稍靡，叶燥望疑稀。昼寝惭经笥，暂解入朝衣。

· 全唐诗 ·

卷 32_25【奉和望月应魏王教】

褚亮

层轩登皎月，流照满中天。色共梁珠远，光随赵璧圆。
落影临秋扇，虚轮入夜弦。所欣东馆里，预奉西园篇。

卷 32_26【咏花烛（烛花）】

褚亮

兰径香风满，梅梁暖日斜。言是东方骑，来寻南陌车。
靺星临夜烛，眉月隐轻纱。莫言春稍晚，自有镇开花。

卷 32_27【在陇头哭潘学士】

褚亮

陇底嗟长别，流襟一恸君。何言幽咽所，更作死生分。
转蓬飞不息，悲松断更闻。谁能驻征马，回首望孤坟。

· 全唐诗 ·

卷 32_28【奉和禁苑饯别应令】

褚亮

大藩初锡瑞，出牧迓皇京。暂以绿车重，言承朱传荣。
舒桃临远骑，垂柳映京营。惠化宣千里，威风动百城。
禁籞芳嘉节，神襟饯送情。金笳催别景，玉琯切离声。
野花开更落，山鸟哢还惊。微臣夙多幸，薄宦奉储明。
钓台惭作赋，伊水滥闻笙。怀德良知久，酬恩识命轻。

卷 32_29【和御史韦大夫喜霁之作】

褚亮

晴天度旅雁，斜影照残虹。野净馀烟尽，山明远色同。
沙平寒水落，叶脆晚枝空。白简光朝幘，彤驺出禁中。
息驾游兰坂，雕文折桂丛。无因轻羽扇，徒自仰仁风。

卷 32_30【晚别乐记室彦】

褚亮

穷途属岁晚，临水忽分悲。抱影同为客，伤情共此时。
雾色侵虚牖，霜氛冷薄帷。举袂惨将别，停怀怅不怡。

· 全唐诗 ·

风严征雁远，雪暗去篷迟。他乡有岐路，游子欲何之。

卷 32_31【伤始平李少府正己】

褚亮

劳息本相循，悲欢理自均。谁能免玄夜，惜尔正青春。
迈德惟家宝，生才谅国珍。高文缀翡翠，茂学掩麒麟。
述作纷无已，言谈妙入神。断肠虽累月，分手未盈旬。
辅嗣俄长往，颜生即短辰。声华满昭代，形影委穷尘。
禅草回中使，生刍引吊宾。同游秘府日，方驾直城闉。
并拜黄图右，分曹清渭滨。风期嵇吕好，存殁范张亲。
虚座怜王述，遗篇恸景纯。精灵与毫翰，千祀寿何人。

卷 32_32【秋雁（一作虞世南诗）】

褚亮

日暮霜风急，羽翮转难任。为有传书意，翩翩入上林。

· 全唐诗 ·

卷 32_33【句（赠杜侍御）】

褚亮

神羊既不触，夕鸟欲依人。

· 全唐诗 ·

第三十三卷

卷 33_1【冬日宴群公于宅各赋一字得杯】

于志宁

陋巷朱轩拥，衡门缙骑来。俱裁七步咏，同倾三雅杯。
色动迎春柳，花发犯寒梅。宾筵未半醉，骊歌不用催。

卷 33_2【冬日宴于庶子宅各赋一字得趣】

令狐德棻

高门聊命赏，群英于此遇。放旷山水情，留连文酒趣。
夕烟起林兰，霜枝殒庭树。落景虽已倾，归轩幸能驻。

卷 33_3【冬日宴于庶子宅各赋一字得色】

封行高

夫君敬爱重，欢言情不极。雅引发清音，丽藻穷雕饰。

· 全唐诗 ·

水结曲池冰，日暖平亭色。引满既杯倾，终之以弁侧。

卷 33_4【冬日宴于庶子宅各赋一字得节】

杜正伦

李门余妄进，徐榻君恒设。清论畅玄言，雅琴飞白雪。
寒云暖落景，朔风凄暮节。方欣投辖情，且驻当归别。

卷 33_5【玄武门侍宴（一作侍宴北门）】

杜正伦

大君端宸暇，睿赏狎林泉。开轩临禁籞，藉野列芳筵。
参差歌管飏，容裔羽旗悬。玉池流若醴，云阁聚非烟。
湛露晞尧日，熏风入舜弦。大德侔玄造，微物荷陶甄。
谬陪瑶水宴，仍厕柏梁篇。阍名徒上月，邹辩讵谈天。
既喜光华旦，还伤迟暮年。犹冀升中日，簪裾奉肃然。

卷 33_6【奉和正日临朝】

岑文本

时雍表昌运，日正叶灵符。德兼三代礼，功包四海图。

· 全唐诗 ·

逾沙纷在列，执玉俨相趋。清跸喧辇道，张乐骇天衢。
拂蜺九旗映，仪凤八音殊。佳气浮仙掌，熏风绕帝梧。
天文光七政，皇恩被九区。方陪瘞玉礼，珥笔岱山隅。

卷 33_7【奉述飞白书势】

岑文本

六文开玉篆，八体曜银书。飞毫列锦绣，拂素起龙鱼。
凤举崩云绝，鸾惊游雾疏。别有临池草，恩沾垂露馀。

卷 33_8【冬日宴于庶子宅各赋一字得平】

岑文本

金兰笃惠好，尊酒畅生平。既欣投辖赏，暂缓望乡情。
爱景含霜晦，落照带风轻。于兹欢宴洽，宠辱讵相惊。

卷 33_9【安德山池宴集】

岑文本

甲第多清赏，芳辰命羽卮。书帷通行径，琴台枕槿篱。
池疑夜壑徙，山似郁洲移。雕楹网萝薜，激濑合埭篱。
鸟戏翻新叶，鱼跃动清漪。自得淹留趣，宁劳攀桂枝。

· 全唐诗 ·

卷 33_10【安德山池宴集】

刘洎

平阳擅歌舞，金谷盛招携。何如兼往烈，会赏叶幽栖。
已均朝野致，还欣物我齐。春晚花方落，兰深径渐迷。
蒲新节尚短，荷小盖犹低。无劳拂长袖，直待夜乌啼。

卷 33_11【安德山池宴集】

褚遂良

伏枥丹霞外，遮园焕景舒。行云泛层阜，蔽月下清渠。
亭中奏赵瑟，席上舞燕裾。花落春莺晚，风光夏叶初。
良朋比兰蕙，雕藻迈琼琚。独有狂歌客，来承欢宴馀。

卷 33_12【安德山池宴集】

杨续

狭斜通凤阙，上路抵青楼。簪绂启宾馆，轩盖临御沟。
西城多妙舞，主第出名讴。列峰疑宿雾，疏壑拟藏舟。
花蝶辞风影，蘋藻含春流。酒阑高宴毕，自反山之幽。

· 全唐诗 ·

卷 33_13【游清都观寻沈道士得仙字】

刘孝孙

纷吾因暇豫，行乐极留连。寻真谒紫府，披雾觐青天。
缅怀金阙外，遐想玉京前。飞轩俯松柏，抗殿接云烟。
滔滔清夏景，嘒嘒早秋蝉。横琴对危石，酌醴临寒泉。
聊祛尘俗累，宁希龟鹤年。无劳生羽翼，自可狎神仙。

卷 33_14【早发成皋望河】

刘孝孙

清晨发岩邑，车马走轘辕。回瞰黄河上，恹恍屡飞魂。
鸿流遵积石，惊浪下龙门。仙槎不辨处，沉璧想犹存。
远近洲渚出，飒沓凫雁喧。怀古空延伫，叹逝将何言。

卷 33_15【游灵山寺】

刘孝孙

吾王游胜地，骖驾历祇园。临风画角愤，耀日采旗翻。
永怀筌了义，寂念启玄门。深溪穷地脉，高嶂接云根。
信美谐心赏，幽邃且攀援。曳裾欣扈从，方悟屏尘喧。

· 全唐诗 ·

卷 33_16【冬日宴于庶子宅各赋一字得鲜】

刘孝孙

解襟游胜地，披云促宴筵。清文振笔妙，高论写言泉。
冻柳含风落，寒梅照日鲜。骊歌虽欲奏，归驾且留连。

卷 33_17【送刘散员同赋陈思王诗游人久不归（一作贺朝或
贺朝清）】

刘孝孙

乡关渺天末，引领怅怀归。羁旅久淫滞，物色屡芳菲。
稍觉私意尽，行看蓬鬓衰。如何千里外，伫立沾裳衣。

卷 33_18【咏笛】

刘孝孙

凉秋夜笛鸣，流风韵九成。调高时慷慨，曲变或凄清。
征客怀离绪，邻人思旧情。幸以知音顾，千载有奇声。

· 全唐诗 ·

卷 33_19【赋得春莺送友人（又作贺朝诗）】

刘孝孙

流莺拂绣羽，二月上林期。待雪消金禁，衔花向玉墀。
翅掩飞燕舞，啼恼婕妤悲。料取金闺意，因君问所思。

卷 33_20【巫山高】

陆敬

巫岫郁岩峩，高高入紫霄。白云抱危石，玄猿挂迥条。
悬崖激巨浪，脆叶陨惊飙。别有阳台处，风雨共飘飘。

卷 33_21【游隋故都】

陆敬

洛城聊顾步，长想遂留连。水斗宫初毁，风变鼎将迁。
皋陶德不建，汾隅祀忽焉。宗祊旷无象，声朔缅谁传。
粉榆何冷落，禾黍郁芊绵。悲歌尽商颂，太息悯周篇。
来苏伫圣德，濡足乃乘干。正始淳风被，人劳用息肩。
舞象文思泽，偃伯武功宣。则百昌厥后，于万永斯年。
兹辰素商节，灰管变星躔。平原悴秋草，乔木敛寒烟。

· 全唐诗 ·

翻黄坠疏叶，凝翠积高天。参差海曲雁，寂寞柳门蝉。
兴悼今如此，悲愁复在旃。彷徨不忍去，杖策屡回遄。

卷 33_22【游清都观寻沈道士得都字】

陆敬

聊排灵琐闼，徐步入清都。青溪冥寂士，思玄徇道枢。
十芒生药笥，七焰发丹炉。缥帙桐君录，朱书王母符。
宫槐散绿穗，日槿落青柎。矫翰雷门鹤，飞来叶县凫。
凌风自可御，安事迫中区。方追羽化侣，从此得玄珠。

卷 33_23【七夕赋咏成篇】

陆敬

凤驾鸣鸾启阊阖，霓裳遥裔俨天津。五明霜纨开羽扇，
百和香车动画轮。婉娈夜分能几许，靓妆冶服为谁新。
片时欢娱自有极，已复长望隔年人。

卷 33_24【七夕赋咏成篇】

沈叔安

皎皎宵月丽秋光，耿耿天津横复长。停梭且复留残纬，

· 全唐诗 ·

拂镜及早更新妆。彩凤齐驾初成辇，雕鹊填河已作梁。
虽喜得同今夜枕，还愁重空明日床。

卷 33_25【七夕赋咏成篇】

何仲宣

日日思归勤理鬓，朝朝伫望懒调梭。凌风宝扇遥临月，
映水仙车远渡河。历历珠星疑拖佩，冉冉云衣似曳罗。
通宵道意终无尽，向晓离愁已复多。

卷 33_26【游清都观寻沈道士得芳字】

赵中虚

青溪阻千仞，姑射藐汾阳。未若游兹境，探玄众妙场。
鹤来疑羽客，云泛似霓裳。寓目虽灵宇，游神乃帝乡。
道存真理得，心灰俗累忘。烟霞凝抗殿，松桂肃长廊。
早蝉清暮响，崇兰散晚芳。即此翔寥廓，非复控榆枋。

卷 33_27【送刘散员赋得陈思王诗明月照高楼】

杨澹

高楼一何绮，素月复流明。重轩望不极，馀晖揽讵盈。

· 全唐诗 ·

镜华当牖照，钩影隔帘生。逆愁异尊酒，对此难为情。

· 全唐诗 ·

第三十四卷

卷 34_1 【陇头水】

杨师道

陇头秋月明，陇水带关城。笳添离别曲，风送断肠声。
映雪峰犹暗，乘冰马屡惊。雾中寒雁至，沙上转蓬轻。
天山传羽檄，汉地急征兵。阵开都护道，剑聚伏波营。
于兹觉无渡，方共濯胡缨。

卷 34_2 【中书寓直咏雨简褚起居上官学士】

杨师道

云暗苍龙阙，沉沉殊未开。窗临凤凰沼，飒飒雨声来。
电影入飞阁，风威凌吹台。长檐响奔溜，清簟肃浮埃。
早荷叶稍没，新篁枝半摧。兹晨怅多绪，怀友自难裁。
况复重城内，日暮独裴回。玉阶良史笔，金马谏天才。
高甍通散骑，复道驾蓬莱。思君赠桃李，于此冀琼瑰。

· 全唐诗 ·

卷 34_3【阙题】

杨师道

汉家伊洛九重城，御路浮桥万里平。桂户雕梁连绮翼，
虹梁绣柱映丹楹。朝光欲动千门曙，丽日初照百花明。
燕赵蛾眉旧倾国，楚宫腰细本传名。二月桑津期结伴，
三春淇水逐关情。兰丛有意飞双蝶，柳叶无趣隐啼莺。
扇里细妆将夜并，风前独舞共花荣。两鬟百万谁论价，
一笑千金判是轻。不为披图来侍寝，非因主第奉身迎。
羊车讵畏青门闭，兔月今宵照后庭。

卷 34_4【初秋夜坐应诏】

杨师道

玉琯凉初应，金壶夜渐阑。沧池流稍洁，仙掌露方清。
雁声风处断，树影月中寒。爽气长空净，高吟觉思宽。

卷 34_5【赋终南山用风字韵应诏】

杨师道

眷言怀隐逸，辍驾践幽丛。白云飞夏雨，碧岭横春虹。

· 全唐诗 ·

草绿长杨路，花疏五柞宫。登临日将晚，兰桂起香风。

卷 34_6【咏饮马应诏】

杨师道

清晨控龙马，弄影出花林。蹀躞依春涧，联翩度碧浔。
苔流染丝络，水洁写雕簪。一御瑶池驾，讵忆长城阴。

卷 34_7【初宵看婚】

杨师道

洛城花烛动，戚里画新蛾。隐扇羞应惯，含情愁已多。
轻啼湿红粉，微睇转横波。更笑巫山曲，空传暮雨过。

卷 34_8【侍宴赋得起坐弹鸣琴二首（一作杨希道诗）】

杨师道

北林鹊夜飞，南轩月初进。调弦发清征，荡心祛褊吝。
变作离鸿声，还入思归引。长叹未终极，秋风飘素鬓。

丝传园客意，曲奏楚妃情。罕有知音者，空劳流水声。

· 全唐诗 ·

卷 34_9【咏琴（一作杨希道诗）】

杨师道

久擅龙门质，孤竦峰阳名。齐娥初发弄，赵女正调声。
嘉客勿遽反，繁弦曲未成。

卷 34_10【咏笙（一作杨希道诗）】

杨师道

短长插凤翼，洪细摹鸾音。能令楚妃叹，复使荆王吟。
切切孤竹管，来应云和琴。

卷 34_11【应诏咏巢乌】

杨师道

桂树春晖满，巢乌刷羽仪。朝飞丽城上，夜宿碧林陲。
背风藏密叶，向日逐疏枝。仰德还能哺，依仁遂可窥。
惊鸣雕辇侧，王吉自相知。

· 全唐诗 ·

卷 34_12【奉和夏日晚景应诏】

杨师道

辇路夹垂杨，离宫通建章。日落横峰影，云归起夕凉。
雕轩动流吹，羽盖息回塘。荆草生还绿，残花落尚香。
青岩类姑射，碧涧似汾阳。幸属无为日，欢娱尚未央。

卷 34_13【奉和圣制春日望海】

杨师道

春山临渤海，征旅辍晨装。回瞰卢龙塞，斜瞻肃慎乡。
洪波回地轴，孤屿映云光。落日惊涛上，浮天骇浪长。
仙台隐螭驾，水府泛鼇梁。碣石朝烟灭，之罘归雁翔。
北巡非汉后，东幸异秦皇。擎旗羽林客，跋距少年场。
龙击驱辽水，鹏飞出带方。将举青丘缴，安访白霓裳。

卷 34_14【春朝闲步】

杨师道

休沐乘闲豫，清晨步北林。池塘藉芳草，兰芷袭幽衿。
雾中分晓日，花里弄春禽。野径香恒满，山阶笋屡侵。

· 全唐诗 ·

何须命轻盖，桃李自成阴。

卷 34_15【还山宅】

杨师道

暮春还旧岭，徙倚玩年华。芳草无行径，空山正落花。
垂藤扫幽石，卧柳碍浮槎。鸟散茅檐静，云披涧户斜。
依然此泉路，犹是昔烟霞。

卷 34_16【咏马】

杨师道

宝马权奇出未央，雕鞍照曜紫金装。春草初生驰上苑，
秋风欲动戏长杨。鸣珂屡度章台侧，细蹠经向濯龙傍。
徒令汉将连年去，宛城今已献名王。

卷 34_17【奉和咏弓】

杨师道

霜重麟胶劲，风高月影圆。乌飞随帝辇，雁落逐鸣弦。

· 全唐诗 ·

卷 34_18【咏砚】

杨师道

圆池类璧水，轻翰染烟华。将军欲定远，见弃不应赊。

卷 34_19【奉和正日临朝应诏】

杨师道

皇猷被寰宇，端扆属元辰。九重丽天邑，千门临上春。

卷 34_20【咏舞（一作杨希道诗）】

杨师道

二八如回雪，三春类早花。分行向烛转，一种逐风斜。

· 全唐诗 ·

第三十五卷

卷 35_1【奉和执契静三边应诏】

许敬宗

玄塞隔阴戎，朱光分昧谷。地游穷北际，云崖尽西陆。
星次绝轩台，风衢乖禹服。寰区无所外，天覆今咸育。
窜苗犹有孽，戮负自贻辜。疏网妖魍漏，盘藪怪禽逋。
髯飞尚假息，乳视暂稽诛。干灵振玉弩，神略运璇枢。
日羽廓游气，天阵清华野。升暉光西夜，驰恩溢东泻。
挥袂静昆炎，开关纳流赭。锦轺凌右地，华缨羁大夏。
清台映罗叶，玄沚控瑶池。驼鹿输珍贄，树羽飡来仪。
辍肴观化宇，栖籩萃条支。熏风交阊闕，就日泛蒙漪。
充庭延饮至，绚简敷春藻。迎姜已创图，命力方论道。
昔托游河乘，再备商山皓。欣逢德化流，思效登封草。

卷 35_2【奉和行经破薛举战地应制】

许敬宗

混元分大象，长策挫修鲸。于斯建宸极，由此创鸿名。

· 全唐诗 ·

一戎干宇泰，千祀德流清。垂衣凝庶绩，端拱铸群生。
重整瑶池驾，还临官渡营。周游寻曩迹，旷望动天情。
帷宫面丹浦，帐殿瞩宛城。虏场栖九穗，前歌被六英。
战地甘泉涌，阵处景云生。普天沾凯泽，相携欣颂平。

卷 35_3【奉和入潼关】

许敬宗

曦驭循黄道，星陈引翠旗。济潼纡万乘，临河耀六师。
前旌弥陆海，后骑发通伊。势逾回地轴，威盛转天机。
是节岁穷纪，关树荡凉飈。仙露含灵掌，瑞鼎照川湄。
冲襟赏临睨，高咏入京畿。

卷 35_4【奉和春日望海】

许敬宗

韩夷愆奉赆，凭险乱天常。乃神弘庙略，横海剪吞航。
电野清玄菟，腾笳振白狼。连云飞巨舰，编石架浮梁。
周游临大壑，降望极遐荒。桃门通山扞，蓬渚降霓裳。
惊涛含蜃阙，骇浪掩晨光。青丘绚春组，丹谷耀华桑。
长驱七萃卒，成功百战场。俄且旋戎路，饮至肃岩廊。

· 全唐诗 ·

卷 35_5【奉和元旦应制】

许敬宗

天正开初节，日观上重轮。百灵滋景祚，万玉庆惟新。
待旦敷玄造，韬旒御紫宸。武帐临光宅，文卫象钩陈。
广庭扬九奏，大帛丽三辰。发生同化育，播物体陶钧。
霜空澄晓气，霞景莹芳春。德辉覃率土，相贺奉还淳。

卷 35_6【奉和初春登楼即目应诏】

许敬宗

旭日临重壁，天眷极中京。春晖发芳甸，佳气满层城。
去鸟随看没，来云逐望生。歌里非烟飏，琴上凯风清。
文波浮镂槛，摘景焕雕楹。璇玑体宽政，隆栋象端衡。
创规虽有作，凝拱遂无营。沐恩空改鬓，将何谢夏成。

卷 35_7【奉和秋日即目应制】

许敬宗

玉露交珠网，金风度绮钱。昆明秋景淡，岐岫落霞然。
辞燕归寒海，来鸿出远天。叶动罗帷飏，花映绣裳鲜。

· 全唐诗 ·

规空升暗魄，笼野散轻烟。鹄度林光起，凫没水文圆。
无机络秋纬，如管奏寒蝉。乃眷情何极，宸襟豫有旃。

卷 35_8【奉和秋暮言志应制】

许敬宗

秋深桂初发，寒窗菊馀菲。波拥群凫至，秋飘朔雁归。
月荚生还落，云枝似复非。凝宸阅栖亩，观文伫少微。
圣敬韬前哲，先天谅不违。

卷 35_9【奉和喜雪应制】

许敬宗

灊州表奇贶，闕竹应遐巡。何如御京洛，流霰下天津。
忽若琼林曙，俄同李径春。姑峰映仙质，郢路杂歌尘。
伏槛观花瑞，称觞庆冬积。飘河共泻银，委树还重璧。
连山分掩翠，绵霄远韬碧。千里遍浮空，五轂咸沦迹。
机前辉裂素，池上伴凌波。腾华承玉宇，凝照混金娥。
是日松筠性，欣奉柏梁歌。

· 全唐诗 ·

卷 35_10【奉和登陕州城楼应制】

许敬宗

挹河澄绿宇，御沟映朱宫。辰旂翻丽景，星盖曳雕虹。
学嚙齐柳嫩，妍笑发春丛。锦鳞文碧浪，绣羽绚青空。
眷念三阶静，遥想二南风。

卷 35_11【游清都观寻沈道士得清字】

许敬宗

幽人蹈箕颍，方士访蓬瀛。岂若逢真气，齐契体无名。
既诠众妙理，聊畅远游情。纵心驰贝阙，怡神想玉京。
或命余杭酒，时听洛滨笙。风衢通阆苑，星使下层城。
蕙帐晨飙动，芝房夕露清。方叶栖迟趣，于此听钟声。

卷 35_12【奉和七夕宴悬圃应制二首】

许敬宗

牛闺临浅汉，鸾驷涉秋河。两怀萦别绪，一宿庆停梭。
星模铅里靨，月写黛中蛾。奈许今宵度，长婴离恨多。

· 全唐诗 ·

婺闺期今夕，蛾轮泛浅潢。迎秋伴暮雨，待暝合神光。
荐寝低云鬓，呈态解霓裳。喜中愁漏促，别后怨天长。

卷 35_13【奉和仪鸾殿早秋应制】

许敬宗

睿想追嘉豫，临轩御早秋。斜晖丽粉壁，清吹肃朱楼。
高殿凝阴满，雕窗艳曲流。小臣参广宴，大造谅难酬。

卷 35_14【奉和咏雨应诏】

许敬宗

舞商初赴节，湘燕远迎秋。飘丝交殿网，乱滴起池沍。
激溜分龙阙，斜飞洒凤楼。崇朝方浹宇，宸盼俯凝旒。

卷 35_15【奉和过慈恩寺应制】

许敬宗

凤阙邻金地，龙旂拂宝台。云楣将叶并，风牖送花来。
月宫清晚桂，虹梁绚早梅。梵境留宸瞩，辋发丽天才。

· 全唐诗 ·

卷 35_16【冬日宴于庶子宅各赋一字得归】

许敬宗

倦游嗟落拓，短翮慕追飞。周醪忽同醉，牙弦乃共挥。
油云澹寒色，落景霭霜霏。累日方投分，兹夕谅无归。

卷 35_17【送刘散员同赋得陈思王诗山树郁苍苍】

许敬宗

乔木托危岫，积翠绕连冈。叶疏犹漏影，花少未流芳。
风来闻肃肃，雾罢见苍苍。此中钱行迈，不异上河梁。

卷 35_18【侍宴莎册宫应制得情字】

许敬宗

三星希曙景，万骑翊天行。葆羽翻风队，腾吹掩山楹。
暖日晨光浅，飞烟旦彩轻。塞寒桃变色，冰断箭流声。
渐奏长安道，神皋动睿情。

· 全唐诗 ·

卷 35_19【奉和过旧宅应制】

许敬宗

飞云临紫极，出震表青光。自尔家寰海，今兹返帝乡。
情深感代国，乐甚宴谯方。白水浮佳气，黄星聚太常。
岐凤鸣层阁，鸞雀贺雕梁。桂山犹总翠，蕙薄尚流芳。
攀鳞有遗皓，沐德抃称觴。

卷 35_20【奉和宴中山应制】

许敬宗

飞云旋碧海，解网宥青丘。养贤停八骏，观风驻五牛。
张乐临尧野，扬麾历舜州。中山献仙酤，赵媛发清讴。
塞门朱雁入，郊薮紫麟游。一举氛霓静，千龄德化流。

卷 35_21【奉和圣制登三台言志应制】

许敬宗

中天表云榭，载极耸昆楼。圣作规玄造，轩阿复聿修。
高门符令节，形胜总神州。企翼抃禽萃，飞甍燕雀游。
缀星罗百拱，缘汉转三休。旦云生玉帛，初月上银钩。

· 全唐诗 ·

妙管含秦凤，仙姿丽斗牛。形言防处逸，粹藻发嘉猷。
荷生无以谢，尽瘁竟何酬。

卷 35_22【安德山池宴集】

许敬宗

戚里欢娱地，园林瞩望新。山庭带芳杜，歌吹叶阳春。
台榭疑巫峡，荷蕖似洛滨。风花萦少女，虹梁聚美人。
宴游穷至乐，谈笑毕良辰。独叹高阳晚，归路不知津。

卷 35_23【奉和圣制送来济应制】

许敬宗

万乘腾镳警岐路，百壶供帐饯离宫。御沟分水声难绝，
广宴当歌曲易终。兴言共伤千里道，俯迹聊示五情同。
良哉既深留帝念，沃化方有赞天聪。

卷 35_24【七夕赋咏成篇】

许敬宗

一年抱怨嗟长别，七夕含态始言归。飘飘罗袜光天步，

· 全唐诗 ·

灼灼新妆鉴月辉。情催巧笑开星靥，不惜呈露解云衣。
所叹却随更漏尽，掩泣还弄昨宵机。

卷 35_25【拟江令于长安归扬州九日赋】

许敬宗

本逐征鸿去，还随落叶来。菊花应未满，请待诗人开。

卷 35_26【同前拟】

许敬宗

游人倦蓬转，乡思逐雁来。偏想临潭菊，芳蕊对谁开。

卷 35_27【和边城秋气早】

李义府

金微凝素节，玉律应清葭。边马秋声急，征鸿晓阵斜。
关树凋凉叶，塞草落寒花。雾暗长川景，云昏大漠沙。
溪深路难越，川平望超忽。极望断烟飘，遥落惊蓬没。
霜结龙城吹，水照龟林月。日色夏犹冷，霜华春未歇。
睿作高紫宸，分明映玄阙

· 全唐诗 ·

卷 35_28【招谕有怀赠同行人（一作李义诗）】

李义府

远游冒艰阻，深入劳存谕。春去辞国门，秋还在边戍。
轩车行未返，节序催难驻。陌上悲转蓬，园中想芳树。
蜀山自纷纠，岷水恒奔注。临泛多苦怀，登攀寡欢趣。
永夕飞淫雨，崇朝蒸毒雾。不求绥岭桃，宁美邛乡茹。
白狼行欲静，骢马何常驱。愿接貂旆尘，联翩东北鹜。

卷 35_29【宣正殿芝草】

李义府

明王敦孝感，宝殿秀灵芝。色带朝阳净，光涵雨露滋。
且标宣德重，更引国恩施。圣祚今无限，微臣乐未移。

卷 35_30【咏鹦鹉】

李义府

牵弋辞重海，触网去层峦。戢翼雕笼际，延思彩霞端。
慕侣朝声切，离群夜影寒。能言殊可贵，相助忆长安。

· 全唐诗 ·

卷 35_31 【在嵩州遥叙封禅】

李义府

天齐标巨镇，日观启崇期。嵒峤临渤澥，隐嶙控河沂。
眺迥分吴乘，凌高属汉祠。建岳诚为长，升功谅在兹。
帝猷符广运，玄范畅文思。飞声总地络，腾化抚干维。
瑞策开珍凤，祯图荐宝龟。创封超昔夏，修禅掩前姬。
东后方肆觐，西都导六师。肃驾移星苑，扬罕驭风司。
沸鼓喧平陆，凝跼静通逵。汶阳驰月羽，蒙阴警电麾。
岩花飘曙辇，峰叶荡春旗。石闾环藻卫，金坛映黼帷。
仙阶溢秘柜，灵检耀祥芝。张乐分韶濩，观礼纵华夷。
佳气浮丹谷，荣光泛绿坻。三始貽遐祝，万岁受重釐。
菲质陶恩奖，趋迹奉轩墀。触网沦幽裔，乘徼限明时。
周南昔已叹，邛西今复悲。

卷 35_32 【堂堂词二首（一作题美人）】

李义府

镂月成歌扇，裁云作舞衣。自怜回雪影，好取洛川归。

懒整鸳鸯被，羞褰玳瑁床。春风别有意，密处也寻香。

· 全唐诗 ·

卷 35_33【咏鸟】

李义府

日里飏朝彩，琴中伴夜啼。上林如许树，不借一枝栖。

· 全唐诗 ·

第三十六卷

卷 36_1 【从军行二首（一作拟古）】

虞世南

涂山烽候惊，弭节度龙城。冀马楼兰将，燕犀上谷兵。
剑寒花不落，弓晓月逾明。凜凜严霜节，冰壮黄河绝。
蔽日卷征蓬，浮天散飞雪。全兵值月满，精骑乘胶折。
结发早驱驰，辛苦事旌麾。马冻重关冷，轮摧九折危。
独有西山将，年年属数奇。

烽火发金微，连营出武威。孤城塞云起，绝阵虏尘飞。
侠客吸龙剑，恶少缦胡衣。朝摩骨都垒，夜解谷蠡围。
萧关远无极，蒲海广难依。沙磴离旌断，晴川候马归。
交河梁已毕，燕山旆欲挥。方知万里相，侯服见光辉。

卷 36_2 【拟饮马长城窟】

虞世南

驰马渡河干，流深马渡难。前逢锦车使，都护在楼兰。

· 全唐诗 ·

轻骑犹衔勒，疑兵尚解鞍。温池下绝涧，栈道接危峦。
拓地勋未赏，亡城律岂宽。有月关犹暗，经春陇尚寒。
云昏无复影，冰合不闻湍。怀君不可遇，聊持报一餐。

卷 36_3【出塞】

虞世南

上将三略远，元戎九命尊。缅怀古人节，思酬明主恩。
山西多勇气，塞北有游魂。扬桴上陇坂，勒骑下平原。
誓将绝沙漠，悠然去玉门。轻贳不遑舍，惊策骛戎轩。
凛凛边风急，萧萧征马烦。雪暗天山道，冰塞交河源。
雾锋黯无色，霜旗冻不翻。耿介倚长剑，日落风尘昏。

卷 36_4【结客少年场行】

虞世南

韩魏多奇节，倜傥遗声利。共矜然诺心，各负纵横志。
结交一言重，相期千里至。绿沉明月弦，金络浮云辔。
吹箫入吴市，击筑游燕肆。寻源博望侯，结客远相求。
少年怀一顾，长驱背陇头。焰焰戈霜动，耿耿剑虹浮。
天山冬夏雪，交河南北流。云起龙沙暗，木落雁门秋。
轻生殉知己，非是为身谋。

· 全唐诗 ·

卷 36_5【怨歌行】

虞世南

紫殿秋风冷，雕甍落日沉。裁纨凄断曲，织素别离心。
掖庭羞改画，长门不惜金。宠移恩稍薄，情疏恨转深。
香销翠羽帐，弦断凤凰琴。镜前红粉歇，阶上绿苔侵。
谁言掩歌扇，翻作白头吟。

卷 36_6【中妇织流黄】

虞世南

寒闺织素锦，含怨敛双蛾。综新交缕涩，经脆断丝多。
衣香逐举袖，钏动应鸣梭。还恐裁缝罢，无信达交河。

卷 36_7【门有车马客】

虞世南

陈遵重交结，田蚡擅豪华。曲台临上路，高轩抵狭斜。
赭汗千金马，绣轴五香车。白鹤随飞盖，朱鹭入鸣笳。
夏莲开剑水，春桃发绶花。高谈辩飞兔，摛藻握灵蛇。
逢恩出毛羽，失路委泥沙。暧暧风烟晚，路长归骑远。

· 全唐诗 ·

日斜青琐第，尘飞金谷苑。危弦促柱奏巴渝，
遗簪堕珥解罗襦。如何守直道，翻使谷名愚。

卷 36_8【飞来双白鹤】

虞世南

飞来双白鹤，奋翼远凌烟。俱栖集紫盖，一举背青田。
扬影过伊洛，流声入管弦。鸣群倒景外，刷羽阊风前。
映海疑浮雪，拂涧泻飞泉。燕雀宁知去，蜉蝣不识还。
何言别俦侣，从此间山川。顾步已相失，裴回各自怜。
危心犹警露，哀响讵闻天。无因振六翮，轻举复随仙。

卷 36_9【奉和幽山雨后应令】

虞世南

肃城邻上苑，黄山迩桂宫。雨歇连峰翠，烟开竟野通。
排虚翔戏鸟，跨水落长虹。日下林全暗，云收岭半空。
山泉鸣石涧，地籁响岩风。

· 全唐诗 ·

卷 36_10【赋得吴都】

虞世南

画野通淮泗，星躔应斗牛。玉牒宏图表，黄旗美气浮。
三分开霸业，万里宅神州。高台临茂苑，飞阁跨澄流。
江涛如素盖，海气似朱楼。吴趋自有乐，还似镜中游。

卷 36_11【赋得慎罚】

虞世南

帝图光往册，上德表鸿名。道冠二仪始，风高三代英。
乐和知化洽，讼息表刑清。罚轻犹在念，勿喜尚留情。
明慎全无枉，哀矜在好生。五疵过亦察，二辟理弥精。
幘巾示廉耻，嘉石务详平。每削繁苛性，常深恻隐诚。
政宽思济猛，疑罪必从轻。于张惩不滥，陈郭宪无倾。
刑措谅斯在，欢然仰颂声。

卷 36_12【奉和咏日午】

虞世南

高天净秋色，长汉转曦车。玉树阴初正，桐圭影未斜。

· 全唐诗 ·

翠盖飞圆彩，明镜发轻花。再中良表瑞，共仰璧晖赊。

卷 36_13【发营逢雨应诏】

虞世南

豫游欣胜地，皇泽乃先天。油云阴御道，膏雨润公田。
陇麦沾逾翠，山花湿更然。稼穡良所重，方复悦丰年。

卷 36_14【赋得临池竹应制】

虞世南

葱翠梢云质，垂彩映清池。波泛含风影，流摇防露枝。
龙鳞漾嶰谷，凤翅拂涟漪。欲识凌冬性，唯有岁寒知。

卷 36_15【侍宴应诏赋韵得前字】

虞世南

芬芳禁林晚，容与桂舟前。横空一鸟度，照水百花然。
绿野明斜日，青山澹晚烟。滥陪终宴赏，握管类窥天。

· 全唐诗 ·

卷 36_16【侍宴归雁堂】

虞世南

歌堂面渌水，舞馆接金塘。竹开霜后翠，梅动雪前香。
鳧归初命侣，雁起欲分行。刷羽同栖集，怀恩愧稻粱。

卷 36_17【凌晨早朝】

虞世南

万瓦宵光曙，重檐夕雾收。玉花停夜烛，金壶送晓筹。
日晖青琐殿，霞生结绮楼。重门应启路，通籍引王侯。

卷 36_18【奉和咏风应魏王教】

虞世南

逐舞飘轻袖，传歌共绕梁。动枝生乱影，吹花送远香。

· 全唐诗 ·

卷 36_19【初晴应教】

虞世南

初日明燕馆，新溜满梁池。归云半入岭，残滴尚悬枝。

卷 36_20【春夜】

虞世南

春苑月裴回，竹堂侵夜开。惊鸟排林度，风花隔水来。

卷 36_21【咏舞】

虞世南

繁弦奏绿水，长袖转回鸾。一双俱应节，还似镜中看。

卷 36_22【咏萤】

虞世南

的历流光小，飘飘弱翅轻。恐畏无人识，独自暗中明。

· 全唐诗 ·

卷 36_23【蝉】

虞世南

垂緌饮清露，流响出疏桐。居高声自远，非是藉秋风。

卷 36_24【秋雁（一作褚亮诗）】

虞世南

日暮霜风急，羽翮转难任。为有传书意，联翩入上林。

卷 36_25【奉和月夜观星应令】

虞世南

早秋炎景暮，初弦月彩新。清风涤暑气，零露净嚣尘。
薄雾销轻縠，鲜云卷夕鳞。休光灼前曜，瑞彩接重轮。
缘情摛圣藻，并作命徐陈。宿草诚渝滥，吹嘘偶仆绅。
天文岂易述，徒知仰北辰。

· 全唐诗 ·

卷 36_26 【和銮輿顿戏下（一作追从銮輿夕顿戏下应令）】

虞世南

重轮依紫极，前耀奉丹霄。天经恋宸扆，帝命扈仙镳。
乘星开鹤禁，带月下虹桥。银书含晓色，金辂转晨飙。
雾澈轩营近，尘暗苑城遥。莲花分秀萼，竹箭下惊潮。
抚己惭龙干，承恩集凤条。瑶山盛风乐，抽简荐徒谣。

卷 36_27 【奉和至寿春应令】

虞世南

瑶山盛风乐，南巡务逸游。如何事巡抚，民瘼谅斯求。
文鹤扬轻盖，苍龙饰桂舟。泛沫萦沙屿，寒澌拥急流。
路指八仙馆，途经百尺楼。眷言昔游践，回驾且淹留。
后车喧凤吹，前旌映彩旒。龙骖驻六马，飞阁上三休。
调谐金石奏，欢洽羽觞浮。天文徒可仰，何以厕琳球。

卷 36_28 【奉和幸江都应诏】

虞世南

南国行周化，稽山秘夏图。百王岂殊轨，千载协前谟。

· 全唐诗 ·

肆觐遵时豫，顺动悦来苏。安流进玉轴，戒道翼金吾。
龙旂焕辰象，凤吹溢川涂。封唐昔敷锡，分陕被荆吴。
沐道咸知让，慕义久成都。冬律初飞管，阳鸟正衔芦。
严飙肃林薄，暖景澹江湖。鸿私浹幽远，厚泽润凋枯。
虞琴起歌咏，汉筑动巴歊。多幸沾行苇，无庸类散樗。

卷 36_29【奉和献岁宴宫臣】

虞世南

履端初起节，长苑命高筵。肆夏喧金奏，重润响朱弦。
春光催柳色，日彩泛槐烟。微臣同滥吹，谬得仰钧天。

卷 36_30【奉和出颍至淮应令】

虞世南

良晨喜利涉，解缆入淮浔。寒流泛鹢首，霜吹响哀吟。
潜鳞波里跃，水鸟浪前沉。邗沟非复远，怅望悦宸襟。

卷 36_31【应诏嘲司花女】

虞世南

学画鸦黄半未成，垂肩弄袖太憨生。

· 全唐诗 ·

缘愁却得君王惜，长把花枝傍辇行。

第三十七卷

卷 37_1【古意六首】

王绩

幽人在何所，紫岩有仙躅。月下横宝琴，此外将安欲。
材抽峰山干，徽点昆丘玉。漆抱蛟龙唇，丝缠凤凰足。
前弹广陵罢，后以明光续。百金买一声，千金传一曲。
世无钟子期，谁知心所属。

竹生大夏溪，苍苍富奇质。绿叶吟风劲，翠茎犯霄密。
霜霰封其柯，鸂鶒食其实。宁知轩辕后，更有伶伦出。
刀斧俄见寻，根株坐相失。裁为十二管，吹作雄雌律。
有用虽自伤，无心复招疾。不如山上草，离离保终吉。

宝龟尺二寸，由来宅深水。浮游五湖内，宛转三江里。
何不深复深，轻然至溱洧。溱洧源流狭，春秋不濡轨。
渔人递往还，网罟相萦纆。一朝失运会，刳肠血流死。
丰骨输庙堂，鲜腴藉笾簋。弃置谁怨尤，自我招此否。
馀灵寄明卜，复来钦所履。

松生北岩下，由来人径绝。布叶捎云烟，插根拥岩穴。

· 全唐诗 ·

自言生得地，独负凌云洁。何时畏斤斧，几度经霜雪。
风惊西北枝，雹陨东南节。不知岁月久，稍觉枝干折。
藤萝上下碎，枝干纵横裂。行当糜烂尽，坐共灰尘灭。
宁关匠石顾，岂为王孙折。盛衰自有时，圣贤未尝屑。
寄言悠悠者，无为嗟大耋。

桂树何苍苍，秋来花更芳。自言岁寒性，不知露与霜。
幽人重其德，徙植临前堂。连拳八九树，偃蹇二三行。
枝枝自相纠，叶叶还相当。去来双鸿鹄，栖息两鸳鸯。
荣荫诚不厚，斤斧亦勿伤。赤心许君时，此意那可忘。
彩凤欲将归，提罗出郊访。罗张大泽已，凤入重云飏。
朝栖昆阆木，夕饮蓬壶涨。问凤那远飞，贤君坐相望。
凤言荷深德，微禽安足尚。但使雏卵全，无令矰缴放。
皇臣力牧举，帝乐箫韶畅。自有来巢时，明年阿阁上。

卷 37_2 【石竹咏】

王绩

萋萋结绿枝，晔晔垂朱英。常恐零露降，不得全其生。
叹息聊自思，此生岂我情。昔我未生时，谁者令我萌。
弃置勿重陈，委化何足惊。

· 全唐诗 ·

卷 37_3【田家三首（一作王勃诗）】

王绩

阮籍生涯懒，嵇康意气疏。相逢一醉饱，独坐数行书。
小池聊养鹤，闲田且牧猪。草生元亮径，花暗子云居。
倚床看妇织，登垄课儿锄。回头寻仙事，并是一空虚。

家住箕山下，门枕颍川滨。不知今有汉，唯言昔避秦。
琴伴前庭月，酒劝后园春。自得中林士，何忝上皇人。

平生唯酒乐，作性不能无。朝朝访乡里，夜夜遣人酤。
家贫留客久，不暇道精粗。抽帘持益炬，拔簍更燃炉。
恒闻饮不足，何见有残壶。

卷 37_4【赠李征君大寿】

王绩

孔淳辞散骑，陆昶谢中郎。幅巾朝帝罢，杖策去官忙。
附车还赵郡，乘船向武昌。九征书未已，十辟誉弥彰。
副君迎绮季，天子送严光。灞陵幽径近，磻溪隐路长。
编蓬还作室，绩草更为裳。会稽置樵处，兰陵卖药行。
看书惟道德，开教止农桑。别有幽怀侣，由来高让王。
前年辞厚币，今岁返寒乡。有书横石架，无毡坐土床。

· 全唐诗 ·

兰英犹足酿，竹实本无粮。涧松寒转直，山菊秋自香。
管宁存祭礼，王霸重朝章。去去相随去，披裘骄盛唐。

卷 37_5【山中叙志】

王绩

物外知何事，山中无所有。风鸣静夜琴，月照芳春酒。
直置百年内，谁论千载后。张奉娉贤妻，老莱藉嘉偶。
孟光傥未嫁，梁鸿正须妇。

卷 37_6【赠梁公】

王绩

我欲图世乐，斯乐难可常。位大招讥嫌，禄极生祸殃。
圣莫若周公，忠岂逾霍光。成王已兴诮，宣帝如负芒。
范蠡何智哉，单舟戒轻装。疏广岂不怀，策杖还故乡。
朱门虽足悦，赤族亦可伤。履霜成坚冰，知足胜不祥。
我今穷家子，自言此见长。功成皆能退，在昔谁灭亡。

· 全唐诗 ·

卷 37_7【薛记室收过庄见寻率题古意以赠】

王绩

伊昔逢丧乱，历数闰当馀。豺狼塞衢路，桑梓成丘墟。
余及尔皆亡，东西各异居。尔为背风鸟，我为涸辙鱼。
逮承云雷后，欣逢天地初。东川聊下钓，南亩试挥锄。
资税幸不及，伏腊常有储。散诞时须酒，萧条懒向书。
朽木不可雕，短翮将焉摅。故人有深契，过我蓬蒿庐。
曳裾出门迎，握手登前除。相看非旧颜，忽若形骸疏。
追道宿昔事，切切心相于。忆我少年时，携手游东渠。
梅李夹两岸，花枝何扶疏。同志亦不多，西庄有姚徐。
尝爱陶渊明，酌醴焚枯鱼。尝学公孙弘，策杖牧群猪。
追念甫如昨，奄忽成空虚。人生讵能几，岁岁常不舒。
赖有北山僧，教我以真如。使我视听遣，自觉尘累祛。
何事须筌蹄，今已得兔鱼。旧游傥多暇，同此释纷拿。

卷 37_8【晚年叙志示翟处士】

王绩

弱龄慕奇调，无事不兼修。望气登重阁，占星上小楼。
明经思待诏，学剑觅封侯。弃繻频北上，怀刺几西游。
中年逢丧乱，非复昔追求。失路青门隐，藏名白社游。
风云私所爱，屠博暗为俦。解纷曾霸越，释难颇存周。

· 全唐诗 ·

晚岁聊长想，生涯太若浮。归来南亩上，更坐北溪头。
古岸多盘石，春泉足细流。东隅诚已谢，西景惧难收。
无谓退耕近，伏念已经秋。庚桑逢处跪，陶潜见人羞。
三晨宁举火，五月镇披裘。自有居常乐，谁知身世忧。

卷 37_9【春日（一作初春）】

王绩

前旦出园游，林华都未有。今朝下堂来，池冰开已久。
雪被南轩梅，风催北庭柳。遥呼灶前妾，却报机中妇。
年光恰恰来，满瓮营春酒。

卷 37_10【采药】

王绩

野情贪药饵，郊居倦蓬茆。青龙护道符，白犬游仙术。
腰镰戊己月，负锺庚辛日。时时断嶂遮，往往孤峰出。
行披葛仙经，坐检神农帙。龟蛇采二苓，赤白寻双术。
地冻根难尽，丛枯苗易失。从容肉作名，薯蕷膏成质。
家丰松叶酒，器贮参花蜜。且复归去来，刀圭辅衰疾。

· 全唐诗 ·

卷 37_11【在京思故园见乡人问】

王绩

旅泊多年岁，老去不知回。忽逢门前客，道发故乡来。
敛眉俱握手，破涕共衔杯。殷勤访朋旧，屈曲问童孩。
衰宗多弟侄，若个赏池台。旧园今在否，新树也应栽。
柳行疏密布，茅斋宽窄裁。经移何处竹，别种几株梅。
渠当无绝水，石计总生苔。院果谁先熟，林花那后开。
羁心只欲问，为报不须猜。行当驱下泽，去剪故园莱。

卷 37_12【春桂问答二首】

王绩

问春桂，桃李正芬华。年光随处满，何事独无花。

春桂答，春华讵能久。风霜摇落时，独秀君知不。

卷 37_13【北山】

王绩

旧知山里绝氛埃，登高日暮心悠哉。子平一去何时返，

· 全唐诗 ·

仲叔长游遂不来。幽兰独夜清琴曲，桂树凌云浊酒杯。
槁项同枯木，丹心等死灰。

卷 37_14【野望】

王绩

东皋薄暮望，徙倚欲何依。树树皆秋色，山山唯落晖。
牧人驱犊返，猎马带禽归。相顾无相识，长歌怀采薇。

卷 37_15【赠程处士】

王绩

百年长扰扰，万事悉悠悠。日光随意落，河水任情流。
礼乐囚姬旦，诗书缚孔丘。不如高枕枕，时取醉消愁。

卷 37_16【九月九日赠崔使君善为】

王绩

野人迷节候，端坐隔尘埃。忽见黄花吐，方知素节回。
映岩千段发，临浦万株开。香气徒盈把，无人送酒来。

· 全唐诗 ·

卷 37_17【独坐】

王绩

问君樽酒外，独坐更何须。有客谈名理，无人索地租。
三男婚令族，五女嫁贤夫。百年随分了，未羡陟方壶。

卷 37_18【游仙四首】

王绩

暂出东陂路，过访北岩前。蔡经新学道，王烈旧成仙。
驾鹤来无日，乘龙去几年。三山银作地，八洞玉为天。
金精飞欲尽，石髓溜应坚。自悲生世促，无暇待桑田。

上月芝兰径，中岩紫翠房。金壶新练乳，玉釜始煎香。
六局黄公术，三门赤帝方。吹沙聊作鸟，动石试为羊。
缙氏还程促，瀛洲会日长。谁知北岩下，延首咏霓裳。

结衣寻野路，负杖入山门。道士言无宅，仙人更有村。
斜溪横桂渚，小径入桃源。玉床尘稍冷，金炉火尚温。
心疑游北极，望似陟西昆。逆愁归旧里，萧条访子孙。

真经知那是，仙骨定何为。许迈心长切，嵇康命似奇。
桑疏金阙迥，苔重石梁危。照水然犀角，游山费虎皮。

· 全唐诗 ·

鸭桃闻已种，龙竹未经骑。为向天仙道，栖遑君讵知。

卷 37_19【策杖寻隐士】

王绩

策杖寻隐士，行行路渐赊。石梁横涧断，土室映山斜。
孝然纵有舍，威辇遂无家。置酒烧枯叶，披书坐落花。
新垂滋水钓，旧结茂陵置。岁岁长如此，方知轻世华。

卷 37_20【赠学仙者】

王绩

采药层城远，寻师海路赊。玉壶横日月，金阙断烟霞。
仙人何处去，道士未还家。谁知彭泽意，更觅步兵那。
春酿煎松叶，秋杯浸菊花。相逢宁可醉，定不学丹砂。

卷 37_21【黄颊山】

王绩

别有青溪道，斜亘碧岩隈。崩榛横古蔓，荒石拥寒苔。
野心长寂寞，山径本幽回。步步攀藤上，朝朝负药来。
几看松叶秀，频值菊花开。无人堪作伴，岁晚独悠哉。

· 全唐诗 ·

卷 37_22【建德破后入长安咏秋蓬示辛学士】

王绩

遇坎聊知止，逢风或未归。孤根何处断，轻叶强能飞。

卷 37_23【过酒家五首（一作题酒店壁）】

王绩

洛阳无大宅，长安乏主人。黄金销未尽，只为酒家贫。

此日长昏饮，非关养性灵。眼看人尽醉，何忍独为醒。

竹叶连糟翠，蒲萄带曲红。相逢不令尽，别后为谁空。

对酒但知饮，逢人莫强牵。倚炉便得睡，横瓮足堪眠。

有客须教饮，无钱可别沽。来时长道赏，惭愧酒家胡。

卷 37_24【夜还东溪】

王绩

石苔应可践，丛枝幸易攀。青溪归路直，乘月夜歌还。

· 全唐诗 ·

卷 37_25【山中别李处士】

王绩

为向东溪道，人来路渐赊。山中春酒熟，何处得停家。

卷 37_26【初春】

王绩

春来日渐长，醉客喜年光。稍觉池亭好，偏宜酒瓮香。

卷 37_27【醉后】

王绩

阮籍醒时少，陶潜醉日多。百年何足度，乘兴且长歌。

卷 37_28【题酒店壁】

王绩

昨夜瓶始尽，今朝瓮即开。梦中占梦罢，还向酒家来。

· 全唐诗 ·

卷 37_29【戏题卜铺壁】

王绩

旦逐刘伶去，宵随毕卓眠。不应长卖卜，须得杖头钱。

卷 37_30【尝春酒】

王绩

野觞浮郑酌，山酒漉陶巾。但令千日醉，何惜两三春。

卷 37_31【独酌】

王绩

浮生知几日，无状逐空名。不如多酿酒，时向竹林倾。

卷 37_32【秋夜喜遇王处士】

王绩

北场芸藿罢，东皋刈黍归。相逢秋月满，更值夜萤飞。

· 全唐诗 ·

卷 37_33【山夜调琴】

王绩

促轸乘明月，抽弦对白云。从来山水韵，不使俗人闻。

卷 37_34【看酿酒】

王绩

六月调神曲，正朝汲美泉。从来作春酒，未省不经年。

卷 37_35【食后】

王绩

田家无所有，晚食遂为常。菜剪三秋绿，飧炊百日黄。
胡麻山麴样，楚豆野麋方。始暴松皮脯，新添杜若浆。
葛花消酒毒，莢蒂发羹香。鼓腹聊乘兴，宁知逢世昌。

卷 37_36【过汉故城】

王绩

大汉昔未定，强秦犹擅场。中原逐鹿罢，高祖郁龙骧。

· 全唐诗 ·

经始谋帝坐，兹焉壮未央。规模穷栋宇，表里浚城隍。
群后崇长乐，中朝增建章。钩陈被兰锜，乐府奏芝房。
翡翠明珠帐，鸳鸯白玉堂。清晨宝鼎食，闲夜郁金香。
天马来东道，佳人倾北方。何其赫隆盛，自谓保灵长。
历数有时尽，哀平嗟不昌。冰坚成巨猾，火德遂颓纲。
奥位匪虚校，贪天竟速亡。魂神吁社稷，豺虎斗岩廊。
金狄移灞岸，铜盘向洛阳。君王无处所，年代几荒凉。
宫阙谁家域，蓁芜冒我裳。井田唯有草，海水变为桑。
在昔高门内，于今岐路傍。馀基不可识，古墓列成行。
狐兔惊魍魎，鸱鸢吓狙狂。空城寒日晚，平野暮云黄。
烈烈焚青棘，萧萧吹白杨。千秋并万岁，空使咏歌伤。

卷 37_37 【益州城西张超亭观妓（一作卢照邻诗，一作王绩诗）】

王绩

落日明歌席，行云逐舞人。江南飞暮雨，梁上下轻尘。
冶服看疑画，妆台望似春。高车勿遽返，长袖欲相亲。

卷 37_38 【咏妓（一作王绩诗）】

王绩

妖姬饰靓妆，窈窕出兰房。日照当轩影，风吹满路香。

· 全唐诗 ·

早时歌扇薄，今日舞衫长。不应令曲误，持此试周郎。

卷 37_39【辛司法宅观妓（一作王绩诗）】

王绩

南国佳人至，北堂罗荐开。长裙随凤管，促柱送鸾杯。
云光身后荡，雪态掌中回。到愁金谷晚，不怪玉山颓。

卷 37_40【咏巫山】

王绩

电影江前落，雷声峡外长。雾云无处所，台馆晓苍苍。

卷 37_41【咏怀】

王绩

故乡行云是，虚室坐间同。日落西山暮，方知天下空。

· 全唐诗 ·

卷 37_42【句】

王绩

琴曲唯留古，书多半是经。（见《周氏涉笔》）

横裁桑节杖，直剪竹皮巾。鹤警琴亭夜，莺啼酒瓮春。
颜回唯乐道，原宪岂伤贫。（被召谢病，见《西清诗话》）

寄身千载下，聊游万物初。欲令无作有，翻觉实成虚。
（《独坐》）

双关防易断，只眼畏难全。鱼鳞张九拒，鹤翅拥三边。
（《围棋长篇》。见《韵语阳秋》）

· 全唐诗 ·

第三十八卷

卷 38_1 【咏舞】

萧德言

低身锵玉佩，举袖拂罗衣。对檐疑燕起，映雪似花飞。

卷 38_2 【过严君平古井】

郑世翼

严平本高尚，远蹈古人风。卖卜成都市，流名大汉中。
旧井改人世，寒泉久不通。年多既罢汲，无禽乃遂空。
如何属秋气，唯见落双桐。

卷 38_3 【登北邙还望京洛】

郑世翼

步登北邙坂，踟蹰聊写望。宛洛盛皇居，规模穷大壮。

· 全唐诗 ·

三河分设险，两嶠资巨防。飞观紫烟中，层台碧云上。
青槐夹驰道，迢迢修且旷。左右多第宅，参差居将相。
清晨谒帝返，车马相追访。胥徒各异流，文物纷殊状。
嚣尘暗天起，箫管从风飏。伊余孤且直，生平独沦丧。
山幽有桂丛，何为坐惆怅。

卷 38_4 【巫山高】

郑世翼

巫山凌太清，岧峣类削成。霏霏暮雨合，霭霭朝云生。
危峰入鸟道，深谷写猿声。别有幽栖客，淹留攀桂情。

卷 38_5 【看新婚】

郑世翼

初笄梦桃李，新妆应标梅。疑逐朝云去，翻随暮雨来。
杂佩含风响，丛花隔扇开。姮娥对此夕，何用久裴回。

卷 38_6 【见佳人负钱出路】

郑世翼

独负千金价，应从买笑来。只持难发口，经为几人开。

· 全唐诗 ·

卷 38_7【送金竟陵入蜀】

崔信明

金门去蜀道，玉垒望长安。岂言千里远，方寻九折难。
西上君飞盖，东归我挂冠。猿声出峡断，月彩落江寒。
从今与君别，花月几新残。

卷 38_8【句】

崔信明

枫落吴江冷。

卷 38_9【侍宴咏石榴】

孔绍安

可惜庭中树，移根逐汉臣。只为来时晚，花开不及春。

· 全唐诗 ·

卷 38_10【咏夭桃】

孔绍安

结叶还临影，飞香欲遍空。不意馀花落，翻沉露井中。

卷 38_11【赠蔡君】

孔绍安

畴昔同幽谷，伊尔迁乔木。赫奕盛青紫，讨论穷简牘。

卷 38_12【结客少年场行】

孔绍安

结客佩吴钩，横行度陇头。雁在弓前落，云从阵后浮。
吴师惊燧象，燕将警奔牛。转蓬飞不息，冰河结未流。
若使三边定，当封万户侯。

· 全唐诗 ·

卷 38_13【伤顾学士】

孔绍安

迢递双崕道，超忽三川湄。此中俱失路，思君不可思。
游人行变橘，逝者遽焚芝。忆昔江湖上，同咏子衿诗。
何言陵谷徙，翻惊邻笛悲。陈根非席卉，繡帐异书帷。
与善成空说，殀良信在兹。今日严夫子，哀命不哀时。

卷 38_14【别徐永元秀才】

孔绍安

金汤既失险，玉石乃同焚。坠叶还相覆，落羽更为群。
岂谓三秋节，重伤千里分。远离弦易转，幽咽水难闻。
欲识相思处，山川间白云。

卷 38_15【落叶（一作孔德绍诗）】

孔绍安

早秋惊落叶，飘零似客心。翻飞未肯下，犹言惜故林。

· 全唐诗 ·

卷 38_16【踏歌词三首】

谢偃

春景娇春台，新露泣新梅。春叶参差吐，新花重迭开。
花影飞莺去，歌声度鸟来。倩看飘飘雪，何如舞袖回。

逶迤度香阁，顾步出兰闺。欲绕鸳鸯殿，先过桃李蹊。
风带舒还卷，簪花举复低。欲问今宵乐，但听歌声齐。

夜久星沉没，更深月影斜。裙轻才动佩，鬟薄不胜花。
细风吹宝袂，轻露湿红纱。相看乐未已，兰灯照九华。

卷 38_17【乐府新歌应教】

谢偃

青楼绮阁已含春，凝妆艳粉复如神。细细轻裙全漏影，
离离薄扇讵障尘。樽中酒色恒宜满，曲里歌声不厌新。
紫燕欲飞先绕栋，黄莺始哢即娇人。撩乱垂丝昏柳陌，
参差浓叶暗桑津。上客莫畏斜光晚，自有西园明月轮。

· 全唐诗 ·

卷 38_18【奉和出颍至淮应令】

蔡允恭

久倦川涂曲，忽此望淮圻。波长泛淼淼，眺迥情依依。
稍觉金乌转，渐见锦帆稀。欲知仁化洽，讴歌满路归。

卷 38_19【和卫尉寺柳】

杜之松

汉将本屯营，辽河有戍城。大夫曾取姓，先生亦得名。
高枝拂远雁，疏影度遥星。不辞攀折苦，为入管弦声。

卷 38_20【答王无功冬夜载酒乡馆】

崔善为

颁条忝贵郡，悬榻久相望。处士同杨郑，邦君谢李疆。
讵知方拥彗，逢子敬惟桑。明朝蓬户侧，会自谒任棠。

· 全唐诗 ·

卷 38_21 【答王无功九日】

崔善为

秋来菊花气，深山客重寻。露叶疑涵玉，风花似散金。
摘来还泛酒，独坐即徐斟。王弘贪自醉，无复觅杨林。

卷 38_22 【答王无功问故园】

朱仲晦

我从铜州来，见子上京客。问我故乡事，慰子羁旅色。
子问我所知，我对子应识。朋游总强健，童稚各长成。
华宗盛文史，连墙富池亭。独子园最古，旧林间新垌。
柳行随堤势，茅斋看地形。竹从去年移，梅是今年荣。
渠水经夏响，石苔终岁青。院果早晚熟，林花先后明。
语罢相叹息，浩然起深情。归哉且五斗，饷子东皋耕。

卷 38_23 【从军行】

王宏

儿生三日掌上珠，燕颌猿肱秣李肤。十五学剑北击胡，
羌歌燕筑送城隅。城隅路接伊川驿，河阳渡头邯郸陌。

· 全唐诗 ·

可怜少年把手时，黄鸟双飞梨花白。秦王筑城三千里，
西自临洮东辽水。山边迭迭黑云飞，海畔萋萋青草死。
从来战斗不求勋，杀身为君君不闻。凤凰楼上吹急管，
落日裴回肠先断。

卷 38_24 【文德皇后挽歌】

朱子奢

神京背紫陌，缟骊结行轡。北去横桥道，西分清渭流。
寒光向垄没，霜气入松楸。今日泉台路，非是濯龙游。

卷 38_25 【大酺乐】

张文收

泪滴珠难尽，容残玉易销。倘随明月去，莫道梦魂遥。

卷 38_26 【与琳法师】

毛明素

冶长倦缧绁，韩安叹死灰。始验山中木，方知贵不材。

· 全唐诗 ·

第三十九卷

卷 39_1【上之回】

陈子良

承平重游乐，诏蹕上之回。属车响流水，清笳转落梅。
岭云盖道转，岩花映绶开。下辇便高宴，何如在瑶台。

卷 39_2【新成安乐宫（一作新宫词）】

陈子良

春色照兰宫，秦女坐窗中。柳叶来眉上，桃花落脸红。
拂尘开扇匣，卷帐却熏笼。衫薄偏憎日，裙轻更畏风。

卷 39_3【夏晚寻于政世置酒赋韵】

陈子良

聊从嘉遁所，酌醴共抽簪。以兹山水地，留连风月心。

· 全唐诗 ·

长榆落照尽，高柳暮蝉吟。一返桃源路，别后难追寻。

卷 39_4【入蜀秋夜宿江渚】

陈子良

我行逢日暮，弭棹独维舟。水雾一边起，风林两岸秋。
山阴黑断碛，月影素寒流。故乡千里外，何以慰羁愁。

卷 39_5【赋得妓】

陈子良

金谷多欢宴，佳丽正芳菲。流霞席上满，回雪掌中飞。
明月临歌扇，行云接舞衣。何必桃将李，别有待春晖。

卷 39_6【酬萧侍中春园听妓（一作李元操诗）】

陈子良

微雨散芳菲，中园照落晖。红树摇歌扇，绿珠飘舞衣。
繁弦调对酒，杂引动思归。愁人当此夕，羞见落花飞。

· 全唐诗 ·

卷 39_7【游侠篇（一作侠客行）】

陈子良

洛阳丽春色，游侠骋轻肥。水逐车轮转，尘随马足飞。
云影遥临盖，花气近熏衣。东郊斗鸡罢，南皮射雉归。
日暮河桥上，扬鞭惜晚晖。

卷 39_8【春晚看群公朝还人为八韵】

陈子良

游子惜春暮，策杖出蒿莱。正直康庄晚，群公谒帝回。
履度南宫至，车从北阙来。珂影傍明月，笳声动落梅。
迎风采旄转，照日绶花开。红尘掩鹤盖，翠柳拂龙媒。
绮云临舞阁，丹霞薄吹台。轻肥宁所羨，未若反山隈。

卷 39_9【赞德上越国公杨素】

陈子良

君侯称上宰，命世挺才英。本超骐驎足，复蕴风云情。
攄藻挾锦绮，育德润瑶琼。已踵四知举，非无三杰名。
济世同舟楫，匡政本阿衡。雍容入青琐，肃穆侍丹楹。

· 全唐诗 ·

桂宫擅鸣佩，槐路独飞纓。高门罗虎戟，绮阁丽雕甍。
金樽酌湛湛，歌扇掩盈盈。匈奴轶燕蓟，烽火照幽并。
天子命薄伐，受脤事专征。七德播雄略，十万骋行兵。
雁行蔽虏甸，鱼贯出长城。交河方饮马，瀚海盛扬旌。
拔剑倚天外，蒙犀辉日精。弯弧穿伏石，挥戈斩大鲸。
鼓鼙朝作气，刁斗夜偏鸣。六郡多壮士，三边岂足平。
岭云朝合阵，山月夜临营。胡尘暗马色，芳树动笳声。
关云未尽散，塞雾常自生。川长蔓草绿，峰迥杂花明。
小人愧王氏，雕文惭马卿。滥此叨书记，何以谢过荣。
高山徒仰止，终是恨才轻。

卷 39_10 【于塞北春日思归】

陈子良

我家吴会青山远，他乡关塞白云深。为许羁愁长下泪，
那堪春色更伤心。惊鸟屡飞恒失侣，落花一去不归林。
如何此日嗟迟暮，悲来还作白头吟。

卷 39_11 【送别】

陈子良

落叶聚还散，征禽去不归。以我穷途泣，沾君出塞衣。

· 全唐诗 ·

卷 39_12【七夕看新妇隔巷停车（一作陈伯材诗）】

陈子良

隔巷遥停幰，非复为来迟。只言更尚浅，未是渡河时。

卷 39_13【咏春雪（一作陈伯材诗）】

陈子良

光映妆楼月，花承歌扇风。欲妒梅将柳，故落早春中。

卷 39_14【骢马】

庾抱

枥上浮云骢，本出吴门中。发迹来东道，长鸣起北风。
回鞍拂桂白，赭汗类尘红。灭没徒留影，无因图汉宫。

卷 39_15【别蔡参军】

庾抱

人世多飘忽，沟水易东西。今日欢娱尽，何年风月同。

· 全唐诗 ·

悲生万里外，恨起一杯中。性灵如未失，南北有征鸿。

卷 39_16【赋得胥台露】

庾抱

胥台既落构，荆棘稍侵扉。栋拆连云影，梁摧照日晖。
翔鹞逐不及，巢燕反无归。唯有团阶露，承晓共沾衣。

卷 39_17【卧疴喜霁，开扉望月，简宫内知友】

庾抱

秋雨移弦望，疲疴倦苦辛。忽对荆山璧，委照越吟人。
高高侵地镜，皎皎彻天津。色丽班姬箴，光润洛川神。
轮辉池上动，桂影隙中新。怀贤虽不见，忽似暂参辰。

卷 39_18【和乐记室忆江水】

庾抱

遥想观涛处，犹意采莲歌。无因关塞叶，共下洞庭波。

· 全唐诗 ·

卷 39_19【凌朝浮江旅思（一作韦承庆诗）】

马周

太清上初日，春水送孤舟。山远疑无树，潮平似不流。
岸花开且落，江鸟没还浮。羁望伤千里，长歌遣四愁。

卷 39_20【句】

马周

何惜邓林树，不借一枝栖。（出《册府元龟》）

卷 39_21【出玉关】

来济

敛辔遵龙汉，衔凄渡玉关。今日流沙外，垂涕念生还。

卷 39_22【七夕】

张文恭

凤律惊秋气，龙梭静夜机。星桥百枝动，云路七香飞。

· 全唐诗 ·

映月回雕扇，凌霞曳绮衣。含情向华幄，流态入重闱。
欢馀夕漏尽，怨结晓骖归。谁念分河汉，还忆两心违。

卷 39_23【佳人照镜】

张文恭

倦采蘼芜叶，贪怜照胆明。两边俱拭泪，一处有啼声。

卷 39_24【奉和同太子监守违恋】

薛元超

储禁铜扉启，宸行玉轭遥。空怀寿街吏，尚隔寝门朝。
北首瞻龙戟，尘外想鸾镳。飞文映仙榜，沥思叶神飙。
帝念纡苍璧，干文焕紫霄。归塘横笔海，平圃振词条。
欲应重轮曲，锵洋韵九韶。

卷 39_25【答辨才探得招字】

萧翼

邂逅款良宵，殷勤荷胜招。弥天俄若旧，初地岂成遥。
酒蚁倾还泛，心猿躁似调。谁怜失群雁，长苦业风飘。

· 全唐诗 ·

卷 39_26 【道失】

欧阳询

已惑孔贵嫔，又被辞人侮。花笺一何荣，七字谁曾许。
不下结绮阁，空迷江令语。雕戈动地来，误杀陈后主。

卷 39_27 【巫山高（一作阎复本诗）】

阎立本

君不见巫山高半天起，绝壁千寻尽相似。
君不见巫山磕匝翠屏开，湘江碧水绕山来。
绿树春娇明月峡，红花朝覆白云台。台上朝云无定所，
此中窈窕神仙女。仙女盈盈仙骨飞，清容出没有光辉。
欲暮高唐行雨送，今宵定入荆王梦。荆王梦里爱秣华，
枕席初开红帐遮。可怜欲晓啼猿处，说道巫山是妾家。

卷 39_28 【同潘屯田冬日早朝】

张文琮

假寐怀古人，夙兴瞻晓月。通晨禁门启，冠盖趋朝谒。
霜霭清九衢，霞光照双阙。纷纶文物纪，灿烂声明发。

· 全唐诗 ·

腰剑动陆离，鸣玉和清越。

卷 39_29【蜀道难】

张文琮

梁山镇地险，积石阻云端。深谷下寥廓，层岩上郁盘。
飞梁架绝岭，栈道接危峦。揽辔独长息，方知斯路难。

卷 39_30【昭君怨】

张文琮

戒途飞万里，回首望三秦。忽见天山雪，还疑上苑春。
玉痕垂粉泪，罗袂拂胡尘。为得胡中曲，还悲远嫁人。

卷 39_31【咏水】

张文琮

标名资上善，流派表灵长。地图罗四渎，天文载五潢。
方流涵玉润，圆折动珠光。独有蒙园吏，栖偃玩濠梁。

· 全唐诗 ·

卷 39_32【赋桥】

张文琬

造舟浮谓日，鞭石表秦初。星文遥写汉，虹势尚凌虚。
已授文成履，空题武骑书。别有临濠上，栖偃独观鱼。

卷 39_33【和杨舍人咏中书省花树】

张文琬

花萼映芳丛，参差间早红。因风时落砌，杂雨乍浮空。
影照凤池水，香飘鸡树风。岂不爱攀折，希君怀袖中。

· 全唐诗 ·

第四十卷

卷 40_1 【奉和过旧宅应制】

上官仪

石关清晚夏，璇舆御早秋。神麾颺珠雨，仙吹响飞流。
沛水祥云泛，宛郊瑞气浮。大风迎汉筑，丛烟入舜球。
翠梧临凤邸，滋兰带鹤舟。偃伯歌玄化，扈跸颂王游。
遗簪谬昭奖，珥笔荷恩休。

卷 40_2 【早春桂林殿应诏】

上官仪

步辇出披香，清歌临太液。晓树流莺满，春堤芳草积。
风光翻露文，雪华上空碧。花蝶来未已，山光暖将夕。

· 全唐诗 ·

卷 40_3【安德山池宴集】

上官仪

上路抵平津，后堂罗荐陈。绡交开狎赏，丽席展芳辰。
密树风烟积，回塘荷芰新。雨霁虹桥晚，花落凤台春。
翠钗低舞席，文杏散歌尘。方惜流觞满，夕鸟已城闉。

卷 40_4【酬薛舍人万年宫晚景寓直怀友】

上官仪

奕奕九成台，窈窕绝尘埃。苍苍万年树，玲珑下冥雾。
池色摇晚空，岩花敛馀煦。清切丹禁静，浩荡文河注。
留连穷胜托，夙期睽善谑。东望安仁省，西临子云阁。
长啸披烟霞，高步寻兰若。金狄掩通门，雕鞍归骑喧。
燕姝对明月，荆艳促芳尊。别有青山路，策杖访王孙。

卷 40_5【奉和颍川公秋夜】

上官仪

沏寥空色远，芸黄凄序变。涸浦落遵鸿，长飙送巢燕。
千秋流夕景，万籁含宵唤。峻雉聆金柝，层台切银箭。

· 全唐诗 ·

卷 40_6【谢都督挽歌】

上官仪

漠漠佳城幽，苍苍松楸暮。鲁幕飘欲卷，宛驷悲还顾。
楚挽绕庐山，胡笳临武库。怅然郊原静，烟生归鸟度。

卷 40_7【八咏应制二首】

上官仪

启重帷，重帷照文杏。翡翠藻轻花，流苏媚浮影。
瑶笙燕始归，金堂露初晞。风随少女至，虹共美人归。
罗荐已擘鸳鸯被，绮衣复有蒲萄带。残红艳粉映帘中，
戏蝶流莺聚窗外。洛滨春雪回，巫峡暮云来。
雪花飘玉辇，云光上璧台。共待新妆出，清歌送落梅。

入丛台，丛台裊春露。滴沥间深红，参差散轻素。
妆蝶惊复聚，黄鹂飞且顾。攀折殊未已，复值惊飞起。
送影舞衫前，飘香歌扇里。望望惜春晖，行行犹未归。
暂得佳游趣，更愁花鸟稀。
且学鸟声调凤管，方移花影入鸳机。

· 全唐诗 ·

卷 40_8【和太尉戏赠高阳公】

上官仪

熏炉御史出神仙，云鞍羽盖下芝田。红尘正起浮桥路，
青楼遥敞御沟前。倾城比态芳菲节，绝世相娇是六年。
惯是洛滨要解佩，本是河间好数钱。翠钗照耀衔云发，
玉步逶迤动罗袜。石榴绞带轻花转，桃枝绿扇微风发。
无情拂袂欲留宾，讵恨深潭不可越。天津一别九秋长，
岂若随闻三日香。南国自然胜掌上，东家复是忆王昌。

卷 40_9【王昭君】

上官仪

玉关春色晚，金河路几千。琴悲桂条上，笛怨柳花前。
雾掩临妆月，风惊入鬓蝉。缄书待还使，泪尽白云天。

卷 40_10【咏雪应诏】

上官仪

禁园凝朔气，瑞雪掩晨曦。花明栖凤阁，珠散影娥池。
飘素迎歌上，翻光向舞移。幸因千里映，还绕万年枝。

· 全唐诗 ·

卷 40_11【奉和山夜临秋】

上官仪

殿帐清炎气，辇道含秋阴。凄风移汉筑，流水入虞琴。
云飞送断雁，月上净疏林。滴沥露枝响，空蒙烟壑深。

卷 40_12【江王太妃挽歌】

上官仪

黄鹤悲歌绝，椒花清颂馀。埃凝写邻镜，网结和扉鱼。
银消风烛尽，珠灭夜轮虚。别有南陵路，幽丛临叶疏。

卷 40_13【故北平公挽歌】

上官仪

木落园林旷，庭虚风露寒。北里清音绝，南陔芳草残。
远气犹标剑，浮云尚写冠。寂寂琴台晚，秋阴入井干。

· 全唐诗 ·

卷 40_14【高密长公主挽歌】

上官仪

湘渚韬灵迹，娥台静瑞音。凤逐清箫远，鸾随幽镜沉。
霜处华芙落，风前银烛侵。寂寞平阳宅，月冷洞房深。

卷 40_15【咏画障】

上官仪

芳晨丽日桃花浦，珠帘翠帐凤凰楼。蔡女菱歌移锦缆，
燕姬春望上琼钩。新妆漏影浮轻扇，冶袖飘香入浅流。
未减行雨荆台下，自比凌波洛浦游。

卷 40_16【奉和秋日即目应制】

上官仪

上苑通平乐，神池迓建章。楼台相掩映，城阙互相望。
缇油泛行幔，箫吹转浮梁。晚云含朔气，斜照荡秋光。
落叶飘蝉影，平流写雁行。槿散凌风缟，荷销裛露香。
仙歌临杵诣，玄豫历长杨。归路乘明月，千门开未央。

· 全唐诗 ·

卷 40_17【入朝洛堤步月】

上官仪

脉脉广川流，驱马历长洲。鹊飞山月曙，蝉噪野风秋。

卷 40_18【春日（一作元万顷诗）】

上官仪

花轻蝶乱仙人杏，叶密莺啼帝女桑。
飞云阁上春应至，明月楼中夜未央。

卷 40_19【从驾闾山咏马】

上官仪

桂香尘处减，练影月前空。定惑由关吏，徒嗟塞上翁。